




大豆

齊

野
史
著



集

天津
大公報社發行

著 史 野

說 小 篇 短

冊 一 全

行發館報公大津天 版再月九年二十二

短篇小說集目錄

頁

滇傲異聞一	一——一七
滇傲異聞二	一七——二六
太平天國逸事	二七——三四
蓬閣幻夢	三五——四九
荒郊夜聲	四九——五九
海外桃源	五九——六五
深山幻影	六六——七一
伊提國	七一——七七
故將軍語	七七——八六
坤維神話	八六——九三

目錄

一

137672

飛鳥冥迹	九四—一二二
王火夫	一一二—一二〇
珠蓮	一二〇—一二六
朱晏如	一二七—一三二
今縵	一三三—一四三
繡花針	一四三—一五一
杜文秀	一五一—一五八
阿耨達池	一五八—一六四
施生	一六四—一七一
十年一夢	一七一—一七八
東江外紀	一七八—一八五
粉侯遺事	一八五—一九一

弈	緣	一九一—一九八
疑	獄	一九八—二〇四
砵	虎符	二〇四—二一一
畫	裏恩仇	二一一—二一八
記	假皇帝案	二一八—二二三
一	片石	二二三—二三〇
探	茶女	二三〇—二三六
衡	山僧	二三六—二四六
棘	園遺話	二四六—二五一
榜	人女	二五一—二五八
兩	酒狂	二五八—二六二
田	間瑣憶	二六二—二六七

靈頭山道士	二六七—二七七
某侍御	二七八—二八二
相術偶談	二八二—二八六
何首烏	二八六—二九二
振武營	二九二—二九六
炎荒軼事	二九六—三〇六

短篇小說集

△滇傲異聞(一)

隴西周岱。家故寒微。早孤。母甘貧作苦。以長以教。十歲始就塾讀。生貌寢。又羸瘠骨立。塾中兒靡不狎侮。至用爲戲笑。生夷然若無忤。劬學弗輟。塾師故名諸生。循循善誘。三歲中業大進。已能操觚作今古體詩文。師有故交虞某。邑著紳也。嘗以詞林典學粵東。乞告終養。當時全國學差。粵東號第一。歲科兩試。所入棚規可二十萬。願學署吏役皆工弄法。典試者偶不慎。輒呈彈章。紳居任甫兩年。深懷止足之誠。即告休歸。優游林下。時與故人爲詩酒之歡。頗自得也。紳無子。有女曰湘。秀曼天然。性尤慧。年十二。書畫刺繡。已自工絕。紳夫婦鍾愛之。謂吾女天人。非第一才子不嫁也。一日塾師造紳齋。縱評邑中人物。因及諸後進。師謂門下有一周生者。今之富彥國張安道也。旋挾生所爲詩文示紳

○紳受之。置諸案頭。湘偶至齋中。檢而讀之。不覺拊掌傾嘆曰。天下奇才也。亟述於庭闈間。紳母某太夫人聞孫女言。意頗動。語紳夫婦。若既欲爲女得快婿。○此子果奇才。盍姑召來一試。胡竟淡然置之。紳曰兒有此心久矣。聞塾師言。彼家寒微。慮非吾匹。故遲遲未決。母曰。若第問人才如何耳。家世胡足計。王侯將相。寧皆有種。明日爲我語塾師。挈此生來。老身當自觀之。紳如言。越日。果以生見太夫人。太夫人視其容態安雅。音吐俊爽。嘆曰。此生器量淵宏。國士也。他日必達。惜骨相差異。恐多磨折。所謂大器晚成者耶。願吾孫宿命亦至奇特。是良耦也。紳夫婦以貌寢爲疑。母曰是格峻而神清。雖寢何害。男子娶婦猶尙德而後容。况于擇婿。紳意乃決。遂以塾師爲媒。定婚於周氏。越年。生年十六。以第一入泮。戚黨嘖嘖交譽。謂郎君今秋發解。來春必作狀頭。玉堂歸娶。占盡人間艷福矣。紳夫婦聞人稱羨其婿。亦自負爲能相攸。塾師更向人絮絮自述教誘之功。人亦以生故咸推其師。師益自喜。私念來歲吾塾生徒當倍今數矣。

獨太夫人與諸人異趣。周生方少。寧亟亟於功名。吾固謂其人大器晚成。縱青一衿。未必遂爲大魁之券。果明歲大魁者。乃益可感。譬如源泉未及盈科。遽爾奔放。且有枯竭之慮。孰若稍蓄其勢。積厚乃發也。願諸人方在慶中。聞此老人言。且其笑爲老諄。即生亦少年自負。私念昔人早達者多。於我胡獨疑慮。老人年事過深。恒多禁忌。殆無足怪。其秋遂赴秋闈。果以第六鄉薦。旣歸。入拜太夫人。太夫人曰。汝不能耐數年之沉寂。吾又奚說。今汝旣登科矣。來歲且勿應禮部之試。汝能稍遲數年。何患不大魁天下。豈必汲汲以第一爲榮。生唯唯。願心不謂然。以告其岳。岳謂吾母所見迂也。更以語其師。師謂此等事。彼婦人又安知之。明年生竟行。果登第。選爲庶常。乞假歸娶。紳已消吉爲女成禮之日。闔城傾動。謂爲歷年未有盛事。太夫人顧其孫女歎曰。命也。復何言。湘瞿然方欲有請而鼓樂已作。登輿遂行。新婚燕爾忘老人之言。不復置問矣。生旣娶。三年生一子。旋以庶常散館。授編修。遂迎母妻入京。衙值之暇。倡隨甚樂。生旣有時

名。喜談經濟。湘每以爲戒。謂君本文學待從之臣。值國家承平。能以所學自致通顯。黼黻聖謨足矣。何必效說士所爲。強與人軍國事。生不聽。會朝廷有緬甸之役。以議政大臣明瑞經理軍務。額爾登額爲參贊大臣。率兵同征緬。明公聞生名。奏請襄贊戎事。得旨允可。女勸生以母老爲辭。勿赴。生奮然曰。馬革裹屍。丈夫事也。卿爲我善事老母足矣。他可勿問。遂行。明公甚器之。累參機密。明公之捷於木邦也。諸將爭請乘勝深入。遂搗緬都阿瓦。生建言。我師轉戰千里。饋餉不繼。且蠻荒地勢。皆非所習。宜且屯兵。威服諸土司。因其糧而用其衆。則敵自困。否則宜亟促參贊率部前進。用爲聲援。若懸軍深入。脫有不利。必無完者。而諸將狃於屢勝。固請不已。且是時中朝用法嚴峻。稍或遲回。懼以逗遛見誅。遂留五千人守木邦。以萬二千人進攻。再破賊柵。賊列象以陣。官軍進蹂之。象皆反走。賊遂逃散。深入二千里。迷失道。糧且盡。賊屢由間道突襲。官軍雖連戰皆捷。願飢甚。勢不可久。日冀參贊赴援。乃查無消息。聞猛籠地方

有積粟。因移兵就食。行六十日乃達。獲倉穀二萬餘石。而賊已繞出官軍後。沿邊諸土司皆叛助賊。賊尋破木邦之師。歸路遂絕。生又建言。宜率精銳陷圍而出。明公謂吾自束髮用兵。未嘗見敵奔避。且所部萬數。吾若輕兵先退。是委餘粟於賊也。又豈仁人所爲。遂全師而行。賊不敢逼。而圍者益衆。且戰且近滇邊。至猛育。士卒飢憊。遂弗支。明公死焉。參佐皆不知下落。或傳生已死亂軍中。報至。朝旨厚卹其家。湘屢欲以身殉。念衰姑猶在。稚子未成。乃復強食。招魂成服。旣以長安不可久居。移家西返。紳夫婦見之皆哭。謂吾兩人不意乃見今日事也。入謁祖母。太夫人歎曰。吾言竟何如。雖然吾信周生無死理。汝兩人終有團圓之日。惜乎當年不耐沉寂。遂召今日之苦惱。抑人世苦樂相爲乘除。又安知他日無食甘之時。汝善自葆。毋戚戚。湘至是亦信老人有先見。唯唯聽命。其夕湘忽得一夢。夢見己身羣衣榆翟。侍從滿前。居然王后矣。方駭詫間。見周生盛飾而至。又儼然王也。乍見悲善。涕淫淫下。不自知。瞥眼間又覺身在曠野。羣

山合擁。流水迴環良苗懷新。隨風起伏。周生則負手行歌。意態甚適。山勢陡轉。突有巨靈伸掌如箕。攬周生以去。湘驚大呼而寤。天已曙矣。默揣所夢。莫審凶吉。以爲幻夢無憑。亦姑置之。越一年。生母以疾卒。湘喪葬如禮。既免喪。乃以兒屬母氏。言將出遊滇緬間。訪周生踪跡。紳夫婦皆誕之。謂若婿死亂軍中久矣。縱幸不死。蠻荒烟瘴。亦無全理。矧朝旨已以成仁賜卹。安能草間偷活。且以一女子奔馳數千里外。尤非所宜。吾兩人垂暮。僅此之點骨血。又安忍棄諸荒域。力阻不使行。聞於太夫人。太夫人力贊之。謂吾孫乃奇女子。惡可以常理相繩。吾料周生固未死。此行夫婦必能相見。天下至甘之境。恒從至苦中來。吾孫比年已嘗諸苦。宜有回甘之時。汝兩人宜聽其所爲。勿拘逼。祇致疾爲老人憂也。紳夫婦弗敢違。竟聽女行。湘遂自隴入蜀。崎嶇山野間。逾月至峨嵋。隨行兩老僕皆病。夜宿某蘭若。僧某故劇盜也。瞰湘美。欲犯之。湘已就寢。忽見白光如匹練自屋頂下射。一人詫曰。何物闇黎。敢犯人閨閣。旋聞有聲砰然墮地。光頓

歛。亟起啓關。門牡已脫。顧見有人赫然身首分矣。知不可留。匆匆奪門出。而僧徒已噪於庭。湘不及顧病僕。獨走山谷間。星月熹明。梟聲鈎磔。毛髮灑淅。然素性倔强。雖內怯猶自鎮定。遙見百餘步外。人影綽約。初疑爲暴客。已見其所行皆通路。若爲己前導者。姑隨之行。天明出山。已至平地。人影亦渺。終夜奔波憊甚。遂就村間稍憩。始得輿以行。晚至一村。天曠黑且雨。止於人家。有老人出迎曰。客得勿自峨眉來耶。聞昨日某寺大火。寺僧皆燼。客亦嘗聞之否。湘聞言。知兩僕必無幸。則大悲。顧不欲形諸詞色。亟歛容曰。吾叔安從聞之。老人踧踖曰。吾甥女新自峨眉來。爲老人述之。湘默然若有所思。忽聞笑聲發於堂側曰。佳客莅止。胡不我告。吾來晚矣。姊幸恕我。則二十齡女子也。周身被緇。頭帕作銀灰色。湘雖大詫。初無怖容。女亦笑曰。夜來得無受驚。吾姊臨事鎮定若此。洵巾幗鬚眉也。湘曰。謬承宏獎。非所克當。夜來蒙相救。此恩刻骨不忘。女曰。吾自爲此鄉除害耳。不以姊故也。敢煩見謝。於是兩人展席對坐。女

自言劉姓。名雪。幼從異人受劍術。能於十步外取人。湘曰世人傳劍俠能納劍於腹。吹氣成虹。其精者乘氣遠遊。瞬息千里。姊亦能之否。雪曰。此謬言耳。純剛所鍊。安能久藏腹中。體本至堅。安能化氣。大抵劍光盪決至速。則疑爲氣化。身手猱捷。則謂能遊行。世人少見多怪。傳述失真。往往如是。兩人遂縱談。湘自述身世。雪益慨歎。因言自此以南。萬山叢錯。瘴雨蠻風。恐非弱質所耐。姊果不見疑。願附伴偕行。當可效一臂之助。湘曰。昨夕山寺之火。吾僕燼矣。筲筲一身。自知弗達。願念昔人嘗以稚子萬里尋親。風霜跋涉。備嘗艱險。吾已三十人。寧不能此。詎女子材力果遜男子也耶。吾志既定。鼎鑊甘之。地獄赴之。世間凡百災難。安有足畏。不意乃得吾姊爲伴。天固哀吾志耶。吾行時。吾祖母嘗爲吾啓易卜之。謂西南得明吉也。今果信矣。姊能偕行。吾當摩頂以謝。安敢相疑。雪曰姊乃英毅如此。即不我許。吾亦必偕。吾自夕相隨。至今未嘗去左右也。時暮雨已霽。新月初上。老人謂村醪已熟。客姑小酌。湘自言戒飲。第索

飯充飢。雪則傾壺恣飲。朱顏微酡。老人頗健談。自言少壯時曾行商滇邊。年老以事付其子。退休山中。甥女雪。早喪父母。依己以長。故偕居於此。因詳述所經行程及士風甚悉。湘傾聽忘疲。明日雪遂偕行。謂其舅曰。甥此行必三月乃返。舅山居頗寂。蓋姑返城中也。老人曰。吾自能辦之。但三月爲期。無乃太促。語竟。闔門而入。湘乃行。雪騎而從。自是涉江入滇。復過昆明。經大理。所歷多山川之勝。二女殊無暇流連。途行月餘。幸皆安適。既至邊境。詢土人以途所出。皆盱眙相顧。又見二女同行。尤相詫爲異事。一日午後。二女方向宛頂而行。途過某銀坑。衆忽大集。二女不得進。衆中有手劍者。其魁也。呼曰。雛兒安往。吾爲此間之長。雖能事我。富貴且無極。吾家積金如山。蓄僕千數。王侯妃后。安足羨者。衆人噪而和之。皆曰。敬賀大王。一日乃得雙美。湘窘甚。軍不稍却。雪則大聲叱之曰。咄。蠢豕敢爾。吾滋不欲以豕血汚吾劍。不速退。吾刀立下矣。魁益跳跟。出惡語。且揮其徒速進。而劍光一瞥。魁頭已入雪手。曰。

汝曹敢進者。有如此豕。衆乃一闕而散。雪願謂湘曰。吾技幸足自衛。故能無恐。姊手不能縛雞。乃能鎮靜若此。邊人既憚二女。輒相與誇張其事。謂二人有神術。犯者且死。自是二女所經。土人趨承恐後。偶獲溫語。輒自引爲幸。謂神人眷我。吾福且無涯也。既過宛頂。道路益險惡。霧雨侵尋。湘亦病矣。困居谷中。土人進藥。湘弗敢飲。詭言吾病當自愈。不煩藥也。土人遽相語以爲神人示疾。特試吾曹。非真病也。雪日從土人問地方風物。因及明公死義事。土人動色。謂此公死後。橫屍山間。蠅蚋弗敢集。夜中人靜。猶聞鼓角之聲。殆天將臨凡者耶。公雖以戰死。緬人猶憚其神威。參佐被擒者皆禮遇有加。但求歸未得耳。雪喜以爲吾得周生消息矣。遽以告湘。且審周生狀貌。以問土人。湘聞參佐皆無恙。知己與周生且有相見之日。神志頓爽。病亦霍然。土人既審周生狀貌。皆曰吾所見諸俘中。似無此人。中有一人。新自緬南來。踏曰果如所言。似吾族之王也。仙人問此何爲。得勿吾王眷屬。雪以所聞甚誕。未敢以實告。乃曰吾有友人。

聞吾爲緬中之遊。託吾訪是人消息。此人何以爲汝族之長。曰此人初不知所自來。窮困無聊。以書干吾前王。王遽召見。一言合意。擢以爲相。相教前王。修定制度。營建城郭。設學校。講武備。一歲間。吾邦遂爲緬中望國。國人咸歸功於相。王自知才不及相。欲禪以位。相弗受。王遂棄位而逃。貽書國人。託國於相。吾來時相已正位矣。雪聞之。以告湘。湘詫曰。彼人乃竟於蠻荒稱王耶。殆土人之傳訛耳。雪曰。天下事往往有吾人夢想所不到者。矧以周君之才。安知不爲尉佗第二。又奚足疑。湘聞言。驟憶前事。念妖夢乃竟踐耶。果爾。則今雖雄長一國。終爲巨靈所擢。暫時富貴。胡足戀戀。默然無語者久之。雪未喻其意曰。汝已備嘗諸苦。今且甘回矣。胡轉戚戚。湘笑曰。勞人暫休。轉覺疲乏。吾亦如是。雪亦笑曰。更二十日吾事畢矣。萬里奔波。究竟所爲何事。吾亦自覺可笑。旣入緬地。二女咸易蠻裝。南行十餘日。至孟馬，遇邏者。覩兩人蹤跡。疑之曰。吾王近有令。凡殊俗入境者必詰所自來。此兩人不類緬產。得非從異邦來耶。

乃要諸路曰。若何之。曰。往孟馬。若何從來。曰。自猛育。若緬人耶。漢人耶。曰。緬人。若往孟馬何事。曰。訪親。所訪何人。於若何親。二女皆吃吃不能答。還者顧謂其曹曰。是必有異。以付司寇。二女方欲有言。而還者已擁之行。至一官署。一人南面坐。似問官者。詢二女姓氏國籍。皆以實對。其人曰甚善。汝兩人何事至此。各直言無隱。吾王對於過客。稽察雖嚴。絕無留難。矧汝兩人來自上國。果皆無他。王必優禮相待。湘乃以尋夫告。其人甚驚異曰。尊夫姓名爲何。年幾何矣。厥狀何若。女郎倘能相告。吾當爲汝覓之。且彼女何爲者。婢耶。湘亟曰吾友也。乃以周生姓名年歲狀貌語之。其人張目遽起。復坐。自言曰。吾王近嘗遣人往求故劍。得無黠者覬覦富貴。冒昧來此。姑待吾王自辨之耳。乃以二女入見。至宮門。宿衛者言。王方出獵。待夕乃返。於是寘二女於別館。馳騁往告王。生方合圍。有鳥五色。衝輿而起。扣弦發矢。鍛其羽。生得之。待者賀曰。是神鸞也。主和合之兆。王得無有戚屬南來者乎。生投弓笑曰。吾夜夢與

吾妻相見。詎吾使己至中土迎吾妻以來乎。抑何速也。語未終。騎至。生詫曰。事固有巧值若此者乎。吾妻孱弱質。胡以隻身走萬里外。且吾家非無戚屬。吾外家固邑中鉅室。詎無可使將送者。彼女又何人。非婢非僕。而曰吾友。天下乃有義俠若此人者。茲事果確。大可作小說資料矣。遂馳歸召見二女曰。江上數峰。湘曰未了也。生拊掌曰果吾妻。願謂雪曰。敬謝女郎。數千里關山。遠勞跋涉。俠膽仁心。吾乃不知所報。雪曰吾自愛吾姊。豈望報者。閒雲野鶴。自適吾性。今汝夫婦已得相見。吾無事矣。明日當告歸。湘聞言亟曰。姊無復爾。吾兩人數月來投分深契。安忍遽別。姊本閒身。何妨小住。雪曰汝試爲我思之。吾將何以自處。友耶。戚耶。明日汝正位中宮。宮禁森嚴。將安置此故交。吾苟不行。轉覺鬱鬱。吾志決矣。久留無益。徒自苦耳。吾兩人神交已久。詎在形骸相接。湘曰。姊姑爲我少留。且竭數日之歡。雪曰。稍留終別。何若弗留。凡事須有餘地乃佳。必欲盡歡。轉少味矣。湘知不可復挽。生亦無言。遂置酒宮中。留雪共

飲。雪縱飲自若。連舉二十餘觴。生覩其豔麗。意不能無動。以雪豪酒。轉爲所懾。雪亦微覺。酒酣拔劍出匣。顧湘曰。吾兩人此別。迢迢不可知。姊固慧人。當知世界富貴不啻幻夢。汝夫婦皆中土人。雖暫貴於此。寄耳。噫天下事何一非寄。縱汝兩人君臨四海。如彼十全天子所爲。百年而後。又將何若。吾醉矣。姑爲姊舞劍以娛此別。因起舞。劍光旋轉。燈燭皆若無色。俄聞晝然一聲如巨鳥振羽曰。吾去矣。姊自珍重。遂不見。簾幙微動而已。生及湘咸大驚。左右舌橋不能下。生曰。惜不早許其行。遂使決去若此。萬里長途。孤行無伴。脫有他虞。將何以對此友。湘曰。吾姊異人。寧須伴者。天已曙。朝臣咸集。請謁見王后。生納之。諸臣皆賀。生宴諸臣。諸臣得見王后。皆詫以爲天人。旣罷宴。入宮始作家人情話。生知老母已終。則大慟成服。越數月生所遣求故妻者歸。旣知王后已至。遂無他言。第謂世子育於虞氏。虞翁夫婦。護視甚謹。不得一見而已。自是生夫婦居蠻中二十七年。國旣大治。國人愛戴若父母。生亦間遣人與虞翁通消

息。紳夫婦知女已得所。且居然王后。亦頗自喜。太夫人年已耄矣。聞之。謂吾孫若壻固自不凡。等是富貴。勝於旅進旅退。伴食朝中多矣。一日生得紳書云。外孫已能讀書。取料第。秋試捷矣。春闈當得意也。以示湘。湘歎曰。知足不辱。知止不殆。雪姊臨別之言。未可忘也。汝在此邦名爲王。實則一小諸侯耳。奚足戀戀。今吾兒幸有成。可託門戶。吾兩人歸求山田。躬耕自適。以終餘年。奚不可者。生日。吾妻言當。吾以寒儒至此足矣。且非我族類。其心必異。乃以明日朝羣臣。言吾老矣。國事慮多闕失。當效前王故事。禪位於相。羣臣皆謂不可。相亦自矢弗受。國人聞者皆大集。乞留。生知不可去。許之。越數月。值國人慶節。於是生長此邦三十年矣。乃下令許國人大舖三日。國人大悅。朝臣稱慶後。各歸縱飲。宮中女侍亦各恣飲。及醉。生及湘先期謀附西洋市舶以行。是日闔城皆醉。生夙具書置几上。略謂年老思家。今當偕王后歸。此邦之事。以付吾相。相能正位甚善。否者由全邦耆老選賢任之。吾不復返矣。匆匆偕湘遂行。時宿

衛留者尙十數。願以王及后恒微行。不以爲異。且生所至處。國人愛戴。尤不虞有他。生亦告宿衛者。吾當出遊。一覘國人歡悅情狀。汝曹第謹視宮闕勿他出。皆唯唯。遂入市。市人方叫嘯狂飲。莫有覺者。生及女遂登舟沿怒江而下。越日早朝。王久不出。朝臣怪之。問諸衛士。衛士言狀。衆大驚。入宮求之。宮人大譁。則內寢空矣。几上有函。不署姓名。啓之即其王手詔也。出而讀之，衆皆默然無語。相雖遜謝。心實自喜。相以國無儲君。自擬爲王久矣。以生素得衆心。不敢作非分之舉。今王旣虛位。舍己安屬。乃言王旣遜國。不知所往。國家不可一日無君。宜集耆老決所從。吾自審非才。不敢闖干大位。朝臣聞相言。譁然和之。耆老旣集。皆言王旣禪位於相。相宜爲國負重，安得固辭。王詔吾曹選賢。吾曹細民所見安能及王。王旣以相爲賢。吾曹所選。寧能更賢於相。相必勿辭。相曰諸君旣不我贊。吾惟竭吾力爲國任事。以報前王而已。王位遂定。而生及湘遂返國。越三月始至家。紳母太夫人已前數月卒。生夫婦皆以祖母之禮喪之。生

子以名進士官京師。至京堂矣。聞生夫婦歸。乞假歸省。相見乃不相識。生及湘遂移居山中。課耕自遣。一日夫婦偕行田間。見閒雲舒卷。嘆曰三十年富貴亦猶此耳。遂終於山中。

●滇傲異聞二

明莊烈既殉國。福唐二王相繼立，皆不兩歲而敗。獨桂王崎嶇滇桂。歷十五年而後亡。固以地勢僻遠。抑亦人和故也。迄今滇邊故老。述永歷遺事。猶相與咨嗟太息。而桂家掌故尤邊人所樂道者也。相傳天啓中。蜀人有穆友芝者。世治儒業。生年始冠。已青其衿。見天下方亂。嘆曰。毛錐子竟何用哉。乃裹糧走數百里外。從人習技擊。凡十年。蜀中名師。從學者殆遍。遂以武顯。嘗於昏黑中以墨識桐葉。百步外彈之。無不中者。又嘗背風而行。髮植起不亂。城門有銅礮。十人弗能舉。生以手撮之。如揭槁木。鄉里子弟爭從之遊。一日。讀馬伏波列傳。忽若有感。乃曰。大丈夫不當如是耶。聞蜀西金沙江多砂金。可淘而得也。乃偕

其徒三人裹糧西行。行三日。叢山參錯。道奇險。多虎豹。同行者有難色。生願謂之曰。吾此行志在探險。不汲汲於攫金。諸君誠與我同志。甚善。否者吾弗敢強。三人中去者二人。餘一人獨留。曰。生死聽之先生。復前行三日。益荒僻。夜宿林間。虎狼嗥嘯。淒風四起。生夷然罔覺。其伴則終夜弗寧。次日。路益惡。風雨大至。避山洞中。天色陰晦。有雙燈如炬。向洞而來。其伴大駭。生堅謂勿動。物行且近。連發兩彈。燈頓熄。四山泅泅若驚濤。久之乃寂。明日二人出洞。西行六里許。有物橫山石間若橋。就視之。巨蟒也。長可百餘尺。腦流溢如漿。斃矣。途行十餘日。所見多異物。偶值村居。稍憩即挾糧以行。既至江畔。淘沙者凡十餘戶。積金甚多。遠賈求金者。相接於道。生嘆曰。金錢之力。乃能使人忘險，詎不偉耶。留三月。頗得金。鬻之。殊足自給。而其伴不耐久居。欲告歸。生亦察知其意。遣之。伴行凡三日。道斃於虎。生益單寂。沿江金戶。初以生有伴不敢犯。伴既去。乃謀略取生所得金。生念彼衆我寡。吾此來既不爲金。而

若曹恃此爲生。吾又何必與較。召諸金戶來。盡以金遺之。脫身西去。衆人稱嘆弗置。生遂西行。道迷失足墜深坑中。林菁叢雜。偶觸一物如綆。滑不留手。生意此殆竹木之屬。可緣以登也。乍攀之。物忽顛簸。生恐。攀益堅。頃之。物遂騰起。可數百丈。張目下視。但見所經之山。都如坵垤。所攀之物。鱗甲森然。其角。鬚鬚始知身所乘者龍也。顧已騰空高飛。則堅持不敢弛。冷風颯淅。血凍欲凝。久之。物似漸疲。忽見巨洞。洞口巨石巉巖。物向洞而飛。生自念此身一觸崖石。且化爲糜。將近洞口。竦體上騰。棲於樹間。遙見炊烟四起。若有居民。俄聞人語鎖雜。若可解。若不可解。乃自樹末作燕子勢。翩然遂止於地。觀者大集。或詢所自來。皆大驚曰。君殆神人耶。否者螿粉矣。於是相聚耳語。若有所商。頃之。環生而拜曰。神人幸憫吾曹。乞爲吾曹之長。吾曹皆中國人。流落異邦。以礦自活。不幸見凌他族。日遭侵剝。近更肆其無厭之求。欲舉吾人歷年所經營之礦山。悉歸彼有。嗟夫神人。試觀此數十里間。密如峰房之坑洞。皆吾

人祖若父挖掘而成者。其間冒風霧。披荆棘。驅猛獸。以生命血肉相搏。雖幸而獲利。所犧牲者亦已巨矣。今他族涎吾曹之利。以威相迫。吾曹欲抗則力不敵。聽之則心有未甘。且吾曹數世衣食於此。一旦失之。惟有餒死而已。今幸神人降臨。必有奇術。足拯吾曹。吾曹願奉神人爲長。幸神人許之。生曰。吾非神人。吾一書生耳。安有奇術。但此間何地。諸君居此者皆何爲。吾殊未解。衆中有老人進曰。吾儕失言。先生幸勿怪。此間爲滇邊一土司。屬緬甸宣慰司所轄。吾儕以有銀坑。相携來此。恃礦以食。聚族而處者。且三世矣。近者會長婪索不已。又欲乾沒吾礦。吾曹雖控訴弗獲理。且揚言將以明日遣兵來。吾曹聚謀抗拒未決。而先生適來。先生雖非神人。然隻身走數千里。虎豹毒蛇不能爲害。殆神使拯吾曹者耶。生曰。諸君皆吾同胞。乃橫遭異族摧殘。吾又安能坐視。吾力雖弱。視此曹若無物耳。雖然。諸君能否聽吾約束。衆皆曰能之。生乃檢礦戶之籍。凡三百六十餘戶。可得壯丁三百人。曰足矣。乃令三百人。各挾長棍以來。教之坐

作進退。半日。皆有法度。生曰。此足以自衛矣。吾人寄身異國。宜使人畏我。不宜使人恨我。明日合戰諸君但以棍蹶之。勿傷其人。我自有以處此。衆皆曰諾。明日。酋果以人來問諸礦戶。何時納礦。生面斥之曰。吾終歲勤勤。納稅未嘗衍期。何故乃索吾礦。將以吾人貴禮尙讓。視爲易欺耶。歸告汝酋。勿再騷擾。以激吾怒。吾且不復言禮讓矣。汝自計之。使者曰。汝何敢爾。吾酋且以兵來。悔之晚矣。生曰。聽汝。雖然吾礦不可得也。使者歸報。酋果以兵來。長矛耀日。可二百人。而生已列陣以待。酋見華人列隊相抗。已覺氣奪。生趨進曰。孰爲酋者。吾此山之長也。請與酋相見。酋被甲戴冑握長槊。怒馬而出。曰吾酋也。若何人。敢抗吾令。試觀吾槊銳否。生突前握其槊曰。此何足言槊。直兒童玩具耳。奪而折之。鐵碎如屑。酋大驚。而二百人者一闕遂進。三百人禦以棍。皆顛。再起再蹶。生語酋曰。酋聽之。吾人營礦於此。吾爲賃者。酋則主也。吾人爲酋闢此荒山。歲納鉅金。爲酋計亦得矣。酋必索歸。他日且復蕪廢。於酋又奚利

焉。今與會約。吾不負會租。會亦不索吾礦。或滄斯言。有如此鳥。適有飛鳥掠空而過。生一彈及之。墜地而死。會及其衆。皆大感服曰。君有此神技。乃不以一彈相加遺。爲德至矣。吾人何敢抗君。自今日以往。吾子子孫孫。不敢復言索礦事矣。下馬跪地爲誓。遂去。生乃集礦戶爲約束。使相友助。凡邊民有窮困來歸者。各視其才而用之。一歲中礦山大闢。流民益集。於是修墩堡。設學校。儼然一小邦矣。越數年。李定國兵敗。桂王入緬。生議遣人迎扈。而緬人已獻王於吳三桂。王尋見弑。諸臣或降或逃。其逃者皆歸於生。生一一闔室處之。於是益爲緬人所指目。有桂家銀坑之號矣。三桂旣弑桂王。清廷命鎮雲南。三桂陰有異志。生聞之。謂桂王諸舊臣曰。是可遊說。以圖興復也。衆謂彼於故君誼已絕矣。縱有異謀。且自爲耳。決無擁戴朱氏之理。生曰。天下無必不可爲之事。亦無必成之事。視吾力何如耳。是雖梟獍。然亦勢有以迫之。吾察其情。殆已中悔。是可得而利用也。且以吾所聞。其人初志特欲襲沐氏故事。以滇黔兩省爲已湯沐。而清

廷弗許。近日新主且有見疑之心。彼懼及直醜之禍。故陰圖不軌。誠能說以擁戴。事成而後仿沐氏先例。可得鐵券玉冊之賜。未必不爲吾用也。遂爲道士裝入昆明。設肆平西府側蓄佳釀。廉其價。府中衛士。多就飲焉。有王甲者。尤與生暱。盡以府中事語之。一日甲復就飲。生引入內室。置藥焉。甲醉弗能醒。生因竊其衣冠及腰牌。潛入府中。衆不知也。其夕。三桂與心腹飲於密室。盡屏侍從。生闌入室中。伏壁衣間。衆皆弗覺。酒三行。三桂因言朝中近有撤藩之議。此何名。撤藩。直驅吾曹於山海關外。豕圈之而待刀俎耳。吾嘗笑韓彭不善自謀。寧能躬蹈之者。一客曰。然則舉大事耳。以公才望。何患不濟。雖然師必有名。計將安出。一客曰。盍以興復爲名。近者閩南鄭氏。嘗以此爲號召。所至響應。人心固未忘明也。三桂未答。燭花驟爆。火光熾然。一客起曰。異哉。室中必有生人。秉燭大索。生伏不敢動。客指指曰。在是矣。遂發壁衣。生聳身一躍。自門掬出。甫登瓦。客略一揮手。生竟體若痿。頽然墜地。客曰。鼠輩敢爾。以手挈

之若提嬰兒。遂入室。三桂見生作道裝。頗異之。曰若猶未薙髮耶。生曰。吾大明臣子。寧能效汝曹側媚向人者。踪跡既露。生死惟命。勿多言。客搜生身。得彈丸一囊。曰汝亦解作石家彈法耶。生曰吾師固石姓。客曰。然則汝吾姪耳。汝亦嘗聞汝帥言鶴遊山人者耶。我是也。吾與汝亦可謂同門之誼。汝適從何來。意欲何爲。盡以語山人勿隱。汝能欺他人。不能欺山人。汝能以情語山人。山人當乞吾王貸汝一死。否者勿謂吾不念同門之誼也。生盡以告。且自述所志。以勸三桂。謂吾明本視滇黔爲藩服。不惜以畀功臣。王能以兵圖興復。分茅胙土。不足言也。三桂曰。汝言良是。吾雖居此。吾心未嘗一日忘本朝也。願朱氏子孫。孰可輔者。生曰永歷少子。猶在木邦。王欲迎奉。某能任之。三桂曰。汝既來。此。吾且夕舉義。需汝爲助。安可他往。汝以諸生而嫻武事。又敢入吾府中刺探秘密。膽略亦至可佩。吾誠愛汝。雖然吾不能使汝出吾府。願謂鶴遊山人曰。即以此生屬吾師。生乃隨山人出。其明日。酒肆門久不啓。鄰人疑有異。破門而入。

有人縊於床上。而道士涉矣。乃鳴於縣。縣官來檢驗。則勅死者。非縊也。衆疑道士與死者有仇。故引入內室謀而斃之。因棄肆潛逃。縣官據以定讞。聞於平西王府。府中知其事者。皆一笑置之。生自是居三桂府中。時爲規畫用兵方略。三桂亦深服之。第言及興復。輒顧而言他。生知其心已變。頗鬱鬱。然終爲所羈。不能去。未三月。而撤藩詔至。三桂得詔。碎而擲之。北向握拳大詈。即日舉兵。傳檄天下。以入清君側爲名。生亟入諫。謂清廷未有失德。若以此爲名。衆必不與。不如以興復號召天下。人心猶未忘明。且閩南鄭氏。方橫行海上。可用爲聲援也。三桂謂吾此次舉事。成敗未可知。萬一而敗。朱氏且無遺種。不如姑觀形勢。事若有成。再謀迎奉未晚也。生默然而退。反檄旣舉。各省皆響應。三桂欲東出湖南。以窺長江。順流東下。而清廷已以重兵扼荊州。生堅持初議。謂宜北出四川。與王輔臣合。遂取關中。以爲根本。鼓行而東。晉豫可定。天下大勢已得八九矣。三桂以西南諸省。爲己根據所在。幸而得志。固可進取中原。不幸

而敗。猶可割據自保。竟不聽。生偶以迎奉爲請。輒謂未可。自請當偏師之任。又弗許。生殊鬱鬱。但日與鶴遊談拳術。鶴游自言所習爲無極拳。能攝人於百步內外。又言以吾術卜之。平西當爲天子。但國祚弗久耳。未幾三桂果議尊號。生疾入諫。三桂謂此諸將意。吾不爲帝。衆且立散。生知不可回。憤然欲辭去。三桂不許。生憤極嘔血。病中嚙語。猶言興復事也。病亟。語鶴游曰。弟子自知不起。敢煩吾師馳書告桂家諸同志。勿壞吾約束也。吾始欲以桂家銀坑之力。招致天下豪士。陰圖恢復。顧念此策縱行。厥效甚緩。故自託於平西。冀得如伏波之於光武。言聽計從。庶幾猶及吾身。獲見漢官威儀。豈知困頓至此耶。雖然。此間氣象非佳。師固達人。宜可飄然去矣。鶴游曰。凡汝所言。吾盡知之。天命有在不可爲也。豈惟平西。即桂家亦安能久。生遂歿於軍中。未匝月三桂死。孫世璠立。鶴游逃去。桂家自生歿後。約束漸懈。緬人猶守信不相擾。而桂家人好與滇邊官吏往還。竟爲所魚肉。自是墟矣。

●太平天國逸事

太平之役。江浙諸州府悉歸洪氏。粵人莫承徽者。故世家子。隨宦杭州。城破爲洪軍所得。某王愛其穎秀。養以爲子。時方十歲耳。洪軍旣敗。自亂兵中逃歸。間關走數百里。道遇鄉人某君。詢其家世。承徽具述祖父科名及中式年分。則某君年家子也。送致其父。乃復故籍。以貲入官。至通判。罷歸。述生平所歷甚悉。云。某年月日。聞洪軍將至杭州。吾家方擬逃避。敵軍已迫。巡撫命閉城固守。而城中將士。咸驚怖無人色。勉強應命。歷二月。矢盡援絕。敵援堞登。衆大潰。城遂破。城中難民扶老携幼。絡繹出城。敵亦弗禁。吾時隨家人同行。昏黑中忽相失。乃大哭。適某將軍過吾旁聞之。挾吾於懷。餌以糖果。所以慰撫之者甚至。吾始聞人言長毛情狀。以爲皆兇暴如魔鬼。不意是人溫藹若此。不覺破涕爲笑。將軍乃以吾歸。頃之。聞王傳呼。將軍匆匆往。未久。忽以人來。命將吾往謁其王。吾詢來人。乃知此王軍令至嚴。部下不得私鹵財物。尤不得收藏人口。

故逃難之人咸聽其所往。吾事後又聞人言。杭城中出亡者皆客籍。土著者悉安堵無恐。唯駐防旗丁無遺種耳。吾既爲將軍所得。知吾爲粵人。又審爲官裔。乃曰。若異鄉客居。無從覓汝父母。盍姑從我。我旦夕需人給事左右應對進退。料無苦也。吾唯唯。將軍大喜。請命於王。王聞將軍譽吾敏慧。欲得一觀。故以人來召。吾意王統兵十萬。威武不可犯。頗惴惴。顧已無可如何。則隨來使偕入。王衣紺色袞袍。冠平天冠。躡朱履。坐高椅。將軍垂手旁侍。吾既入。將軍曰。王也。汝宜六叩首。吾如言。既起。王命吾前。吾始仰首視王。貌甚癯而溫婉。鬚眉美秀。兩目閃閃有神。乍見幾疑爲老書生也。王以手撫吾額。詢吾身世及所讀書。吾一一應之。王大喜。願語將軍。吾老無子。是兒頗穎慧。吾欲撫以爲嗣。汝意云何。將軍亟曰。是兒乃蒙吾王垂盼。是兒之福也。臣何敢言。王命侍者爲吾束髮加冠易赭黃袍。袍長乃不稱身。既改服出拜王。王居軍中。不蓄姬侍。乃選軍士秀者與吾偕處。諸將聞王新立世子皆入賀。城中居民爭獻其所有遺王世子。吾

數日間得珍玩至夥。盤盃盞蓋莫非金製。他精巧器物。皆鑲以寶石。吾驟見此。不禁目眩心迷。然數日後心乃漸厭。迴憶向時父母昆弟之愛。若覺有動於中。一日思及吾母。遂大哭。王聞吾哭。以責侍者。皆予杖五十。吾大驚爲止哭。是後吾稍不適。侍者輒環跪。乞世子見憐。謂世子再哭者。吾豈頭斷矣。吾乃不敢復哭。而心殊鬱鬱也。未幾王命吾從師學。師爲軍中記室。每日入授讀。執禮甚恭。吾心殊厭之。然不敢斥言。恐是人因且以獲罪也。吾屢欲出遊。侍者防制甚嚴。一舉一動。輒隨以叩首。吾真如入樊之鳥。視錦繡玉粒。皆刑械毒物也。吾爲王子且兩年。唯謁王時。猶覺有生人之樂。餘皆苦楚歲月耳。王愛吾洵深摯。但軍事方面。罕得相見。左右衛侍又拘牽禮節。吾竟不得盡情。乃知古人飭勿生帝王家者良有以也。未幾王移軍出江西。吾遂將從行。沿途所經。居民咸燈花奉送。王微笑頷之。吾私念幼時嘗聞人。長毛所至。村落雞犬無遺種。以今觀之。竟何如也。王自出行而後。軍次草草。儀衛稍缺。吾亦稍復自由。軍中無事。輒效

人投石超距爲戲。王以吾年漸長。護侍諸人。稍稍撤去。其留者頗能順適吾意。吾登山涉水。亦殊自得。不復作向日思家之念矣。吾從征已數年。一日過某邑。有兒年可十五六。哭於道。吾憫而問之。則避兵失路者也。自念彼人身世。乃與吾相類。蓋留爲吾伴。以告於王。王許之。是人吾滋不欲舉其姓氏。第審其名爲浮瑛而已。其人至溫婉。吾與處久之。未嘗見其有慍色。詢以家世。輒秘不吾告。吾亦不强詰也。居數月。瑛忽語吾。太平天國勢且敗。清兵已圍金陵。更分途規復蘇杭。吾人宜早爲計。居聞之。心頗恐。乘間以問吾王。王謂清兵圍金陵再矣。皆敗潰。何患焉。若年幼安知大事。且此言誰告若者。語時聲色俱厲。自吾事王以來。未嘗見王以如許聲色向人。吾乃大駭。枝梧其辭。王弗信。詰益急。遂以實告。王命人往召浮瑛。吾植立不敢動。有頃使者返。言瑛逃矣。王大懊喪。斥吾退。吾亟歸私室。抽屜中得緘。則瑛手書也。書言太平氣數已盡。吾與汝有宿世因緣。故來相就。冀脫汝於世。汝不吾信。又泄吾言。吾料彼曹方諱疾忌

醫。聞言必且切齒於吾。吾不能以汝之故。坐待脯醢。行矣。他日山中復相見也。○書法娟秀。頗類女郎。吾是時亦頗疑其人爲女子。恨不悉其蹤跡。竟無由追尋也。○自瑛行後。吾每謁王。王色殊不豫。吾意王始以瑛故有憾於吾。每見不敢久留。自是吾軍屢徙。吾頗以爲怪。然不敢復問於王。但侍御之士。日漸稀少。以爲王見吾年已長。無煩衛護也。○又數月軍行山中。天已昏黑。一將軍驟馬至吾前。將軍昔日得吾以獻於王者也。吾自入軍中。屢與將軍相見。渠雖以世子禮吾。吾仍以故人視之。是夕驟騎而至。遽牽吾裾。曰。吾師敗矣。王已帥兵南去。世子宜易服速逃。敵軍且四逼矣。因擲一衣畀吾。吾舉首四望。果見火光冲天。呼聲震野。急下馬易衣。越嶺而遁。追者益急。吾窮窘間。投山中團瓢自匿。天既曙。聲漸寂乃出。忽聞有人拊掌笑曰。來何晏也。顧視則亭亭玉立者瑛也。已易服爲女子矣。瑛言吾知汝必來。已預爲之備。乃出乾糲及刀梳。曰且飽此。乃蓬髮束辮。吾如言。既訖。瑛曰。此間難久居。可速行。復出黑鹽一包。曰此去不

可得食。飢時掬溪水和鹽飲之。可稍耐也。吾要瑛同行。瑛不可。曰宿緣已盡。相從轉各不利。吾固強之。晝然一聲。已失所在。吾木立者久之。遙見數十人奔驟而來。亟避匿及近觀之。則鄉人避難者也。衆謂吾人聞官兵且至。以爲皆伐罪弔民之師。寧食勞軍。不意見詆爲賊黨。恣其焚掠。吾曹之產蕩矣。不去且恐吾身及禍。吾亦自承爲避兵者。相偕北行。沿途村落皆墟。無可得食。掬溪水和鹽飲之。日僅再飲。幸方在盛年。不覺憊也。同行諸人。途中或轉死。或逃散。行三日。僅三人存耳。又兩日。兩人各往投其戚。吾乃踽踽獨行。次日午後。偶經某村。欲入行乞。村中已空無居人。返身欲出。忽遇軍隊盤詰甚嚴。吾語言稍失檢。隊長曰。必奸宄也。挾吾往見長官。吾懼甚。念此去必無幸。既至營門。矛戟森然。益膽落。隊長反縛吾手。繫馬樁上。入告長官。有頃傳呼以囚犯進。吾自知絕望。轉覺心神泰然。既至公案以前。左右大聲呼叱。吾弗爲動。官詢吾姓名籍貫甚悉。詰吾何爲獨行。吾具以告。官頗致疑訝。謂汝乃粵人。汝父何人。

汝祖何人。吾又具以告。官又詢吾祖父科名。何年中式。吾又具以告。官遽命釋縛。曰吾故人子也。是必無他。遂留吾夜飲。密室縱談。不覺吐實。其人大駭曰。吾始欲留子。今不可復留矣。子若留此。吾與汝俱不利。聞汝父母猶在滬上。此間相去僅一日程耳。明日亟行。吾聞言終夜不能成寐。天明遂去。行可一日。至滬。既見吾父母。皆不相識。吾自述乳名。吾母乃大哭。謂不意猶得相見也。吾自是家居奉親。始覺家庭之樂。但念浮瑛不已耳。越數月。聞洪軍已破。諸王皆盡。惟某王不知下落。吾心頗介介。後十年。天下既久定。更無復言前事者。吾乃入贛。以縣尉需次江西。累保至通判。一日奉檄赴閩。道經九龍山。天色已暝。宿於山寺。寺中方丈年八十矣。而神采奕奕。吾既與爲禮。方丈曰。居士尙記老衲否。吾聞言轉覺茫然。曰似曾相見。開士果何人者。方丈啓床頭小匣。出黃封一。曰居士覽此。當自知耳。吾受之。頗訝其沉重。乃辭歸臥室。屏人啓視。則黃金小印及鬚數莖。印蓋王所佩者也。吾心怦怦然。其下有紙方勝折之。言

吾與汝雖假父子。恩誼亦自深摯。時勢所厄。竟至睽離。吾每獨居。念汝不能去懷。未知汝於吾如何也。吾自敗後。知事不可爲。即欲逃匿山中。而清兵追捕甚急。幸某將軍代吾受虜。清兵乃不吾索。吾與老僕逃此寺爲僧。歲月悠悠。萬緣俱寂。今且適彼淨土。自念生平無可繫戀。惟眷眷於汝耳。今以吾所佩私印及遺鬚數莖付老僕使遺汝。吾所能爲汝紀念者。僅此而已。吾旣審爲王遺蹟。不覺泣下。往叩方丈之門。方丈已寢。乃復返室。次日將行。闔寺喧言方丈已圓寂矣。吾亟入其室。見案上留書一紙。言居士所欲問者。吾已知之。出寺門東行十餘步。有白楊三株者。是矣。老衲事畢可西歸。居士亦宜自省。官海中非可久留也。吾旣哭而出。乃語從者。謂此寺舊方丈爲吾故人。吾當往祭。遂具蔬酒束帛。拜墓下而去。後二十餘日。吾自閩歸。往謁巡撫。巡撫頗不喜。謂汝奈何從九龍山僧宿。是間盜藪。僧衆安有佳人。吾儕士大夫行止宜自謹。勿貽人口實也。吾唯唯謝。逾月追憶前事。彷彿夢寐也。

蓬閣幻夢

粵西某氏。流寓西貢。歲久遂入籍焉。娶士人女爲室。生子女各一。而卒。其妻撫稚弱以長。年老多病。乃使其女入某工廠。其子入某校肄業。女年十七。明眸善睐。巖服蓬頭。見者無不傾倒。廠主某歐人。豔女美。遇之優於常工。每見必溫語相慰。或貽以珍羞。託言饋贈其母。女惡其荒惰。輒避不與語。即受其贈遺。答謝外無他言。廠主百計欲籠絡之。竟不可得。意頗憤憤。女弟每日自校返。必過工廠之門。俟其姊工罷。携手偕歸。廠主既知女深愛厥弟。欲因以結其心。一日弟復到門。廠主就詢所學。喜曰。吾廠方欲覓一司事。汝年雖穉。而純謹敏慧。且諳書算。吾欲以汝任之。第月薪不過十五六金。汝姑留此實習。徐議升轉可也。弟以母老家貧。意欲諾之。以問女。女意弟自以才能見知於人。不虞有他。乃曰。主人既知汝。汝自決之耳。弟乃受雇爲廠中司事。隸會計部。主計者亦一歐人。年可三十。而溫文爾雅。不類閩閩中人。待女弟甚肫摯。廠中監工某。故

廠主家僮也。桀猾能佐主。屢以廠主之命達款曲於女。利誘威逼。靡不至。女漠然置之。監工無如何。女弟既受雇於廠。每日工畢。姊弟必偕歸。薪入雖薄。然一家三口。頗不虞凍餒。姊弟工暇。家居奉母。或板輿出遊。母亦深覺歡適。如是可數月。時已深秋。某日天忽風霾。廠主謂其弟且緩歸。吾有事須汝。女遂先歸。其母聞及子未返。意頗弗寧。向晚女復至廠。廠門已閉。廠主亦已返其私宅。女怏怏歸。道遇主計者。主計曰。廠主頃遣汝弟將鈔萬三千元往致其友。囑以收據逕投私宅。吾頗以汝弟年幼。挾此巨貲。慮有意外。而廠主堅謂渠純謹且慧。可託以重任。監工又從旁慫恿之。廠主竟遣若弟行。女聞言意頗恐。曰。然則奈何。主計曰。若弟或已自歸。天昏黑。道中行人漸稀。吾當送女郎歸。何如。女意頗喜。曰。重煩先生。吾心滋覺弗安。乃偕行。到門。女心怦怦然。念吾弟或已早歸。將候吾於門耶。抑趨承吾母左右耶。既近則雙扉猶閉。叩門久之。母自出應。曰。吾兒歸耶。吾幾爲汝想煞矣。既見女駭曰。汝弟未歸。客何人者。女乃

爲主計者介紹。曰此廠中主計某先生也。主計前爲禮甚恭。母延入坐。久之主計辭去。母託之曰。先生倘遇吾兒。幸告以速歸。勿令老人望眼穿也。主計曰諾。其夕兒竟未返。女強爲歡笑。母意稍解。夜過半乃睡。女終夜目不交睫。戶外風聲隆隆。益增愁思。倦極欲寐。忽聞晨雞喔喔。窗紙已白。亟起具炊。既畢。母已醒。曰吾兒猶未歸耶。女曰。殆以天黑之故。宿於廠主宅中耳。兒當赴廠探其消息。早餐熟矣。母當進食否。母曰。吾倦欲稍憩。汝可先食。食已往告若弟速歸。可向廠中乞一日假也。女曰諾。既食遂行。至廠。閹者方啓門。見女詫曰。女郎來何早也。女告之故。且請電詢廠主私宅。夜來其弟曾否宿於宅內。閹者允之。而電鈴已丁丁然鳴。則來自廠主私宅者也。傳廠主言。速以人往某司事家中。問渠昨夜歸否。閹者應曰。其姊方來問其弟踪跡。云渠終夜未歸。其母幾於成癡。此人殆他適矣。女聞言大感。淚下如霰。曰吾弟竟失踪矣。旋聞閹者應曰唯唯。吾當告此女郎。如主人命。遂懸受話機。顧謂女曰。主人命女郎稍候。渠當

即來。女應曰諾。有頃廠主果至。謂女曰。吾以汝弟穎敏可託。不意至此。脫有意外。將如之何。女哭曰。唯主人憐之。速電警署偵索。當有所獲。嗟夫。天其憐吾弟。勿使竟遭意外之變。倘吾力能拯吾弟。靡頂放踵。弗惜也。廠主曰。汝勿喋喋。須知汝弟倘有意外。吾亦蒙其不利。吾以巨貲託此童稚。既喪吾財。且使同業笑吾用非其人。所虧益多。汝當知吾昨宵亦通夕不寐也。願謂閹者曰。速電警署。且具牒以往。必得踪跡乃已。吾貲萬餘金。寧能聽其損失。復謂女曰。女郎且歸。汝昨夜殆失眠。今日姑休。吾得汝弟消息。必遣人告汝。汝久留此無益。徒令乃母懸望耳。女聞言甚感。曰敬謝主人。恩意如此。貧女不能忘也。乃爲禮而出。廠主喜且恨。私語曰。汝今日尙能脫吾牢籠耶。女歸盡以告其母。母心稍慰。顧是日向晚。乃未見廠中以人來告。母女皆恐。女已疲甚。強復赴廠。廠中僅司閹者在。謂警署頃有人來。殆已得若弟消息。吾第知主人延客人談。良久乃出。客去主人遂行。竟未審其詳也。女益憂恐。曰主人行時情狀若何。閹者

曰。似有喜色。以吾揣之。汝弟消息殆不惡。主人平日視財若命。果有意外。萬金已成虛擲。寧能安泰若是。女意稍慰。曰彼既得吾弟消息。胡不我告。聞者曰彼知其財未喪。已喜出望外矣。吾意彼必往詢汝弟。或此貲猶在汝弟手中。渠亟亟往索。不暇顧前諾耳。女太息曰。吾曹生命。乃輕於金錢。復何言。謂聞者曰。伯父能否偕往警署。一詢吾弟消息。聞者曰。此間已無他人。吾不能遠出。且聞警署例不許人昏中探視。縱往何益。吾意汝弟必無恙。女郎且歸。女曰。然則往謁主人如何。聞者曰。此時主人方忙於赴宴。必不在宅。往亦無益。天色已黑。女郎歸耳。勿令尊堂懸盼也。女不得已遂歸。詭辭以告其母。謂警署已得吾弟踪跡。蓋爲主人之友留飲沉醉。故不得歸。主人之友盛譽吾弟。主人甚喜。留吾弟飯。囑吾先歸。今晚吾弟歸否未可知也。母聞言稍喜。曰吾未見汝弟。吾心終鬱鬱耳。其夕女侍母飯罷。待其弟久未歸。母遂就寢。女倦甚亦寢。忽夢廠主流血被面。顧己而言曰。女郎吾甚悔。但已無及。雖然。吾產已悉畀汝。吾罪當可贖

。女方欲致詰。忽有聲崩騰如地坼。遂驚寤。則鐘鳴甫兩下耳。默審所夢。莫解凶吉。輾轉反側。竟不成寐。天既曙。披衣遂起。聞叩門聲甚急。亟往啓門。則廠役以主人命召女至其私宅。謂其弟已無恙。第有他事。須待女往決耳。女且喜且懼。而其母已醒。聞愛子有事。待其姊往決。促女亟往。女不暇晨餐。稍嚼乾糲即行。比至。監工已候於門。曰汝來何遲耶。主人昨夜深始歸。歸即跳踉怒罵。賴主計先生力勸。氣乃稍平。始電廠中遣人召汝。吾料汝弟所爲。有負主人厚意。故召汝議之耳。汝宜自慎。勿忤主人。女曰。吾自知之。不煩諄囑。監工竊笑而退。俄聞主人召女入。女趨趨進謁。廠主面鐵色。盛氣虎虎。若將噬人。主計者側坐。容色甚溫。女見之心稍定。曰。主人見召何事。廠主曰。吾殊不意今日少年人荒誕至此。貌若純謹。內乃巧詐。老夫二十年來相人已多。今乃失之於汝弟。吾恨不自抉其目也。女曰。吾弟果何負於主人。乃致盛怒若此。廠主曰。茲事吾滋不欲言。視此自知之。乃擲一紙與女。女視之則供詞一紙。略言吾昨

奉主人之命。以鉅金往賂某君。途爲匪人所誘。失身賭窟。致喪吾資九千餘元。吾萬死不足自贖。唯主人哀憐之。署名者儼然其弟也。女驚欲暈。嗚咽曰。吾弟素謹愿。且不識樗蒲爲何物。安有是事。廠主曰。今日少年變節者多矣。何有於汝弟。彼實巧猾。而飾爲謹愿。汝亦且爲所欺。况於老夫。雖然。茲事可勿論。今供詞具在。且何以處此。女曰。惟主人見憐勿究耳。主人固多財。是區區者寧足計較。吾姐弟二人。倘得一日之生。必竭吾力以報。廠主狂笑曰。吾不意貧人乃多大言。九千餘金之欸。罄汝畢生所得。未必能及此數。乃曰區區。汝真不識世故者矣。且汝弟盜用吾財。法律當得何罪。汝知之否。今猶在警署。越日當移法庭。國法具在。吾又安能上下其手也。女聞言益悲。曰奈何。廠主曰。吾若有術處此。吾不召汝來矣。拂衣遂入。曰。汝自與監工商之。女躑躅室中。而監工已入。謂女曰。今日之事。唯女郎能了之。廠主平日所以待女郎者何若。女郎當自知之。吾平日所以語女郎者云何。女郎當能記之。女郎倘能體主人之意。豈惟

令弟無事。闔家咸享其福。否則非吾所忍言矣。女泣曰。不意汝等乃要人於危。吾雖女子。抑非弱者。不能受汝曹逼迫也。吾志決矣。勿多言。監工色愈和。曰。女郎聽之。今此案猶在警署。主人苟欲撤消。一紙之力耳。明日當移法庭。事依律公判。汝弟既負重罪。且由此爲社會所不齒。無異斬渠畢生之運命。汝既愛汝弟。寧忍聽其錮鑕入獄。受衆人唾罵。况尊堂年高善病。倘見愛子若此。必且心肝摧裂。是女郎慳於一諾。而促老母垂盡之餘算。且奪愛弟終生之幸福也。女郎幸自思之。女忿然曰。吾即以吾身爲犧可耳。雖然。吾身可犧。吾心不能奪也。主人何戀於我。監工曰。女郎。誠解事。主人所求者惟此而已。遂出。主計者招女前。小語曰。女郎勿許。彼曹雖狠。不過暫置乃弟於獄耳。吾知乃弟枉也。此獄終有昭雪之時。若允所求。是自承爲犯罪也。且爲終身之玷。爲女郎計。宜虛與委蛇。俟既見乃弟。徐議其他。乃弟倘有隱情。不妨相告。吾力雖薄。猶堪爲助。女大感激曰。先生肝胆照人。敢不唯命。語已。廠主已出。願謂女曰。

汝與監工所商者。吾已知之。果踐若言。行見汝弟出警署矣。女曰。姑稍緩。主人欲吾踐言。吾必先面吾弟。今猶未也。廠主笑曰。汝太狡猾。即欲一面汝弟。又何妨者。召監工人。曰。即偕女郎往見其弟。監工遂偕女出。至警署。署中知爲某廠主人使者。皆笑厯相迎。監工致使命畢。警官即延女郎而其弟。弟見姊來。則大慟。女亦哭。久之乃止。女嘆曰。吾爲汝故犧牲巨矣。茲事本末竟如何。幸相告勿隱。弟曰。吾殊不自解胡以至此。吾前日以主人命。挾鈔萬三千元。往致某先生。吾竊自喜。以爲主人器我。乃以重任相屬。匆匆欲行。主計先生諄諄告我。謂此行途中勿停留。即遇相識。勿與交談。汝年少宜自謹。勿墮人計中。吾深以其言爲然。行兩三里。稍憊。忽聞有人呼吾名。謂風靈之中。何事疾行。盍少休。吾一回首。則廠中工人甲乙也。吾弗答。仍前行。二人繞出吾前。斥吾無狀。謂汝稍蒙主人青睞。遽作此面目向人耶。吾告以將命往某處。期以六點前覆命。勢不得留。二人曰。今未五點耳。爲時尙寬。少留何害。吾猶欲有言。二人

挾吾入道旁酒肆。遽呼酒進吾。謂風壺中得酒可自壯也。吾辭弗飲。而二人強沃吾口。可三鐘。吾即沉睡弗省。次日巳午。有警兵促吾醒。吾猛憶昨事。檢懷中鈔。纔三千餘元耳。大驚而呼。警兵謂主人方索汝。汝乃藏身此間耶。汝知此間何地。博徒之窟也。汝殆已喪其資耶。吾聞言大駭。乃以實告。警兵弗信。曰此兩人果欲醉汝而竊其資。胡不罄汝所有。乃猶留三千餘元畀汝。少年人不當作誑語。汝事如何。待汝主人決之，今當隨吾往警署耳。吾遂見拘至此。警官詢吾事甚悉。終以吾有嫌疑。靳不吾釋。吾辨甚力。警官謂茲事宜向主人乞情。第得主人一言。他可無問。因爲吾草一詞。命吾署名其上。吾實不願蒙此嫌疑。顧其勢無從自白。吾已請警官速緝甲乙二人。渠亦唯唯。倘兩人中能得其一。吾冤可昭雪矣。女嘆曰。吾固信吾弟無罪。雖然。……語未竟。警兵進曰。吾署向例交談不得過五分鐘。今爲限已屆。乃弟所欲言者亦已畢。女郎可退。女不得已遂出。豈工曰。吾今當復命於主人矣。女郎之意云何。女曰。何事亟亟。吾當先歸。以

告吾母。午後入廠。與汝決之。監工微笑曰。諾。女歸。主計者待于門。曰曾與乃弟晤面否。女盡舉所歷以告。主計曰。然則乃弟墮人計中矣。吾料主人監工者及警署。皆狠狠爲奸者也。彼所草詞。語至渾含。然可據以入獄。乃弟既已簽名。勢難自拔其罪。惟有速致甲乙二憾。根究指使之人。此案猶有大白之日。否則乃弟且終身負枉耳。吾當竭吾力。窮探此中秘密。女郎且入謁令堂。老人殆久候矣。遂與女爲禮而別。女入。見母倚床而坐。曰汝弟無恙耶。胡不歸。女長嘆。繼之以淚。曰茲事吾滋不欲令吾母知之。顧事已至此。不敢不告。吾母聞之。幸勿戚戚。以重吾罪。因歷述所遭。母抵掌詈曰。彼僮年已長大。乃猶懷獸心。僮肉尙足食乎。已而大悲曰。吾家貧賤。遭人蹂躪至此。吾亦不敢復問汝事。行止如何。聽汝自決。第望汝弟能復其自由。吾願足矣。女聞言益悲。涕下不可仰。有頃。毅然收淚曰。吾母勿悲。吾力能拯吾弟。吾亦有以自拯。僮縱橫暴。其奈我何。午後。女遂入廠。監工見之曰。汝母云何。女曰。速告主人。能以今日出

吾弟者。吾猶以彼爲友。必欲置吾於法者。吾兩人仇耳。勿謂稚弱可欺也。語時響色俱厲。監工若爲所懾。悄然曰。然則女旣晨間所言。竟不克踐耶。女曰。何名踐言。汝曹迫脅孤女。於心安否。監工默然而退。以告廠主。廠主曰。彼旣云爾。聽之而已。速電警署。即以原案移法庭。吾不信世間女子乃有倔強若此者。殆有唆之者耶。監工如言。是日向晚。主計者以事往謁廠主。至戶外聞室中有詬諍之聲。一人謂吾儕爲此嚮盡良心矣。而所得乃僅此數。殊覺弗值。且茲事萬一暴露。吾必爲人唾棄。吾畢生所有名譽幸福。又豈僅值此區區者耶。一人謂汝等畢生勤勤。不得一飽。得此寧猶未足。吾今日心境弗佳。殊無暇與汝絮絮言之。須知吾之出此。意別有在。今吾所希望者且成泡影。汝曹猶欲挾功自重。將何爲者。吾今行矣。旋聞履聲橐橐。則廠主已出。主計亟避面。頃之復有二人出。主計審爲廠中工人某某。逕呼其名曰安往。二人舉手爲禮。曰先生猶未歸耶。主計曰。公事相羈。苦不得脫。今日廠工畢矣。若二人到此何事。二人色忸怩。然察

其意殊憤憤。主計乃籠以甘言。謂主人殊怪客。吾儕縱出死力。未必避有佳處。來歲當捨此他圖耳。二人不覺傾倒。曰先生言當。吾兩人冒萬險。爲渠幹此大事。渠猶銖銖計較。况於其他。主計曰。敬賀二君。當得重賞矣。乙曰。何名重賞。二千元耳。主計曰。此數殊不菲。二君胡猶未足。甲曰。先生非外人。吾不妨以情相告。先生試爲我評之。某日監工以主人命。囑吾約某司事飲於某肆。能醉而竊其鈔過九千元者賞千元。吾初不解其故。如言行之。獻於主人。主人畀吾兩人各千元。今日乃聞彼人以失鈔羈於警署。吾深悔陷此無辜少年於罪。欲以情自首。而主人使監工告我。謂宜速逃。否者事發。法庭將見逮。且受社會唾罵。吾竊念吾兩人所值寧僅千元。且從此轉徙異鄉。尤非鉅金莫濟。請於主人。乞即以所得鈔九千餘元相畀。主人弗肯。至於決裂。先生爲我思之。吾兩人能甘受苦否。主計曰。二君勿躁。吾意二君且勿遠遁。法庭即見逮。二君第據情直述。自可原情末減。倘有他故。幸乞相告。吾自有以處之。二人皆曰。敬謝先生。遂出。

翌日此案遂由法庭預審。女弟具述經歷。一如在警署中所供。法庭以人緝甲乙皆到。二人既受主計教。具述情由。更以人傳廠主及監工。廠主未到。乃以人往拘之。入門忽聞槍聲砰然。衆曰。是人殆自盡矣。破門入。廠主臥血泊中。旁有老婦。手猶擎槍。氣勢洶洶。衆人相視弗敢前。主計聞聲趨至曰。媪何人。何爲入吾主人室中。媪曰。汝何人。曰。吾此間主計者也。媪何事乃戕吾主。媪曰。吾戕之耶。此人宜死久矣。因自言己爲歐產。初嫁一富商。年未三十而寡。與廠主相愛。挾資嫁之。託以營運。不意是人乃以漸吞沒吾產。吾產既爲所罄。吾年又老。渠乃棄吾遠適。日前得渠手書。言將別娶。吾忿不可遏。奔馳至此。詢離異之由。渠竟以橫暴相加。且出此槍擬吾。吾不能復忍。遂與鬥。槍彈脫口而出。天竟不容此惡人復留塵世矣。願謂主計曰。汝知吾爲汝何人。主計大詫。媪曰。汝吾姪也。汝叔歿時。遺產爲汝有。汝叔憐吾早孀。遺囑先以付我。吾不能守。負汝叔矣。主計審其姓氏確也。而市中警吏大集。以媪付法庭。越數日。諸人皆

依律判決。女弟無罪。廠主家無親屬。遺產例歸其妻。媼亦弗受。遂歸主計。自女備於工廠時。主計陰有慕悅之意。女亦以其弟訟事。深感主計周旋之力。委身事之。數月而後。居然廠中主婦矣。

●荒郊夜聲

倫敦東鄙。地素荒僻。不軌之徒往往溷跡其間。有麥敦祺者。年二十二。始卒業於醫科大學。其戚某名醫也。懸壺且十年矣。麥既卒業。未有所事。依其戚以居。時爲助診。亦頗覺有得。一日值隆冬。風雪戴途。戚某已返鄉里度歲。麥獨留。意頗弗適。夜向半。忽聞汽車鳴鳴。到門輒止。一客貿貿然入。曰某先生在否。麥曰已歸里矣。客頗失望欲去。麥進曰。吾爲麥敦祺某先生助手也。客如有求於某先生者。鄙人亦可代勞。客聞言似喜。乃曰麥先生聽之。吾此來無他求。乞稍施手術而已。麥請診其傷痕。客徐伸左手。裹以重棉。甚臃腫。麥爲解去其裹。客嚼齒有聲。似痛不可耐。裹既解。將指已碎。血被掌猶濕。麥徐徐以醇滌之。

。其爛肉則箝去之。既乃爲傅藥。以布纏之。客稱謝。詢醫費當若干。麥據實以對。客曰。今夕之事。當視爲例外。吾欲予汝百磅何如。麥聞言大駭。曰客何爲者。吾義不受非分之財。客曰。吾出此鉅金。固非妄擲者比。吾亦知醫費至微。烏值百磅。第有重託於汝。若允吾請。此數亦區區耳。殊不足以酬汝勞也。麥曰。客將何以見託。客曰。無他。願汝緘其口。勿洩於人。麥曰。吾爲醫生。以職業言之。自有應守之秘密。客曰。吾知之。第吾所求於汝者。匪僅尋常業務也。凡今夕所遭。胥勿與第三人言之。即有人詢汝今夕有客就診否。亦勿得以實告。麥曰。吾不能以百磅之故。受此約束。奪吾自由。客曰。然則百五十磅如何。麥意稍動。客曰。先生果允吾請。幸先宣誓。麥曰。吾以受賄故。瀆及天神。吾罪重矣。吾弗敢承。客能信我。吾必不背所約。客躊躇久之。乃曰君信人也，得君一諾。逾千磅矣。君必勿誓。吾亦何敢相強。乃出鈔百五十磅畀麥。匆匆遂去。客去未久。復聞蹄聲得得。一女子推門入。見麥。曰君某先生耶。麥曰否。吾爲

麥敦祺。女郎神色匆皇。果何恙者。吾亦業醫。或能相助。女曰善。吾固無恙。惟吾父猝得暴疾。吾家無可使者。吾故以健馬疾馳至此。奔波幾殆。幸先生速臨。麥曰。吾職固應爾。請以住址見示。吾即車行。女郎可先歸。女曰否。吾宜爲先生嚮導。且有一語奉告。此行中途須易車。乃可進。吾已令人在彼奉送。麥私念今夕所遭胡皆出人意外。昏夜隻身。涉荒僻之境。尤覺慄慄可危。遲疑欲止。女敦促益力。麥愛其柔媚不能却。允之。遂携藥籠以行。女前爲導。左右轉折可四五里。有淖於前。女曰至矣。此間路徑。非外人所習。先生宜命車夫留此稍待。麥乃易車。女偕登並坐。車簾皆重幙。車中一燈燐然。沿途所經。似甚荒寂。但聞車輪碾沙。厥聲如鋸。麥意頗恐。女時與攀談。麥乃頓喜。若忘其身入危地也者。有頃。車忽止。女即下。麥從之。僕人以燈俟於門。女挽麥先偕入行經甬道。昏黑無所見。頃之升階。遙見左側窗間。燈光外射。女啓門與麥先入。僕人以藥籠從。麥既入室。室頗高曠。室中陳設至古樸。燈閃閃發光。沉沉昏夜。幾

疑身在古塚中也。已而聞有人微呻。發自室隅。女亟以杯水往就之。且以手招麥。一老人臥榻上。鬚髮蒼然。面色灰敗。麥診視久之。願謂女曰。老人殊不病。日前得勿猝受震驚也耶。心房跳躍稍微。神經稍失運用。然不久必康復。此間陰森。老人非所宜居。能移於城中醫院則大善矣。女微歎曰。先生言然。麥乃爲處方。留藥數味而出。女命車送麥。仍至前地。則前車猶在。登車。忽聞香氣觸鼻。頗類哥羅福姆。遂昏不知人。比醒。則身已在地窖。窖中有窻。僅能透光。窻格皆錮以鐵條。粗如巨指。麥驚大呼。若覺有人笑於意外。俄見獐厲面目自窻逼視。麥曰。汝曹錮我何爲。須知吾非易與者。吾必有術出此窖。窻外笑聲益縱。麥曰。吾自問生平與人無仇。何事見錮。汝曹橫摧無辜。天不汝佑也。窻外復大笑。有頃乃止。一人曰。汝非吾仇。第從吾仇處來。吾不能汝宥也。汝倘有自知之明。宜悉以昨夕所遭者相告。吾曹且引汝爲友。何敢相錮。麥大憤曰。吾有秘密自由。不能受人迫脅。汝曹蹂躪人權若此。亦太無狀矣。一人曰。此人殊不識

事理。聽彼留窖中耳。窖中固甚適。麥先生殆安之矣。一闕而散。麥知叫號無益。轉益恬靜。而飢腸轆轤。不可耐。向晚。有人自窻隙擲麵包入。曰。囚聽之。汝尙倔强耶。今且瞰此。明日尙爾。並此不可得矣。麥憤甚。遂不食。夜中忽聞巨聲砰然。窻檻皆震。旋聞屋宇倒塌之聲。麥大駭。天明憑窻遠瞰。寂無聲息。欲出不可得。則以手攀鐵格。稍稍搖動。盡力撼之。去其一。又撼之。去其二。乃伸首出視。竟無覺者。疲甚略憩。拾地上麵包瞰之。精力稍復。再撼鐵格。又去其三四。可容身矣。蒲伏遂出。見棟宇傾頽。瓦石紛落。而樓基尙無恙。其下有地。甚完固。麥遂入觀。地下電線盤錯。硫酸硝酸及他化學藥品甚多。皆區分類別。似方作某種試驗者。又入一室室中無他物。惟有鐵櫃六架。皆高大逾恒。櫃門已扃不能啓。未知所儲何物也。室隅卡片一紙。檢而讀之。正面爲雷若鴻。背面則詳書經緯度數。爲東經若干度。北緯若干度。某星分野。太陽高度若干。麥益惶惑。不解所謂。姑置衣袋間。遂出。旋繞行至樓後。始知此屋四周曠野。

積水沮洳。乃涉水行渚澤間。雲陰斑駁。陽光微露。審光線方向。始知其地適當醫院東南。既出澤中。取道西北行。沿途蓬葦高可隱人。且二小時。遇一農夫方自田歸。見麥詫曰。先生胡自來。麥示以方向。其人曰。夜來彼方嘗發巨聲。吾曹皆駭。已而寂然。先生自彼方來。當能知之。麥曰。吾亦聞之。第未知其詳耳。此間去倫敦幾里矣。其人曰。可十五六里耳。先生欲往倫敦。宜以火車行。此間去車站甚邇也。麥曰。此間有警署否。其人曰。警署去此稍遠。此間亦設有望崗。但區域遼濶。巡視每覺弗周。幸居民皆農。故不爲匪徒所覬覦。警備稍疎無妨也。麥頷之。遂與爲禮而去。午後。麥返醫院。車夫入見。謂前夕待先生至曙。胡竟弗歸。麥模糊應之。麥迴念日來所經。忽動好奇之興。次日遂出。語院役吾方有事。今夕未必即歸。有就診者。却之可也。乃入倫敦市中。止於某酒肆。命酒獨酌。隔座一女郎。頻以目睇麥。麥視之。恍若相識者。酒罷將出。過女郎座旁。小語曰。麥先生慎之。今夕且有奇險。麥方回首。欲言。女亟止以手。麥

審其人。即前日同車者。惘然遂出。其夕宿某旅館中。夜將半。忽氣窒不可耐。久之乃蘇。聞一少女言曰。愈矣。幸無恙。視之則酒肆中所遇者也。願見身在院中。衆人環視。知有變。默然無語。館人見麥已醒。曰謝此女郎。不然。先生殆矣。吾曹亦蒙其不幸。乃移麥入室。麥詢館中侍者。乃知睡時幾爲人縊殺。幸隔壁女郎聞有異聲。呼館人破門入視。乃脫於厄。麥欲往謝女郎。侍者言已行矣。麥浩歎而已。次日麥歸醫院。檢懷中物俱在。惟雷若鴻名刺不可得。知己入仇人手也。自是麥遂蟄居弗出。歲既除。其戚復來倫敦。麥悉以事告之。戚沉思有頃。曰。麥君汝涉世未久。當知世事變幻不可測。即此女郎。亦似非好相識。避之爲上。麥雖唯唯。而心殊不謂然也。越數日。麥夜偕友人飲於酒肆。將出。侍者忽以書進。曰孰爲麥敦祺先生。麥曰我是也。侍者曰。頃有女郎來此。屬以此書致先生者。麥受而讀之。書言頃有要事。欲煩先生臂助。請以明日午後六點鐘。至某街某宅相見。書辭婉媚。麥愛不忍釋。次日竟如期往。至則女郎已俟於路左。

。以片紙予麥。曰。可入宅稍憩。吾少須即來。聞者倘見詢。即以此紙示之。麥欲勿入。女曰。吾事非先生莫濟。今吾客集矣。先生弗臨。茲事且復停頓。麥遂巡入門。聞者果見詰。麥以紙示之。聞者即導入一室。室中坐者五人。見麥皆起爲禮。有竊訝者。麥亦弗爲意。俄聞鈴聲。衆皆行。麥從之。至一室。室列長筵。旁置坐椅。衆皆就坐。一老人自屏後出。衆皆起立。老人中座立。曰畢集乎。衆曰。畢集矣。老人忽指麥曰。此人爲誰。衆曰非龐波乎。老人曰。似矣。抑有可疑者。乃曰龐波近日胡兩次未到。麥曰。吾非龐波。吾爲麥敦祺。語甫出。衆皆譁然曰。必殺此獠。不然吾事且敗。老人曰。緩之。因詰麥所由來。麥自述所業。且言女郎見招之事。老人忽若有悟。曰麥君汝固無罪。第今日之事。汝已爲人械器。用汝之人。又吾仇也。且汝爲人用屢矣。吾不能復恕汝。顧謂衆曰。了之。衆皆前撲麥。麥素孔武有力。而衆寡不敵。竟爲所仆。衆以繩縶麥頸。麥方掙扎間。市警四集。破門而入。皆受縛無一脫者。麥昏暈不省。及醒則身在燬室

。衾褥溫美。室中陳設琳瑯耀目。一貴家婦坐榻旁。曰醒矣。敬謝先生。佐吾曹幹此大事。雖然。先生苦矣。麥審其人向所見女郎也。方欲致詰。一人進曰。麥先生久不相見。尙記鄙人否。昔日之約今可解矣。麥視之。則嘗以百五十磅要已。宣誓爲守秘密者也。益皇駭。其人曰。先生勿駭。吾當以此中情事爲先生述之。吾德國某貴族也。吾來此鄉。實負有任重。先生猶記普法之役。法國嘗以巨金償吾德國兵費乎。中有現金凡六百萬磅。吾皇欲留備不時之需。造鐵室以貯之。局鑰甚固。以兵二千爲衛。營長某皇族也。陰謀破室取金。衛兵頗受煽惑。同謀者凡百餘人。事覺。政府以形迹未著。慮張揚反爲國恥。託以他事。解營長職。此人既解任。即與同黨六人。密謀破室之術。其中一人爲電學家。欲以電力發室。匿居倫敦鄉中。晝夜研究。吾皇聞之。命吾夫婦偕至此間。偵其消息。吾乃賃居與彼曹鄰。會彼曹欲覓一僕供使令。吾使吾叔往應之。彼曹幸不覺。吾乃一一知其秘密。一日爲彼曹試驗之期。吾潛身入視。乃大駭。蓋電力過處。室中諸鐵櫃

。皆受吸自啓。忽大聲爆發。火光四射。吾叔暈於地。吾手亦傷。遂奔出。諸人見有生人。莫測所以。驚恐四散。吾挾吾叔歸。此後之事。先生當已知之矣。吾不就他人診而就先生者。以鄉僻醫家較清靜。且醫生多寒素。可以賄塞其口也。不意先生執持甚堅。幾敗吾事。麥曰。彼曹蹤跡。既已爲汝所得。曷不逕告皇帝。電請英政府拘捕。此一紙之力耳。曰吾皇滋不欲人知。既貽國家之恥。且恐鄰國橫生擬議。於吾德外交滋多不利。吾夫婦深自閉匿。即以此故。皇意欲假他罪。逮此七人。使不得復爲電學之研究足矣。當先生被困旅館之日。吾妻即欲以警察拘彼凶人。吾力止之。謂如此則同黨之人。必且驚避。不如俟其既集。一網盡之也。彼曹雖屢集會。吾苦無機會使致於法。幸黨人有龐波者。遭同黨輕蔑。意頗鬱鬱。吾乃以術釣致。使爲吾用。以先生狀貌酷肖龐波。故今日之事。特煩先生一行。即用龐波會證。得人其門。吾人於先生入門後。即以謀殺報告警署。亦知此行實置先生於險。第不如此。則無由能入彼曹於罪。今事集矣。先生幸恕我

。雖然。吾皇亦必有以酬先生也。麥曰。君等亦太無良。乃以他人生命。爲汝立功之具。婦曰。先生見責固當。幸已無他。吾夫婦此行。非敢貪功。激於愛國一念耳。且吾爲貴族。分宜與國共休戚。吾皇此命。吾兩人又何敢辭。先生賢者。當見諒。麥聞此柔婉之言。不覺頓爲所屈。乃曰。六人旣入法庭。寧不向刑官述此原委。曰。吾德人必不自揭其醜。此案當以謀殺未遂定罪矣。吾人今旣輸情於先生。他日法庭倘見詢。尙乞守此秘密。麥曰。吾自有以處此。此不相負。惟吾前者曾得黨人名刺。所書乃爲經緯度及太陽高度諸等數。是何爲者也。婦笑曰。是指示窖金所在者也。物猶在此。先生持歸。留爲紀念。可矣。

●海外桃源

海陽錢生。幼有大志。弱冠應童子試。屢不售。乃棄去。習賈。從人走海外。轉物居積。十年間致數十金。皆散與戚友之貧者。或勸生稍自封殖。生笑曰。君等乃以我爲守財虜耶。吾所以奔赴海上。日與風濤狎習者。豈爲區區財物計哉。吾

聞海外多勝境。私冀或有所遇。用副平生壯志。使我欲富。豈無他術。又安用冒險爲。衆皆迂之。生亦不屑與辨也。某歲秋。附海舶出行。過成山頭。颶風忽作。舟破。生抱破舵隨水漂流。但覺身輕如葉。浮行絕迅。闇中忽觸一礁。似爲陸地。遠望羣螢亂飛。若有林木。乃舍舵登陸。逐螢火而行。而且逐且却。卒不得近。乃知燐也。俗傳燐爲鬼火。生意頗恐。已念同舟者多與波臣爲伍。已獨幸存。遇鬼奚恤。矧得嘗鬼趣。亦此生奇遇。又何憚焉。願終夜竟無所遇。第見浮光往來上下。詫爲奇觀。而濕且冷。殊不耐。天將曙。倦甚遂寐。既覺乃在一矮室中。左右伺者數十人。皆對已嬉笑。生顧視其人。長不滿三尺。跳擲如獼猴。察其意殊不惡。亦安之。惟腹中奇餒欲得食。姑示以手勢。諸人相向啾唧。或揚手蹈足。若有所喻。頃之一人趨出。良久乃返。擲果可十餘。置生前。生孳食之。味乃如棗。嚼五六枚。飢稍止。衆中一人似其曹之長者。就生若有所詢而語言弗達。頻以手擊地。生卒無語。衆乃皆散。留兩人守之。生飢而索食。則餌以巨棗。

。渴而索飲則酌以山泉。泉頗甘美。生詢所自來。以手示意。其人亦啾啾作手勢。似謂取諸高山也。如是者可五日。每日輒有數十人臨視。久久乃去。去則留二人省視飲食。生起居溲溺。輒有人監之。生亦因漸解其意。稍稍與交談。盡了其語言。始知是族語言至簡。意所不達。恒作態示人。狀盛怒則以努目。狀大喜則以狂笑。其他事物。往往以四肢作勢形容之。無文字。以石畫地。用作號誌。縱橫欹邪。長短相間。居民不火食。以果爲餌。果有棗栗之屬。皆巨大逾恒。水中。有蓮茨。亦可食。然終歲不常有。飲以礦泉。自山中出。居民承以陶器。隨地取飲。居以板屋。屋高不及七尺。廣不逾丈。而居民游處其間。皆若有餘。衣服至簡。編細草爲袍。柔韌可浣濯。男女所衣若一。生既漸習其語言。一日晨起。其酋以人來召。生乃隨往。酋高可五尺。左右衛侍者十餘人。皆高可四尺。酋見生。頗訝其高如已。遽下座與生比肩立。問左右。吾與客孰高。左右相顧未發。生亟言吾高安能及酋。吾僅與能酋左右較高低耳。酋聞言大喜。謂汝雖高不及吾。

然足爲吾副矣。左右聞之。皆以手加額。曲其身。首幾至地。先與生爲禮。又與酋爲禮。賀生得爲副酋且賀其酋得此良佐也。生於是始知其俗有巨酋一。選全族中最高者爲之。次高者若干人。地位略如大臣。旦夕在酋左右。佐酋爲政。實則所爲政者無他。每三十日。出行泉源一周。視其塞。每五十日。出視各林。視果實之多寡。每百日出。視戶口多寡。校其生死之數。每三百日。率族人叩禱天神一次。遇日月交食。則率族人號泣躡踊。復圓乃已。一酋死則族人公推一體高者繼其後。或酋尙存。而衆中有高於酋者。則酋必讓位。而退處於副酋。生體實高於今酋。國人以其來自異國。疑弗擁戴。故退而爲副。實則酋及副酋。居處食飲衣服。所享受者與居民無異也。生旣得爲副酋。遂出巡。始知是族所居爲一孤島。島方廣可百餘里。居民二百餘戶。凡千五百餘口。男女人數略相等。其民皆一夫一妻。男女婚姻。由母父締定。締婚之期。多在十歲以下。逾十六乃嫁娶。生活旣簡。故其民無室家之累。島中多山。山林所產。附拾即是。人人足以自給。

故不爲殖產之謀。山中麋鹿禽鳥。與人往還。皆若馴習無忤。生甚樂之。島所處地。似當中國之北。而天氣溫暖。有火山。間歲一發。居民所製陶器。搏土爲型。投火山噴口。火熄時取之。皆完好可用。居民所有械器。皆石製。剷土伐木外無他用。居民數百戶聚處。未嘗有睚眦之忿。世人所謂名利者。在此間竟不知何解也。島中以日出入紀日，以月圓缺紀月。不知所謂歲時。生居島中且二十月。始至頗悅其俗久之漸厭。島中生活之簡單。固非已開化之人所能堪也。一日生臨水獨坐。忽動欲魚之念。乃揭石於竿。刺魚得之。敲石取火。焚草烹。衆人望見火光皆集見生所爲。相顧愕然。生取魚遍餉觀者。或食或否。其食者皆喜悅。以爲不意乃嘗此美味也。生於是告以火食之法。肉食之美。衆乃大悅。前此生雖嘗爲衆言之。莫之信也。又逾月。生登山遠望。遙見一舟向島而來。審爲漁舟。旣近岸。舟中虛無一人。生偕島人登舟。於舟中得短柬。載舟姓名籍貫。略謂吾以扁舟遊海上經歲不得近陸。餒且死。自投於海。此舟聽其漂流。有拾得者。

煩以吾事轉告。吾族可耳。生不覺。悲慟。念此人亦同志也。而所遭若是。島人見舟頗以爲奇。生告以航行之利。彼乃大喜欲得一試。生遂盪舟前行。海波不興。舟行甚適。島人人扣舷而歌。行可三里。望見黑雲起於天末。知且有暴風。亟返舟。而風已起。舟爲風掣。行甚緩。去岸且百丈。忽狂飈捲浪。舟顛簸不能駐。頃之遂爲風濤所挾。駛行如箭。生束手無策。聽之而已。島人則大哭。生溫語慰之。哭仍弗止。入夜冥不辨方向。浪花四濺。幸舟輕甚。得不沈沒。明日晨曦初上。風靈稍霽。望見海舶南行。生遙作呼哨。船中人審爲同道者。乃駐泊。邀生及島人偕登。衆見島人人矮小如猴。繞視揶揄之。島人頗瑟縮。生乃爲衆自述所遭。且歷言島中情景。衆皆以爲異聞。環聚傾聽。掌舶者因爲生覓一室。使與島人偕居。衆見島人性情樸真。皆愛之。或畀以食品。島人覺所見聞。皆非平生所歷。且以諸人相待頗厚。亦欣欣然忘其故土矣。行數日至萊州。生以去家稍邇。挈島人辭去。家中人見生與侏儒偕歸。皆出意外。數日間戚友來訪者相屬。談島中事。

咸視爲珍聞。且有方人來觀侏儒者。或議置此矮人於都市。作陳列品。可供衆覽。生弗肯。謂彼皆人也。奈何以物相視。乃止。生歸一載。復欲出遊。而家人不許。生意頗鬱鬱。且自歸國後。所見社會情狀。多不滿意。歎曰。悔不留彼島中。乃復入此虺蜮世界也。生有故交陳某。方官陝西。偶以告歸。聞生談島中事。陳曰。此海外桃源也。吾當從汝往遊耳。於是二人託辭赴京師。竟僦船從海道行。島人與焉。海行數日。天氣晴朗。生以方向辨之。請於掌船者。乞迂道往覓彼島。掌船者亦好奇。果如所向而航。行兩日。遙見島影。島人拊手怵躍。謂白雲起處。乃島中火山也。未幾果得陸地。磯舟遂登。島人自歸其家。居民聞生來。爭出問訊。前酋已死。新酋方立。舊日侍衛中亦有物故者。居民自生行後。習於肉食之美。頗以射獵爲事。林中走獸飛禽。見人輒驚避。不復如前此之馴優。即居民亦漸易其素性。稍稍兇猛。不若曩之溫良矣。生歎曰。鑿混沌之竅。殘純樸之材。陷島族於泥犁者。吾之罪也夫。遂歸不復出。

●深山幻影

匡廬天下名勝也。巖障九層。崇巖萬仞。綿亘五百餘里。異蹟奇峰不可勝數。道書所稱爲第八洞天者也。自九江開埠以後。豪家往往依山建墅。山中勝處輒有亭榭。昔日古寺廢觀。恒爲僧衆盜售。改築別業。雖非山靈所喜。抑亦無如何也。山中有某墅者。相傳爲某寺故址。自改築以來。已三易主。主人輒不利。最初主人爲某鉅商。善投機。致富數十萬。慕西人之有避暑別業也。賃山中某寺爲遊憩之所。旋以資啗寺僧。收爲私產。寺中佛像已毀圮。某輒昇棄。有諫者皆弗聽。營建旣就。饗諸相識者以賀之。其日即有甲乙二客酌飲互毆。乙負傷。懇甲於官。引主人爲證。官審主人饒於財。因而魚肉之。行賄累萬乃解。甲乙亦旋以調停罷訟。然自是某商所爲輒敗。不三年盡喪其貲。別墅亦他屬矣。第二主人爲某貴官。家本寒微。至某始以進士歷官中外。遭逢時會。累任要職。某善封殖。致貲亦且百萬。旣退休林下。頗出餘貲權子母。某商嘗從貸巨金焉。商旣破產。盡出

所有債諸債權者。山中別墅遂歸於某。某意殊弗欲。願舍此別無取償之道。強忍受之。戚友或勸以爲此墅故廢寺。盍復其舊。延高行者住持。某弗聽。謂別墅可轉售。吾費尙猶得復也。願懸價至高。無過問者。得墅之明年。某遂歿。喪未除。二子爭產。戚族解之不得。乃訟於官。久弗決。奸人因而侵漁之。訟畢已斥其產之半。而廬山別墅遂屬長子。長子故嗜博。博徒爭趨奉之。未半年盡喪其貲。別墅復易姓矣。第三主人爲某外人。礦業家也。其人持身有檢制。而勤於所業。用是能得社會信仰。受某公司聘來華。歲俸數萬緡未嘗妄費。因以居積致富。既購得別墅。每歲夏秋。必移居山中。凡三年。初無他異。惟僕役輩竊竊耳語。意謂別墅非佳。某外人亦微知其事。願不以介意。而山中人知此墅歷史者。則咸相詫。以爲神佛亦憚外人。無敢有不利於其躬。或謂彼人奉耶教。於吾國爲化外。故神佛亦不與較。或論報應有遲速。彼特幸而未及耳。其一二明達者。則謂此人致富以道。故神罰不及。非前此兩主人一爲奸商。一爲汚吏者比也。然未幾是人

以事返國。乘舟與冰山相觸。或傳已歿於海。求其尸不得。鄉人聞其事者。又囂囂然。謂報應弗爽。罰之遲者報乃愈酷也。而傳聞者更附會其說。謂盜鬻某寺之主僧。已寒餓以死。死後見夢其徒。自云當入無間地獄。滿若干劫乃得轉生。於是人言籍籍。或議以重價購此墅。仍復爲寺。而守者不可。謂必得主人或繼嗣承諾。乃能出售。事遂止不得行。顧自是廣廈坐荒。無復有人入居。守者亦以主人久不至。怠於厥職。蓬蒿漸長。瓦石傾頽。鷓鴣之屬。日噪其間。景益荒寂不可耐。月明之夜。輒見有人衣冠長跪而禱。喃喃有聲。皆相傳以爲某鉅商抑某貴官之魂。禮佛自懺也。越數年。有人自歐洲來。投某國領事。自承爲某外人嫡嗣。領事驗之信。衆人聞是人來。爭從問某外人消息。始知果歿於海。其時嗣子方幼。遺產託人代理。代理人懼於鬼神之說。不敢問別墅事。懼或蒙其不利也。衆人既知爲遺產繼承人。爭勸是人以賤值出售別墅。聽人改爲佛寺。是人不可。謂科學發達以來。神鬼久已退聽。奈何以虛無之事。妄自搖惑。衆人或舉所見爲證。

是人謂諸君心理作用耳。天下安有所謂幽靈者。竟不聽。衆人亦無如之何。是人既來華。頗樂中土風物。留連不去。其父遺產可三十萬。盡用以營運。所入亦頗足自給。惟山中別墅久不聞問。或言其人實有所見。特畏人議己迷信故隱而弗宣耳。是人尋眷一東方女子。豐容鬢髮。遊處必偕。終以種見爲梗。未能諧伉儷之好。越數月。復眷一歐女。遂棄前女不顧。女無如何。長日以淚洗面而已。一日見所歡挾歐女偕出。憤火中燒。發狂欲投環。己念徒死無益。不如歸禮空王。且聞是人有廢墅在山中。誠得乞一席地。結菴焚修。亦足自了此生。乃伺所歡者出。要諸道畔。即以爲請。所歡者亦憐之。即如言。送女山中。且以一嫗爲侍。月致薪米之費。女遂清磬木魚。朝夕梵唄。雖春花秋月。多遲暮之思。而山色水光。亦足遣此愁抱。一夕月明偶出。遙見前庭有人拜跪。若作祈禱之狀。女習聞山中故事。意頗恐。旋念此心久同槁木。已無生趣。即以身爲鬼餌。曾何足惜。且安知鬼趣。不愈於人。即欲探其究竟。而投足復縮。趑趄者久。掉臂遂進。及近

乃無所見。惟怪石俯立似人。長春藤延蔓其上。隨風披拂。作拜跪勢。蟲聲風聲相聞。恍若禱誦之聲。不覺狂笑。陰念世間所傳鬼魅。大抵皆此類耳。今夕之事。非吾親歷其境。疑團且莫能釋。玩賞者久之乃出。遇老嫗以火至。曰汝膽亦已巨矣。此間幽靈輒夜出。幸不相值。否者且爲所魅。女以實告。嫗不信。曰無作誑語欺人。女邀與偕入。嫗不肯。曰吾雖人奴。吾家亦薄有貲產。吾子已娶。且晚得孫。吾亦自有家庭之福。安能以命爲博。女笑曰。姥旣福人。鬼安敢逼。姑入一觀如何。嫗終弗聽。女太息而已。逾月。女所歡者忽以僕來召。言主人知汝貧苦。特遣奉送。女欲勿往。且以歐女尙在。不能同居爲慮。僕言主人已與彼絕矣。女詢其故。乃知主人自女行後。旦夕與歐女遊處。歐女故歌妓。已適人。其夫本無賴也。善媚能得女子歡。是女偶爲所盡。委身事之。無賴者因以爲囿。貴游公子往往墮計中。瞰主人多財。欲誘致之。主人故嗜博。是女乃與無賴設謀。漸導與博。博多負。主人本精於博。徐究致負之由。恍然大悟。次日復博。盡發

諸博徒詭謀。諸博徒爲所窘。皆大怒。各出手槍擬之。主人亦弗懼。顧衆寡不敵。卒爲所困。逼署券三萬金。乃得出。覓歐女弗得。已偕同黨逃矣。於是歎曰。愛情固無種界。彼東方女子。乃能爲守貞。吾同種之歐女。乃陷我至此。吾知悔矣。女遂歸。未三月即締婚。既婚言於其夫。即山中別墅捨爲療養病院。自是別墅主人。不逢不若。而一時轟傳之山中幽靈。已歸無何有之鄉矣。

●伊提國

光緒季年。政府方議立憲。登庸新進之士。一時游學海外者。各挾文憑來京。以自銜鬻。往往得顯職。其後干進者日益多。新舊曹署。不足以容。於是挾才求售者。輒有不遇之歎。有徐生者安陵人。嘗留學歐西。遍歷英法德奧諸國。自負爲命世才。不屑屑隨人應舉。然阨於貧困。不能不貶節。北上走京師。應留學生考試中第。旋由廷試授某部主事。大喜。以爲平步青雲。富貴立致也。願其時部曹實閒員。無所事事。且歲俸至薄。曾不足供醴粥。生大失望。會同學某君長南中

某校。電招爲某科教授。怏怏附海舶南下。舟行過渤海。東南望成山。忽發遐想。時方盛暑。倦甚憑艙假寐。忽覺有人挽己曰。舟抵岸矣。胡不理裝。尙酣睡耶。視之則舊友某也。生曰。行何速也。頃間方過渤海。今竟已抵岸耶。某曰。彼間綠楊垂蔭。行人稠錯。非巨埠耶。生望之信。頃之。有衣冠者登舟。言奉命來謁徐先生。生納之。其人自言奉國王命聘先生任顧問。謹具百金將意。即呼從人以聘幣及書奉呈。生受書。見煌煌黃封。三鈐朱印。啓而視之。略言吾深慕先生才學。願以師禮相處。謹專使安車奉迓。幸勿吝教。審其國名。則伊提國也。生疑平日足跡所經。與地誌所載。世界並無此國。使者曰。先生勿疑。六合大。豈無曠土。彼地理學者祇憑見聞編訂。所遺亦已多矣。生遲迴未決曰。國王何由見知。使者曰。先生有同學藍君者。前年漂流吾國。吾王得而用之。今爲大臣矣。藍君屢稱先生於王。謂才學勝已十倍。且曰此人品格絕高。王宜師之。不可得而臣也。生憶同學果有藍姓某歲航海久不返。信之。乃受聘。偕使者登車。沿途垂

楊夾道。良田彌望。惟道路殊崎嶇。且糞穢叢積。臭味迫人。殊不可耐。生陰念國王果能用吾。吾當首平道路。次議衛生。今國污穢若此。成何氣象。且疫癘盛行。邦人將無遺種。方沉思間。車忽止。遙見道左編竹爲籬。籬間有泉可數頃。有人方浴。其由籬之左方出者。肌理瑩潔如玉雪。其由籬之右方出者。則瘡痍遍體不能寓目。使者邀生入浴。生見右方水渾濁作黃綠色。左方則清澈見底。欲就左方。使者曰。先生旣惠臨吾國。當以吾國禁俗。爲先生言之。吾國習例。凡國人自內出者。就左方浴。自外至者就右方浴。先生宜就右方。生欲勿入。使者及其從人百端譬勸。生竟入浴。始下穢氣觸鼻。亟出。有頃使者乃出。非復前人矣。面目潰爛。幾不可辨。生駭曰。胡一霎間美醜頓殊也。使者曰。君以爲醜耶。吾國人固以爲至美也。生復登車。使者欲與偕。生意似畏惡。使者曰。君貴賓也。吾不敢逆君意。雖然。君將悔今日之不從吾教也。乃隨車步行。頃之至一城。城門衛士數十人。面垢若未嘗浣。見生來欲拒勿納。使者曰。此吾王所聘顧問徐

先生。而藍大臣之友也。衛士乃聽生入。至宮門。衛士數百人。微疥着面。尤穢於前。見生來即反走。使者告之如前。衆皆望望然立。使者謂生曰。先生稍待。吾當入報國王。遂入。頃之偕一人出。曰王以先生遠來勞頓。宜稍休。今夕且宿於藍大臣賜宅。明日早朝。當延見也。其偕出者即前引生手。曰徐君猶相記否。生聞其聲藍也。而兩頰瘍潰。乃如麻瘋。大駭釋手曰故人胡竟至此。藍曰且歸。徐與子言之耳。遂命回車偕至賜宅。閤闕高大。侍衛數十人。皆面垢如城門衛士。既入內室。侍者乃皆皎好。生頗訝之。藍笑曰。君得勿以爲異耶。遽呼進盥。盥至。藍沃水頰面。瘡瘍悉去。儼然美丈夫也。生不覺狂呼曰。藍君吾乃今見汝真面矣。藍曰。吾今當爲故人盡言之。此邦之人。嗜好殊異。彼以垢穢爲奇觀。謂實天然之至美。君來時道路所經。當飽嘗此中况味矣。吾嘗建議於王。謂道路崎嶇。宜稍平治。以便交通。語頗切至。王亦深然吾說。而朝中諸老。謂如此則是欲以人力征服天工。匪惟事不可能。藉曰能之。而斲喪自然。失其真美。交通

雖使何益。吾始來時。猝聞奇臭頗不耐。囊中携有茄楠珠串。偶用解穢。爲邦人所見。奪而投諸水中。謂此乃召疫之媒也。吾今習聞諸臭。已若無覺。浸假一日不聞。鼻觀轉若弗適。此間人以醜穢爲上品。凡醜穢愈甚者。其位愈高。其王三年一選。由各地方公推醜且穢者若干人。更由所推者公推一人。是爲國王。王得自選大臣。亦以醜穢爲主。雖有奇才異能。而醜穢弗中程者。官亦弗進。故是邦之人。爭自飾以瘡疖。國門浴泉。卽致疖之良藥也。然有守者。常人不得入浴。必以賄進。其以王命往者。恣浴弗禁。吾以善歌見賞於王。王命入浴。吾甫投足。弗堪而出。衆人頗爲吾惜。謂先生。誠能居泉中曆一炊許。大官可立致也。吾於是始知是邦風尚。自念吾苟欲貴。豈無他術。奚必以此泉自污。吾幼讀偵探小說。見福爾摩斯有易容之術。心竊慕之。及遊歐洲。習化學及藥物學。頗得其秘奧。一日偶行野間。得藥物若干種。合而製之。遂成易容妙藥。竟以此誑邦人。至鉅官矣。每日見王必盛粧乃出。旣返私室。則盪浣去。侍者數人。皆他貴人所

屏棄者。吾皆留之。此曹深感吾恩。弗泄吾事也。生曰。國門亦有清泉。入浴者胡甚寥寥。藍曰。此皆被放或奉使出國者乃就浴耳。一浴則瘡痂盡脫。喪其真美矣。生不覺大笑。藍曰。君勿笑。君既來此。頗欲富貴否。如欲富貴。即以吾爲法。吾當以術爲君易容。不然。邦人且不慊於君。君亦不能久居此間也。生曰。吾不願以假面目向人。此間醜濁之鄉。安可久居。吾寧貧賤終身耳。不能枉已以求富貴也。藍曰。君言無乃太刻。世間安有能以真面目向人者。昔人謂李義府笑裏藏刀。吾觀世人皆李義府也。此間人雖醜濁。然心地純潔。濁於貌而未濁於心。視世之冠玉其外。而羊腸其心者。勝之遠矣。君涉世未久。欲以書生本色。出與社會周旋。吾見君之窮困也。生曰。小別三年。不意君乃深於世故如此。休矣藍君。敬謝推薦之恩。書生福薄。不能同流合汙。負君盛意矣。藍聞生言意頗怒。曰。士各有志。吾安敢強君相從。若欲歸即歸耳。何必喋喋作冷語侵人。生亦含怒曰。君勿以高官自鳴得意。儻來富貴。奚啻浮雲。吾不暇爲君哀也。藍怒甚色。

變。目光如炬。叱曰。腐儒不達時變。餓死不足惜也。生怒甚。抵案而起。案上陳設悉墜於地。砰然作聲。藍忽不見。生願見已身臥艙板上。始知所歷皆夢境也。問諸船人，已入黑水洋矣。

●故將軍語

武彝九曲之勝。海內所盛稱。其第七曲有峰曰三仰。其下崩崖堆錯。外成石門。僮僕而入。有地一區。四山環繞。中有平畦曲澗。圍以蒼松翠竹。雞聲人語。俱在翠微中。所謂小桃源者也。居民可十餘戶。耕種所入。差能自給。罕與外人往還。相傳清初有孫先生者，嘗隱於此。以授徒爲業。鄉人敬其學行。相與呼爲先生而不名。歷時既久。遂無能道其名字者矣。先生雖讀書人。而氣象豪邁。絕無寒態。嗜飲。飲酣輒出匣劍。翻騰作上下舞。或掇石超距。鄉人益喜從之遊。先生頗不欲人詢其身世。偶語及之。輒顰蹙掉首弗答。人亦弗敢強也。人有欲從先生習武事者。先生輒曰。天下承平。方當偃武修文。習此何用。有以經義叩者。

輒應口答無凝滯。有異方人欲假館從受業者。輒謝却之。以故名不能出鄉里間。某年月日。村人早出治田。見先生坐隴畔。以手掬日光吸之。且吸且引其頸。願見村人。招之使前。曰汝知吾爲何如人。曰孫先生耶。曰汝視吾豈猶尋常村學究哉。曰否。先生固非常人。雖然。先生見召何事。先生曰。此鄉之人。屢欲詢吾身世。吾慮爲君等累。未敢相告。今日晚且歸。姑爲汝述之。吾鄭延平故將也。隸甘國公輝部下。金陵之役。延平兵敗。吾爲清兵所俘。乘間脫逃。往投張蒼水。蒼水旣授命。吾輾轉海上。欲自歸台灣。道阻不得達。故託於此耳。村人曰。吾始已疑先生爲異人。今果然矣。惜乎台陵之役。功虧一簣。不然。吾人已光復故物矣。先生歎曰。天也。復何言。吾當以金陵一役始末爲汝述之。當延平之治兵於金門廈門也。欲以水師縱橫海上。所部可二十萬。選士六千人。皆犀甲重鎧。負戟重六十斤。日走五百里。其他勁卒銳兵命中及遠者以數萬計。艤艦巨艦五百餘艘。是時桂王猶在滇。清兵進攻甚急。大將李定國間道遣使至金門。約延平

進攻長江以擣其虛。延平欲聽之。謀士陳永華獻策。謂我軍多巨艦。士卒習於海戰。請逕率所部循元人海運故道。北據登萊。則山東搖。北直大震。南征諸軍。必返顧畿輔。江南諸省可傳檄定也。諸將憚於遠征。力阻其議。會有遺民自江南來。謂金陵駐軍多西征。江左空虛可襲而取。延平意遂決。吾聞之。言於甘國公。謂我軍雖善水戰。但於內地沙線都非所習。且巨艦進退不便。內河港汊紛歧。慮有蹉跌。不如沿海進取以擾敵防。公頗然其說。言於延平。而諸將習聞江南風物之美。力主入蘇。延平竟不能奪。師遂發過浙。浙海諸將皆來會。自請攻浙。而慫恿延平入蘇。時朔風方勁。師行三日已至崇明。守將梁化鳳遣師迎兵擊。師甫合。我軍銳士百人以輕舟入其陣。左右衝突。大破之。幾獲其帥。守將遁歸。嬰城而守不敢出。吾又進言於甘國公。謂崇明一島。方廣數百里。誠能據而有之。則大江咽喉。爲吾所扼。北窺登萊。西略寧陽。其勢至便。且此次進兵。其事至危。深入攻堅。曠日維久。萬一蹉跌。且無歸路。倘大軍必欲西行。請以偏師

見屬。吾必取崇明以報。公復言於延平。延平甚然吾說。諸將中有曾遂者。攘臂言曰。此行爲光復故國。破釜沉舟。有進無退。崇明孤島。寧足留戀。以分我軍兵力。且俟進攻金陵不克。迴師取之未晚。衆皆和之。守將梁化鳳偵知我軍委城弗攻。夜率所部西上。所過告其守將爲備。遂馳入金陵。我軍西行至狼山。清兵礮發。我軍已預爲之備。礮遂弗及。更遣死士三百人。以魚艇繞出礮台後。乘夜進攻。守將猝不及防。遂潰。自是所過無留行。顧港汊錯出。又以泝流故。艦行稍緩。六日始達楊蓬山。巨艦至者十七艘。勝兵纔五千人。遇清提督管效忠。列戰艦百餘艘。陳兵二萬。繞出我軍前後。我軍士皆殊死戰。敵軍礮石雖猛。而舟小仰攻不便。鏖戰竟日。相持不退。向晚且收兵。其主將坐艦掠吾舟而過。曾遂蒙盾一躍登艦。壯士從者十人。管效忠以長矛攢刺。倉卒不及。遂爲我軍所擒。敵軍大驚。解甲乞降。我軍盡納其衣裝。僞爲彼軍。進攻瓜洲。瓜洲守將以爲提督休戰歸也。開營納之。一鼓而克。次日進攻鎮江。鎮江守者議納降未決。我軍

先期遣死士潛入城中爲內應。師至城下。死士從中發。城遂破。直抵金陵。清總督卽廷佐方謀遣人納款。而梁化鳳以師至。遂罷。事後聞金陵人言。梁師更半日不至者。金陵已爲我軍有矣。時甘國公建言於延平。謂鎮江瓜洲旣下。金陵之勢已蹙。宜北取揚州。以斷北方之援。南取蘇常。以絕兩浙之路。則金陵不戰自困。延平以堅敵在前。不亟攻下。而分兵他略。勢力益孤。且爲敵乘。弗聽。陳永華亦建言。宜以降卒爲導。疾西上據九江武昌諸形勝。號令各地。則湖廣皖豫諸豪傑。蜂起嚮應。清軍之入滇者必且返顧。李定國等以忠義之士乘其後。可使無遺種也。延平欲聽之。而金陵遺民日歎軍門。言金陵旦夕可下。金陵爲太祖龍興故地。得之進可以悉復舊宇。退則猶可偏安。且漢高開基。以關中爲根本。光武中興。資河內爲後援。江南民物殷富。亦今之關中河內也。延平喜其言。遂旦夕進攻。陳師儀鳳門外。且躬謁孝陵。釃酒陳牲。慷慨涕泣。衆皆感愴。方祭時。大風暴起。毀饗殿鴟吻。陵上老松一株忽折。觀者皆訝爲不祥。延平亦意興沮喪。

○出陵上馬。馬蹶延平幾顛。掌馬者惶恐謝罪。杖之。延平旣驟勝。別遣張蒼水由蕪湖進取徽寧。皖江南北望風納款者數十州縣。江南各縣降者踵接。其自歸麾下願效死殺敵者。日數千人。而我軍亦四集。聲勢益壯。自金陵至海口。旌旆相望。諸將皆大喜。唯甘國公與陳永華以爲憂。永華私語國公。我軍幕上黑氣如墨。殊非佳兆。吾欲爲王言之。王方得志。必不見聽奈何。公亦謂近日降人過多。雖云出於忠義。第人心叵測。難免反覆之虞。且兵不厭詐。脫有間牒驕入。豈不立敗。吾聞此二人言。意頗惴惴。默揣延平近狀。似覺失常。延平素精勤。泛愛容衆。現乃驕氣橫溢。不可嚮邇。且喜聞諛言而惡讜論。豈天不欲中興吾明。故奪其魄耶。一夕吾登山四望。遙見黑雲起於斗牛之間。亟奔告國公。謂大雨且至。我軍營地低窪。宜亟徙高處。公言於延平。延平曰夜已深矣。徙營慮有敵乘。待明議之未晚。其夜四更。雨忽大集。平明水深數尺。幸我軍頗習水性。猶能支持。然輻重遇水。轉徙頗不便。敵軍乘高鼓噪。四面馳下。我軍力與之角。選士

六千人皆出戰。無不以一當十。敵死傷山積。我軍亦疲。向午稍憩。敵將梁化鳳以生力軍萬人乘我軍之左。更以三千銳卒搗元戎幕府。延平督衛士力戰。殺傷略相當。降人忽從中應之。陣勢遂亂。我軍且戰且退。吾及甘國公爲殿。護諸將士畢登舟。舟順流而下。吾及甘國公以兵寡爲敵所圍。累衝不得出。遂皆被擒。敵以兵三十人守吾。其中一人曰趙甲。本降卒也。吾夙與稔。以目示意。甲低首無語。居二日。敵將大犒師。守者多醉。甲解吾縛與偕逃。深夜徬徨不知所往。聞張蒼水尙在寧國。問道往投之。遂留軍中。蒼水已得報。謂甘國公就擒後。敵獻諸北京。道過瓜洲。躍入江死。覓其尸不得。延平已全師南歸。惟軍艦道遇風。有十餘艘飄入小港。港狹不得轉側。爲敵所焚而已。未三月。敵兵漸集。蒼水勢益蹙。部衆散且盡。乃偕親卒千餘人迂道錢塘出海。吾自是偕蒼水漂流海上。凡三年。一日向晚。吾與蒼水同舟過舟山。忽有漁艇掠舟而去。頃之復返。投書舟中。舟人拾而視之。遂獻於吾。吾審爲甘國公手跡。驚喜交集。啓封果公手書。

書言吾投江後。敵覓吾尸不得。以爲葬身魚腹矣。吾固深諳水性。潛伏水中五日。敵敵稍懈。泗行至焦山。山中无本禪師。吾師也。匿吾寺中。吾聞延平已南歸。過崇明時。嘗遣曾遂攻城弗克。攻吳淞亦不得拔。吾深嘆當日延平不能用汝言也。吾請於吾師。欲微服往歸延平。師謂明祚已盡。天命有歸。非人力所可強爲。吾力駁之。謂忠臣謀國。不當諉諸天命。且華夷之辨。自昔所嚴。安能低首異族。師笑謂世界無不亡之國。自盤古以來。改姓易號。不知若干次。拚無數人頭。顛膏血。博一姓安富尊榮。曾何忠義可說。至所云華夷之辨。雖似有意義。所見抑亦太狹。民族勢力迭相消長。天道人事。未可概言。晉楚更霸。胡漢代興。前史往例。歷歷不爽。時代益近。畛域漸化。春秋時所謂蠻夷。秦漢後乃同內地。安知今所謂夷者。他日不與汝等並列爲衣冠之族耶。衆生本自平等。人類妄爲分別。已乖天理。今復於人類中自區種族。自相殘殺。孽報相尋。不胥歸沈淪不已。况吾國自東晉以後。雖迭受異族之宰制。皆不久而復我版宇。彼異族之來主吾

國者。且爲我所化而不自覺。今之滿洲。豈能逃此先例。汝曹第安之而已。奚必
懸南方脆弱之民。以蹈赴湯火耶。吾聞言忽若有悟。乃從吾師受戒爲弟子。木魚
僧粥。送我歲月。孰知今之老朽行脚。乃昔日叱咤風雲縱橫海上之甘輝耶。頃有
故人。將作浙海之遊。因使寄書與汝。汝年來奔走。無所成就。聞吾師言。亦可
以自知所處矣。蒼水先生學問氣節。吾所敬仰。第大勢如此。似不必復爲無益之
犧牲。必欲自貞素志。追蹤首陽可矣。無事苦斯民也。吾讀竟。見以書上張蒼水
。蒼水嘆曰。公言固當。吾夜觀天象。滿人氣運方盛。二百年後始就衰耳。聞滿
洲新主頗仁恕。果善撫其民。休養生息。吾人何仇焉。次日盡遣所部。昂之曰。
諸君誠有志興復。各散歸鄉里。以大義詔子弟。人心不死。終有還我河山之日。
必守磴磴之節。俱爲灰燼。無益也。畧皆感泣而去。蒼水遂屏居懸壘。蓄兩猿自
衛。吾往來海上。時致餼糧。山猿見吾來。輒長嘯若逆客。遇生人則反走。用是
蒼水得爲戒備。會有蒼水舊部王某。以通海故。爲清帥所囚。窮詰蒼水所在。某

竟吐實。清人以兵來索。蒼水逃匿。莫得蹤跡。其帥必欲致蒼水。盡發墓中林木。巖穴求之。蒼水遂見。執下獄。所部謀竄取之。防備甚嚴。不得發。蒼水從容就義。吾欲往收其骨。浙人已斂貲葬之。且爲起墳。吾乃拜墓下面去。迄今十餘年。回憶往事。恍惚一夢。昨有故人以書來。約爲東海之遊。明日吾當逝矣。煩以吾事爲鄉人述之。留作異日談助也。翌日。村人以先生且行。咸來爲別。到門已扃。或從門隙窺之。則先生巍然端坐。玉筋下垂尺許。已蛻化矣。破門入視。有火自耳鼻出。繞燃全身。或以水沃之。火乃益烈。有頃遂爲灰燼。衆議納灰營塔以葬。而旋風忽起。灰四散。竟不得集。然小桃源中人。至今猶知有孫先生也。

●坤維神話

黔中都勻。故土司也。改流而後。規制擬於內地。風俗猶雜苗疆。山嶺之中。林菁茂密。多爲苗族盤據。相傳苗民擅異術。能以符咒魘人。化爲飛禽走獸。被魘者輒惘惘失知覺。長日如在夢中。願其術亦不能久。或經歲。或半年。輒自解。

楊氏者中原人。以罪徙都勻。居三世矣。有二子。曰蔭曰蕃。孿生也。面目酷肖。雖父母不能辨。蔭聲實而弘。蕃清而堅。人以此識之。二子既長。英英玉立。友愛甚篤。遊處必偕。一日蔭偶出遊。蕃以微恙未從。蔭道遇二女。婉妙絕人。意頗傾屬。微睇之。旣歸頗縈懷想。夜向半。忽有飛鳥拂簷而墜。劃然羽脫。則晝日所遇女子也。大喜。詰所自來。女自言盤姓。盈其名。家故苗族也。感君子垂盼。故羽化相就。倘不棄菲陋。願締永好。蔭愛其美。納之。次日。蕃知其事。意殊不謂然。未敢訟言兄過。願自是兄弟情好稍殺。不復如前此之形影相隨矣。踰月。蕃忽出遊。經夕不返。蔭以爲或在戚好處流連也。次日仍未歸。逼徵諸相識者。皆曰未見。蔭乃大恐。懸賞購其弟消息。十日寂然。蔭思弟綦切。幾廢寢食。匆匆三月消息仍渺。蔭大悲曰。吾弟殆已化異物矣。會有流人自中原來。擅壬遁之術。人有介蔭往訪者。卦成。卜者詔曰。事殊蹊蹊。行人且歸。但兄弟猶未得相見。奈何。蔭曰。吾欲出求吾弟。途安從出。卜者揲算有頃。曰。西南

得朋吉也。但非兄弟相見之卦。奈何。蔭曰吾行決矣。不得吾弟弗歸也。以告盤盈。盈阻之不可。遂行。盈自蔭去後。獨居寡歡。旦夕凝望。蔭一去兩月。渺無音信。一日向晚。聞叩門聲。啓門則蔭昂然入。盈就與語。蔭弗答。雙目直視。若不相識。逕入書室。闔門靜坐。不飲不食。如是者可三月。盈旦夕悲泣。無如之何。願窺見其神采弗衰。則亦聽之。唯日盼蔭歸。慰解其心而已。未幾蔭果歸。入門。即詫曰。吾弟歸未。盈聞聲。審爲蔭。乃知昔日之歸者蔭也。曰歸久矣。但其人似已喪魂魄。可若何。蔭破門入。蔭見之。曰吾兄歸耶。吾今始得復吾自由矣。戚友聞兩人歸。爭來問訊。蔭因自述所遭。衆皆詫爲異事也。先是蔭出遊。道遇一媪。頻以目攝之。蔭不覺從之行。漸入山嶺。道益險惡。而天色已暮。遙見炊烟起處。就之。則荆扉半掩。媪已俟於門外。曰日晏矣。山中多虎狼。盍稍憩。蔭乃入門。聞呻吟之聲。媪曰。珍姑。汝意中人至矣。旋偕蔭入室。一女郎扶床而坐。病體奄奄。曰來何遲也。蔭茫然不解。欲出。媪止之曰。郎君勿

行。聽吾一言。吾爲盤氏。是吾女珍也。日者吾女及吾姪偕游邑中。道遇郎君。乃蒙垂盼。渠二人深感於懷。吾姪既歸。夜竊吾衣以遁。踰月未歸。吾審其情亦聽之。吾女素拘謹。竟以鬱思成病。吾愛之甚。敢以小術攝郎君至此。冀吾女獲慰所望。疾可漸瘳。此後有生之年。皆郎君賜也。唯郎君憐之。蕃曰。嫗誤矣。如嫗所言。殆吾兄歟。嫗喜白。果爾尤佳。吾姪既歸汝兄。汝即以吾女爲室。天緣湊合。孰過於此。願謂珍曰何如。珍俯首不答。意似以爲可。蕃曰。吾不能爲野合之事。吾兄弟自異趣。勿以吾事例我。吾今行矣。拔關欲出。嫗怒曰。汝既來此。能入亦不能出矣。從我者福且無涯。否則立見墮落。蕃益憤。曰汝乃欲以力脅我耶。吾堂堂男子。寧能受人迫脅。吾欲行即行耳。汝其奈我何。仆嫗於地。啓門逕出。嫗喃喃有頃。含唾噴蕃。蕃覺體如繫。遂顛。願視己化爲狼。心猶了了。珍泣曰。吾母無乃太很。嫗曰。渠能知悔。吾自有術解之。否則聽之。是人很惡若此。胡足戀戀。蕃益怒。但口不能言。視之以目。嫗曰。汝尙敢作此狀態

向人。莫怪老身辣手也。更舌嚙血噴之。蕃乃迷惘。頓失知覺。遂出門。行亂山中。從羣狼遊。不復記日月矣。一日經某山洞。洞口有小菴。一僧卓錫其中。瞑目趺坐。狼趨就之。遂臥其側。僧既出定。熟視而歎曰。夙世孽緣。報乃弗爽。幸善根未泯。老僧今爲汝解之。解所披僧架覆其上。頃之狼毛盡脫。復化爲人。蕃也。僧曰。汝今愈矣。汝宿世本獵戶。以捕狼爲事。所殺過多。其後入山困於狼。幸遇某長老乃得脫。汝亦深自懺悔。茹素禮佛。僅得善終。轉生猶獲人身。第夙孽已重。應以狼身受報。賴汝秉心剛直。未至沈淪。老僧今送汝歸。汝受驚已深。未易滿被。歸後靜坐百日。百日之內。勿或言笑。乃可無患。僧言已。復出丸藥如梧子者三。曰吞此可百日無飢渴。待汝兄歸乃飲食。陰曰。弟所見僧厥狀如何。蕃具述之。陰曰。然則吾與汝所遭者一人耳。因言自入山後。晝行夜宿。西南去可三日。爲土人所囚。乘間夜逸。墜山澗中。忽聞澗底啜泣之聲。天明乃見一女子。蓬首垢面。吾憐之。援與俱登。女自言盤姓。珍其名。家有老母

。以事與鄰人鬪。鄰人弗敵。不知何方野僧。乃爲彼助。縮吾母以去。吾方臥病。強起追之。弗及。失足墮此。先生何人。似曾相識。吾曰。女郎得勿吾姨耶。吾妻固盤姓而盈名者也。女曰。噫吾姊也。郎君。吾爲汝憔悴矣。自爾日相見。迄今未忘。嘗請於吾母。爲吾物色郎君。吾母憤憤。乃以術招令弟來。令弟性執拗。屢忤吾母。吾母以術魘之。竟化爲狼。遂去不知所往。嗟乎。吾滋恨當日未能諫阻吾母。致陷乃弟於非類。吾滋愧對郎君矣。吾聞言大驚。曰吾此來欲訪吾弟踪跡。弟竟受魘至此。吾將奈何。珍曰。事已至此。無他望。惟速求吾母爲渠解魘耳。吾曰。汝亦能爲之否。珍曰。吾母此術秘不傳人。彼嘗告我。謂凡能爲魘術者。往往爲魘所制。身心不得自由。當施術之時。兇很若喪本性。事過境遷。悔輒無及。解魘之事。尤感困難。酒醴牲牢。必厭廢欲。術乃得行。否則輒覺有人阻撓。往往中止。吾習此術且三十餘年。所魘人且百計。其人未必皆吾所深憐。爲吾人解魘。索酬甚奢。亦非吾之本意。吾旣以此自困。安忍更陷汝曹於惡

○吾姊妹於此道皆弗習也。吾乃曰。吾必先得吾弟。乃能與汝往尋汝母耳。珍曰。汝弟已化爲狼。荒山之中僦僦狉狉。胡從辨識。且渠受魔至深。非五年不克復其本象。倘不先覓吾母。何由能得汝弟。吾無言。遂與偕行。吾意雞足山爲佛教聖地。僧衆所集。又適當西南之望。吾兩人乃入滇。跋涉月餘。始至其地。琳宮梵宇。前後相屬。所見皆常僧。無高行者。最後至三摩寺。寺有老僧年九十餘矣。神采澄澈。似有道者。吾及珍叩之。弗答。固問則示偈曰。來從何處來。去從何處去。征鳥已倦飛。莫叱王尊馭。再叩之。則曰先迷後得。吾及珍尋繹所言。復遵故道歸。行近安順。忽失道。入山谷中。遙見蘭若趨就之。一僧出應曰。客得無自雞足來耶。吾師待子久矣。導入方丈。主僧見吾。起爲禮。曰汝二人偕行。往返二千里。乃能不涉男女之私。殊可欽也。楊居士之友於盤居士之純孝。足以格神明矣。盤媪來此已久。此媪罪惡。萬死不足蔽辜。念其猶知自悔。且以孝女故。貸其一命。吾已使渠日禮大士。誦大悲咒百遍。滿八十一日乃得歸。今五

十日矣。汝兩人可留此。待渠偕歸。吾曰。吾欲往尋吾弟。心中如撻。不耐久待。幸大師爲我圖之。僧曰。居士勿躁。令弟已早歸。但汝兄弟未及相見之時。汝宜稍耐。否者且俱不利。吾旣神僧之言。不敢不聽。乃留寺中。珍則往伴其母。時學禮佛。越三十日。限期且滿。盤媪忽至僧前。長跪請受戒。曰。吾自禮佛以來。頓覺心境明徹。向日所爲。胥同一夢。所苦者時時有魔相擾。輒誦大悲咒制之。幸不相逼。然吾心終覺弗寧。惟師施法力。爲我解脫。僧許之。乃摩頂受戒。次日。吾往告珍。偕謁方丈告歸。珍曰。吾日來參禮三寶。此心似有所悟。吾不願復履塵世。吾母旣已皈佛。吾當結菴深山。終身奉母耳。郎君可自歸。吾曰。汝母女不行。執爲吾弟解魔。珍曰。師已爲汝弟解之矣。吾兩人又奚事焉。吾以問僧。慨曰。信。居士可歸。令弟厄難且滿矣。吾遂兼程返。果得與吾弟相見。嗟夫。天佑吾兄弟至矣。盈旁立。聞二人言。木然者有頃。歎曰。吾嬪及妹竟以此終其身。吾乃弗如。盈居蔭家四十年。生三子。夫婦偕老以終。

●飛鳧冥迹

粵人陳金行賈於舊金山。善觀時變。致產數百萬。光緒末年。嘗以賑災輸鉅款得
獎特用道二品封典。遂以指紳自居矣。金妻早逝。遺兩子一女。次子夫婦並沒。
有女孫二人。金自撫之。長子昂。美少年也。英特喜讀書。嘗畢業於美國某大學。
。清季政府方網羅留學之彥。應試者輒得進士舉人出身。授以翰苑部曹諸職。金
早歲行賈。於科名不能無艶羨之情。既聞留學生可得清秩。即促其子歸國應試。
資送甚厚。並電託上海某銀行。凡厥子所需。悉給勿靳。昂豪邁有大志。平日憤
祖國顛危。輒深歎惋。又學於美洲。習知共和政體之優良。頗不以其父爲然。願
未敢顯示反對。且欲藉此一觀祖國氣象。遂附輪西歸。未逾月至上海。滬上故多
大賈。皆與金有舊。聞昂歸爭款待之。昂意殊不屑也。惟日從革命黨人游。縱談
改革方略。滬上爲繁華之地。選色徵歌成爲風尚。雖號稱志士。亦復未能免俗。
一日昂赴友人之約。座中偶見一鬟。風致絕佳。驚爲天人。罷酒即有人慫恿往訪

。昂造其梓閣。尤清雅無塵俗氣。益爲傾倒。姬旣審昂富人子。又觀其丰標俊爽。深自結納。昂自是造訪無虛日。未半月姬遂委身焉。金自昂行後。時致書滬上故友。詢昂近事。曰。吾望彼光大門閥。乃爲湛族之謀耶。一日間三電促昂歸。昂不得已。遂發往別姬。姬泣涕流漣。誓相從。友人有好事者。勸昂納之。姬遂與昂偕歸舊金山。金見昂挾稚姬歸益怒。命昂去之。昂不可。金即召主計者來。命以金十萬元及住宅一區致昂。語之曰。辱子玷吾家門。吾不能復以爲子矣。自今日以往。聽彼自立門戶。勿復至吾家也。昂屢遣人乞恕於其父。金卒不聽。昂乃偕妻妾別居。昂妻某氏。妬而無子。姬曲意承事。嫡庶暫得相安。逾年姬生一女。昂及其妻皆鍾愛之。姬自生女後頗憔悴。昂妻輒勸出遊。昂意其妻愛之也亦聽之。未幾。昂以事赴紐約。經月乃返。入室不見姬。詢諸其妻。妻長嘆曰。勾欄中人竟不可造就。吾始憐彼鬱鬱。勸令出遊以自疏散。不意乃成大錯。距今五日前渠夜赴某園觀劇。天明御者返報。謂待渠竟夕。竟無踪跡。僅以空車歸也。

吾即遣人四訪。聞輪船公司人言。是日早晨。有人挾一少婦登舟赴澳門。其狀似與彼相彷彿。昂聞言大憤。曰吾以彼故絕吾父子之情。所犧牲者亦已巨矣。彼之報我乃如是。不殺此狼。吾死不瞑目也。吾必已跡其所往。雖然。彼誠有罪。其女則猶吾女也。吾明日當赴澳門。此女煩善畜之。汝素鍾愛此女。當能視同己出也。妻力勸昂。謂奈何以一姬故輕冒風濤之險。且敗柳殘花寧足繫戀。若爲彼負氣。事尤不值。昂弗聽。明日遂行。妻自昂行後。頗善視其女。而昂一去經年。竟無消息。其妻頗以爲慮。奔告於金。金殊不措意。曰不肖兒果一去不復返者。尤佳事耳。昂妻大慟。金曰。渠素無恩於汝。汝奚戀焉。拂袖而入。昂妻不得已遂歸。第日撫孤女以自遣。女既漸長。頗與嫡母忤。昂有妻妹。憐其姊孤苦。願以所生子爲嗣。昂妻請於金。金曰。此汝家事。何與於我。吾於長房恩誼絕矣。勿相聞也。昂妻乃螟蛉畜之。自是女愛益弛。旦夕一媪護視。媪知主人意所在。事女亦弗如禮。女稚弱無如何。飲泣而已。金於諸女孫中惟愛長者曰鸞。而於女

。則深恨痛絕。惡其母因及其女也。鸞嘗以歲時過伯父家。見女即鍾愛之。字之曰鳧。○既不得於嫡母。益與其姊暱。鸞則時時往視。友愛甚至。鸞之妹唯嘗以爲言。謂吾姊愛鳧乃甚於愛我也。金家人久居美洲。頗染西俗。跳舞音樂之會。時有陳氏女公子芳影。鸞姊妹皆善修飾。又饒於資。以故交際場中。頗爲一時傾倒。鳧既漸長。恣態秀曼。不事粧飾而自覺絕俗。家雖多貲。扼於嫡母。服飾未能稱意。鸞每出必挾鳧與偕。客有見鳧者。輒繩其美。鸞益自喜。以爲吾有妹如天仙也。一日某鉅商開化裝跳舞會。先期柬約諸與會者。鸞姊妹皆盛飾以往。鸞過鳧邀與同行。鳧方啓其母遺篋。得故衣一襲。意似弗慊。更啓他篋。搜索未半。忽長號而踣。鸞適入門。見之大駭。曰何事若此。鳧曰無他。天暑室中空氣又惡。不覺暈耳。因起闔其篋加鑰焉。曰吾今夕當赴會。嫡母乃以此衣與我。我安能服此。解襟示鸞。則古代宮人衣也。鸞曰。此人奴服耳。宜汝之弗屑也。鳧曰。吾意吾母生平必多奇服。開篋尋之。果得此襲。姊謂如何。鸞審其衣爲散花天女

所服。曰可矣。但茲事會請命於伯母否。鳧曰。此吾母遺衣。分宜爲吾所有。渠安能與吾事。鸞意似不謂然。曰汝旣云爾。吾亦無他可說。雖特。汝不此之服。更從何處得美衣者。因挾鳧偕往。會中諸客見鳧來皆屬目焉。其夕諸客皆戴假面具。奇形異狀。觸目皆是。有作天王者。僉曰天王宜伴天女。其人即前自請與鳧偕舞。鳧亦諾之。樂旣奏。諸客僭僭屢舞。樂止皆喘。天王與天女同憩於琴側。鳧雖未識是人真面。頗覺溫雅可親。三舞。主人請諸客各去面具。鳧方轉眼間。是人已他適。怏怏無如何。而夜已三鼓。鸞僕催鸞速返。言主母有命。女公子年穉宜早歸也。鳧未肯去。而鸞力勸鳧行。謂今夕且歸。明日午後當邀汝遊海濱公園也。鳧不得已行。旣歸入見嫡母。昂妻大驚。謂鬼物乃夜見耶。僕人亦駭謂鬼物安在。昂妻以手指鳧。鳧曰。奈何謂吾爲鬼。昂妻則大怒曰。孰教汝服此者。鳧曰。此吾母遺衣也。吾不能服此。孰當服此者。吾啓篋自求之耳。無與他人。昂妻益怒。曰汝自以爲美耶。乃益增汝醜耳。匪直醜也。乃爲吾家之玷。鳧曰。

吾殊不解所謂。詎此衣不當服也。昂妻盛氣曰。汝年穉始未知汝家事。汝母媼也。渠居家時常作此裝。遂爲匪人所誘。失身潛逃。汝父一怒去家。迄今未返。吾家人以門風所繫。諱莫如深。今汝乃於稠人廣衆中作此奇裝。使人憶及汝母。距非自揚家醜。孺子聽之。今後若復如此。莫怨吾奪汝自由也。鳧哭曰。大母見責固當。第以吾所見。吾母必不狼狽至此。大母幸勿相誣。吾寧身受百羅。不忍聞人議吾母也。昂妻怒甚。曰惡種固無良苗。即曳鳧入一密室。曰汝既不從吾教。吾亦不能以汝爲女。自今以後。汝即永居此間。勿更作他想也。遂下鑰焉。鳧大呼且哭。而夜已深無應者。室爲樓之第二層。外臨廢圃。鳧號呼既久力且竭。忽聞圃中歌吟之聲。陰念夜已深矣。殆鬼物耶。顧身在幽困。鬼亦胡憚。遙與之語曰。歌者誰也。其人應曰。吾天王也。來拯天女。鳧知爲頃間同舞之人。方欲細訴衷曲。而昂妻忽來。挾瓶水及麵包一碟語鳧曰。飢即噉此。明日當別爲汝設食也。語已匆匆即去。鳧聞其去已遠。復轉向窗外。與圃中人語。忽羣鼠啾啾。聚

噉麩包且盡。鳧揮以手。觸瓶瓶倒。水流於地。顧視羣鼠皆斃。鳧長嘆曰。此間不能居矣。即啓窗語其人曰。吾欲脫此幽獄。君能相拯否。其人曰。此間無梯。唯有繩而下。今夕不能拯汝。且待來夕。鳧泣曰。吾不能一刻居此。安望來夕。其人曰。天已將曙。吾當歸而取繩。往返間天色已亮。勢難相援。鳧毅然曰。然則吾當攀檻下投。君以手承之。僥倖可全。其人不可。曰此危道也。吾不汝從。鳧曰吾計決矣。即奮身窗自中下擲。其人承之以手。鳧身輕幸不墮地。然其人暴受下擊之力。竟不能自支其腔。遂跪於地。鳧亦被擲尺許。就視之氣息已絕。撫之不醒。其人嘆曰。不用吾言遂至於此。而晨鷄鷄喔喔。曙色已呈。不得已置鳧草上而去。鳧實未死。頃之氣漸蘇。四望無人。自念無可投止。姑往訪鷺。冀能爲計。坐息奔至金宅。鷺甫自外歸。見鳧大驚。曰汝獨不畏祖父見逐耶。乃黎明至此。鳧哭曰。吾來尋吾姊。不謀與祖父相見也。姊不我留。我即自去。奪手返奔。鷺亟挽之曰。汝清晨來訪。必有他故。姑隨吾入。吾力足以底汝

。即偕鳧入己私室。敦囑女侍。謂是女爲吾良友。吾欲留彼暫憩。勿泄於人。吾當以金鍊賚汝。今日有來訪我者勿爲轉達。告以吾倦甚欲眠。不欲人相驚擾。女侍聞有重賚喜甚。諾而退。鸞始詢鳧所苦。鳧一一具告。鸞歎曰。嗟乎。吾寧與汝易地而處。不忍見汝之困頓也。鳧大感泣。曰吾姊厚德。吾乃不知所報。其日鸞即遷鳧於海濱別墅。以一媪爲侍。衣服飲食之費。皆取於鸞。昂妻既覓鳧不得。奔告於金。金怒甚。謂是女本非吾類。逃去亦佳。勿再以汝家事慰乃翁也。昂妻遂去。金女嫁黃氏士族也。金既喪次子。又斥逐其長者。獨其女時相往來。金亦用以自慰。女有兒曰文龍。幼而韶慧。金鍾愛之。資遣入美國某大學。年二十三已得博士學位。金陰欲以鸞歸文龍。且賸以私財百萬。其女亦陰有是志。鳧失蹤後三日。文龍隨其母來謁外祖。金留與飲。鸞姊妹亦與焉。文龍曰。三年不見。妹已長成如許矣。飲酒甚酣。金察二人情意頗暱。以語其女。女曰是固兒所願也。未知文龍之意如何。次日女私問文龍。文龍曰吾妹洵美。第兒意已別有在。

今吾母云爾。兒不敢違也。自是文龍居金家。戚友皆知此人爲陳氏佳婿。亦即承產之人也。文龍與鸞出入必偕。一日鸞偶臥病。文龍獨遊公園。向晚忽見一無賴者追一少女。女窘甚。文龍義憤激發。蹴無賴者仆之。曰汝乃敢無禮若此。無賴者曰。彼女於汝何親。乃敢無端干涉吾事。文龍曰。吾職宜護弱者。汝不速去。吾拳立下矣。其人逡巡而逸。女見其去遠。乃返與文龍爲禮。文龍大驚。曰汝何人。竟未死耶。女恚曰。與君胡仇。一見便咒吾死。文龍曰。吾過矣。女郎非陳氏女公子芳名爲鳧者耶。女驚曰。君何由而相識。文龍曰。女郎不嘗於某日化裝跳舞之會耶。不嘗與喬裝爲天王者同舞耶。不嘗由密室窗間奮身自擲而下耶。鄙人皆嘗與其事者也。鳧曰。然則吾與先生神交久矣。敢請先生姓名。文龍曰。吾王姓而文龍名也。當日女郎胡由得蘇。又何以在此。鳧告之故。文龍曰。不審女郎能許我同作公園之遊否。鳧意稍遲疑。即應曰諾。自是文龍日與鳧相見於公園。兩情益洽。文龍頗自恨不早與鳧相見。致訂婚於鸞也。鸞婚期旣近。文龍奉母

命移居某旅館。鸞亦日爲婚嫁之計。無暇問鳧。鳧亦知鸞且嫁。不知其所嫁者即文龍也。鳧既見棄於其祖。又不爲嫡母所愛。故於陳氏戚串殊少往還。不知文龍即己中表。文龍又自詭爲王姓。鳧益以外人視之。但覺此人溫雅可愛。能急己之急。不期輸情於彼。陰有託身之意。文龍亦雅欲與鳧訂終身之好。願以鸞約已定。未能中棄。且鸞富鳧貧。果純以愛情相結者。將自陷於窮困。况外祖金性既剛暴。又愛鸞而惡鳧。苟逆其意。必絕親戚之好。己身不足計。倘因而遷怒老母。豈非至痛之事。終夜籌思。竟不成寐。次日遂不敢復至公園。懼復與鳧相見。且爲情絲所縛也。鸞婚前一夕。遍召諸親友。期於次日午後同往教堂行禮。鳧亦被召。自念吾姊既得所矣。吾苟能得王君偕往觀禮。尤可喜也。日來此人竟未見臨。將無有他故耶。吾年尙稚。又無可託以探消息者。可奈何。次日晨。文龍往見鳧。將爲永訣。鳧見之大悅。頗怨文龍蹤跡之疎。文龍遜謝。鳧要與俱往教堂觀鸞婚禮。文龍不可。曰吾今日午後將有遠行。特來與汝訣耳。吾兩人自今以往。

不能復相往還矣。鳧聞言涕淚交頤。曰君胡太狠。乃爲此言。吾不信兩人情誼遂終於此也。天乎。吾安得如吾姊。文龍不覺惻然。自念吾將昧吾本心竟婚於鸞耶。抑忍見所愛之人。矢志憂傷耶。是女今猶未知吾事。已傷心若此。倘盡知之。且將若何。吾不能以百萬金錢易吾所愛之人。真愛情固未可以財產計也。吾意決矣。他可勿問。乃曰。女郎勿悲。吾與汝相識纔數月。吾之身世。女郎或未深知。吾一書生耳。家貧不諳外事。獨以至誠自結於女郎。乃蒙女郎芳盼。爲幸多矣。果承不棄。願締永好。如何。鳧覲然曰。固所願耳。文龍曰。然則吾兩人即以今日訂婚。吾與汝偕謁牧師何如。鳧頷之。文龍是日本服禮服。鳧亦盛飾將往賀鸞。即偕赴牧師處成禮。鳧喜曰。吾姊妹二人。乃以同日結婚。惜乎鸞未知吾事。果知之當益增其歡愉也。文龍無語。是日午後。陳氏宅中賀客畢集。婚期本以三點。鸞已盛裝以待。日既西。文龍猶未至。問諸旅館。則云是日已早出。鸞遣婢女。待於門側。有見即以告。然車馬紛集。皆賀客也。或言新郎已赴教堂矣。

亟遣人往視。則禮堂猶設。三數牧師自相擬議。見陳氏人來。曰天已安矣。今日殆難成禮。吾儕居此數十年。未嘗見如此事。殆以吾儕爲戲耶。赫赫上帝。斷不容汝曹作誑語也。使者既歸。遇一童於門。手一封書致鸞者。婢女受之。以示鸞。鸞讀竟。即暈於地。諸人皆大恐。金趨往視之。遂移鸞入臥室。金即讀來書。亦拍案大言。曰此畜乃無人理。諸人始知書自文龍處來。略言吾驟遭事變。不克如約。吾心中實未嘗有汝。倘得解約。亦彼此之幸也。諸人皆往慰鸞。金獨大怒。謂吾年雖老。猶能手刃此畜。渠行事若此。直欺老夫無能爲耳。吾必弗赦其罪。而文龍是日午後已偕鳧東行。行之明日。昂適返。其妻見昂歸。且喜且懼。昂言姬人渺無消息。殆已死矣。今其女安在。妻曰。渠亦效其母所爲。隨人逃矣。昂曰。胡不我告。妻曰。吾久不得汝踪。何由作書告汝。昂曰。吾行時諄諄相囑。汝胡不察。竟使至此。妻曰。彼天性非美。他人焉能時時約束。即汝在家。亦無如何。昂曰。渠平日常與何人往來。妻曰。惟姪女鸞耳。其他則吾弗知。昂聞言

。即造金宅。門者弗納。言主人日來心緒惡劣。不欲見客。昂呼門者名。曰汝竟不識我耶。門者始辨爲昂。曰。公子來耶。不見久矣。乃蒼老若是。雖然。主人方盛怒。公子勿入。昂曰。我非來見主人。欲一視女公子鸞耳。門者曰。女公子方臥病。昂曰。吾來視疾耳。門者未答。適有女僕自內出。門者告之。僕曰。姑少待。吾當入請命。頃之乃出。曰。女公子。已醒。可入視也。昂遂入。鸞已起坐。昂詢鸞事。並及鳧。鸞具告之。昂長嘆曰。不意世事變幻一至於斯也。旣出四往覓鳧。得鳧於紐約逆旅。文龍已他往。惟鳧在耳。先是文龍旣挾鳧東行。忽憶其母尙居旅館。未知厥狀如何。意頗刺促。居數日。言於鳧。謂小別兩日即返。鳧意殊弗欲。而文龍持之堅。鳧乃聽之。及期文龍弗歸。鳧坐臥不寧。飲食亦不下咽而昂適至。鳧方臥。聞逆旅人與客言。以爲文龍歸也。及見乃一斑白者。未嘗相識也。鳧方引避。其人呼曰。吾女猶識汝父否。鳧審其貌。髣髴憶之。曰果吾父。即趨前。攬其父而哭。昂亦哭。久之乃止。鳧因自言吾之身世。鸞姊殆

已爲吾父述之。吾之近事。吾姊殆未知也。昂曰。吾蹤跡汝至此。始知汝身已嫁。第茲事重大。嫡母縱於汝無恩。汝胡不商於汝姊。萬一失身匪人。悔將何及。鳧曰。姊方忙於嫁事。兒實未暇與商。且王君義勇之氣。兒深欽佩。敢決其非匪人。吾姊見之。亦信其足以託身也。昂曰。渠胡棄汝於此。鳧曰。渠必不至相棄。此中殆有他故。使渠不能即來耳。吾父從家中來。曾見吾姊婿否。昂歎曰。尙何言哉。汝姊妹殆同運耳。因述鸞事始末。曰汝姊未嫁而棄。汝旣嫁而棄。渠固勝汝多矣。鳧曰。吾父勿以此冤人。昂曰。汝勿戀戀於彼。吾年來經營商業。致富百餘萬。吾力足以恣汝所欲。願勿齒及彼人。以傷汝父之心。吾於世間已無他戀。惟汝猶繫吾心耳。汝若愛汝父。幸勿違吾意。鳧不語。數歎而已。其明日。昂即偕鳧往遊巴黎。將行作書致其妻。言汝罪惡吾已悉知。不復與汝相見矣。家中財產儘足了汝此生。吾亦不過問也。復作一書與鸞。述與鳧相見情景。及後此出遊方向。書旣付郵。即私召旅舍主人。賄以金二百。曰吾行後。王姓者尙歸。

可告以吾女已沒。其父來此收骨以葬。若問葬地。任指野塚告之可也。是日。昂及其女遂以舟行。沿途鳧甚沉默。似有所思。昂輒譬解。鳧終弗釋。既至巴黎。居大旅館。日導之出遊。鳧驟觀華侈之俗。不能無動。昂更爲盛購衣飾。鳧意似亦歡悅。昂私以爲女兒天性。易動以紛華。果能悉如所欲。日久當漸忘前事矣。鳧居巴黎且一月。若覺漸厭。昂偶呼與偕出。或辭以疾。昂知其別有心緒。謀選地以解其鬱結。乃游瑞士。留經月。往意大利。遍歷諸古跡。鳧意似漸解矣。一日得鸞來書。言已嫁黃氏。並乞昂於漫遊歸時。携鳧往過其家。鳧聞鸞已嫁大喜。而衷懷微覺不適。昂知其意。無如何也。文龍自與鳧別後。復至舊金山。逆旅主人爲言其母已歸窳矣。文龍匆匆檢書囊。即一書上其母。述已締婚始末。乞母恕己無狀。且曰新婦淑姿。母見之亦當心解也。書未發。出遇客於門。曰君非黃文龍耶。曰然。客曰。鄙人受陳翁託。待君久矣。陳翁以君辱其女孫。欲甘心於君。囑吾偵君踪跡。今當歸報陳翁。翁必以人來召。吾察翁意殊惡。足下宜自爲

計。文龍曰。吾自審所爲無不可告人者。翁果不善吾所爲。吾亦聽之。吾決不自
餒。明日當謁陳翁也。客曰。君誠男子。以小人之腹妄度君子之心。是吾過也。
文龍次日果往謁金。金盛氣以待。文龍侃侃自言。結婚宜以愛情。吾於鸞愛旣弗
至。強締姻好。且至仳離。與其反目於終。毋寧慎之於始。彼此各行其是。翁何
怒焉。語未旣。金已怒不可遏。曰畜生乃作此語向人。遽以刀斫文龍。鸞亟奔入
以身翼文龍。文龍背已負傷。遂絕於地。金怒未息。文龍之母亦出。見其子臥血
泊中。則大哭。金亦自悔孟浪。乃以人移文龍入臥室。鸞左右護視。晝夜不去側
。文龍頗感其意。願每念及鳧孤寄旅舍。旦夕望已。輒爲惻然。覺鸞恩意雖隆。
終不能奪己心頭之鳧也。文龍病稍愈。鸞始問見棄之故。文龍默不答。越三月。
文龍始復。陳翁語其母。議爲畢婚事。文龍自請於母。謂母果以吾爲子者。乞稍
緩。不然。兒將無以自處。其母惻然許之。文龍遂赴紐約。復至舊居。居停主人
見文龍來即大哭。謂夫人日望君歸。旦夕以淚洗面。竟遭篤疾以歿。賴其父來乃

得成殮。今已葬矣。文龍信之。即問葬處。適有新塚。即指以示文龍。文龍大哭。謂吾非負汝。迫於事勢耳。乃出鉅金畀居停主人。謂是塚煩隨時護視。即以此爲資也。主人受之。深自歡幸。念茲事差無故實。吾乃得兩家金也。文龍既聞鳧已死。懊喪而歸。遂與鸞成婚。時鳧已倦遊。乃請於其父。願歸視鸞。昂許之。遂偕歸。至之日。文龍適他出。鳧與鸞相見甚歡。向晚文龍乃歸。鳧遇諸客室中。文龍失聲大呼而仆。鳧驗其聲息已絕。大哭曰。數月不見。幸而相遇於此。又永訣矣。天平奈何。鸞亦聞聲奔出。大呼吾夫何爲至此。鳧昏迷間驟聞此言。不覺止哭。竊訝吾姊乃以吾夫爲彼夫耶。文龍有頃乃醒。見鳧在側。語鸞曰。吾壽殆不永。白日乃遇鬼。鸞曰。鬼安在。文龍以手指鳧。鸞曰。此吾妹鳧也。文龍長嘆曰。鳧耶。汝負吾矣。鳧聞言切齒。陰念汝實負吾。乃轉謂吾負汝。世間男子。洵可畏如蛇蝎也。時文龍之母及家人咸集。擁文龍去。鳧欲辨不能出口。飲痛而已。其夕鳧閒步黃氏園中。忽聞足音蹙然。願視文龍也。鳧見文龍即曰。君

自負心。棄吾於逆旅。乃反謂吾負汝何也。文龍曰，吾因事勾留。未能及期遂返。此誠吾過。抑亦不得已也。汝獨奈何以死誑吾。致吾蒙此重咎。汝試自問於心安否。鬼曰。吾何嘗誑汝。汝何由聞吾已死。文龍曰。聞諸逆旅主人。鬼曰。噫。君乃爲彼所欺矣。此必有人。欲間吾二人。故賄彼爲之耳。文龍曰。往事且勿論。今將何以處我。鬼泣曰。吾已見棄矣。復何言。吾所以留此未去者。欲一見自明心迹耳。今事已大白。明日吾逝矣。文龍曰。否。吾愛汝實甚於戀。且吾兩人訂婚於先。汝旣健在。前約不可廢也。繫之婚約。於律宜無效。鬼泣曰。若此則害於吾姊矣。吾姊於吾恩誼至重。吾不能以此爲報。吾與君誼已絕。君宜聽吾自由。文龍曰。汝愛汝姊。奈何獨不愛我。我若失汝。便無生趣。汝獨不稍見憐耶。鬼終不可。曰吾愛姊尤甚於愛己。汝能與吾姊永諧厥好。即所以愛我者也。吾有老父可依。足以了此生矣。至汝所以自處者如何。汝當自審之。非吾所敢知也。文龍方欲有言。而僕人來告晚餐已備。遂皆出。飯旣畢。鬼自言病腦。欲早

睡。鸞爲布置而去。次日。鸞往視鬼。則其室空矣。詢諸僕人。皆言鬼今日晨起。出遊海濱。呼吸新氣。殆留連未歸耳。鸞遂不以爲意。午後得鬼書。言已隨吾父漫遊世界。吾姊恩誼永不能忘。恨吾命薄不能長侍吾姊左右也。鸞得書。浩嘆而已。鬼行後數月。鸞亦偕文龍爲瑞士之游。昂妻忽發狂疾。疾作即奔赴鬼所居臥室。啓鉅篋悉傾其裝。篋底乃有屍骨一具。衆人皆奔視。肌肉盡脫。惟齒髮猶可辨。莫審爲誰。方倉皇間。鬼偕一嫗歸。嫗事生母甚久。以事被譴出。未幾鬼母即失踪。鬼游香港遇之。嫗言其母形狀甚悉。鬼即邀與偕來。嫗一見即辨爲故主遺體。於是鬼母蹤跡乃大白。鬼嘆曰吾無事矣。遂去。不知所終。

●王火夫

南中人好禳祥。信神鬼。自昔成爲風尚。而鬼物之於人。往往因信仰之故。而益恣其威福。九仙山者。閩中勝境也。山中有古寺。相傳多妖物。白日見狀於人。幻形爲男女老少。憧憧往來。寺僧惡其擾己。輒以符咒禁止之。而祟乃益甚。諸

僧衆於合十禮佛時。每覺有物自頂下注。拊以手則無有。或夜中禪定。鼻孔恒作奇穢。便大噴嚏。而顛。諸僧皆苦之。乃撤去符咒。卑詞乞禱。而作惡益劇。僧袈度牒或無故自焚。趨救之則火已息。每飯時盥甫近口。即粒粒化烟騰去。頃之。盥又已滿。諸僧寢食爲廢。久之稍稍散去。寺中一火夫留耳。火夫王姓。謹愿而木訥。家貧事母至孝。闔寺中人以其慧也。多戲侮之。王不與較。即相聚爲苦語嘲笑。亦杳若無聞。寺中自方丈以次。皆不能堪妖物之擾。王獨若未知其事者。物亦未嘗一擾王也。寺故爲某巨室家廟。僧衆旣四散。乃屬王使守之。王旦日偶一歸家奉母。夜則歸宿寺中。人或勸以勿往。亦弗聽也。王同村有老儒某者。平日規行矩步。言笑必依於聖人。嘗手批性理大全。自謂深得程朱蘊奧。能接孔孟心傳也。村中嘗爲跳神之祭。有靈附巫身。久不退。跳踉飛擲。巫憊甚。嘔血盈斗。諸巫皆集。謀解之不可得。老儒袖大學一卷。從容就巫前朗誦。未終卷而巫已醒。衆人皆驚。以爲聖經信有神力。能解諸厄。老儒則以爲吾道至正。邪神

因而退聽也。自是老儒恒沾沾自喜。而村人亦咸信仰。謂某先生真聖人之徒。將來當從祀兩廡。爭遣子弟就學。學舍隘不足以容。聞寺中方空。謀徙居焉。生徒頗以爲疑。老儒謂汝曹皆聖人之徒。豈不聞孔子未嘗語怪。而乃惑於悠悠之口耶。吾人道力誠堅定。妖物且將馴服。不爾亦將遠避。汝獨未見吾以大學一卷解某巫之厄耶。汝曹果多恐。且誦大學可耳。諸生徒皆應曰諾。遂遷入寺。然心猶惴惴。老儒作告妖文。言幽明既隔。各行其道。無相擾。居且二月。寂然無事。諸生人人皆喜。謂吾師至誠格物。雖韓昌黎之驅鱷魚不能過也。然老儒實無他長。胸中祇有高頭講章一部。其所批性理大全。亦皆東塗西抹。用自矜眩而已。匆匆月餘日。已屆初夏。夕陽既下。諸生中幼者皆散學。冠者數人環坐。聽其師教誨。老儒爲諸生講中庸第一章。述天命謂性一語。徵引至數百言。而諸生益瞠目不解。老儒嘆曰。道之不明也久矣。語未終。忽聞笑聲發於室隅。曰聖人大道。本在倫常日用之間。汝曹腐儒。必欲引而遠之。道之不明。誰之咎也。老儒大

驚。猶強爲鎮定。叱曰。何物妖魔。乃敢擾吾講壇。且至聖神位在此。汝其速避。因啓大學琅琅誦之。而笑聲益縱。曰汝曹爲人師表。旣不能身體力行。又不能昌明經訓。乃欲假託聖道。自高身價耶。至聖有靈。必不聽汝久擁臯比也。老儒見大學無效。聳然爲之罷講。諸生亦皆惴惴終夕。然竟寂無他異。心乃稍安。其明日。老儒晨起。諸生尙未就課。老儒方獨坐。忽見案上。盛饌羅列。大喜。欲恣瞰之而案空矣。瞥眼間見一垂髻女郎從簷下過。不覺驚爲絕艷。方注視。而其人已渺。老儒自疑矣。豈目眩耶。火夫王姓者入。見老儒兀坐。若喪魂魄。即以目攝之。老儒不覺內愧。面發赤。王亦無言。自潔庭除而去。旬日老儒已忘前事。復集諸生講孟子。至食色性也一章。痛詆告子。以爲異端。並自言吾生平修養有得。箠食瓢飲。樂在其中。雖太牢之奉。不足以移吾志。粉白黛綠。尤不足以動吾心。諸生聞者。皆疑信參半。老儒益自矜許。而室隅笑聲復發。曰不知案上盛饌。簷下女郎。先生對之將云何。老儒聞言大慙。噤不能聲。諸生竊竊議。以爲吾

師蓋僞善者也。異物乃發其隱。物亦直諒矣哉。其夕老儒遂不能安寢。深恨妖物。思有以懲之。聞村中某姓有正乙真人神符。能鎮壓邪魅。往假以歸。懸諸壁間。夜中老儒已寢。忽聞戶外人聲嘈雜。竊起視之。見一老人據案南面坐。環而侍者可七八人。一少年揭壁間符以示老人。老人笑曰。某先生以大學無靈。乃欲以此相恐耶。渠既聖人之徒。胡爲乞佑於道流。吾始以爲此君雖迂。心尙無他。今險狠乃爾。吾人不能復與處矣。此符吾當持去。返諸正乙可也。即捲入袖。老儒猛憶假符時。某姓人。再三戒勿失。不覺大呼。老人聞聲即曰先生出。老儒不覺自出。老人曰。吾自分於先生爲益友。不覺言之過直。先生奈何乃欲見仇。幸吾儕道力高。符不爲害。否者先生何以處我。先生旣不以吾爲友。明日可移去。吾以先生讀書人。不欲過爲已甚。行止如何。先生幸自決之。因擲符返老儒曰。先生可將還主者也。燈燭俱滅。寂無所見。惟皓月當空。壁上符固儼然在也。而寢門猶閉。老儒亦不自知所由出也。次日謝遣諸生。仍歸村中授讀。而寺中仍一王姓

者留耳。明年有遊方僧自江西來。自言生平遍歷名山大川。三上峨眉。六至鷄足。凡妖魅所宅。虎豹所居。皆嘗身經其境。所見異物情狀。多可驚可愕。幸吾心恬定。不爲幻境所搖。卒不能損吾毫髮。以此知佛祖所云。一切有爲法如夢幻泡影如露亦如電者。非虛語也。衆人聞其言。皆深歎美。以爲此僧洵善知識。老儒聞之。亦歎服。陰念此僧道力。宜可懾服羣魔。吾盍勸使卓錫寺中。果僧能懾魔固甚善。否者吾亦可自解嘲。乃謁僧。盛言寺中妖物可畏。非大師威德。不足感化而馴服之也。僧曰老僧亦嘗聞諸寺僧矣。吾此來當爲佛門護法。不然。將來佛子。且無以爲衣食。老儒曰。甚善。僧遂盡携衣鉢入寺居焉。僧經論明習。戒律亦精嚴。居寺中五月。寂無聲息。村人知者咸嘖嘖稱大師道力果非常僧之比。固知佛教門徒。多躬行實踐。不似儒者之僅以弄文數墨尋章摘句爲事也。僧聲望漸著。巨紳大賈爭往供養。名門貴婦膜拜尤虔。僧亦漸出爲人說法。每值佛教聖節。禮者闐門。僧頗自喜。有貴官家居。每日必訪僧山中。談論經典。僧則以廣長

之舌。發海潮之音。貴官輒側聽忘疲。某日相與研成惟識論。天晏未休。僧遂留貴官宿。夜深。貴官忽覺有物觸額。寒氣澈腦。大呼而醒。顧見一人。鬚如蝟毛。目閃閃有赤光。以舌舐己。即拔關而出。奔入方丈。僧方禪定。遽驚起。曰居士何事。貴官告之故。僧曰。妖魔乃敢擾吾貴客耶。即密念金剛神咒。而舌忽塞。不能成聲。僧懼而止。然是後貴客偶至寺中輒遭怪異。或茶中置鼠糞。或坐褥無故自焚。諸供養者皆不敢往。僧不能無嗔心。私掣密咒焚而禱焉。妖既稍止。客亦漸集。及四月八日浴佛之辰。諸檀越咸蒞。僧方肅客。有物自袖中墜。或拾而視之。則女子鞋也。繡鞋精絕。衆人皆譁。僧方駭愕。衆中復有一人見垂髻女郎自方丈出。即曰吾人爲此禿所欺矣。禿罪不可容也。僧無以自明。即被逐出寺。而寺中沙石紛飛。衆人皆駭潰。僧旣被逐。往依其師。師故有高行。歎曰。妖由人興。汝自召之耳。夫又奚尤。汝須知修行之人。以貪嗔爲大戒。汝初聳於老儒之言。欲以道力懾服妖魔。機心所感。即足召侮。幸汝以護法爲志。故諸魔

不敢相逼。然揆諸我佛忍辱般若之教。已無是處。汝又公然受人供養。侈心漸萌。魔已輕汝。汝又欲爲貴官張目。妄用密咒。故魔得而乘之。汝又妄動無明。欲以威力制服羣魔。雖暫得禁制。而積憾愈深。不免竟爲所敗。幸汝夙根素厚。妖物亦有道器。故爲害止此。小懲大誡。未必非汝之福也。僧歎曰。師言固當。天下惟不校者乃能服人。吾知過矣。雖然。彼火夫王姓者居寺中且十年。妖物竟不相犯。何也。師曰。彼天機已純。人欲盡泯。世間利害毀譽是非之變。不能擾其靈府。是已臻菩薩地位矣。妖物於彼。旣愛且敬。寧當相犯耶。僧歎息曰。吾今乃知博學多聞之無益也。其後僧遊羅浮。偶於山中遇一老者。仙骨秀澈。揖僧而言曰。大師猶相憶否。曩時冒昧相犯。事過悔已無及。吾與大師。道雖異趣。俱修行中人也。往事不足論。小菴咫尺。大師能枉駕見蒞否。僧許之。菴在萬泉交流中。僧入室便覺清幽絕倫。歎曰。吾不如也。菴中人捧柏實以進。僧略瞰之。口齒俱爽。頃之乃出。願視若有所思。而白雲忽起菴已不可復見矣。

●珠蓮

元季有珠蓮者。粵東倡家女也。其家故業農。有田數十畝。粗給衣食。父某。年四十始生蓮。鍾愛之。蓮生時。其母夢有僧入室。授以紅蓮一朵。瓣瓣皆發霞光。寤而蓮生。故名曰朱蓮。遂訛爲珠蓮云。蓮父性樸慤。族人多魚肉之。皆弗校。蓮母初亦聽之。旣生蓮。乃靳其出納。謂宜封殖以遺吾女。不能聽他人取携也。族人貸乞旣多弗應。銜之。會縣中有里正之選。族人相約以蓮父應舉。里正者名爲公職。實則徒隸。黠者要結官府。與蠹吏奸胥比。以漁利於民。愿者日應徭役之迫索。往往破家。蓮父旣被役爲里正。百計思自脫。謀於縣吏。縣吏索賄二百貫。蓮父欲從之。其母不可。謂如是則割吾腴田且五畝矣。里正誠官役。然善爲之且足致富。不見鄰村某翁。爲里正可十年。今已廣廈雲連矣。胡亟求自脫爲。蓮父謂彼翁以不義得財。雖富必無良果。吾不能效彼所爲。即如某次縣中徵發夫役。渠偵知某寡婦多貲。家僅一男竟與衙役比。繩繫入官。其家以千

其納贖乃免。然此少年卒以驚遽得狂疾。是家之禍且暫矣。天道有知。此人詎能逃罰。蓮母謂君縱不欲富。但當官而行耳。何必以賄自免。先斥吾貲。蓮父無如何聽之。爲里正可數月。適政府有安南之師。徵發遍於兩廣。窮鄉僻邑無免者。大府索之縣官。縣官符下里正。尅日募夫若干名。有不如期。以貽誤軍機論罪。諸里正皆與縣役比。擇富戶索賄。而強繁遊手應命。蓮父不可。謂旣名曰募。宜視其人志願。乃遍諭村衆。欲以大義勸募。期滿竟無應者。縣役旣恨其固執。又以失重利故益憾之。乃言於官。謂此人狡甚。多受鄉民金錢。而解免其役。以故弗集。縣官大怒。即飛籤捕之至。予杖二百。勒限三日。索夫三十人。不然。按律梟首。蓮父大恐。扶劍出。遍告鄉人。自願毀家募人應役。蓮母知之。第日咒縣官無良而已。及期幸如額。然所費已千貫。縣吏復索規費百貫。乃爲冊報。事竣去其產泰半。所餘薄田二十畝宅一區而已。蓮父故小康。未嘗經歷艱苦。旣備受楚痛。重以憂恐。遂遘疾以死。縣中猶以逋賦故責遺族清償。復去其產三之一。

婦母。孤女僅保門戶。族人益肆侵漁。不三年田宅盡矣。母亦尋沒。蓮時始十一歲。族中無賴者利其顏色。盜鬻諸勾欄。蓮性介潔。視是中人行事。殊弗謂然。顧穉齒不能自拔也。稍長習聲伎。深得其妙。當筵一奏。四坐盡傾。又姿容都麗。見者皆爲目眩。然其自愛益甚。豪富兒累擲千金。不能得其一盼也。李甲者以武縱橫海上。有徒數十人。元代聲威震海外。東南諸島國。恒以歲時來貢。間許互市。然沿海人民。例不得貿易他國。違者有罰。而大利所在。雖嚴刑峻法。弗能禁阻。居民冒禁行洋者相屬。甲家即以此致素封。置巨舶數十。分遣其曹。往來諸島國。適有提舉市舶某公。新視事。未審地方情形。遽申明禁例。凡商民以物出口者。悉沒入之。並按律予杖擬流。諸海商猝出不意。盡喪其貲。甲旣破家。官中又逮捕甚急。乃逃之海上。諸喪貲者皆往依之。甲幼嘗從異人學。精於劍術。跳擲如飛鳥。又善連珠彈。百步外取人目無不中者。嘯聚旣衆。頗以兵法部勒其徒。且自許爲替天行道。所劫掠者多貪污之吏。或豪商大賈。斷自殖者。粵

中官府頗惡其所爲。名捕甚急。而甲機警。能以計自脫。諸貧民皆受其惠者。亦多爲之耳目。以故橫行自若。甲偶遊勾欄。見蓮甚傾心焉。蓮亦喜甲溫文爾雅。而氣宇豪邁。私歎爲非常人。頗有委身之想。過從漸密。因作深談。蓮旣稔甲身世。歎曰。君洵非常人也。吾家世所遭。與君實有同感。恨吾爲女子身。乃以風塵自溷。吾弗如君遠矣。甲曰。倘不相棄。同爲海上之遊如何。蓮曰。固所願也。其明日。蓮遂與甲偕行。將去以鈔五百貫。匕首一。緘封甚固。留置鴉母枕畔。并貽書言。即以此貲爲女身價。勿得張揚。否者將蒙不利。鴉醒啓封。得鈔及匕首。噤不敢聲。自是蓮遂從甲浮游海上。久之漸習海事。凡沙綫之迴復。風暴之消息。及沿海形勝。瞭然若掌上羅紋。又久之。即所部諸人材幹之強弱。及所堪任之事功。亦咸了了。且明敏剛決。料事多中。甲及其徒皆敬憚之。蓮歸甲十二年。年且三十矣。甲遊南洋遇疫卒。蓮哭之慟。因代領其衆。於是甲歷年劫掠。及營運所獲。且千萬。蓮與其徒議。謂劫掠生涯終非久計。不如覓一荒島。從事

墾闢。因以懋遷海南諸國。自足存立。且今元祚將盡。異日有聖天子出。吾人能
以所部爲國家效力。光復舊宇。豈非痛快之事。衆皆曰惟夫人命。遂率所部入南
澳。是時南澳猶曠土也。蓮旣移墾其地。沿海遊民至者益衆。凡不樂地方苛政者
。輒往歸焉。不三年已成村落。蓮爲經紀其政。咸有條理。未幾元帝北遷。中原
漸歸於明。明祖以廖永忠爲將軍。湯和副之。帥舟師往平兩粵。於時江南將士。
雖習於水戰。而南方海道。未嘗經歷。風濤泮泮。人有懼心。初戰於虎門。敵軍
憑高固守。攻者未能近岸。暴風猝起。舟觸礁碎者十餘艘。將軍大懼。迴兵依香
港以守。募有能識粵海水道出奇制勝者賞萬金。衆皆莫應。蓮聞之。謂其衆曰。
吾人欲爲國效力。今其時矣。即率所部凡數百人。舟二十艘。造軍門上謁。將軍
嘗遊粵東。耳蓮名。聞之。即延見。蓮雖三十餘齡。而風態娟媚。不改少年。將
軍一見大喜。蓮請將軍以大兵進迫虎門。而已以所部從間道登陸。繞出敵後。敵
必奔潰。將軍諾之。因命張筵宴蓮。延之上坐。蓮便攝衣就席。辭旨俊爽。圍軍驚

歎。席間將軍餽以甘言。謂軍事方亟。乞夫人留軍中。俾得望見顏色。就商戎機。蓮正色曰。將軍爲國大臣。寧不聞男女有別之義。矧功高望重。謗議所叢。縱純謹自守。猶未免蕪蒞文犀之謗。若更脫落一切。益啓讒慝之口。方今天子明見萬里。信賞必罰。不私貴近。將軍幸自愛重。以保功名。勿使韓彭笑人也。將軍色變。心實內慙。頃之。乃曰夫人言當。吾乃自愧弗如。今大計已定。夫人不宜復久留。翌午使進兵何如。蓮曰。今晚當有颶風。來日午後乃息。將軍宜以來夕子正出兵。黎明可抵虎門。敵出不意。必悉力來迎。吾以偏師搗之。必大潰也。惟將軍兵士遠來。於此間路線慮弗習。吾請以所部三十人留此爲導。將軍曰諾。蓮遂別去。將軍雖爲正義所屈。然心未忘蓮也。副將軍湯和聞蓮言。私歎曰。是洵奇女子也。方今主上明察而猜忌。吾常懼立功之後無以自全。不意是女所言。乃深得我心如此。次夕子正。衆星明波。概濤不興。大軍安行無阻。天明已至虎門。敵軍狃於前次之役。以爲明軍遠來。不習路線。必以晝日進攻。可預爲之防。不

意將軍猝至。倉卒無以爲計。盡以所部來抗。而蓮已偕所部自深圳進兵。行可壹日。繞擊其旁。敵果大奔。遂進克廣州。旬月之間。廣東底定。將軍遣人諭意於蓮。謂衆能降心相從。當請於朝廷。援洗氏先例。封爲越國太夫人。鎮撫粵海。蓮語使者。謂未亡人無心富貴久矣。所以溷迹此間者。念同族世受虐政。欲乘時自建功業。出諸水火耳。今幸大兵已下嶺南。吾志遂矣。他又何求。將軍勳高位重。宜念吾前言。善自保愛。主上英明。漢高之儔。將軍宜思自伍良平。否則當作絳灌。唐太宗有言。韓彭蒞醢。非盡高帝之罪。望將軍勿蹈前轍也。使者返報。將軍大怒曰。彼女敢爾。吾前次已容之矣。今不能復恕也。立命所部往擒以來。看此婢子猶能倔強否。副將軍力勸。謂人方有功於國。害之不祥。將軍執不可。副將軍知不可諫。亟遣人馳告蓮。而蓮已先一日率所部出海去矣。副將軍聞之。歎息而已。其後將軍竟以罪誅。副將軍以功名終。相傳副將軍嘗過普陀巖。見一比邱尼神采秀澈。坐紫竹林中。彷彿珠蓮也。

●朱旻如

明社旣屋。諸王崎嶇南服。惟桂藩歷年較久。其時統兵諸帥。皆忠義激發。能用其衆。故能支持殘局。更十餘年而後亡。然諸帥襲舊日專閫之威。往往驕恣自便。復值朝廷播遷。紀綱失墜。諸將帥雖偶有越軌舉動。輒優容不問。以故諸帥益肆。意氣用事。雖賢者不免也。讀王船山永歷實錄所載何騰蛟朱旻如事。可以觀時變矣。何騰蛟者弘光故臣也。嘗以右僉都御史巡撫湖廣。與左良玉善。已而爲黃澍所搆。遂致隙末。良玉旣舉兵東下。以清君側爲名。騰蛟不從。良玉使其子夢庚劫之。騰蛟佯墮水。匿蘆荻中。附小舟得達江岸。走江西。轉湖南。會良玉死。南都陷。而李自成率餘黨數十萬南奔湖南。自成旣爲九宮山農民所殺。其衆無所依。騰蛟因而降之。而左良玉餘部亦歸騰蛟。益廣召募。衆號百萬。唐王旣立於閩。以騰蛟有潛邸舊恩。特賜尙方劍。許便宜行事。而諸將皆桀驁。各爭私利。騰蛟雖日議出師謀恢復。諸將莫肯進兵。第日遣人索兵餉。常供不足。則加派義

餉。預徵田租。每畝至六倍以上。猶不足。則開捐納之例。募人入貲助軍。號曰餉官餉生。郡邑長吏皆以貲爲進退。又不足。則募姦人告密。刺探毀富家陰事。罰令出貲給軍。破家者相屬。諸將各據防地。政府所授官吏皆不遣就任。或以意改易。欽差臺省官至者。稍不遜讓。輒漂搖江干。或爲兵卒所侵侮。政府不敢問也。地方農民旣困於重斂。復遭兵士魚肉。亦釋耒耜而爲兵。更互仇殺。兵旣愈多。地方亦愈弗寧。湖湘間千里無烟火。居一年。清孔有德以大軍南下。諸將皆不戰自潰。人民苦將士殘暴。爭出迎清軍。騰蛟走謁桂王於廣西。滇軍趙印選胡一青等。以騰蛟雖敗。然服其忠義。願受節制。騰蛟遂率兵出全州。留老營於桂林。驕縱爲暴於城野。給事中萬六吉奉勅至桂林催師。人民環懇兵士橫暴爲害六吉。出榜飭責之。語侵督師。騰蛟聞之大怒。六吉嘗以言事忤武臣意。謫經歷。未幾仍復職。騰蛟乃馳檄召經歷萬六吉赴軍前效用。令材官健兒數十人齎檄以往。密令。捶械之。即死勿論。六吉已赴平樂。猶未知騰蛟仇己也。衆復追至平樂。分

途大索。時副將朱旻如以都督守平樂。旻如性慤直慕義。折節下文吏。尤恭謹循法度。一日自校場閱兵歸。有數人匆遽犯其前導。卽遣騎繫問之。衆言頃有材官自湖南來。奉何督師命召萬經歷赴軍前。旻如卽曰萬經歷何人也。曰故萬給事也。旻如曰。給事朝官。督師安得檄召。曰督師憤給事榜語侵已。意不平。欲得而甘心焉。材官遠來。未知給事居處。託吾曹代偵。許以重酬。吾人頃已偵知給事寄居某寺中。將往報材官，不意觸犯將軍。將軍幸寬恕之。旻如大怒曰。督師乃欲捕繫天子近臣。無禮至此極乎。給事榜責擾民軍隊。爲國家收拾人心。督師乃反以爲罪乎。督師此舉。欲效曹操殺孔融朱溫鋤清流耶。朱旻如臨桂男子。不能坐視權臣跋扈至此。今日是忠臣義士致命之秋。卽遣騎請六吉至署。而謂其人曰。若歸告材官。言萬給事在吾署中。可往相見也。材官旣聞六吉在旻如處。遲疑未卽往。而騰蛟仇六吉甚。嘗豫誠其使。謂不得萬六吉者。汝曹勿返。其黠者卽曰。吾曹奉命而來。朱某決不能以爲吾罪。且一都督安敢抗督師。今姑往索。能

得萬某固善。即不能。亦有以報督師矣。乃皆往。扣門求入。晏如方張酒宴六吉。即延入酣飲。持檄者見四壁甲士皆露劍立。晏如瞑目怒視。目眦欲裂。且時時援佩刀。不敢出檄。頻仰視晏如顏色。欲言復止者再。晏如曰。君奉何令。欲何爲。當以相告。持檄者色動。起立曰。督師令請萬公。晏如曰請啓安在。持檄者出檄示晏如。晏如讀未半。立碎其檄。拍案而起。杯盤飛舞。大叫曰。萬公天子言官。以軍政戒飭士卒爲民害者。惜未執殺之爾。督師庇驕卒虐民。惜未參劾爾。區區一榜文。而督師遽欲遣狗鼠輩持牒辱之。置天子于何地。督師反耶。晏如破家捐身。爲朝廷效死。督師蔑天子。即晏如敵仇。狗輩敢銜人衣。當齒我刃。即拔佩刀斫持檄者。六吉大驚。亟掣其袖。持檄者脫走。甲士噪而起。晏如介馬彎弓追之。至郊外擒一卒。捶而告之曰。狗子速歸告督師。朱晏如不畏死。爲一隅君臣存分義。督師若欲殺我者。我自赴死。萬給事已赴行在。不可得也。遂送六吉詣南寧。而自署其門曰晏如得罪督師。爲朝廷存一線君臣之義。不敢擁兵以自

求活。重撓軍政。今解兵待禮。諸軍願歸農者聽。願充伍者赴焦公調度。焦公者大將焦璉也。晏如初以武舉隨璉起兵。散家財萬金。號召丁壯。成一軍。器仗精好。爲璉所部最。璉甚倚之。晏如旣榜門告衆。遂盡籍其糧儲甲仗馬匹旗幟以歸焦璉。而自褫甲冑。葛巾布衣。詣平樂知府聽羈。持檄者歸見騰蛟。泣訴晏如事。自言幾被殺。且故甚其辭。騰蛟方食大怒。盃箸悉墮於地。曰鼠子敢爾。立命幕府草檄拘晏如。或言晏如爲焦璉部將。璉方倚重晏如。萬一復起抗命。事旣無濟。於督師威望無乃重損。騰蛟平日能以威凌士大夫。而懾於諸將。畏璉不敢逮問晏如。乃以書訴璉。乞殺晏如爲己雪恥。語甚切至。璉固重晏如爲人。而以騰蛟故。不能不問。遣卒往攝晏如。晏如囚服就璉。璉詰之。對曰晏如以一時之義。激不自量。爲朝廷存綱紀。今已使督師無擅執言官之愆。晏如之志已伸。唯求一死以正軍法。爲裨將亢督師者戒。璉心重憐之。諸將亦多爲晏如乞恩。督師閣部瞿式耜。亦重晏如之義。告璉宜寬贖之。璉遂收其軍貲。而別贖二千金爲騰蛟壽。

○騰蛟喜。遂移書璉。令釋晏如。且稱晏如能。勸璉仍令將兵。晏如由是以義俠知名。璉恐騰蛟仇晏如。不令將兵。晏如亦畏不敢出。謝事閒居。久之。騰蛟竟以諸將內訌。爲清兵所乘。遂敗。被執。不屈死。晏如聞之歎曰。何公固讀書人。能知大義。惜乎復而無方略。宜其敗也。尋焦璉復強晏如復職。使統舊部仍守平樂。時諸將卒多虐民侮吏。而晏如獨以謙謹有節制聞。遂掛鎮西將軍印。其明年。孔有德入廣西。遣兵間道攻平樂。晏如所部寡。盡率以守城。城中兵民皆潰。敵兵大至。晏如戰不勝。敵乘城入。晏如乃入署中。殺妻子。南向拜。焚勅毀印。易進賢冠大絳袍。手劍端坐。清兵入署。望見晏如若天神。睜眦不敢進。晏如大呼曰。身是鎮西將軍朱晏如也。咄汝狗鼠。何怯不敢前殺我。清兵自堂下射之。中頰。：如復呼曰。虜竟不濟。遂拔劍自刎而死。瞿式耜在桂林聞之。歎曰。朱君之賢且才。乃僅以偏裨終。天下事可知矣。未幾桂林亦破。式耜竟殉節。

宿松諸生張某。性任俠。家僅中資。而急人之急。遇戚友困厄。假貸不稍靳。家中座客常滿。鄉里有公益事。輒挺身自任。鄉人爭推譽之。道光中。邑大饑。縣官匿荒未報。鄉人訟諸大府。生爲領袖。大府袒縣官而罪訟者。生以糾衆誣控長官。概袷流粵西。同訟者亦擬罪有差。生被放十年。杳無消息。會遇赦令。家人旦夕翹望以爲且歸。而遲之又久。竟絕不相聞。家人相恐以爲已死。其妻遂憂鬱致疾以歿。生有女年十七矣。其母以無子故鍾之。女幼有異秉。不肯穿耳纏足作女兒裝。尤好弄劍戟。家有傭工。故鏢客也。年老憚遠行。盡以家業付其子。而自出爲傭賃。或荐諸張生。生以其風神豪邁畜之。不甚責以事也。女年十一。私於後園掣杖舞之。旋轉如風。傭一見大驚。因傳以技。不三年女已盡其秘。兩臂能舉百鈞。而身段矯迅。能緣壁斜行。登山涉水如履平地。技乃出傭上矣。女旣喪母。茕茕無所依恃。自其七八歲時。聞其父因罪流徙粵西。即從人間粵西風士。及道路山川形勢。心竊識之。又聞人言孝女緹縈上書救父。及古孝子萬里尋親事。嘆

曰。吾何遽不及昔人哉。嘗屢請於母。謂他日兒長成時。母能許我爲緹縈否。母以其年稚。笑而應之。曰可哉。雖然。朝廷旦夕當有赦令。汝父且自歸耳。女喜曰。阿父果歸。當教兒讀。兒且盡通諸經。入學作秀才矣。母笑曰然。吾甚願汝能爲之。年復一年。生既不歸。女恒窮問其母。母始猶強笑應之。已乃大哭。謂汝父殆不返矣。蠻荒炎瘴。久無音耗。吾每念汝父。吾心碎矣。女自是不敢復問。陰念吾必走粵西。訪吾父蹤跡。益勤習諸武技。爲遠行之計。且自字曰今緹。今緹既葬其母。因裹糧爲粵西之行。箭服蠻靴。儼然雄糾少年。見者不知爲女子也。遂由皖入鄂。經湘。泊舟君山下。夜已三鼓。忽聞鄰舟有格鬥之聲。舟子戒勿動。言有貴官入觀過此。爲盜所劫。同行有衛士二人。方與盜劇鬥。盜衆蟻集。衛士勢且不敵。吾僂行路人勿多事。多事則盜舍彼而仇我。吾舟殆矣。今緹聞之。大怒曰。狗盜敢爾。吾必有以懲之。舟子力勸弗聽。卽掣雙劍一躍過舟。劍光閃處。衆皆辟易。盜魁見之曰。是何人。敢敗吾事。卽前與鬥。今緹左右抵禦

。顧以衆寡懸殊。勢僅相當。天明盜呼嘯而去。其魁顧謂今緹曰。相見有日。能勿避者乃好男子耳。今緹笑而應之曰然。貴官見盜衆已退。即延今緹入謝。言吾家微壯士破矣。敢請姓氏行踪。今緹具告之。官曰。粵西方亂。地方官譏察甚嚴。壯士隻身孤行。易滋疑慮。吾當爲汝作書致當局。使相照拂如何。今緹謝曰。願之。官卽爲作書。並黃金五十。以遣今緹。今緹受書返金。曰吾自忿盜衆橫行。不量衆寡。欲因以懲之耳。不爲公護私產。亦不敢望報施。吾此行所齎。足以自給。多財只爲吾累。公幸勿以此相溷。語已卽逝。貴官追之不及。歎息而已。今緹遂泝湘江南行。至零陵。由武岡入全州。中途失路。竄山徑間。天色已黑。道旁呼聲四作。今緹兩足被膏。遂顛於地。欲起則已爲人反縛。知強抗無益。亦聽之。有頃衆人擁以行。至一古廟。列炬燭天。戈矛森然。自廟門至於內殿。環侍者可三百人。皆戎裝貫甲。聞殿中傳語曰。俘虜至未。衆人同聲應曰至矣。殿中復傳語曰以來。衆和曰諾。屋瓦皆震。今緹入殿門。殿中設三座。坐者三人。

皆絳服平天冠。中坐者掀髯顧今提曰。猶相憶否。今提視之。則洞庭湖所遇盜魁也。回首他顧弗應。再問聲益厲。今提笑曰。吾既至此。惟所命耳。何多問爲。盜魁大笑而起。曰。佳客遠臨。爲幸多矣。倉卒未能備禮。當不我怪。即叱衆人解縛。延今提就座。曰。義士。曩於洞庭湖畔。獲觀義士劍術。舒縮進退。罔不應手。力敵數十人曾無懼色。吾愛義士之勇。與吾曹交手數百合。劍鋒所及。只斫吾械。不肯損及膚體。吾服義士之仁。聞義士與貴官言。知汝萬里尋親。不避艱險。吾敬義士之孝。貴官贈金五十。毅然謝絕不受。吾佩義士之廉。吾知義士將往粵西。道經此間。因遣吾曹分途邀請。從者不謹。致有觸犯。吾之罪也。雖然。不如此。吾何由能邀義士見臨。吾混江龍往來湖湘。所取雖非其有。自信尙無不義之財。彼貪官污吏。掊克取盈。吾徒不爲散之。將留爲彼兒孫放蕩之資耶。義士幸勿以他盜例吾曹。吾曹自信平日行事。必不爲義士所棄也。今提嘆曰。諸君所爲。誠有激而然。抑君等皆負奇才。果以澄清自任。何事不可盡力。打家劫

舍。終非真正豪傑所爲。吾不敢苟同也。泚江龍默然如有所思。頃之。乃曰。義士言當。吾聞粵西金田方有異人崛起。漢高明祖之業。庶有望乎。吾雖庸陋。惡敢不勉。乃置酒款今緹。縱談歡飲。今緹慮夜中棲止。或有他故。竟夜飲且談。天明辭去。盜魁言。義士孝思方切。吾人不敢強留。不然。當作十日歡也。乃送今緹出山。曰。由此南轉。即桂林官道矣。宇宙雖大。相見當有期也。今緹遂行。數日至桂林。挾貴官書往謁當道。當道即延見。立命首縣訪張生踪跡。報曰在泗城。即爲驛書告沿途官吏。隨宜護視。旬月已至泗城。問諸府吏。皆曰此人於日前失踪。已轉詳上憲矣。今緹木立久之。乃曰。流人例有主者。胡竟疎忽至此。衆皆支吾其詞。今緹知久留無益。憤憤遂出。至逆旅中。逆旅主人謂君乃張先生哲嗣耶。先生居此久。吾曹皆與稔。惟府中羣吏。恒以事索賄。先生輒靳不予。謂吾寧以周貧民。不能以飽狐狗。羣吏銜之甚切。每假公事挫折之。距今一月前。朝廷已有赦令。流人皆得歸。羣吏復從張先生索賄。乃爲申詳。先生怒罵之。

羣吏撫拾其罪。言於官府。拘囚欲治之。隔宿遂失先生所在。遍尋不獲。城西有智井。深不可測。或於井畔亂草間得隻履。乃先生所服者也。吾意先生已不在人世矣。今緹聞言大慟。即絕於地。有間乃蘇。哭曰。吾萬里尋親。不意遂至於此。○天乎。彼府吏者。實殺吾父。智井安在。吾必往求遺骨。歸乃與此曹論罪耳。因收淚而起。乞逆旅主人導往井所。主人憐之。如其言。此至。募人下探。衆莫肯應。皆曰。井有妖物。一入便爲所瞰。吾儕血肉之軀。安能冒此奇險。今緹奮然曰。此何等事。吾不自行。乃待他人爲之耶。即一躍入井。衆人掣之不及。皆曰。可憐哉。孝子也。今緹初入。昏無所見。飄然墜於井底。頃之神稍定。乃覺井中空無所有。惟旁有一穴。蛇行而入。有風外射。蝙蝠翻飛。今緹陰念風從穴出。穴必外通。此中當有道路也。前行漸高廣。望見鍾乳下垂。壁上崖石種種奇狀。或如龍鳳。或如竹木。或作佛像。或作鬼態。洞中雖闇。然今緹在闇中久。眼光外射。亦能照見一切。愈進愈不得遺骨踪跡。惟流覽石壁。以此自遣。倦甚即憩。

憊已即行。偶覺飢渴。便飲崖泉。氣力頓復。闇中亦不辨早暮。第覺經過之久耳。一日忽窺見星光。今緹喜曰。吾當出穴矣。即前進至洞口。洞口稍闊。可容人。惟荆棘槎枿。不能安手。幸隨身有寶劍。因盡削亂枝。騰身而上。則已在諸山高處。星斗滿天。不知何地也。倦甚。倚石而臥。忽覺寒氣襲人。啓目四顧。天且曙矣。下山覓路而行。林箐深密。崖石崩劣。疲勞特甚。已而初日漸上。照山林間作絳色。今緹方流連景物。忽聞有聲西來。有十餘人。皆裸半身。披短褲。手長矛。向今緹。意似阻其前行。而語音啁啾。不甚可辨。蓋山中生獠也。今緹行弗輟。望見山崗上有人踞坐。殆其酋也。酋見今緹來。即吹唇作響。十餘人者以矛攢刺。今緹拔劍禦之。矛不得近。矛桿多折。酋大怒。命左右發矢。矢小乃如筆管。今緹揮以劍。矢紛紛墜。匆卒間有矢著手背。矢端傳毒。今緹即週身麻木。自山旁下墜澗底。幸爲叢棘所挂。否者骨碎矣。時今緹已昏不知人。適有獠女出而樵採。見一少年狀貌秀偉。僵臥若死。意憐之。撫其體猶溫。審爲中矢受

毒。即拔去其矢。以刀剗去矢旁肌肉。肉受毒作黑色。既盡剗。乃傅以樹葉。血立止。復取瓢挹山泉。置藥其中。啓今緹口灌之。旋聞腹中雷鳴。今緹大嘔。黑水可數升。乃醒。饑甚。見獠女在旁。察其意殊不惡。自指其口作索食狀。獠女似不以爲可。搖首微笑。且舉手示意。言欲負以歸。今緹頷之。女即負今緹於背。健跳數十步。至一山洞。洞中藉草爲褥。女置今緹其上。今緹驟得溫爽。合眼便睡。獠女拾薪作火烹鹿肉。既熟。今緹已醒。女進鹿肉。今緹飽啖之。精神遂復。健如常日矣。獠女因自致慕悅之意。今緹笑之。報以手勢。言吾乃與汝同性耳。獠女似弗信。今緹多方譬解。女乃大笑。意謂汝縱女身吾亦愛汝也。今緹復示意。謂吾兩人相結爲姊妹如何。女益狂喜。跳躍良久乃已。因互談家世。獠女自言父母已逝。不見容於叔父母。隻身寄此洞。以射獵樵采自給。今緹亦以遠來尋親告之。且備述所遭。曰吾父生死竟不可知。果其死也宜有遺說。如其生也今且安往。獠女曰。吾當爲姊卜之。即出走山間。折籐枝長七寸者九莖。平置諸地

。以手指畫作符。口喃喃誦不輟。且誦且畫。籐枝漸漸起立。俄頃九莖並起。旋轉作勢。又頃之。中央一莖突飛出。向東北而逝。媖女賀曰。生矣。吾法卜之。凡九莖平臥弗起者。其人已死。或起或不起者。病且弗測。九莖俱起且作舞態者。其人必健在。今九莖旋轉弗已。姊又何憂。且中央一莖飛向東北。宜東北行求之。必相值也。今緹笑曰果爾。吾明日當行耳。女沉思稍久。曰此間數百里山徑叢雜，皆吾族也。姊既遠來。料非所習。獨行且復遇險。吾隻身居此亦殊乏趣。願與姊偕行。往觀上國之光。不知姊亦許我否。今緹大喜曰。此吾所禱祀以求者也。其夕二人同宿洞中。雖異族而相愛乃似同胞。次日遂行。行五日乃出嶺山。又七日至長沙。時洪秀全已起。進攻長沙。今緹所行皆山道。不與洪軍相值。至長沙之明日。洪軍奄至。今緹遂困於圍城中。百日圍解。乃與媖女偕出。乘舟東下。而洪軍已據岳州。沿江數百里。皆洪軍舟師。今緹自洞庭出長江。大風驟起。諸舟相盪。今緹所乘舟觸洪主帥坐艦。遂覆。今緹媖女並墜於水。主帥拯之以

起。問二人所自來。今緹具告之。主帥弗信。俄傳軍師來謁。今緹竊視其人似曾相識。主帥命以二人付軍師窮治。軍師既知今緹姓氏籍貫。大驚曰汝爲宿松張姓。亦知有張某其人否。今緹哭曰。吾父也。吾隻身走粵西求吾父。往返萬里。不獲一面。今又困於此。天乎。胡厄我若是。軍師遽起曰。不意乃與汝相逢於此。汝視我爲何如人。今緹視人。神采宛然其父也。唯鬚長至腹。已斑白。且服改矣。張生曰。彼女何人。今緹復具以告。張生曰。微斯人。吾父女幾不復相見矣。大恩不可忘也。即入告主帥。主帥大悅。諸軍將聞之。皆喜。爭持酒肉賀張生。張生即享姦女及今緹。言曩爲流人時。受府吏虐待。心殊不平。適有偕流者。洪軍之同黨也。爲衆人說法。謂尊禮天父。死後可登仙界。衆皆附之。相約於洪軍起時。前往投效。而事勢所迫。洪軍不及期起。臨時無可使參佐帷幄者。故以吾備選。今已官平章矣。方隨大軍東取金陵。乃以阻風故留洞庭三日。遂得相見。豈非天乎。於是今緹及姦女並留軍中。今緹既作男裝。親女亦健鬥如男子。師行

所過。頗立功勳。比進攻金陵。二女率僮師數百人。皆喬裝爲雜貨商。以次潛入金陵。相見各作隱語。一日今緹遊市中。聞能作隱語者漸多。知大軍且至。陰爲戒備。其夕兵果臨城下。城中守者出戰。今緹率數十人突襲其後。守軍遂潰。未幾金陵陷。論功行賞。二女與焉。洪軍旣得金陵。諸王漸驕恣。某王聞今緹才。且聞緹女之美。欲并得之。言於張生。乞附爲婚姻。張生婉謝之。言當歸商於女。王意似弗悅。謂張生却其請也。張生歸以告今緹。今緹歎曰。此間不可居矣。太平國基粗定。諸王已浸驕恣。異日必有蕭牆之禍。吾人潔身去之。此上策也。即偕張生及緹女夜遁。遁之夕。諸王來相殘。東王楊秀清被殺。翼王石達開出走。今緹歎曰。事不可爲矣。道遇零陵盜魁某。問安往。言將投洪軍。今緹具告之。且曰吾無望矣。諸君仍歸養晦。以待天下之清耳。即去不復見。

●繡花針

繡花針者海南人王興也。興爲人短小精悍。勇於任事。而條理綜密。好謀能斷。衆

以其人瘦削而有鋒芒。又精巧。能肆應。因以繡花針狀之。或傳興多伎能。夏日飛蠅薨薨。興用針左右擲。頃之獲蠅盈把。鄉里少年因呼爲繡花針。又傳興好作武裝。冠必綴繡花一朶。以針結之。故人呼爲繡花針。傳說紛紜。莫能明也。順治初年。清兵旣入關。南方人士不樂附清者。往往結合鄉里。據地自保。遙奉唐桂諸藩名號。稱爲義兵。興亦以忠義激勵其徒。海南有銀礦。興因而據之。大爲冶鑄。流民益集。衆至數萬。遂渡海。散居雷州廉州間。二府皆饒物產。廉州尤富寶貨。雖在兵亂之年。四方商賈猶雲集。興因而權其利。所入益廣。繕兵置械。規模略具。南海陳子壯者。崇禎故臣。唐王立於福州。嘗就家拜文淵閣大學士。子壯糾合諸義師。共謀匡復。會清將李成棟入廣州。子壯約舟師數萬。取沿海諸縣。興亦舉兵應之。成棟南來不習地勢。興以偏師由山澤間進。而子壯以大軍自水道攻廣州。成棟所部多困。閉城不敢出。子壯悉兵登岸圍之。成棟乃出鐵騎與戰。粵人不習陸戰。皆敗北。天又大風。舟飄搖不得近岸。子壯遂沒。興收兵

歸。成棟使部將某追之。師陷於澤。無返者。成棟乃不敢逼。子壯之弟子升。復收餘衆據花山島。與興相犄角。興鄙人不知書。然性服善。子壯兄弟感以忠義。故興樂爲之用。嘗曰陳閣老未嘗一日登朝。而破家爲國。臨難不避。雖文丞相不是過也。其後李成棟與清總督佟養甲相惡。意頗自危。其愛姬某氏陰勸舉兵歸明。興聞其事。以告子升。子升聞於朝。且遣人以一品命婦服貽某氏。某氏見而羨之。促成棟反正。成棟遂以廣州附於桂王。子升亦解兵入朝爲給事中。成棟猶挾前隙。摧抑子升舊部。衆皆瓦解。惟興固守雷廉間不爲屈。成棟嘗遣人招之。興罵曰。吾於朝廷未嘗受一命之錫。所以間關至此者。願不忍見堂堂華裔。竟爲異族隸役，且陳給事兄弟皆義士。可與相結。共謀國家大事耳。李成棟何人。反覆無信。唯利是視。乃敢誘我共爲不義耶。成棟忿其言而無如之何。乃言於朝。乞遣使招撫。朝旨以連城壁爲大理少卿往慰喻之。城壁貪人也。以曲媚得進。居官所至。每以較量財賄爲事。時朝廷雖播遷。士大夫猶崇氣節。不屑屑爲封殖計。

及李成棟反正。薦何吾騶宜備顧問。吾騶本崇禎間故相。家多貲。富甲東南。銷銀爲小山。廣高各丈餘。凡十餘座。露置宅院隙地。李成棟初以清兵入廣州時。聞吾騶富。爭趨其家。欲移去銀山。則重不能舉。欲鑿取之。則堅不可動。吾騶尋降於清。爲撰功德史。稱明兵爲寇。且重賂成棟薦己。冀大用。未幾成棟歸明。吾騶輒蟒玉乘軒。自稱故相。成棟利其賄。又薦於朝。朝臣皆不以爲可。而成棟新附。桂王不欲重違其意。所請皆允。吾騶遂以故官入直。廷中人皆鄙之。莫與往還。而城壁慕其富。趨奉恐後。吾騶語城壁。世亂朝無綱紀。欲致富易耳。第致富而後。處之甚難。欲購田宅。則世亂田荒。人皆轉徙。宅亦爲墟。欲儲珠玉。則一遭暴客。且盡罄其所有。吾故銷銀爲山。雖有入吾宅謁吾篋者。終無如此纍纍者何也。城壁曰。相公固非常人。即此心計之工。已非吾曹所敢望。吾騶掀髯大笑曰。此言毋乃太過。城壁曰。吾不敢望如相公。第望能擁銀山一座。吾死亦瞑目矣。吾騶曰。是何難。吾聞李將軍方請於朝。乞遣人宣撫雷廉諸義師。

是皆擁貲至厚者也。君能假朝命以往。彼曹趨奉恐後。萬金不難致也。城壁大悅。即歸告其鄉人王化澄。化澄方秉政。奏遣城壁慰撫王興。興治兵海隅。招納陳子壯舊部。語人曰。小朝廷終不足恃。大丈夫當自立功業。安能依傍他人門戶。且李成棟爲人。誇而內怯。旦晚必敗。敗則清兵且復南下。吾人宜預爲之計。吾欲養精蓄銳。待清兵南來時。迎而擊之。勝則嶺南可定。敗則走入海南。爲海外扶餘耳。諸君以爲何如。衆皆曰善。城壁旣奉慰撫之命。乃馳檄告興。興見檄大怒曰。吾力固足自保。奚煩慰撫。此殆姦人欲假朝命以制吾王興耶。吾自起義以來。未嘗受小朝廷毫末職事。朝命安能及我。且連城壁何人者。乃敢檄我。即傳語所部。謂連某敢入吾境者。即縛以來。其參佐諫曰。成大事者不能不暫假名義。用爲號召。公起海上。固以恢復明祚昭示有衆。今朝廷雖微。名分猶在。不宜過於操切。使人議公。且使遠近義士聞而失望。連城壁爲人。賢吾未可知。使其賢也。可羈縻以爲吾用。如其否也。一麾可去。天下聞之。將皆咎朝廷所用非人。

而於公自可相諒也。興曰善。即遣人往迓城壁。如欽使禮。供張甚盛。城壁入境。見郊迎者與絮談。所問皆煩猥。其人已心鄙之。既至海康。興跪迎朝旨如禮。退而私問於郊迎者。曰欽使何如人。得勿似陳給事否。其人歎曰。國將亡矣。乃用此等人爲欽使。其言皆糞土也。安得如陳給事。興曰。既來之則安之。姑備禮款之爾。即夕張筵大會將佐。邀城壁赴宴。甲士三千人。皆被精鎧。佩弓矢。手長矛。自軍門至於行帳。霜刃森然。興乘馬爲導。城壁肩輿以從。甫入。衆矛並舉。呼者動地。既升帳。衆矛並下。斷喝若雷。城壁大驚失色。興邀之就坐。城壁踉蹌若無所措。頃之乃坐。興曰。欽使遠來勞苦。城壁唯唯。興又曰。欽使視吾衆尙可用否。城壁期期久之。乃曰皆壯士也。興勸酬甚殷。城壁察其意似不惡。乃稍舒。頃之。有人入。向興耳語。興曰。以來。即聞其人傳語一聲。帳下噤應。俄見一人俸盤進。盤中人首血猶淋漓也。興曰。此人犯吾令。於法當斬。城壁益恐坐不安席。興即命持去。酒闌。興遣人伴城壁歸館。城壁歸私歎曰。何闊

老此舉。乃欲致吾虎口耳。此間安可久居。縱黃金滿地何益。明日吾當速歸。終夜不能成寐。自念遠道來此。萬無空回之理。倘以情誼向王興告貸。數千金或可致也。次日即作書與興。言京曹十年。家無長物。此次幸蒙聖上憐吾清苦。特遣奉使。用爲調劑。不意兵燹之後。驛傳蕭然。舟車之費。旣已靡貲。他日使還。中朝諸老。又須饋贈。此費更無所出。聞將軍疎財好義。乞憐寒士苦况。以五千金相貸。則拜賜旣多。終身不敢忘德。興得書。付僚佐讀之。且命爲己解釋。參佐讀已大笑。興則始而駭。繼而怒。終乃長歎曰。不意堂堂欽使猥鄙至此。吾始以爲中朝士大夫。人人皆陳給事。今乃有此等不知羞恥者。雜廁其間。果中朝人才皆如此老。國亡無日矣。願謂主計者曰。速爲吾備白金千兩。即齎往爲贖。並告以此間迫狹。不能久留與馬。明日可赴行在報命也。主計者如言以往。城壁哀之曰。吾此來殊不易。聞此間至富。金銀堆積。將軍旣念寒儒。何妨少豐其贖。幸轉告將軍。五千金雖不敢望。千金之贖。毋乃使人譏將軍吝於出納乎。主計者曰。

將軍既已有令。吾儕又安敢違。城壁哀之益力。主計者曰。吾姑先以此金歸耳。將軍倘必弗增。欵使強受爲是。不然。並此不可得也。主計者歸以告與。與曰。腐儒不識進退若此。姑益以吾百金。渠若弗受並一金不可得矣。主計者復往。城壁始猶囁嚅欲有所言。主計者致命既畢。城壁乃長揖稱謝。曰客中無足爲贈。鄙人素擅草書。自謂張旭懷素外無抗手者。今當以一紙奉貽。稍酬厚意。藉結筆墨因緣耳。即伸紙疾書。主計者素不識書法。但見城壁龍蛇飛舞。亦謬爲贊賞。城壁大喜。謂不意山陬海澨。乃有風雅如君者也。城壁既歸。王與乃戒其徒。謂此後朝命皆勿受。中朝士大夫。欲以吾曹爲銀坑。惟所取求。吾人雖多財。方留以餉戰士給軍實。安能酬應此曹腐儒耶。自是朝命輒拒絕。政府無如何。任之而已。越年李成棟敗於信豐。清兵進圍廣州。十月而陷。粵東諸郡。漸爲清人所有。與猶固守雷廉不下。清兵以道僻遠。未能全力進攻。然大勢已去。且沿海禁防嚴甚。商賈不行。而海南銀坑忽告廣竭。與所部衆稍稍散去。相持十年。天下大定。

千人耳。與慨然謂其衆曰。吾初起上海時。志欲輔佐明室以立功業。而小朝廷竟不足輔。欲自主而勢不我許。荏苒十餘年。迄無所就。今北廷氣運方盛。吾曹阻兵無益。徒苦地方人民耳。吾年已老。自揣當以野叟終。諸君去留悉聽自擇。海南僻遠。不患無逃死地也。即日解兵。與其徒十餘人浮海去。餘衆遂散。或降於清。皆編入卒伍。而前廷忌與能。屢勅地方官名捕甚急。竟不可得。適有新總督初蒞事。懸重賞購與。且密召與舊部能者。怵以危辭。勸令捕與自贖。某日總督晨起。忽覺衣領間有物爲梗。揭視則繡花針三枚也。衙署禁防甚嚴。竟莫知所自來。總督亦解其意。追捕漸懈。與往來海上。竟以壽終。

●杜文秀

清咸豐間。海宇鼎沸。南則洪楊。北則捻。西北則回部。阻兵累二十載。都邑市里。半爲邱墟。其有據地自保。歷年較久者。則滇之杜文秀是已。文秀家故士族。世奉回教。滇人自康熙以後。雖遵守清廷正朔。然乃心明室。未嘗或忘。文秀

少讀書。頗知大義。或勸應舉不答。固勸之。輒曰陳涉何人哉。嘗讀晉書載記。歎曰。劉元海固自不凡。遂從人習劍術。問兵法。喜談古名將事。評論得失。咸有卓見。及太平軍起。文秀與其徒謀曰。滇地僻遠。而物產殷富。土曠人稀。易以自給。今天下方亂。未知所歸。吾人誠能閉關自守。以待天下之清。尙可爲也。衆皆應曰然。乃殺馬告天。舉義旗。攻大理下之。時承平日久。將士皆不習戰。文秀師行所至。勢如破竹。滇中各郡。多舉兵應之。遂定全滇。諸軍咸奉文秀爲滇王。改元。易服色。定爵號。立制度。儼然自爲國家矣。文秀爲人。警敏好自用。旣成功。益沾沾自負。視同時俱起者。每鄙夷不屑加禮。正位而後。浸驕怠。諸將朝賀者往往弗省。即相見亦不作一慰勞語。諸將陽尊而陰甚之。各懷自立之志。文秀愛大理山川秀麗。以爲國都。城東雞足山。相傳爲迦葉成道之所。大小寺院數百。僧徒千數。雖兵荒之年。而梵唄經聲未嘗止息。文秀雖回教。性頗佞佛。有高僧涵空者。嘗出入王宮。其人熟於經論。而儀容清雋。且擅口才。

文秀爲之傾倒。涵空嘗謂文秀劫運方起。衆生不假佛力。無由拯拔。勸文秀建金光明道場。作大功德。文秀用其言。乃下令境內。齋戒七日。設壇點蒼山上。旛幢蔽日。鐃鼓震天。遠近僧衆應召至者八百人。大小壇壝七十二。各按方位。供奉諸佛菩薩。延雞山獅子林某長老主持壇政。涵空所薦者也。法壇旣建。文秀親往膜拜。羣下皆赴之。舉國若狂。歷四十九日。功德圓滿。香烟上昇霄漢。凝聚作五色雲。夜中雲啓。有聲若雷。闔城皆見一僧偏袒右肩。頂上光如滿月。色相端好。坐蓮花上。冉冉騰空。有無數僧衆隨之。又有鬼物作種種殊相。令人生怖。並升空而去。皆嘆曰。佛法洵不可思議。未幾。有喇嘛由西藏來。自言聞此邦大王尊信佛法。特來瞻依。文秀納之。因言點蒼功德事。喇嘛笑曰。此幻術耳。彼所焚香。皆含殊質。見風輒凝而上浮。凝集旣富。便爾爆發作種種相。是與烟火何異。大王欲觀妙法。吾請爲大王試之。乃擇靜室趺坐其中。不飲亦不食。且禁人窺視。曰七日以後。大王臨觀。當有異境也。文秀如言。七日往視。見喇嘛

端坐。兩目下垂。初無他異。稍趨起間。喇嘛頂上蒸氣一縷徐起。高及數尺。忽展爲圓形。晶明若鏡。鏡中忽見一山。林木茂密。瀑布飛流。崖洞中一僧方入定。有六耳獼猴頰向禮拜。頃之。僧目忽啓。髣髴與獼猴語。猴大喜。踴躍而去。鏡中又幻一境。見叢林古寺。一老僧披舊衲。趺坐佛旁。一燈熒然。有么魔黑物五六。環繞僧眼鼻口耳。似欲覓穴求入。而滑不得留。皆墜於地。然既墜復升。繚有一物自腦際徐徐鑽入。僧大呼而醒。搏頰自擲者三四。遂周身火發。鏡中又易一境界矣。一人冕旒高坐。左右趨走數百人。俄有旌旗蔽空。戈矛森列。冕旒者易甲冑乘馬。率戰士且數萬。陳於廣野。瞬忽間。矢石紛飛。旌旆皆靡。甲冑者棄甲反奔。橫屍遍野。一城巍然高峙。環而攻者萬餘人。城墻忽墜。一人僧服自竄出。匆匆逃山間。一僧以袈裟覆之。而城中火起。萬衆奔潰。焦頭爛額者相屬。文秀不覺悲呼。而室中寂然。惟兩人相對而已。喇嘛已醒。曰大王喻意否。王所見前兩景皆往世事。後一景則今日也。天命不常。王盍棄此從老僧遊乎。文秀忽

若有悟。久之。乃曰吾當熟思之。喇嘛嘆曰。天意已定。人力安能挽回。大王勉之。老僧從此逝矣。明日喇嘛遂行。文秀留之不得。頗鬱鬱。其部下有謀士某。故博學通儒也。察知文秀意。因進言治國宜以儒術。釋氏之教。儒者弗道。爲其不切於用也。大王命世之英。方爲斯民造福。宜遵儒者修齊平治之道。不當信佛氏因果報應之說。文秀深然之。某乃勸以興墜舉廢。行郊天視學大射鄉飲諸禮。文秀頗以爲疑。曰吾聞禮樂之興。必待太平。今戎馬倥傯。奚暇事此。謀士曰。方今天下洶洶。正由當局者皆以武功相競故耳。若有人出。能修文德。以悅近而懷遠。則大業集矣。至謂戎馬之間。無暇禮樂。愚見未敢云然。昔祭遵鎮守北邊。軍中歌雅投壺。當時傳爲盛事。即胡人亦爲所化。今大王立國於外。外逼緬甸。諸蠻多桀頑不馴。正宜以禮樂化之。大王幸聽臣。勿以爲迂。國家之幸也。文秀曰。果儒術之效足以致此。吾亦何妨一試。第以吾見言之。當此國家未定。郊天諸禮。非所敢行。至於習射講武。寓揖讓於中。似亦非迂。君盍爲我草定儀文。

行之。謀士大喜。乃斟酌古禮。爲射儀一篇以進。文秀見之曰。此吾所能行者也。即命謀士主其事。於是造射侯及弓矢。決射尊爵諸禮器。浹月而畢。更選國中秀者以爲司馬司正諸官。習其儀文。七日而畢。乃行射禮。立賓設耦。秩然有序。文秀臨觀歎曰。信乎禮之可以爲國也。然諸將中與文秀同起兵者。多不以爲然。皆曰。今天下未定。區區滇南。幸能自保。整軍經武。猶恐弗給。乃聽此腐儒修飾偶像。用自娛悅。吾曹未知死所矣。其稍習事理者。則曰。崇儒固美事。今不務其本。而惟區區末節之求。是所謂買椟還珠者耳。吾王與此腐儒共事。亡無日矣。諸將既皆携貳。各據郡邑。賦稅所入。悉留以供軍。文秀所遣官吏。皆遭屏逐。有良姓者。尤橫暴恣睢。所據永昌諸縣。鷄犬無遺種。居民多逃徙。田宅皆賤價出售。無應者。文秀知之。莫能禁也。清兵既定江南及中原。乃命將攻滇。文秀所部。未戰輒潰。數十合皆敗北。遂迫大理。文秀率部迎於洱海之旁。清兵遠來。未審虛實。文秀有驍將曰鳳彝。力敵數百人。長矛貫甲。率輕兵夜入清營。大呼

奮擊。清兵潰。明日其主將至。戒衆人勿輕戰。而分兵繞出文秀軍後。斷其歸路。文秀依山爲軍。勢若長蛇。清將選銳卒三十隊。爲游擊之師。而以大軍當其正面。陣甫合。銳師同時進攻。文秀首尾不相顧。遂潰。鳳彝力戰突圍。護文秀出。遂入大理固守。召永昌之師來援。竟不至。久之城破。文秀仰藥死。而滇人傳言文秀實未死。當清兵圍攻方急時。文秀有愛姬某氏。蜀人也。寵專房。知大理旦夕且破。言於文秀。乞以身留代。而請文秀易服與鳳彝偕逃。文秀初不可。旣而許之。城破。姬冕旒仰藥端坐以死。文秀則已由亂軍中出奔。清兵旣入。見冕旒者以爲文秀也。諸將爭前梟其屍。交關不已。久之乃審其誤。亟分兵追索。而文秀去已遠。行可半日。忽遇邏者。文秀竄入山中。見一僧坐巖上。彷彿相識。乞爲藏匿。僧不語。但以手山後石洞。文秀匍匐入焉。邏者追至。見一虎臥崖上。昂首怒目。狀甚可畏。遙以銃擊之。虎若無覺。乃懼而退。文秀遂免。因剃度從僧去。或言光緒中有官隨駐藏大臣過日喀則。休於某寺。寺中人言。有中土僧人善密

宗咒。寄居於此。且十年矣。某官因乞一見。寒暄既畢。某官大驚曰。尊師相貌殊奇特。吾生平相人多矣。如尊師者乃未之見。龍眉而鳳目。於法當有南面之尊。而佛骨松身。又當以僧伽終老。倘清修淨業。可作佛地中人。僧聞言色動。久之乃曰。老衲安敢望此。明日行。以告駐藏大臣。大臣即以檄遣人往召。至則聞寺中人言。僧已赴印度朝雷音矣。是後遂不知所終。

●阿耨達池

雅魯藏布江者西藏大川也。源出岡底斯山中瑪珀木達賴大池。佛經中所稱爲阿耨達者也。有漢中人王佛客者。世業儒。佛客棄而習賈。嘗往來西藏。販鬻藥物。以此致富。前後二十餘年。於藏中山川風土靡不稔習。嘗述入藏時所遭異事。以阿耨達池畔爲最云。某年月日。余行賈藏地十五年矣。念生平遊藏。僅至拉薩。未嘗西行。以爲憾事。乃以是年四月西赴日喀則。即班禪喇嘛所居之札什倫布也。留數日復西往加托克。沿途川澤交錯。皆山中積雪所化。昔人謂是地爲陸海。

洵不虛也。既至加托克。始聞人言阿耨達池爲恒河所出。印度人及藏人咸呼爲聖水。或傳池中有龍蟄伏。甚威神。人有入浴者。可得菩薩身。但龍王禁制。輒不得入。必先奉以重禮。卜筮一俯一仰。則得請於龍王矣。浴時風濤弗起。否者波起如沸。入必無幸。余聞而奇之。乃具禮以往。比至絕幽入險。行三日始達池畔。一泓淺水。清可見底。有物如蜥蜴。蜿蜒往來。同行者語余。謂是皆龍子也。余殊不信。去池可一里爲龍王廟。廟中一老僧。自云七十餘矣。而步履輕捷。乃如壯年。廟有黃幄。幄前置水一盂。幄幔下垂。禁人窺視云。若是則褻於神也。余乃出所携禮物奉神。珠幢一。繡幡二。牲牢酒醴咸備。自謂豐腆若此，神必見享，乃卜筮。二禱皆不吉。意頗不平。而寺僧謂余心弗虔。必留寺宿。齋戒三日。乃可得請。余以好奇心勝。且遠來無空返理。聽之。是夜即宿寺中。夜半不能成寐。月色如晝。余即潛起。趨神龕前。揭幔窺之。中有玻璃盤。徑可六七尺。一蛇粗如兒臂。蜷伏盤內。遍體作黃金色。光芒耀目。蛇首柴立盤之中央。目光睒睒。

余笑且駭。亟掩幔返。而寺僧已至余室。曰客何爲驚吾神。余欲申辯。僧曰客勿辯。吾頃者坐床。心明若鏡。寺中內外情景。一一悉在鏡中。凡客所爲。吾盡知之。客宜亟向神謝罪。否者神怒不測。吾亦無能爲力矣。余聞此言。匿笑不答。而僧促余不已。且曰越一食頃不謝。將累及老僧矣。余勉從其言。向神三叩。而迅雷忽震。風雨交至。僧頓足曰。晚矣。余憤曰。天下惡有聰明正直之神。而禁人瞻仰者。語未終。忽覺煙霧迷濛。霹靂一聲。余遂迷惘無所聞見。旣醒則身在曠野。風雨已霽。殘月銜山。遙見數武以外。茅屋數椽。似有火光。姑往棲止。至則柴門虛掩。余從門隙窺視。一偉丈夫踞坐。割鹿肉置火上。炙而瞰之。余饑甚欲從乞肉。丈夫似已覺。即起立。月光照其首。映壁作虎形。余乃大驚返走。丈夫已迅步追余。余匆遽不暇擇地。奔馳間忽墮山澗。澗中雲氣甚厚。余投身其間。乃覺柔軟如棉。頃之始達澗底。陰黑不辨路徑。第聞水聲潺潺。時有微風拂面。余念風來當從谷口。乃迎風而行。行可半日。崎嶇不能成步。忽觸巨石而仆。

。陡覺身從懸崖下墜。自念今番必無幸矣。遂暈去。久之乃覺身臥草間。周圍葱綠如茵。忽聞有人操華語。且作漢中口音。乃大驚詫。吾殆夢耶。抑吾身已死。魂返故鄉耶。顧視則杲杲日出。天地清明。而周身奇痛。不能轉側。知吾身固未死。亦非夢也。有頃人來漸近。乃見男女二人。年可十五六。雖作農家裝束。而衣服不類近人。並橫坐牛背。欸欸而來。余乃操鄉語呼之。兩人大訝。駐牛視余。問所自來。余略告之。兩人似甚注意。女者曰。客姑小憩。吾人當往告主君。即馳去。旋偕一人來。裳服樸素。頗似唐代表冠。與余問訊數語。即語男者曰。先生憊矣。速命人以筐床來。男者唯唯。俄見四人以繩至。敷棉可三寸。即移余置繩床中。舉以行。所謂主君者。緩步隨余後。余從床中外視。山色清秀。平時千頃。山泉流溝渠間。潺湲可聽。陰念此間殆仙境也。已而至一宅。結土爲墻。覆以茅葭。編棘爲門。繩以爲樞。室中雅潔絕倫。無多器物。一床一桌。椅三四而已。舉者既入。即移余於床。主君隨入。命作糜餼余。余乃與主君談。主君自

言其先唐人也。唐德宗時。渾瑊與吐蕃尙結贊爲平涼之會。瑊不設備。爲虜所乘。將士被俘者千餘人。其中百餘人皆漢中籍也。中途相約逃散。遂入此山。山中故有居民。男女十餘戶。蠢愚不識世事。吾人因而役屬之。墾田築室。遂成村落。今有居民五百餘戶。墾田千餘頃矣。山中地勢絕佳。而土脈饒沃。資生之物。不假外求。居民各食其力。人各耕田四十畝。家各樹木棉十株。木材則取於山。食鹽則採於井。其餘鷄豚牛馬。則各視其力而宇畜之。果實菜蔬。則各視其宜而種植之。居民既無嗜好。故食飲所需。常覺有餘。衣食既足。故各自愛重。不爲非義之舉。村中有首領一人。大事則取決焉。每三年由村人公推一次。即所謂主君者是也。然村衆數百家。既皆各樂其生。所謂主君者。亦無所事事。如今日之事。即可視爲此間數十年來第一大事矣。主君之名雖尊。而服勞南畝。無異於衆。居處衣服飲食。亦與人同。村人農作之暇。則騎牛往來山澤間。流覽天然景物。以此自遣。思慮既寡。故年壽皆至百歲以上。平日未嘗疾病。無事醫藥。死則

積薪茶毗之。由主君臨觀焉。余聞其言。因嘆昔人桃源之記竟非虛也。乃從主君索紙筆。欲得其詳而載之。主君竟不解所謂。余再三申說。主君始笑謂。君乃欲得此等物耶。吾聞祖父言。吾族居故國時。亦嘗有事於此。自徙居此間。人人咸以服田力穡爲務。不復事此者已千年矣。余亦大笑而罷。時村衆聞有異方人。爭欲一見。主君以余體方憊阻之。言此君顛頓山川。須小憩。當與衆相見也。乃皆散。主君護余甚至。凡三日余體乃復。村衆更番問訊。每見必與述唐以後事。衆皆以爲聞所未聞。有老人年百有十六歲矣。聞余言蒙古及滿洲事。意似不信。謂吾族歷來相傳。只聞突厥吐番。不聞有此等國家也。其少年聞余談歷代諸姦巧事。皆以爲故甚其詞。謂人類宜慈篤實。相愛相敬。安有此等事也。余竟無以難。唯唯而已。余寄居彼間凡數月。村人皆以客畜之。一日主君忽語余。君來此已數月矣。此間習俗。君已稔知。吾村無坐食之人。君長此遊蕩。將何以對村衆。且四體不勤。於君亦非所利。吾村開田未墾者尙多。君盍從事墾殖。吾力猶足佐君

○此間與外人隔絕。既來亦無返理。他日稍足自給。立門戶。長孫子。於計亦得。○君謂何如。余聞言意頗不懌。然其言確。不能無聽。乃從主君於山下治田。引水爲渠。田甚饒沃。既布秧。漸漸長成。而余性習安逸。不耐勞苦。朝夕荷鋤披笠。殊覺弗便。如是三月倦矣。某日息耕。憩於田畔。方假寐間。忽有物茸茸觸余面。余驚而悟。則繫牛之尾也。余戲掣而登焉。牛忽奔馳。余亟握其頸不敢釋。而牛奔絕迅。遂入亂山雲霧中。余一聽其所之。忽聞有聲砰然。遂顛於地。一人趨至余前。衣獵人衣。問余曰。傷乎。余曰。未也。獵人曰。幸哉。吾見此獸奔馳過迅。慮君觸崖墜澗。故鳴槍止之。不意渠乃中足而仆也。余既起。問獵人。是間何地。則藏外不丹境也。余遂遍遊印度諸郡邑。遇彼中人。時時談阿耨達池。以爲恨不得一浴聖水也。

●施 生

山陰施生。治刑名之學。癖嗜山水。遊幕所至。遇名勝地。不問館穀豐嗇。必趨

赴之。嘗讀山海經西荒諸山。及穆天子傳。心好之。以爲海內果有此異境。且神仙所窟宅也。適有舊友某君。權新疆和闐州。以書招之。和闐地勢。南據托古茲達坂。西南憑哈喇崑崙。哈喇崑崙者。相傳以爲山海經所稱不周之山及崆峒山者也。生得書大喜。即日束裝。戚友有以道遠阻之者。皆弗聽。遂行。沿途流連山水。生得書大喜。即日束裝。戚友有以道遠阻之者。皆弗聽。遂行。沿途流連山水。行經五月乃達。友已他徙。以生屬後任。後任故老吏。覩生神采蕭散。不甚責以事。生亦無意簿書。第日爲漫遊之計。然居停機防深密。幕友皆深居簡出。選勝尋幽。未能自便。生頗鬱鬱。一日署中忽失施生踪跡。闐州大索不獲。州牧頗恐。亟馳書告生友某君。某君覆書。言施君畸人。君以常客畜之。宜其絕羈而馳也。然以吾卜之。此君不久自返。渠癖嗜山水。此去必登崑崙。遊倦即當歸耳。越三月。施生果返。州牧迓而勞之。生歎曰。幾不復與君相見矣。因備述所遭。聞者皆咋舌云。先是生居州署且兩月。日以未得出遊爲憾。偶值月明之夜。端坐庭中。遙望羣山。頗涉遐想。忽有老翁葛巾道袍。神態瀟灑。撫生背曰。夜深矣。

。獨不畏霜露耶。生返顧大駭。已念此殆仙人也。亟起爲禮。且延之坐。翁亦弗讓。生因叩其姓氏。翁言吾崑崙第四宮散僊也。吾無姓氏。必欲相呼。以玄隱子字我足矣。生乃大喜。自謂果遇僊也。玄隱爲生言。崑崙凡十二宮。最高處曰閼風。第四宮曰增城。宮有主僊一。餘皆散僊無定員。吾宮主僊爲廣成子也。生聞亦喜。乃語玄隱。能邀吾爲崑崙之遊否。玄隱曰。可哉。君身既有僊骨。與吾曹復有夙緣。且及月明偕遊耳。脫巾擲地。咒之。頃刻遂化爲鉅蓮。花瓣皆作金色。玄隱呼生趺坐其上。生如言。坐甫定。蓮花即徐徐上昇。瞬息間樓臺都渺。花飄月中。如泛舟於海。生意殊皇皇。然性好奇。且行止未能自主。亦遂聽之。已而蓮花忽止不進。聞人言曰。佳哉遊乎。願視花已著地。玄隱俟於道旁。生方起與握手。花已飛集玄隱頂上。復化爲巾。生歎曰。僊家妙用。洵不可測也。玄隱笑曰。小術何足道哉。即謂生曰。此間爲崑崙山麓。稍進左行即增城宮矣。遂前行爲導。生從之。峰迴路轉。忽見五色層雲縈繚天半。鳳凰鸞鶴之屬。往來飛翔。

。玄隱以手招白鶴一雙。與生各乘其一。鶴遂飛騰而上。山間樓閣不殊人世。唯覺月色如晝。閣中有十餘人。方聚飲。狀貌皆殊特。頗有瘳惡可怖者。生意始駭。而衆人見生來。咸歡呼踴躍曰。玄隱先生邀得佳客至矣。即擁生入座。傾觴以進。生察衆意頗不惡。故懷縱飲。言笑甚歡。有頃皆覺微睡。衆起舞蹈作歌。歌聲殊粗曠。方囁嚅未已。忽一人駭呼曰。王至矣。即皆四散。樓閣亦不見。惟亂石叢疊。瀑布飛流。生自顧乃在巖下。飛瀑四濺。如垂簾。酒亦驚醒。知玄隱等非人。自幸不爲所祟。然幽泉怪石。皆平生所未見。亦頗感玄隱。以爲非此怪無由飽吾眼福也。顧荒山寂寂。旣鮮人跡。且無從得食。自念不爲豺虎所飽。亦將以餒死耳。復念諸怪所駭呼爲王者。果何物耶。怪且畏之況於吾人。旣不得避。有死而已。方躊躇間。忽聞有聲悠揚如笛。頓覺肢體皆痠。俄見一物。四爪兩角。面目似人。吹口作聲。生欲奔避。兩足乃弗爲使。物見生即張口作噓噓狀。生覺有人舉己。向物而擲。即飛至物前。物以爪握之。頻嗅弗止。生駭已失知覺。

忽聞有聲砰然。物狀若負痛。生覺被擲入雲際。復下墜。乃挂樹間。樹杈恰承其臂。稍左右出入者。即洞胸矣。生神識稍定。自樹杪窺視。流水迴環。松柏葱翠。景至清曠。初日既上。萬山皆綠。尤覺可愛。頓忘頃間事矣。一人幅巾坐松下。臨流展卷。生見之。念此復爲玄隱子也。即蟄伏弗動。其人似已覺。以手招生曰。客乃攀樹相瞰。欲爲不利於吾耶。生爲所招。即墜其前。墜時勢甚舒緩。若兒童之索紙鳶。徐徐取之。初無苦也。其人遂扶生起曰。通夕爲魘侵擾。得無苦乎。然山中風景飽歷一遍。足以相償矣。生頗訝其前知。曰。僊人。其人曰。吾非僊人。凡人耳。客須知天地間無真僊。果有真僊。決不與君等爲伍。俗所見僊人。皆怪物之假託者也。客所稱玄隱子者非他。玄豹而修真者耳。其餘皆麋鹿豺狼之屬也。生始悟。因與其人爲禮。且詢姓氏。其人自言李姓。本中土人也。因謫戍至此。今爲此邦人矣。偶遊山中。愛其幽秀。因結廬於此。山田十餘畝。薄加墾殖。差足自給。今晨早出。偶見君爲異物所困。略施小技以懲之。不意君乃惠

臨吾居也。遂邀生入其廬。廬因山洞爲之。几案床椅皆山石也。坐定。李因掬山泉烹松實爲飲。談山中事多生所未聞。生居洞中三四日。欲出遊。李輒禁制之。謂荒山多異物。君力未足服魔。遠出殊非所宜。吾生平擅絕技。欲傳而難其人。君神情雋爽。宅心醇厚。茲吾所欲求者也。第君性躁。恐不能卒業如何。生大喜。長揖請受教。且自矢事事如命。必竟所業。李察其誠許之。因教以運氣之術。生晝夜研習。逾月能舉巨石。遙擲至數百步。又能聳身上騰。棲於樹杪。自喜以爲吾技進矣。李又授以劍術。生精習弗輟。一月間能飛劍百步外取物。無失者。李臨觀之。曰君天資洵絕人。循此習之。一年後當悉得吾技矣。生益喜。越數日。李以事他出。云三日當歸。戒生勤習所業。勿問他事。生唯唯。李行後之第二日。生夜坐運氣。忽聞洞外窸窣有聲。生憶李戒弗問。而厥聲漸厲。洞門被撼漸啓。一物探首入。狀至猙惡。生運氣舉石投之。物大嗥而奔。衆聲悉寂。生喜以爲吾力足降魔矣。次日李猶未歸。生自念吾旣負此絕技。何妨出遊。一覽山川勝

景。即出洞。攀登崖頂。縱目四觀。遠近泉石。悉在眼底。踞坐久之。復涉澗深入。白雲掠面。生步而縱行。不覺早暮。俄見天光開朗。有三人坐巖石上。方聚談。言語調啾不可解。見生來皆拊掌。即奔躍而下。繞生左右。指而相語。其中一人前引生腕。生運氣一揮。其人仆於地。復起。餘人大怒。環而歐生。生任其攢毆。衆皆憊一哄而散。生笑曰。技止此耳。有頃。空中一巨石掠生額而墜。生舉首。望見巖畔物。巍然高坐。三人侍其側。以手指己。物隨所向撥石投之。生笑謂此物亦作祟耶。即拾墜石反擲。中物腰間。物若無覺。而石來如雨。生乃奔避。物見生奔。即大笑。聲震巖谷。生越澗而逃。物一躍遂過。勢若風雨。生偶返顧。物高三丈餘。兩手如箕。亟奔。而物行絕迅。瞬息已及。以手攫之。生念是物殊蠢。可以智取。因潛出飛劍欲取其目。物似頗靈。稍一俯首。劍乃着於眉間。物初不覺苦。拔劍擲之。生遂被攫。知必不免。悔不從李言也。物忽長號反走。生墜於地。渾身皆血。遙見李緩步而來。曰。君胡自用若此。吾若稍遲一步

。已作是物晨餐矣。因指地上墜指。粗若人臂。曰。此物之將指也。吾以飛劍砍之。君乃得脫。不然且爲所搯以死。生大感愧。即與李偕歸。李曰。君性躁。終無望於大成。人才良不易得。吾技竟無傳人矣。生亟謝過。自誓不敢復違訓誨。李終不可。曰君留此無益。吾技非冲融和粹者。不能得其奧妙。君矜躁根於天性。縱能強而從我。亦祇得其皮毛。不能復有加進也。旣來此。不可空歸。吾更當有以授君。因取一卷與生。視之皆符咒之文。曰。此縮地法也。能習此則四海之內可以聽吾所之耳。乃略爲指點。謂生曰可以歸矣。州中人方待汝也。生自願已在州署門外。追憶前事。恍惚如夢。未幾辭歸。仍徜徉山水間。然不敢復作遐段舉之想矣。

●十年一夢

方嶠。江右世家子也。年十七已膺鄉薦。清季科舉旣廢。鬱鬱不得志。有父執某公官京師。因往依之。某公亦清貧。歲俸所入。纔給衣食。以生遠來。姑留寓中

。課其二子。生意別有在。青燈黃卷非其好也。課暇輒游市肆。過舊書攤。尤留連不能去。偶於攤畔見北洋編書局所出戰術學。詢其價僅二百。即購歸。旦夕揣摩。不三月。於各種軍隊之性質。器械之應用。以及應戰方略。罔不精習。謂自可將十萬兵橫行中外矣。時以所得誇於某公。某公大驚以爲奇才。曰吾幾失子矣。因言門人某君方總某省陸軍教練處。迭有函札來通殷勤。吾爲子介紹以往。宜可得志。生大喜稱謝。某君即爲作書。並贖以程儀四金。曰吾所能助子者。僅此而已。生本文人。未諳世務。官場情況尤非所習。聞某總辦爲公門人。以爲一紙之書宜有奇效。轅門投刺之日。某總辦必倒屣相迎也。欣然就道。既至命車往謁。到門警衛森嚴。逡巡久之乃進。門者謂總辦午後始到處視事。今猶在公館高臥也。遂轉車至總辦私宅。叩門環三無應者。即入司閤室中。豪奴三四。方盤坐縱談。一老者臥烟榻上。向燈燒烟。且燒且與衆人相應答。衆見生入。略若無視。生前鞠躬袖刺欲出。言來謁某大人。一人睨之曰。若誰家從僕耶。主人何官。謁某大

人何事。生即出刺。言身是也。自京師來。有某公書。囑投謁某大人。其人聞言。傲然弗答。生憤甚。欲批其頰。老者徐徐自榻起曰。先生新來。宜未知此間事。督部有令。省中司道勿得於私宅延致賓客。收受薦函。凡遠來投效暨到省候補者必於公廨延見。先生所挾函牘殆此類耶。果爾請往教練處投遞。吾儕不敢與聞。語已願謂其曹曰。若儕殊憤憤。人家初出茅廬。胡能見怪。若曹隨主人久。習知官途規矩。曾不能爲人指導耶。語時若嘲若諷。生羞憤交集。擲刺而出。猶聞老人作鄙夷聲曰。書獃子乃欲求官。且俟十年學習耳。午後如老者言。往教練處投刺。號房見刺。熟視者久之。謂尋常拜訪耶。抑猶有他事耶。生即出函示之。云以某公之命來謁。其人即返刺。云若此非吾儕事矣。生怒。大聲斥之曰。此非若儕事。誰之事耶。其人亦反唇報之曰。自有主者。非汝所宜問。生益怒。守衛兵士聞遂集。生告之故。一兵甚文。曰先生勿怒。吾處差役各有專責。號房司傳達。至函件投遞。則別有東房司之。先生既挾薦函。宜趨西廂。是東房專司函牘者。

也。生如言往。見一人體幹豐碩。肥白如瓠。方解衣盥礪。口含潮烟。吐烟囿囿上升。生前投函。言欲謁總辦。其人曰總辦忙甚。何暇延客。即擲函座上。略不顧視。頃之一少年趨入。其人呼之曰。老伴。即以此書呈總辦。天氣方暑。往來奔馳。累人欲死矣。少年曰。汝亦太懶。即挾書以去。生坐久之。竟無消息。意頗惶急。念某總辦方得意。未必猶念師門。此書殆如投石於海耳。俄聞傳呼聲甚厲。少年匆遽奔入。問其伴曰。方某去未。願見生。亟足恭爲禮。曰總辦請見。即高舉名刺。延生入客室。問某公安否。近狀若何。生一一具答。總辦曰。吾師清介絕俗。吾屢向訪求人才。師不一答。今乃作書盛譽吾兄。吾兄固自不凡。師謂吾兄兼擅文武。諸葛弗管也。吾必言兄於督部。督部愛才。每以屬僚掩抑真才爲慮。故有薦函私受之禁。欲於公庭表而出之。吾兄大才。督部所延攬恐後者也。即與生同車返私宅。闢室處之。諸豪奴竊竊私議。願以總辦待生有加禮。目視而已。次總辦言於督部。述某公函中語。督部嘗官京朝。頗聞某公名。曰此公不

輕假人。所言必不妄。立命傳見。生入謁。陳用兵方略。參以歷史往事。洋洋不能止。督部傾聽忘疲。撫其背曰。今之子房也。即日辟爲練兵文案。兼教練處提調。生故能文。所草章奏。督部無不傾倒。累保至特用府。且大用矣。共和旣成。督部去職。生居幕府且三年。薪俸所餘可二千金耳。時遣老相聚。謂共和無久理。清祚且復。他日中興。凡曾汗僞命者。皆聖朝所進棄者也。吾曹姑退隱。以待天下之清耳。生宦囊雖非豐。然寒士生涯。亦足稍支歲月。不亟爲出山之計。年復一年。民國已三載矣。向所謂遺老者。亦駸駸改節。顧問參政。人人且優爲之。生家居無聊。環顧昔日朋輩。紛紛入仕。意不能無動。即致書友人。自述清貧之況。友知其意。爲言於當道。電招至京。髮種種猶新剪也。當道以聞曹處之。厚其廩餼。生優游京國。意頗自得。未幾帝制議起。生殊憤憤。以爲共和果不可行。則宜復辟。今以民國元首而竊帝號。是拿破崙所爲也。國亂且無已時。遂南歸。然猶月受政府廩給也。南歸可一年。北方政潮日惡。復辟謠言益喧傳衆口

○生喜謂天下且太平矣。其明年復辟之變果作。不十日而敗。生聞之。投筆長嘆曰。天下事不可爲矣。遂憂鬱成疾。一夕倦臥。殘燈如豆。忽見僕人持刺入。言某大人過訪。某大人者。嘗與生共事督部幕府。督部倚爲左右手者也。入民國來。其人歷官中外。累居顯要。生頗不以其人爲然。久不相見。其人殊念舊。歲時緘扎饋遺。常相往來。是夕忽聞造訪。生喜即命延入。寒暄甫畢。其人即言。諸葛先生將以草廬終其身耶。生答言。盲者不忘視。跛者不忘履。勢未可耳。其人復言。久臥者思起。久閉者思啓。先生獨無意耶。因言莊將軍近奉朝命。徃征不庭。參佐雖多。莫有總持全局者。吾以兄薦。將軍甚然吾言。遣吾來徵同意。未知高臥南陽之諸葛先生。能否爲蒼生起耳。生聞言大喜。精神陡振。歎曰。髀肉復生矣。丈夫固當爲知己用。弟恐思力就衰。弗勝重任耳。其人喜曰。然則兄已許我矣。吾當復於將軍。以安車重幣奉迓也。次日果有使者到門。以白金三千爲聘。且附某將軍手書。諄諄致殷勤。生受聘遂行。既造軍門。將軍延見。執禮甚恭。自言

吾當造請。以軍務方急。未能抽身。曾託某公致意。猥承不棄。惠然肯來。先生厚我至矣。軍中宜有名額。請以總參議相屈如何。生許諾遂居幕府。將軍性豪。生所言咸見聽許。部下將佐多出行伍。於生尤深欽服。皆呼爲某先生。將軍既立武功。旋膺封疆之寄。自以武人不諳政治。事事悉諮於生。生權勢益重。妬者漸多。即平時欽仰之人。亦難免求全之毀。將軍有部將某。與將軍俱起卒伍。勇猛善戰。人俱呼爲賽李達。性疎曠善罵。自將軍以下皆畏憚之。賽李達自統一軍。頗跋扈。生輒加裁抑。賽李達素輕生。以爲書生何知世事。復爲所裁抑。益不平。但以將軍方信任生。未敢發難。將俟隙掎之。尋將奉命出征。生爲規畫方略甚周至。而諸將久耽安逸。且狃於屢勝之威。遇敵多不設備。遂爲所敗。賴賽李達爲殿。乃得全師而退。衆人多咎生。將軍雖素重生。而羣言籍籍。不能無疑。旣敗。大會諸將開軍事會議。生痛陳積弊。語甚切至。與李達忤。賽李達奮拳抵几大詬生。且歷數其罪。生弗能堪。遂向將軍乞休。妬生者復從而媒孽之。將軍雖溫語

慰留。而禮意浸衰。生覺之。歎曰。可以去矣。此軍暮氣已深。諸將不亟覺悟。終有覆滅之時。吾不能坐視也。再請退益力。將軍許之。諸將聞其言者。以語賽李達。賽李達大怒曰。此僉乃敢咒我。即遣騎邀諸途。生驅車過之。伏作。諸槍並發。生負痛大呼。則一檠依然。家人畢集。始知頃間所歷皆夢境也。歎曰。十年事業。乃一夢耳。吾又安知今日所歷之非夢耶。自是宿疾若失。不復輕議天下事矣。

●東江外紀

明自天啓以後。邊事大壞。崇禎初年。起袁崇煥督師遼左。崇煥整軍經武。自負五年可復全遼。清人既畏憚之。思陵亦倚畀甚至。然卒中清人反間。處崇煥極刑。既壞長城。邊事益不可問。明迄以亡。崇煥一人之身。而前後遭際如此。人多議思陵之惑。抑崇煥亦有以取之也。毛文龍之在東江。朝議頗倚以爲重。崇煥遣殺之。朝議紛然。思陵亦爲之大駭。乃以倚重崇煥故。轉溫詔喻意。崇煥方憫然自得。而不知禍已胎於此矣。相傳崇煥初受命督師時。嘗與陳眉公相見於錢龍

錫家中。眉公語崇煥。拔一毛而利天下。奚不爲也。崇煥素不喜文龍所爲。聞言意乃決。文龍遂死。而崇煥亦因以及禍。文龍有雄志。使其不死。成就未可量也。文龍杭州人。嘗往來上海。萬歷間以都司援朝鮮。兵敗遁歸。偶遊逆旅。見一偉丈夫。甫入門。即索酒及豚肩。踞坐飲。旁若無人。酒酣脫幘擲案上。熱氣蓬蓬上升。遙望作龍虎形。心異之。就與攀談。則海陽耿仲明也。兩人聚談既洽。益恨相見之晚。仲明言明祚且盡。或云遼東有天子氣。吾將往遊。冀有所遇。足下能偕行乎。文龍奮然曰。男兒當及時立功業。吾行決矣。遼東王氣。何用知非僕耶。遂偕發。過旅順。爲海盜所困。兩人劇戰不得脫。一健男子持斧虎吼而入。衆乃太奔。文龍與仲明感其援己。趨與爲謝。男子言。吾遼陽孔有德也。敬二君之勇。不量其力。拔斧相助。胡謝焉。文龍因述東來之意。願相與結納。共圖大事。有德許之。結伴同行。議所向。或言王巡撫化貞方招募豪士。盍往投之。因藉其力以謀進取。皆曰然。遂往投効。化貞一見器之。即授耿孔把總。文龍

仍原官。予卒二百人。文龍謂二人曰。吾得所藉手矣。即言於化貞。欲以奇兵由海道擣滿洲。一舉而覆其巢。化貞以爲然。許之。化貞有記室某。杭人也。文龍以鄉誼故。偕耿孔往謁。記室見二人大驚。曰君等皆貴人也。願謂文龍曰。二人皆當以君貴。君相貴矣。然而多險。過此十年當有大厄。幸而無恙。後福不可量也。文龍色動。因請屏人密語。曰。君視吾相果如何。記室曰。君相固非久居人下者。願以僕揣之。神旺而駁。氣峻而蝨。殆割據之豪耳。雖然。彼二人者皆佐命之臣也。胡以竟居君下。此理殆不可解。文龍謝之。遂出。明日浮海東行。因與二人共議用兵方略。仲明言海中有皮島者。扼渤海之口。北距滿洲國境不八十里。東北可達朝鮮。若能襲取而有。因而招徠流亡。可以廣衆。通海上貿易。可以致富。蓄積既豐。然後南出登萊。沿海道以入南京。可得志於天下。或北取遼瀋以植其基。南入燕京。以應王氣之兆。即兩者俱不得志。取朝鮮而墟之。亦足自成一國家也。文龍拊掌曰然。願吾儕皆大明臣子。今明祚雖衰。名分猶在。且朝廷

未有大惡。遽議舉兵。難以得志。不如北取遼瀋。名爲恢復國家已失之地。實則自植不拔之基。吾聞中朝有魏忠賢者。陰懷不軌之志。吾人宜藉其力覆明社。俟彼篡奪旣成。國基未固。一舉而去之。如發蒙振落耳。衆皆曰。毛君固自不凡。遂潛師夜發。清兵守皮島者不過數十人。文龍及其衆掩至。守者不及防。遂潰。殺其守將。俘兵十餘人耳。文龍以報化貞。化貞遽以大捷聞。朝旨嘉獎。各進官有差。文龍遂據皮島。海濱之氓多歸之。於是結連賈舶。通商朝鮮。一歲中獲利無算。流亡大集。衆至十餘萬。累遣奇兵侵入清境。輒大獲而歸。清人甚惡之。然無如何也。文龍勢旣浸盛。頗以貲籠絡朝士。朝士多稱其能。遂授總兵官。累加至左都督掛將軍印。賜尙方劍。然其自負益甚。明廷嘗遣姜曰廣往按之。文龍匿其精卒。而以羸弱者應校閱。曰廣使還上言。文龍以二百人入鎮江。據鐵山。招降夷。撫歸義之民。至十餘萬。不可不謂之豪傑。若堂堂正正。與虜決勝於郊原。不獨臣不敢信。文龍亦不敢自信。若養成一隊精銳之兵。設伏用間。乘敝出奇。

。文龍自信其能。臣亦信文龍之能也。疏上報聞而已。然文龍實有奇略。其所部士卒。亦驕捷善戰。嘗遣其愛將王甲率兵三千人。溯鴨綠江。越長白山。行無入之地數百里。其登長白山時。山勢陡峻。士卒皆以繩相縋而上。中途遇大熊。高丈許。衆皆驚避。王甲戒士卒勿動。持滿以待。熊既近。諸弩並發。中者三矢。熊若無覺。益前奔。攬發弩者兩人生扼之。甲前與鬪。熊左右支格。奪其矛折之。遂以短劍搯進。頻斫其股。熊乃仆。甲亦傷臂。所攬兩人斃矣。既過長白山。甲與其衆約。夜突清營。每人各挾短刀。見辮髮者。即恣斫勿問。清守將不意明兵猝至。皆大驚。自相踐踏。死者無數。清人大震。王甲語其衆。乘勝遂進。可復遼瀋也。然士卒遠來疲敝。甲又傷於熊。創遠不能進。軍中無善藥。疾乃益劇。清兵察知虛實。密調精卒。截其歸路。因而攻之。衆皆殊死鬪。殺傷過當。孤軍無援。餉械復缺。甲裹創力戰歿於陣。所部三千人。脫者三人耳。歸報文龍文龍歎曰。惜乎奇兵而正用之。吾之過也。益與耿仲明孔有德謀。欲部勦其師分道

並進。方規畫未發。政府忽議以文臣爲監軍。文龍抗疏請止。朝議始譁。或劾文龍糜餉殺降。或請撤皮島兵移屯寧遠。事雖不行。文龍意不自安。及袁崇煥來督師。以文龍跋扈。頗不善之。始受事。文龍來謁。崇煥接以賓禮。意文龍必辭讓。文龍自矜功多。抗禮不稍屈。崇煥惡之。乃決去之矣。崇禎二年五月。崇煥以閱兵爲名。泛海抵皮島。文龍部下有知崇煥與文龍相惡者。即語文龍。督師此來。恐不利於公。宜豫爲戒。文龍曰。彼所恃者尙方劍耳。吾亦嘗奉此賜者。彼其奈我何。其人曰。不然。督師文人多城府。公恐非其敵也。文龍笑曰。吾自審無過。且此行也。彼實就我。非我就彼。脫有不測。煩諸君一舉手耳。彼何能爲。崇煥既至。消息益惡。耿仲明孔有德勸文龍遂舉兵入朝鮮。文龍謂術者語吾。今年有大厄。吾宜慎重。冀可自脫。兵兇戰危。姑待來年。吾料督師縱不利於我。不過削吾職耳。吾寧以一官爲輕重者耶。衆人遂不復言。文龍往謁崇煥。崇煥欸之有加禮。每縱談劇飲。輒至夜分。文龍語人。督師厚我。我必無他。衆人聞之。

。防亦稍弛。崇煥與文龍談。動以歸鄉之意。文龍益喜。以爲吾固知督師縱不利於我。不過解吾兵柄耳。因漫辭以答。謂吾非不欲歸。但東事未畢。吾職未盡。丈夫固當立功外國。寧能鬱鬱域中。吾欲於東事畢後。襲朝鮮而有之。因以水師縱橫海外。此亦丈夫之雄也。崇煥益不悅。遂以六日邀文龍觀射。設幄山上。遣部將率衛士伏於幄外。文龍至。其部卒不得入。崇煥曰。予詰朝行。公當海外重任。宜受予一拜。交拜畢。登山。崇煥問從官姓名。多毛姓。文龍曰。皆子孫也。崇煥大笑。因曰。爾等皆積勞海外。月米止一斛。亦殊可憐，宜受予一拜。望汝等爲國家盡力。衆皆頓首謝。崇煥因詰文龍違令數事。文龍抗辨。崇煥厲色叱之。命去冠帶繫縛。數以十二罪。文龍猶倔强。然已受縛無如何。但曰吾自信無罪。崇煥曰。人臣無將。將則必誅。爾試自問。平日所爲何事。文龍乃無言。崇煥悉召文龍部將。問以文龍罪當斬否。衆人倉卒相顧無一語。唯唯而已。崇煥乃頓首請尙方劍。斬文龍於帳前。諭諸將士曰。誅止文龍。餘無罪。衆人憚崇煥威

。無敢動者。於是命棺斂文龍。親具牲醴拜奠。曰昨斬爾朝廷大法。今哭爾僚友私情。爲之下淚。衆心乃定。遂分遣文龍子承祚及副將陳繼盛等。統領其衆。且爲奏請增餉十餘萬以慰衆心。然烏衆既失主帥。心乃携貳。當文龍作鎮之日。所部將弁。餉米雖薄。而互市及他所得不啻數倍。故養兵雖多。餉額殊寡。及崇煥奏定兵制。兵數較減。餉乃轉增。思陵既駭崇煥之擅殺。又以兵減餉增爲疑。遂不滿於崇煥矣。文龍既死。部下豪將多脫去。各謀建樹。清人既無後顧之憂。益得以全力經營關外。邊防遂益單薄。而耿仲明孔有德兩人。卒有登州之叛。雖不久遂平。而兩人者。咸降於清。遂導清人以覆明祚。皆封王云。

●粉侯遺事

明莊烈帝將殉國。手劍砍公主曰。若何爲生我家。其言絕痛。帝王末路。固不如一平民也。其實昔時帝王。即席全盛之業。亦祇修飾偶像。自便威福。未嘗一日有生人之樂。凡其眷屬。亦桎梏於儀制之下。初無生趣可言。某筆記載清代某公

主事。謂清代公主多無子。俗傳以爲歷朝懼龍種傳於他姓。每公主遣嫁時。輒進禁方。絕其生育。此讐言也。清代公主府中。衛侍森嚴。有管家媼者尤擅權。公主與額駙內外隔絕。額駙非有宣召。不得入重門以內。公主即欲與額駙相見。必重賂此媼。否者媼輔引例箝制。倡隨旣闕。故其生不蕃。惟某公主多權賂。憤管家媼抑制。一日入宮面請於皇帝曰。臣女遣嫁何人。帝大笑曰。額駙某非汝偶耶。公主憤然曰。臣與額駙。終年不得一見。額駙何狀。臣乃莫審。因盡發管家媼罪狀。帝復笑曰。管家媼汝僕耳。汝以爲不使。遂去之可也。吾寧暇問汝家事耶。公主退而斥管家媼。召額駙與處。清代公主有子者。惟此公主耳。帝王家固無生人之樂。不待國破家亡。久已身入地獄矣。某說部所載明駙都尉鞏永固事。可與此參較也。永固宛平人。雅負才氣。年十五。以選尙主爲駙馬。明初。尙主必擇大臣子弟。其後定制。由禮部榜諭在京官員軍民子弟。年十四至十六。容貌齊整。行止端莊。有家教者。報名司禮內臣。於諸王館會選。不中則博選於畿內山

東河內。選中三人。欽定一人。然其時官員子弟多欲以科名自致通顯。恥以尙主取富貴。其家人亦深以子弟尙主爲苦。凡報名待選者。大抵皆平民覬幸富貴者。永固家故寒微。英俊好學。光宗女樂安公主將出嫁。循例榜諭。內監中有與永固父相知者。嘗以休沐日過其家。永固方歸自塾。內監見之。愛其韶秀，詢所讀書。永固應對如禮。內監大喜。謂其父曰。汝家今富貴矣。明年朝廷選駙馬。郎君可往報名。必入選也。其父謂報名應選。例有規費。吾家安能辦此。內監謂吾能爲子任之。可告郎君。準備作新貴也。永固聞之。頗不謂然。請於其父。謂男兒當讀書自致將相。寧能依附帝室。苟求進取。歷來尙主之人。罕以功名自見。寄生而奴使。豕交而獸畜。志氣銷磨已盡。事業安有可言。今日士大夫。於尙主者。皆陽尊之陰鄙之。駙馬雖偶得參與朝政。迄不爲衆望所屬。况國家無萬年之久。儻來富貴。未必非禍。脫有不測。求爲凡庶且不可得。吾父惟一子。奈何棄諸兒。幸而落選。猶得父子相保。不幸而入選。去爲人奴。父子且難相見矣。其父

聞言。亦頗感動。踰月內監復至其家。言吾已爲郎君布置妥帖矣。其父因以永固之意告之。且言欲勿應選。內監驚曰。此何等事。寧能以兒戲出之耶。皇家禁令森嚴。試問汝有幾個頭顱。乃敢若此。其父大恐。曰然則惟公命耳。永固遂應選尙主。凡納采問名納徵諸禮。費皆出於縣官。旣婚。駙馬見公主行四拜禮。公主坐受一拜。永固私語人曰。貴賤雖殊。名分已定。堂堂男子。乃向人作此禮。可歎也。公主頗婉嫵。永固儀容秀偉。公主亦心悅之。旣行合卺之禮。贊者傳言駙馬且退。公主欲休息矣。即有內監導永固出就外舍。曰駙馬且憩。明日當行禮也。公主聞駙馬退。意頗不懌。猶以爲暫出當復入也。而長夜沉沉。女侍奏言宜就寢。駙馬竟不至。永固出居外舍。以內監奉侍。偶一步趨。輒有人相隨。意尤不副。以爲吾何罪。乃處囹圄中耶。天未明。即有人促駙馬起。問何事。曰當行禮。永固未及答。即有人引其臂。被以衣冠。導至府門外。贊云駙馬行禮。即導至月台四拜。內傳唱云公主答禮。行禮旣畢。乃返飲膳。俄傳某先生至。贊云駙馬

謁師三揖。永固視其人。則業師陳鍾盛也。明自嘉靖以後。定例以禮部主事一人。專在駙馬府教習。永固既見鍾盛。喜極欲涕。即長跪曰。唯吾師憫我。鍾盛曰。且起徐言之。內監皆驚。永固起。泣言吾始以爲尙主者。雖墮吾平日之壯志。猶克享貴戚之安樂。今若此。直囚犯耳。囚雖拘繫。猶得甘寢。吾乃併此亦不可得。吾又不如囚矣。鍾盛即問內監。歷來公主婚禮。雖稍異平民。從未聞拘束至此。禮果何由起。內監瞠目弗答。第曰吾儕循故事耳。朝廷體制。先生宜知之。鍾盛曰。吾稽禮典。未聞有此。抑故事當若何。內監言駙馬合卺後。每日黎明必造府門外月台行四拜禮。如是者三月。乃得上堂。上影壁。入內庭。仍前拜跪。然後進侍膳。公主正坐進膳。駙馬侍立於旁。駙馬疏進菓物稱臣。公主答禮稱賜。又如是者久之。乃許成婚。今駙馬初尙主。吾儕未測主意云何。惟循例行事耳。駙馬倘以旦起爲勞。吾曹亦可爲力。從前某駙馬嘗有行之者。每日晨遣人於月台外大呼行禮。內外應和。禮即告畢。第茲事須府中上下布置妥貼。吾不能負此

全責也。鐘盛知其意。曰吾與駙馬徐圖之。即私語永固。此曹志在得賄。汝家素貧。安有餘財。歷彼所欲。此曹居心奇險。倘竟無所獲。此數月內難保無不利於汝之事。公主深居簡出。又寧知此中鬼蜮。吾當爲汝請於朝廷。幸而得旨。早日成婚。當無事矣。即日爲奏。言所教習駙馬都尉永固事如此。安有既經合卺。猶須拜跪侍膳。歷數月之久。乃許成婚者。理既乖迕。禮無明文。故事陋習。未可因仍。請旨許永固擇日成婚。府中內監皆恨鐘盛。謂陳先生壞吾例也。永固既成婚。公主頗與相愛。始知怨曠之感。彼此乃有同情。他公主聞永固事。亦皆歎喟。以爲我曹胡不早遇陳先生也。永固立朝頗著名節。莊烈帝嘗命諸戚入太學肄業。諸人或以齒釋辭。永固獨自請就學。帝大嘉獎。未幾丁父憂。特旨賜祭。公侯以下皆會葬。儀仗數十里。鄉里故人皆曰此翁福厚。乃生賢郎。然是時國事日非。遼東失地既不可復。陝豫流寇復蜂起。莊烈雖旰食憂勞。而廷臣泄沓成習。人人皆知必亡。人人皆欲於未亡時豫爲將來身家之計。永固歎曰。吾與國共休戚。義無

他願。有死而已。公主亦憂勞成疾。曰吾能及國家未亡而死。是吾福也。樂昌破鏡之往事。吾不能爲己。李自成既僭號。明祚旦夕且傾。賊逼京師。公主已前卒。未葬。永固有子女五人。歎曰。使吾爲平民。猶克有遺種。今竟何如。又曰吾子皆帝甥。不可污賊手。即以黃絨繩一一束縛。繫於主柩。諸兒皆涕泣。永固歎曰。彼曹不幸。乃生今日。復何言。即拔劍自刎死。

● 弈 緣

揚州阮生幼善弈。年十四已負時譽。諸大家弈譜。偶一流覽。輒能覆記全局無遺着。雍正間。某公撫山左。性嗜弈。聞生名。遣人以重幣往聘之。於是生年已二十。累應童子試皆不售。意亦頗厭制舉。忽被隆禮。喜可知也。戚友聞其事者多諫阻。以爲吾儕讀書人。宜以文章自致通顯。奈何挾此小技。作人門客。縱獲多金何益。生不聽。同學某生爭之尤力。至以絕交相要。生亦弗顧。遂束裝附漕艘行。舟過濟寧。遇風未發。鄰舟貴官某。云係奉旨出都查勘海塘者。侍從如雲。

聲勢烜赫。忽有豪僕過舟。言奉主人命延阮先生臨談。生訝其無因却之。僕言主人與尊府有世誼。故敢奉邀。先生過談便可審也。生遂具衣冠往謁。貴官殊謙抑。至云其尊人嘗督學江蘇。生父實出門下。頃無意中聞舟人談生路歷。憶在京師曾與江蘇京官往還。頗耳生名。萍水相逢。寧非快事。平生於弈道雖未入室。亦頗得門徑。客中無事。請共一局。銷此永日如何。生聞言大喜曰。姪年穉詣淺。不免貽笑方家。長者倘幸賜指教。固所願也。貴官即呼從者展局。弈具殊精雅。貴官自取黑子。而以白者予生。生謙弗受。貴官不可。乃入局。生初置子頗審慎。十餘著後覺無他異。漸縱意攻擊。終局貴官大負。推枰狂笑曰。後生固自可畏。老夫當退避三舍矣。生聞言頗踉蹌。自悔多上人也。貴官殊不置意。縱談江南風物。及京中朝局。生傾聽不能措一辭。俄僕人持束入白濟寧州官送酒席至。貴官頷之。即命張筵。邀生共飲。飲次於席中諸珍品。皆能一一道其故實。生覺所言都未嘗聞。開懷縱飲。浸至沉醉。及醒。忽覺衾褥溫軟。紅日滿窗。始知身在室

中也。室殊雅潔。壁間懸素琴一張。劍一盾一。床前置書案。案上一硯方可八寸。秃筆三四支。露插筒中。硯旁置書可十餘冊。皆長可盈尺。紙色深黯。望而知爲古本也。生駭甚。自念吾豈夢耶。俗言夢中嚙指當弗痛。即以指入口猛嚼之。痛極而號。有人舉簾入曰。先生醒耶。夜來甘寢否。生視之。昨日延已過舟之僕也。即詰之曰。主人安往。吾何爲至此。且此間何地。僕笑曰。先生勿急。少選當自知之。乃爲生具盥漱。甚殷勤。生旣無可奈何。亦遂安之。偶翻案上書。則古禮器圖。刻畫工緻。施以采色。甚可觀。日已向午。僕人傳言某先生至。生起迓之。昨所與共飯之貴官也。其人甫入。即長揖稱罪曰。昨日昧冒。安居長者之列。吾知過矣。先生幸見恕。生憤然曰。君誠何人。乃鬼蜮若此。其人笑曰。先生勿怒。吾之爲此非得已也。吾人敬先生深。故專舟奉迓。否則三四莽夫。足以致先生矣。生聞言意乃轉恐。曰此間何地。見召何事。吾旣備蒙禮遇。自當有以報君。其人笑曰。吾亦奉命行事者耳。君所欲聞之事。自當有告君者。先生須之。

○勿躁也。有頃聞室外傳呼聲。應者近千人。曰王命延阮先生入。其人即導生出室。庭中竹石錯列。芳草被徑。繞廊西轉出門。遙見十餘步外。戈矛森列。映日作光。行近轅門。壯夫數百左右夾侍。皆豹頭盔兕甲。狀至威猛。導者前呼阮先生至。衆皆正立。舉矛爲禮。生驚不敢仰視。行可數十步。導者先生升堂。一偉丈夫起拱手曰。嘉客辱臨。蓬戶生輝矣。生唯唯遜謝。丈夫延就坐。生坐定神色稍復。曰大王見召何事。丈夫笑曰。先生讀書人。奈何作此口吻。果承相愛。呼我爲將軍足矣。生曰。然則將軍何事見召。丈夫曰。聞先生善弈。有欲與先生角藝者。故使道相邀。僕於此藝雖非所精。亦頗欲作壁上觀。先生雅人。當不以爲怪也。○生方欲有言。丈夫忽命治酒款客。堂下噉然應和。厥聲若雷。生遂啞啞不能出口。俄報席具。丈夫導生偕入一室。室中陳設甚華。設座四。丈夫延生上座。自據主位。其右即導生入門喬裝爲某貴官者也。旣即席。丈夫顧侍者呼女公子來。衆復噉應。久之聞環珮鏘然。侍女四人擁一少女出。年可十八九。雲鬟霧鬢。風

致娟好。衣履皆作古裝。益覺都麗。生乍見目眩。丈夫曰此小女也。幼嗜弈。凡名手過此間者。輒邀與弈。勝既弗欣。敗亦弗戚。吾憐其少喪母。故聽之而勿禁也。即謂女曰。此阮先生。南中名手。汝旦夕所欲承教者也。女即檢衽爲禮。落落無稍羞澀。生轉刺促弗寧。酒罷。丈夫命設局。生與女對弈。頗懼不敵。每著必再三斟酌。女則灑落自如。行所無事。自酉盡亥。局乃竟。女所負者九捩耳。更請一局。局半。生自計當負三枰。祇欲轉敗爲勝。必出奇著。而女隨方應付。生苦思竟不能過也。天向曙乃畢弈。生仍就客舍憩焉。次日午後。生方醒。侍者言吾王延先生入。生從之。丈夫戎裝擐甲。置酒堂上。揖生就坐曰。今夕當送先生歸。生方流連昨事。殊無意即去。聞言色微動。丈夫曰。先生視吾爲何如人。生囁嚅弗能答。曰。姑言之。何害。生曰。將軍殆草間英雄耶。然氣象殊不類。丈夫曰。先生言固當。吾固朝廷命官。年大將軍麾下也。嘗從征青海。累功至提督矣。大將軍旣得罪。部下多散。僉以大將軍死於非罪。陰懷不平之心。寧向草

間偷活。不受當今爵祿。當今亦以吾曹爲大將軍親信。欲悉鋤去。吾曹益不得不爲逃死之計。今淮北山左間。擁衆自保者。所在而有。吾實忝爲之魁。當今亦知之。特簡某公巡撫山左。此公夙負能名。屢遣人偵吾動止。幸吾善趨避。渠終無所得也。此次延先生來。吾意蓋別有在。吾生平縱橫天下。到處皆可爲家。但以愛女爲累。不得不棲息於此。吾初擬以女託先生。吾女乃不以爲可。吾問其故。彼乃託於星相之說。吾以此女所言多驗。未敢違其意也。雖然。吾竊有求於先生。先生旣受某巡撫聘。煩爲我轉告巡撫。勿相煎太急。吾力雖弱。取彼首領猶反掌耳。吾客舍所陳禮器圖。先生嘗見之矣。是巡撫臥室中藏品也。先生煩携以往。巡撫方懸購此書千金。歷城伍伯。亦累遭縣官鞭撻。豈知物猶在此耶。吾女夜來默窺天象。云帝座旁黑氣如管。當今運祚殆不永。巡撫何苦助桀爲虐耶。生聞丈夫言。爽然若失。丈夫亦知其意。曰人生貴自遣耳。今夕有酒。且盡一夕之歡。引滿勸生。連沃數觥。校下諸樂並奏。音節悲壯。生亦痛飲至醉。及醒則身仍

在舟中耳。問之舟人。皆言兩日來鄰舟竟不見。吾人以先生失踪。言於州官。四出訪覓。莫得先生消息。惶急未知所計。不意先生乃自歸也。生詭言吾與鄰舟主人有舊。送渠南行盡一程。乃返擢。昨夕返時。圍舟皆寢。吾不欲驚汝等。自舵樓潛身入艙。猶等竟弗覺也。衆皆曰。先生殆有僊助。何往來飄忽若是。生笑曰。此則非吾所敢知者矣。數日後。生至濟南。即偕使者走謁巡撫。方入轅門。遇戈什哈某。言日來撫公心緒殊惡劣。阮先生既來。暫就客舍。稍緩投謁也。生問其故。戈什哈言撫軍有家傳古書值三千金。愛護甚至。平日置臥室。摩挲未嘗釋手。十日以前。撫公夜坐。方展玩間。忽寒光一瞥。燈燭盡滅。比呼燈至。此書已失所在。現方懸賞千金。飭歷城縣嚴比捕快。追求此書。查無下落。神色沮喪。逢人便怒。吾乃不審數卷爛書有何寶貴。乃使彼朦朧顛倒一至於此。萬一將撫院關防失去。不知此公當作何狀。生笑曰。此書之值。乃遠過於關防。即謂使者曰。爲我告撫公。吾已將得此書來矣。使者曰。信乎。生笑曰。吾豈妄言者。即

舉袂以授戈什哈曰。此撫公生命所係也。速將以入。戈什哈曰。先生胡自得此。生曰。吾見撫公當自言之。汝第以此偕使者入告。撫公必喜而賚汝。奚多問爲。戈什哈如言。撫公果大喜。即重賚使者。並及戈什哈。立命延生入見。寒暄未畢。遽問得書之事。生請盡屏左右。因述原委。撫公默然無語。長歎而已。自是捕盜稍弛。累被朝旨切責。或言於朝。謂撫臣自得幕客阮某。旦夕耽弈。以故多廢事。有密旨逮治阮生。生聞之。驚駭夜遁。遂遭心疾以卒。巡撫旣失生。無以應命。方駭懼無出。忽聞大行晏駕。事乃寢。

●疑 獄

洛陽許某。以縣令官江左。擅鈎距之術。省中有疑獄。諸老吏不能決。許一訊而服。大吏器之。累任繁劇。頗著能名。然其權某縣時。嘗誤入人罪。事後頗自悔。嘗舉以告人。謂足爲鑒戒云。縣南有劉家鎮。村人以種桃爲業。每歲桃實。防人盜摘。或鳥獸侵害。輒相與結棚以守。守者挾木棍及鐵尺數事。用備不虞而已。

。某日夜雨。守者深匿弗出。次日桃下有伏尸。腦際血津津出。里正報官勘驗。死者爲二十餘歲少年。傷痕則鐵尺所擊者也。村人皆曰守桃者實殺之。縣官逮問諸守桃者。皆弗承。因盡拘諸獄。而以死者年貌張諸市。莫有識者。乃以無名男子殮。且通詳大府。逾月。有他邑婦人投狀。言其夫挾貲遠出。累月未歸。聞縣中所殮無名男子年貌頗類似。乞檢驗。覆檢皮肉已腐。模糊不可辨。婦言其夫左足有歧指。驗之信。遂以尸歸。而累牘請訊諸守桃者。以爲殺其夫而取其貲者必此曹也。縣官提諸守桃者研審。盡諸楚刑。而供詞前後無歧。皆曰是日以雨故未出。縣官無如何。長繫而已。諸守桃者旣繫。家且破。邑中人頗有言其枉。縣官自負爲能。欲窮竟其事。商于幕客。將微服出訪。幕客朱姓者。精六壬。願不輕爲人論休咎。縣官焦勞。自請爲占一課。課成。言此案罪人不遠。當在城西三十里內。其人當爲李姓。年可二十六七耳。縣官大喜。即夜喬裝潛出。明日飲於城西某村肆。酒半。聞鄰座有人談縣中近事。一人曰。某村命案。竟無頭緒。人謂

縣官廉明。吾意亦殊憤憤。守桃諸人。安分自保。今乃無辜囚繫。案久弗決。此數人者。闔家畢命矣。一人曰。某久未見李某。昨日遇於某姓家中。幾不相識。衣裳楚楚。大類富家兒郎。或言彼暴得橫財。詢之彼乃深諱其事。是殆有不可告人者耶。一人曰。某素純謹。是宜無他。一人嗤之以鼻。縣官聞言。默然欲盡其辭。而二人忽止弗語。頃之遂去。縣官召肆中人。詢頃間飲者姓氏。肆人一一具告。縣官領之。并詢村中有李某者否。曰有之。此人嘗偕二人飲於吾肆。近月以來。忽久不至。或傳此人已暴富矣。縣官遂歸。立命人以簽召某村里正。詢村中姓李者凡幾家。曰惟李某一姓耳。曰其人何如。曰素無賴。近已折節爲善人矣。曰汝何由見之。曰其人酗酒嗜博。近日酒肆博場中。竟不見蹤跡。曰。此人日來在村否。曰在也。但深居簡出耳。縣官喟然嘆曰。孰謂世間無鬼物哉。里正瞠目不解所謂。縣官曰。汝速歸。爲我監視此人。勿令遠逸。是劉家鎮案正兇也。渠爲鬼困。不得遠出耳。里正大駭不敢復請。即馳歸。縣官立遣役往捕李某。語幕客

曰。朱先生洵神人也。李某是日方與妻坐談。自言年已長大。事業猶未成就。秋後擬行賈。遂什一之利。幸而大獲。可致饒富。不幸而無所獲。亦可周知世事。藉爲自活之謀。語未卒。聞叩門聲甚厲。倉卒未應。來者已破門入。聲勢洶洶。堂室皆滿。李某大驚失色。里正進言。奉縣官命捕人。究竟所犯何罪。汝宜自知。復語諸役。君等遠來。宜且稍憩。此人料不得脫也。李妻聞里正言。知有變。亟出與諸人周旋。各致賄有差。諸人卒擁李某以去。至縣。縣官詢諸役曾大索家中。覓得兇器否。諸役相顧莫答。縣官命復往。乃得鐵尺及棍以歸。縣官曰。是矣。即提囚研訊。曰汝何故殺人。王法具在。汝知罪否。囚痴立不知所答。久之乃曰。吾未嘗殺人。官奈何以此問我。縣官曰。汝家本貧。近乃驟富。試問錢何自來。非以殺人越貨故耶。曰吾固不敢爲此。曰汝能言錢所自來。吾乃信汝。曰吾不能爲官言之。吾自信吾未嘗爲不義事。亦未嘗取非義之財。縣官大怒曰。囚乃強辯。劉家鎮之案孰爲之耶。吾作吏十餘年。所鞫罪人以千數。盜案猶有漏網

○命案無不破獲。冥冥中自有主者。決不許汝倖脫也。立命伍伯曰杖之三百。囚極口呼囂。杖畢。曰汝速自承。勿枉受苦。囚泣弗答。縣官曰。不承者更予杖。囚亟曰。吾當爲官言之。吾錢所自來。蓋得之天賜。吾嘗與吾妻夜坐。吾妻以吾好遊蕩。苦口進勸。吾即自矢改行。但以家貧不能存活爲慮。即聞簷前有人高語曰。果從此改行。吾即以此資汝。旋有囊物墜地作聲。囊中皆銀也。縣官益怒曰。汝勿作嚙語。吾非三歲兒童。此等語寧足誑我。即命伍伯猛批其頰。牙齒盡脫。囚哭不成聲。縣官色愈惡。曰勿更作此態。速吐實。不然更被極刑。囚猶極口呼枉。伍伯即施刑。囚昏絕者再。嘆曰姑自承。猶克須臾無死耳。即言是夕陰雨。偶過劉家鎮。遇孤客闌行。因以鐵尺自後猛擊其腦。仆之而取其囊。所儲白金可三百兩耳。縣官曰。囊今安在。囚供在家中某箱。縣官即命役往取以來。囊中白金猶二百許也。復傳原告婦人。問其夫所携行囊何狀。及所儲銀數。出囊驗之。大小號誌悉如所言。銀數亦與囚言適合。於是囚罪乃定。諸守桃者皆得釋。然

長繫數月家已破矣。李某之妻自其夫被拘後。百計謀脫其罪。而縣官意已決。旁人不能廻也。既以罪證確鑿擬大辟。移獄申府。府中如擬定罪。復移按察司。按察使某疑其枉。欲爲平反。而囚劫於積威。莫敢枝梧。縣中所具獄辭及贓證。又至完密。遂成定讞。縣官旋以期滿受代將去。陰遣吏役示意諸守桃者。製萬民傘以進。諸人不得已。如言行之。進傘日。鼓樂前導。士女臨觀者相屬。縣官意甚得。方紛擾間。忽有丈夫排衆而前。取傘裂之。片片飛舞。曰守桃者固無罪。李某獨有罪耶。身爲民牧。不能準情酌理。剖決疑獄。乃以偏見妄入人罪。此等縣官。尙何歌頌之有。衆皆大驚。方欲致詰其人已渺。縣官聞之。大不懌。即遣役偵捕。其夕縣官方閱公牘。忽於卷中得片楮。字大徑寸。言吾自以報仇殺人。奈何累及無辜。徧詢諸人。莫知此楮所自來。縣官亦心怯。罷偵捕之令。亟遣人馳告省幕。暫緩詳部。既去職繼任者聞前事。欲遂改判。苦不得正兇。即有山陽李姓到縣投首。自云家故小康。吾弟少不更事。曠比匪人。死者嘗誘與博。傾吾家

資。吾父憂憤以卒。吾方行賈於外。既歸乃悉聞之。誓不與此人共天地。渠畏吾復仇挾資遠出。吾踪跡至此。因伺隙踣之。吾仇既復。他無所戀。偶過李某之門。聞彼夫婦坐談。不覺有感。盡擲囊金予之。遂復遠賈。不意竟見以此累及彼人也。前縣官臨去時。吾始聞李某事。欲到縣自首。念彼自負精明。必護短不肯改判。且獄已讞定。彼願惜前程。尤不肯自行翻案。以取効於大府。吾知投首無益。故裂傘以張其事。投楮以警其心。前官既去。後有賢者必翻前案。吾所以遲遲至今。始自投首者也。於是累年疑案始大白。李某得釋出獄。山陽之李。以自首復仇得減等。尋遇赦免罪。前縣官以失入例應得罪。幸獄未詳部。大府又素重其才。置不問。

● 硃虎符

甬人朱某官滇中。蓄一老僕。性醇謹。委以事。未嘗有過失。尤嚴於取與。不妄受錢物。人咸敬重之。朱嘗奉檄赴昭通勾當公事。道出牛欄河。河上橫藤索爲橋。

。索上貫以木筩。渡河者坐筩中。往來牽索而過。朱逡巡不敢進。欲他出則又無路可達。僕進自言。能負主過河。但請閉目勿視。防致驚恐。朱不得已從之。僕負朱於背。即聳身履藤索而行。捷如飛鳥。朱偶一啓視。已達北岸矣。某日早行。山路逼窄。忽有暴客據險而噪。矢集於輿。輿夫棄輿逃。朱驚怖無人色。僕掣藤杖左右旋舞。若飛龍盤空。衆皆辟易。其魁躍進大呼曰。公得勿龍鞭張四耶。吾曹知罪矣。即羅拜而去。朱自是益重僕人。每舉其事告人。聞者多弗信也。僕有錦囊。臥起未嘗去身。囊中物秘不示人。願從外表測之。殆爲楮絹之屬。囊形扁。又輕若無物。或謂是必秘密符咒。或疑爲某種重要文書。莫能決也。然性多恐。夜間不敢獨行。每陬隅幽黑。輒疑有物潛伏。質明膽乃陡壯。願仍有所畏。尤畏虎。儕伴有談虎者。輒變色。或張畫虎於壁。即望而却步。人每以此笑之。朱有少子。慧黠善畫。聞僕畏虎。輒畫以驚之。一日偶以黃紙研硃畫虎。奮爪怒目。絕肖真者。署其傍曰付張四。暇僕他出。函置枕畔。僕歸視大震。即自擲於

牀。終夜喃喃。同伴陰笑之。次日僕狂易發疾矣。病中譫語間作。多不可解。第聞我何罪乃迫我至此。綿續至七八遍而已。朱素方嚴。子弟有過。鞭笞甚苦。衆莫敢言畫虎事。以故朱祗疑其僕中惡。延致巫醫爲之解禳。醫言六脉平和固無疾。巫則妄指某某爲祟。索香楮醴牢諸費。當爲謝神解厄。沉綿三日。迄未有瘳。朱大憂慮。適有僧自鷄足來。僉許爲善知識。能言過去未來諸因果。因延視僕疾。僧嘆曰。此夙孽也。入力弗能爲已。吾姑爲說法其可乎。因布席禮佛。爲演金剛般若四句偈。謂一切世間有爲之法。無得久停。須臾變壞。一切心行念念生滅。以是故苦。應觀過去所念諸法。恍忽如夢。應觀現在所念諸法。猶如電光。吾觀未來所念諸法。猶如雲歛爾而起。應觀世間一切有身。悉皆不淨。種種污穢。無一可樂。反覆申譬。聞者皆大感動。自午至昏。僕忽蹶然起。合掌作禮曰。吾殆夢耶。朱喜曰。汝今愈矣。僕見主人在側。因言老奴乃不自謹。以爲主人憂。吾罪重矣。吾一向沉迷。自秘身世。今聞大師言。覺世間一切有爲法。無非幻境。

○吾身浮漚聚沫。有何繫戀。縱令當前幻滅。亦復自得佳趣。矧此十餘年秘史。隱而不言。徒滋戚戚。無寧明白披露。轉覺心神安泰。諺云夜夢不祥。榜門大吉。吾過去歷史。皆不祥之夢也。榜之可耳。主人亦知吾爲何如人耶。吾山東荷澤人也。世業農。頗饒給。吾鄉多盜。有產之家。子弟多習拳棒。用以自衛。吾幼從名師學。年十六。技已出儕輩上。嘗使酒與博徒鬪。諸博徒皆披靡。吾方醉不能自制。追斃之。死三人。遂拘於官。醒乃悔之。罪證既確。按律當死。吾家厚賄監卒。監視稍弛。吾乃伺隙脫逃。隻身走數千里。輾轉入黔之苗山。有苗女五姑者。勇健冠其曹。以力役諸苗寨。悉聽指使。所屬近三千人。專以劫掠爲事。湘黔川滇數千里。無不被其害者。五姑甚神明。所號令。雖千里外莫敢違。或違輒爲所覺。行戮無貸。衆皆畏之。吾旣入苗山。途遇劫盜與鬪。殺三人。傷十一人。衆皆奔潰。吾亦憊甚。稍憩。五姑率其衆忽至。睨之甘許佳人也。吾意殊輕之。一交手乃覺爲勁敵。日向晚。渠不支。遂反奔。吾追之且及。忽濃霧蔽空。有

黑虎三。繞吾前後。吾左右騰掣。忽爲所仆。昏不知人。比醒已爲囚虜。衆人以吾傷其儕伴。爭欲甘心於我。五姑不可。謂渠一人勝汝曹百輩矣。吾當收爲吾用。因勸吾歸彼。當以自副。吾許之。遂爲苗峒副會矣。五姑洵美。吾每欲貢媚。渠輒覺。眉目間稜稜含殺氣。吾懾而止。願其人乃殊好貨。凡部下行情劫所得。必盡數獻納。五姑輒取其十之一。餘乃分畀諸人。渠積貨雖多。享用殊寡。所得財物。部署而居積之。物物皆爲簿籍。以書記四人司之。簿籍高可尺許。五姑暇輒披閱。某物月增若干。津津計校。多進則喜。寡進則怒。實則寡進多進。均箱皮而屋列之。徒使掌管者多一勾稽而已。五姑所享受者。初不以此爲羸絀也。五姑雖女子。左右皆健男。渠謂女子能力不如男子。世間女子惟渠一人。餘皆蠢蠢鹿豕也。諸人初侍五姑。頗涉遐想。已皆震於其威。趨走惟謹。帖然無敢有他志。五姑之視此曹。亦等諸器械。未嘗一假辭色也。吾旣爲副會。時偕所部出掠。每大獲而歸。五姑益重我。有大役必以命我。距今十年前。吾奉命往劫某貴官。貴

官自滇返京。輜重累累。護以兵可三百。吾邀諸鎮遠。甫一合。統領某參將先遁。衆皆潰。吾拊掌笑曰。鼠子竟不值一擊。衆中有人。虎吼曰。賊乃敢藐視而翁耶。視之一老卒也。年五十矣。目光炯炯四射。吾知其非易與者。竭吾技與搏。其人健甚。吾勢且敗。其人忽揮拳曰止止。汝拳法不似南人。得勿嘗此從北人習技耶。汝師何人。吾具告之。其人曰。然則吾與汝同門耳。汝胡作此生涯。吾復告之。其人曰。丈夫當自立功業。奈何爲一女子役屬。效鷹狗所爲耶。吾聞言乃大愧悔。而中心若有所戀。躊躇不能決。其人曰。君已着魔矣。吾力未能拯君。且待吾師耳。驅車竟去。吾自念無以報五姑命。歸且得罪。而五姑已以虎符來。虎符者五姑所用爲號令者也。以黃紙畫虎。或硃或墨。墨者行刼。勿得殺人。硃者縱無所獲。必殺人以報。吾是日所奉本爲墨符。臨時乃得硃符。五姑似預知吾事者。吾遂追捕。得逃兵二人。盡殺之。其中一人。自言家有老母弱子。乞貸一死。願爲奴。吾弗聽。其人宛轉哀號。吾竟殺之。旣殺乃懷隱痛。回憶吾友之

言。益覺愧悔欲死。念欲委此而去。忽見黑虎繞吾左右。吾知爲五姑魔術。乃大震恐。遂率所部歸。五姑見之。謂汝乃敢懷異志耶。吾自囚虜中擢汝。畀以重任。相待不爲不厚。汝尙敢若此。須知吾力至偉。汝縱善走。不能出吾掌握也。吾唯唯而已。一夕月明如晝。吾夜出。登山四望。萬峰浸月色中。如入瓊瑤世界。耳目頓覺清曠。方留連間。遙見黑影蠕蠕。向吾而來。吾駭極幾不能聲。來者非他。乃吾師也。師言吾早知汝着魔。但以汝甘入迷途。吾亦何術拯汝。汝今旣知愧悔。只此一念靈明。便是自拔之道。吾當助汝。因出一紙若符籙者。曰苗女旣善魔術。汝又惑於其色。故動止不能自由。今汝靈明旣復。佩此紙足以制魔矣。雖然。殺業已深。報應慮弗能免。吾道力淺。未能爲汝解脫。奈何。吾旣受籙。神識忽清。聞師言報應事。心頗惴惴。師復爲吾言。將西遊天竺。訪靈山聖蹟。吾請從行。師許之。行至滇中。途遇一人被髮垂肩。鬚長過腹。面橫廣可七八寸。兩瞳炯若明星。吾師趨與爲禮。兩人不知作何語。師因語吾留滇。異日自有遭

遇。渠即自去。吾遂留此。得爲主人僕役。主人待我良厚。吾亦自喜得所。願每念向日行事。輒覺跼蹐無以自容。吾自佩符以來。魔不吾侵。方幸得脫妖女掌握。豈知昨日乃有硃符及我。詎吾師向日所授者今竟無靈耶。仰吾靈明忽昧。魔乃乘而入之耶。大師固善知識者。幸有以詔我。因出函封示主人及僧。朱方駭異。其少子跳擲適來。見之。喑曰是吾所爲也。吾以彼畏虎。聊以此驚之耳。乃煩和尙解釋耶。朱聞言大怒。欲撻之。僧止之曰。是吾所謂夙孽也。此僕與郎君前身殆有深冤。欲索償於今世。硃符之投。亦小小懲戒耳。幸遇老僧爲汝解脫一切。今世無慮報應。來生不可知也。僕恍然大悟。即日言於主人。乞從受戒爲沙彌。朱憐而許之。留三日。遂偕僧西行。

●畫裏恩仇

嶺南蕭生。癖嗜書畫。有家藏手卷。畫人物絕工緻。無題款。而絹色沉黯。或傳爲唐人所作。莫能明也。邑紳某公豪侈而貪。人有珍玩。必百計謀取之。或繩生

藏畫於某公。某公使人致意。願以千金易畫。且致生通顯。生不可。使者三返。增至二千金。生罵之。某公大怒。夜使盜入生家。劫畫以去。生知某公所爲。控於縣請緝盜。辭侵某公。縣官不敢詰。生訟弗已。會學使按臨。某公陰囑以劣等。視生矜。生既失畫。復削學籍。憤懣氣結。遂遘疾以卒。嗣子曰武。方襁褓。生妻陸自鞠之。某公聞生已死。存者僅孤孀弱息。乃自喜。以爲吾畫可長據而有也。生妻陸素有遠識。始某公索畫時。陸即力勸如價出售。以爲國方多僻。懷寶抵以買害。與其爲人豪奪。寧求善價而沽。矧耳目之好。飢不可食。寒不可衣。寶之何爲。畫旣被劫。生欲鳴官。陸復阻之。謂萬緣集合。終有散時。即此一身。齒牙毛髮亦且化爲沙塵。況於身外諸物。安能長爲吾有。自有此畫以來。歷年不知幾千百載。輾轉遷徙。乃入吾家。又不知其若干載。乃入君手。倘能長與此畫相守。君又胡從有此。生終不聽。生旣以憤死。陸大慟。陰自矢必爲復仇。願以弱息無託。強自抑制。即向人述家事。亦不作一憤惋語。某公偵之。

益發舒。謂蕭氏遺族無如我何矣。武年漸長。陸親課之讀。八歲讀左氏春秋。至夫差使人立庭事。意若有感。以告其母。母爲泣下。武訝之。亟請於母。母具告之。武泣曰。母胡不早告兒也。母曰。仇方得勢。汝雛耳。稍露聲色殆矣。勾踐二十年而後沼吳。姑忍之十年。未晚也。武泣受教。未幾某公忽奉朝旨起用。陸聞之喜曰。仇今可復矣。天尙相予。及見吾子之長。武忽暴長。壯健如成人。陸遣從師學。師故宿儒。奇其狀貌。盡以所學傳之。且教之技擊。三年學成。聞仇家官京師甚得意。言於其母。欲入京叩關。訴父枉死狀。母不可。謂茲事差無佐證。訴必不直。吾懷復仇之志久矣。懼未能自立。是用遲遲。今汝旣長成。門戶有託。報仇之事。吾自任之可也。武弗可。曰母年長矣。又女流也。報仇之事。不敢以勞吾母。兒受吾母十餘年教養。正爲今日事耳。兒請行。母且留。母曰。吾自有復仇之策。懷之久矣。此何等事。寧憑恃少年血氣所能爲者。汝若不聽吾行。便非孝子。武乃不敢復言。母遂北行。武潛以己意告其師。且言其母北行事

○師沈吟久之。曰吾姑爲子卜。乃命龜。有頃卦成。曰汝母此行必能復仇。然厥功弗竟。汝其勉之。成汝母之志者汝也。武遂隻身入京。中途遭疾。困於逆旅。逆旅主人見其狀貌魁梧。疑爲入京應試者。待之有加禮。疾愈北上。比至京。聞仇人以事逮問下獄。罪且不測。武且喜且悔。喜者喜其仇亦有今日。悔者悔不早來。萬一仇人罹法以死。己且不獲手刀以逞厥志也。生有中表某官京師。武嘗從家人得其住址。乃往依焉。甫入門。其母出罵曰。孺子乃敢違吾教。將謂爾母不能了此事耶。吾仇旦夕復矣。汝來何爲。悠悠長途。萬一遭疾。爲爾母憂。汝心安否。且泣。衆人勸之始止。遂留武同居。武得間請於母。乃知致其仇於獄者母也。歎曰吾母智慮深遠。固非吾所敢望。初某公奉召入京。聲勢烜赫。頗作威福。納賄賂。母固已知之。旣入京。欲偵得其證據。因以傾之。苦無着手處。會某公內眷欲備一粵嫗。母遂微服。託人爲介以往。大見信任。遂潛伺其交納情狀。及往來函札。一一具載。密藏之。乘間以付中表某。遂聞於某侍御。侍御據以上

達。嚴旨逮問并籍沒其家。母已先期移疾去。獄既具。某公宜大辟。賴座師某爲緩頰。減等擬戍伊犁。母歎曰。吾力盡矣。吾仇猶未竟復也。可奈何。武自負其力。請以隻身要諸途而刺之。母不可。曰渠雖失勢。此行必盛護衛。刺之必弗克。即幸而集。亦以身試法耳。我老矣。不忍見汝縲紲入獄也。復仇自有道。多力何益。武乃止。未幾母以疾卒。既殯。武歎曰。吾必復仇以竟吾母之志。乃歸葬耳。遂隻身赴伊犁。既至。聞某公方爲伊犁將軍延居幕府。歎曰。吾間關數千里。今若此。吾仇竟不得復矣。奈何。道遠又無相識者。乃爲酒家傭保。力作甚苦。主人頗愛重之。武旦夕思復仇。卒不得間。一日有軍署戈什哈飲於酒肆。言將軍欲得材武之士爲衛隊長。選於衆中。無當意者。武慨然自薦。言少習技擊。諸兵器皆諳練。幸爲我言於將軍。誠得進身。沒齒不敢忘德。肆主亦從旁盛譽之。戈什哈意動。曰吾姑爲子言之。成否聽諸運命。戈什哈歸。果言於將軍。將軍召入試之。將軍有硬弓凡八石。部下莫能挽者。武既入見。將軍試以他弓。縱送自

如。若不經意。因以此弓試之。左右控如滿月。將軍大驚曰。此神力也。老夫弗如矣。更命騎射。武踞鞍而馳。轡絕遂顛。武矯騰而上。兩足夾鞍。馬大嘶而仆。將軍笑曰。子則勇矣。南人固不善騎。雖然。以子之材武。日月而習之。必有成也。遂剖授外委把總。曰。姑以此爲進身之階。異日有功再議陞叙也。即以衛隊百人使爲之長。諸人皆置酒賀武。武大喜。以爲朝夕現軍署中。可伺隙復仇也。逡巡半年。迄未得間。而武以捕盜功累保至都司矣。適有邊警。將軍使武率五百人往剿之。邊兵多緜惰。武又新將不習地形。遂爲賊乘。舉軍盡歿。武隻身逃歸。參贊大臣以武失律宜當重辟。將軍愛武材勇。欲贖其罪。牽於衆議未能決。以語某公曰。蕭武奇男子也。吾欲活之。慮違國法。君意云何。且渠君鄉人也。某公阿將軍旨。即曰。將軍居外。自可便宜行事。果此人可用。盍言於朝。使戴罪至贖。某以罪人苟活於此。安敢爲鄉人乞情。第仰體將軍愛才之心。不敢不成人美。將軍曰。吾意決矣。君即爲吾草奏可也。某公即爲奏。盛稱武之材勇。且

言此次失律。罪有可原。乞聖明宥其一死。異日此人必能爲國立功。否者甘與同罪。將軍聖眷方隆。奏上即邀俞允。武褫職留營自贖。詣將軍謝。將軍曰。汝得不死。鄉人某公力也。老夫何與焉。武聞言即搏頰自投。曰果爾。沐思寧就死耳。願將軍以標下付獄論法。吾甘死不願生也。將軍大詫。曰汝言云何。吾乃弗解。武慷慨言曰。某吾仇也。實死吾父。吾母爲父報仇。走數千里外。死於京師。未得歸葬。吾今乃賴斯人庇蔭以生。不如死。因歷溯前事。將軍歎曰。果爾。汝兩家可以釋憾矣。此人誠有罪。抑汝父自以忿鬱死。究與加害者有別。渠今家破。孤身遠戍。亦已極人世難堪之境。稍有骨氣者早已自殊。渠特去死一間耳。汝又何必以流血爲快。汝以孤子承祧。當念此身負荷之重。太夫人十餘年鞠養。不知幾許血淚。乃得見汝成人。詎可執匹夫之諒。憑方剛之氣。等此身於鴻毛耶。人各有子。子各有親。親親相仇。禍將誰救。今彼旣脫汝於死。汝家宗嗣幸而不斲。亦足以贖前愆。設太夫猶在。必詔汝以釋仇修睦也。汝宜禮先人之志。留此

身爲國家之用。盡日立功立業。爲前人光。乃大孝耳。武稽首曰。將軍誨我至當。敢不從命。將軍即召某公與武偕坐。酌酒飲之。且語之故。曰汝兩家可以釋憾矣。前事視同夢境可耳。某公大媿。不能自容。武眉目間稜稜猶有餘怒。旣罷酒。某公頗自怨艾。念向日以一畫故。至於破人之家。卒之已家亦破。畫今安在。果知世間萬物不可長保。何苦作此冤孽。蕭生雖歿其年。猶有克家令子。我則寄身絕漠。賜環未知何日。後顧茫茫。胡以堪此。逾月。某公遂以憂卒。將軍尋被命內召。便武護某公喪先行。武初弗肯。將軍勸之曰。人旣死矣。生前恩怨都已乘除。枯骨何知。奈何猶與爲仇。武大感悟。即護喪歸。初。某公夫人聞某公之戍。蕭氏實爲之。頗切齒於其孤。旣武爲護喪歸。乃釋憾。武旣葬其母。復以原官從將軍征教匪。累立勳業。官至提督。

●記假皇帝案

戊戌之變。德宗幽於瀛臺。宮闈事秘。莫得真相。中外人士。各以臆度爲說。訛

言朋與。不可殫詰。未幾而武昌有假皇帝案。頗類衛太子王之明故事。事見某稗史。說者頗以爲誕。粵人某君。嘗客張文襄所。述其始末頗詳云。文襄督鄂時。治事恒至夜分。或通夕未嘗就寢。已亥五月某日。夜漏向訖且盡。文襄方憑几治官書。有職者然。一人自梁間下。傍立如植。周身衣服盡黑。眉目秀朗如好女。文襄神色儼然。呵之曰。此吾內書室也。汝何人。乃潛夜至此。其人鞠躬言曰。宮保勿怒。小人近有要需。欲從宮保貸金三萬耳。文襄曰此易事也。吾當召司道籌之。抑此金將安付。其人曰。三日後請置金通山門外。小人自往取之。文襄曰諾。其人曰。然則宮保允吾請矣。宮保大人。必不失信。小人拜賜矣。語已遂失所在。文襄始按警鈴呼衛隊。衛隊皆丁男。年事率在二十左右。然甚精鍊。血氣方盛。相矜以力。督署中人呼爲娃娃隊者也。夜深已各就寢。隊長聞鈴。亟集其衆。衆皆荷槍畢至室外。顧寂無他變。皆莫測所以。隊長入請示。謂宮保有令耶。隊今集矣。文襄曰。汝曹職警衛耶。鐘方三鳴。乃皆沈睡如死。署中今有變。

汝曹知之否。因言頃間事。衆皆大驚。於是闔署喧擾。城中文武咸集。分途大索。卒莫得踪跡。越三日。遣人偵諸通山門外。亦竟無所見。第嚴爲戒備。決旬備亦浸弛。莫有復言前事者矣。而假皇帝之案出。衆疑與前事有涉。前此之舉。蓋姑爲嘗試。或陰有所窺伺者也。是歲七月。有異人至贛州。逕造州官。自言從京師來。欲往武昌。以資匱不得達。要州官護己偕往。州官大詫。欲斥逐之。其同來者乃大呵喝。謂汝有頭顱幾許。欲相違拒。州官覺有異。詰其人往武昌何爲。曰往見張之洞。州官意其人。殆文襄尊屬也。乃與偕行。既至武昌。其人即馳往督署。不待通報。逕至內宅門外。闔者止入。其人大言曰。爲我告張某。速出奉迎。聲達於內。文襄方在書室治事。聞之命擒以入。聲音笑貌。宛然德宗皇帝也。文襄大駭。其人即言。遭幽以來。旦夕不自保。今得脫至此。以汝忠義可恃。宜有以處我。且言與贛州牧某同來事。文襄即真其人書室中。遣使召州牧某。某已至。即入謁。歷述所遭。文襄領之。曰然則當召巡撫及司道以下諸官辨之耳。

頃之皆集。召其人訊之。其人即踞坐。指斥諸官吏。凡政事所施措。及平日入告之言。或臧或否。咸中竅要。衆人相顧愕眙。江夏縣陳某由庶吉士散館出宰。有廉曰。此姦人覬幸蓋一者耳。諸憲勿爲所愚。諸憲必欲慎重將事者。一切勿過問。盡以付卑職。職雖卑下。至揣尙能了此。脫有意外。闔家八口延頸受戮。不爲諸憲累也。其人聞言。即迴面向之曰。若非陳某耶。汝政聲素佳。國家行大用汝矣。陳叱之曰。勿妄言。夫政事修舉與否。諸大憲自知之。汝何等人。乃敢妄議得失。其人怒甚。即起奮拳抵几。顧謂督撫曰。即以此人付獄議罪。陳亦厲聲如言報之。諸官莫發一語。皆向文襄。文襄呼陳使前曰。吾今以斯人付汝。茲事洵近誕。第就中情節。決正可以快刀截麻手段治之。汝素有幹聲。好自爲之。陳聞言。即召伍伯繫其人。皆逡巡莫敢進。陳怒。自牽其人以去。親鞫之。其人矢口弗承爲僞。杖之乃大罵。語益激。聞者動色。陳弗顧也。旣不得要領。遂致於獄。典史某私請於陳。謂皇帝不爲母后所容。蒙塵於外。自古有之。周襄王居汜。

唐中宗在房州是也。堂尊讀書人。寧未聞此。奈何逕情遂行。一切不顧。將苟阿西朝旨。欲以取富貴耶。脫有意外。何以見天下士。千秋讀史者謂堂尊爲何人。堂尊幸慎重。勿操切。陳曰。吾計之審矣。勿勞借箸。典史太息而去。即於獄中具衣冠拜跪。自稱典史臣某。見天子蒙塵。肺腸摧裂。小臣職卑。不能將護。使聖躬狼狽至此。萬死不足自贖。其人似喜。溫言勞之曰。使諸臣皆效忠如汝。朕復何憂。抑風霾暫膾。終有晴朗之時。他年復見天日。必不忘汝。典史即叩首謝。侍奉甚謹。且請納女備妃御。其人却之曰。朕方蒙塵。禍福未可料。何敢自耽於色。卿欲納女。他日復位時更議之可也。典史復叩頭。稱聖主者再。乃出江。夏縣繫囚久。旦夕研訊弗能決。其同來者亦繫獄。備諸楚刑。皆堅不吐實。時衆議紛紛。或言宜密電軍機處。詢聖躬安否。或言京中事未可知。驟發此電恐滋誤會。果無他變。益近鶻突。不如遣人入京。假他事爲名。往謁權要。因探宮中消息於事爲便。遂選二人以行。既至京。審京中無他故。即以密電返報。獄乃決。

典史力爭。欲以身殉。縣官言於督部。以卑污昏聩褫其職。陳某旋擢知安陸府。累官至道員。

● 一片石

塔里木河之上游。有川曰喀什噶爾。導源葱嶺。挾諸溪之水。橫貫疏勒全府。流域號爲殷富。有班札布者。天方教徒也。結廬河畔。倚山臨水。屋室軒檻皆依巖壁爲之。班性耽岑寂。終日嚮壁趺坐。壁爲巨石。磨治甚潔。光可以鑑。班自言擅神術。能知人肺腑間事。人有所問。應答如響。凡造候者。班輒與對坐。未嘗有雜言。而所言皆得人意。人偶動念。即爲所覺。商人某聞班名。具禮往謁。見班環堵蕭然。坐席已穿。面目黧黑。神情索漠。不似有道者。陰悔此來爲多事。班即詰之曰。汝非某商耶。海非欲詢我以此行貿易宜居何貨耶。過道來此良不易。旣入吾門。胡有他志。真人詎可貌相者。商大驚。即首服。班曰。貿易無他術。居賤而鬻貴耳。汝此來非欲以重金絲緞耶。吾意不如沙棗佳也。商拜謝如言。

果大獲。班名益著。阿富汗某酋。有世傳寶珠。大可徑寸。夜懸之。光照一室。酋常以自隨。遊俄領七河省而喪焉。酋大憂怖。相傳酋之先人。常誡其子孫。以此珠爲闔族福禍所繫。族有休祥。則珠色朗耀。有咎徵則珠色沉晦。酋旣失珠。慮大禍且及。寢食弗安。其部下者知班札布事者。即言於酋。遣人將幣往聘。班辭弗往。言酋必親臨。吾乃能爲汝決其禍福。酋不得已。造班而請焉。班相對默坐。可一炊許。酋倦且寐。從者欲呼使醒。班止之曰。吾正欲觀其夢中情景也。有頃酋醒。亟自謝曰。吾無禮。乃對大師酣睡。大師幸勿怪。班遜謝。酋顧謂從者曰。汝曹何事。乃聽吾失禮至此。吾懲若曹矣。班曰。吾實爲此。勿責若曹。吾欲觀酋夢境。故禁若曹勿聲。今則旣見之矣。酋珠非貯以錦囊佩諸身旁者耶。失珠之時。非嘗在某旅館晝寢。旣醒而喪之耶。酋曰。師何從知之。班曰。吾以曾夢境知之耳。酋驚曰。師誠神人。吾自失珠後。每寢輒夢。夢中情景。宛然失珠之時。凡室中几案陳設。及當時侍從僕役往來蹀躞情況。輒留吾腦間不能去也。

。班曰。曾皆見之矣。吾似有所得。曾能留此一二日，吾當爲曾蹤跡竊珠之人。今猶未敢武斷也。曾曰。師能容吾留此。固所願也。泱旬亦甘。况一二日。曾遂留居班廬。飯疏飲水。略無厭色。班則旦夕嚮壁。目陶指畫。喃喃若誦經咒。居二日。曰吾得之矣。乃草一紙授曾。曰曾歸如吾言之。賊可得珠可返也。初曾既失珠。旅館主人即召警察大索。徧拘館中執事者。偵察久無驗。有一人忽脫去。衆疑即盜珠者也。乃以其人像片遍致諸偵探。未幾果得諸哈爾濱。送致七河省警署訊之。其人自言有兄在海參崴營漁業。招往爲助。以官府偵察甚苦不得往。兄又累電相催。故亟亟自脫。不意中途乃遭逮捕。失珠事實不知情。吾果得珠。當避匿深山窮谷中。否亦遠適新大陸。烏敢由火車赴海參崴在俄政府勢力之下。公然爲旅行之舉乎。遂出電文及車票爲證。驗之皆信。警管如何羈之。索諸其家。四壁立。何從有珠。其內在海參崴營漁業。頗發達。號爲小康。海參崴警署召詢之。則自言去家久。僅知有弟某爲旅館侍役。憐其孤苦。嘗電招之。不知其性行

果如何也。既久無徵驗釋之。其人尋去之新疆。爲俄國某領事侍者。領事聞班札布之異。嘗造其廬。其人偕往。班一見輒咨嗟者久之。其人懼不敢復面班也。某會既受班教。即造領事。侍者見會駭欲引避。會願謂領事曰。吾今日爲此人來也。請得留彼共談何如。領事曰諾。侍者弗肯留。會即語領事。此人嘗竊吾寶珠。吾今追尋至此。不容彼復兔脫矣。侍者大詬曰。會勿妄言。此何等事。乃以蜚語毀人名譽。須知吾人視。名譽爲第二生命。有毀吾名譽者。誓以生命相搏。會宜知之。會曰。吾豈妄言者。試問乘吾熟寐。以迷藥妨吾知覺者誰耶。纖腰慧暎。自飾爲貴夫人者。非汝之同謀者耶。得珠而後。巧爲脫卸。又故布疑團以亂人耳目者。誰實爲之耶。汝能一一爲吾剖析。吾敢不自承爲妄。侍者口呿者良久。乃曰。會言殆同夢囈。會曰。吾亦不敢自論非夢。此中情節。吾皆從夢境得來。願夢而巧合於真。夢境即真境也。謂夢爲真何害。侍者曰。吾殊不解會言。會曰。汝勿強辯。吾當日雖在夢鄉。凡汝曹前後謀畫。吾皆歷歷如見。所以不即舉發者。以

未得證佐耳。今證佐備矣。吾已遣人分途探索。旬日以內吾珠當返。汝縱狡者。焉逃吾鑿。即以片紙示之曰。汝試讀此。當有合否。侍者讀竟。即泥首自承曰。吾誠有罪。此珠今且返。吾罪倘可末減。會能赦吾。沒齒不敢忘報。會曰。汝既知罪。當佐吾求珠自贖耳。侍者曰。會已知之。何須於我。會曰否。茲事非汝莫了。吾當偕汝往巴黎一行。侍者曰。會已赦我矣。會笑曰。汝疑我欲致汝於法耶。吾豈誑人者。汝若不信。吾爲汝誓。吾不誑汝。汝必助我。侍者乃誓曰。吾若不助會者。謨罕默德實監之。無得良死。會曰。吾信汝矣。遂辭領事。與侍者偕行。既至巴黎。往謁某珠寶鉅商。鉅商見侍者來。曰吾已重酬汝矣。來將何爲。侍者曰。吾弗受酬矣。吾金猶在。當奉完耳。即出匯票付之。且曰物各有主。今主人在此矣。引會遂前。曰此阿富汗某會也。珠宜返彼。鉅商怒甚。曰若平日受吾金。奈何乃泄吾謀。侍者曰。吾亦迫於勢耳。會甚神明。已盡知吾曹舉動。吾縱欲自秘何益。因出一紙曰。此會所書者且讀且譯以告鉅商。商大驚歎。曰吾經營十餘

年。乃爲所敗。東方固多異人。語未竟。有人闖然入。侍者阻之弗得。入門去面幕。乃好女子。商驚曰。汝胡爲至此。曰獵狗追急。馴鹿能弗避。願見會在側。矍然曰。君非阿富汗某酋耶。胡爲在此。酋曰。汝勿更貢媚。吾今知狐狸可畏甚於虎狼也。女慙而却。商曰。吾儕計謀已爲此人所敗。吾今還珠矣。指侍者曰。汝欲知其詳。問此人可也。即啓積出珠。曰吾福薄不能享。謹歸諸有德者。赫赫帝命。吾寧敢違。遂以歸酋。錦囊密緘猶昔也。啓之珠光四射。侍者及女皆驚。曰當日匆匆行竊。竟不及啓視。今乃得飽眼福矣。女曰。往事可勿問。吾獨慙受人鉅金。造果乃如此耶。商曰。此無與汝等事。凡事咸有成敗。方其經營之時。孰不望其成功。而卒於敗者天也。吾人今茲所經營者。不可謂不周至。即汝兩人。亦已各盡厥力。凡吾所以遺汝者。皆勞力之報酬也。吾於義爲當與。汝於義爲當取。又何慙焉。語已。復取匯票以畀侍者。曰吾雖不得珠。汝功不可忘也。吾費此鉅金。猶投資於懋遷事業。盈虧吾自任之。不以累吾夥友也。侍者不受。商

再三強之。乃納諸懷。商既弗得珠。頗欲窮究某會所以蹤跡此珠之術。百計探索。乃知由班札布。遂往疎勒謁班。班延之坐。曰君意猶在寶珠耶。此物殆歸故主矣。商驚且忿。念此人乃敗吾事。殊可殺。班曰。吾世外人。君胡相恨之深也。商乃曰。大師洵異人。吾恨不早識大師耳。抑大師胡由能知吾事。班曰。吾自有慧眼。君不見此鑿鑿之石耶。凡君腦中所營營者。一一於石上留痕。譬如照像。不忒毫黍。特君等俗眼不自見耳。商乃大服。既歸以語某學者。學者弗信。謂世間安有此等岩石。能留腦中意念痕迹者。商矢言之。學者曰。世間萬事。惟憑身證。吾當自往。即往見班札布。班已知其意。曰君勿謂智識絕人。遂欲武斷一切。世間物理。吾人詎得而窮者。學者欲乞石。班許之。乃刷一片以歸。與其曹共研究之。某化學家謂此石作用。頗類照像乾片。惟所含原質。有特殊微光性。故能照見一切。復有某科學家。爲之解釋。謂凡人構思或夢想時。腦中所含電波。輒起運動。空中電子受其感應。便生種種幻象。此象印於石間。便成痕迹。紛紛

解說。莫決當否。歲久廬傾。一片怪石。仍矗立山間也。

●採茶女

武彝之茶。爲天下名產。採茶揀葉。多用女工。以其性耐而心細也。韓甲者。世業農。有女素馨。年十七。從人習揀茶。女性慧敏而勤。所作倍常工。諸業茶者爭欲致之。茶商某聞其明慧。欲得以爲妾。遣人諭意。女弗可。商以重賄啗其父。父許之。女泣告其父。謂致富詎無他術。奈何鬻女。吾家雖貧。作苦亦足自活。果命中宜富。弗求可獲。果不宜富。縱驟得多金。終必不保。其父弗聽。竟以八百金署券。署券之明日。忽失女所在。四出覓之不能得。商欲訟諸官。有好事者。爲韓排解。盡反聘金。且泥首謝罪。乃已。素馨既逃。韓妻旦夕詬詈。韓不能堪。鄉人又挪揄之。益覺無以自容。尋以憂憤發疾。一病逾半年乃起。其妻復以憂死。薄田兩畝。醫藥喪葬之費盡之矣。困乏不能自存。聞人言江西封禁山中。曠地數百頃。可以墾植自給。乃偕游食者十餘人。自間道入山。山中森林蔽空。

皆大可合抱。怪禽羣鳴。其聲格磔。山行半日。天色曠黑。忽聞虎嘯。衆皆驚怖。俄見巨虎咆哮而來。惶駭莫知爲計。有黠者言虎亦畏人。可以氣懾也。姑同時發聲叱之。則實大而弘。虎必暫却。衆如言。虎果退。有頃逡巡復來。衆人意頗狎之。虎忽突進。銜一人以去。即主謀叱虎者也。衆遂四散。韓冥行不辨方向。可三四刻。乃得出林。新月銜山。遙見隔溪燈光閃灼。彷彿若有人家。溪水清淺。徒步可涉。乃褰裳而過。數十步外崇垣矗起。墻基皆以文石爲之。循墻左轉行三十步。則朱門半掩。浮漚獸環。儼然巨室。門前兩宮燈。其光方熾。韓饑且疲。號於門而乞焉。一老人出。見韓大詫。問所自來。韓具告之。老人喟然曰。吾固知子爲異鄉人也。吾家主人他出未返。山中又多虎豹。吾不敢擅留客奈何。韓聞言色變。請於老人。乞門內一席地。暫庇此身。曉即他往。老人曰。汝異鄉客也。主人有令。吾弗敢違。萬一發覺。吾與汝俱不利。韓復哀之。老人曰。察汝狀貌。尙謹愿無他。吾姑破例留子。僥倖主人明日未返。可無事也。遂邀韓入室。

出餅餌之。敷了於地。使憩焉。韓展問老人姓氏。弗答。曰子姑一宿即行。何多問爲。韓乃不敢復言。天方曙。忽聞馬嘶之聲。老人駭曰。主人返矣。可奈何。韓懼欲逃。老人曰。逃將安之。不如以情哀主人。或有濟也。俄頃門啓。主人遂入。左右衛侍十餘人。始入門。詫曰。胡爲有異人來此。呼老人問之。老人具以告。其人大怒。命擒以來。遂有人挾韓出見。韓仰視主人。眉目秀朗。一好少年也。詢韓姓氏籍貫。韓具以告。主人似驚且喜。遽命老人及從者悉退。曰此吾鄉人也。吾當與深談。即肅韓入室。厥狀甚恭。韓入見室中陳設絢麗。目爲之眩。私念聞人言天宮。殆不過此。方踟促間。主人遽延致上坐。韓坐定。主人即下拜。韓大駭。起避。主人曰。吾父猶識兒否。韓熟視者久之。曰曠。女素馨耶。胡爲至此。素馨笑曰。固也。請爲吾父言之。先是素馨既知其父欲以己媵某商。乃易男子衣巾以逃。禱於武夷君之廟。乞神佑己。化身爲男子。其辭甚苦。夜夢神告己。謂化男之請。吾力未能。姑以金丹遺汝。此丹能移人心志。益人智慧。汝今

服此。雖未脫女身。而氣概之豪。尋常男子不汝及也。及醒。覺胸中若有浩氣。勃然不能自抑。遂出門他往。道遇老人。爲言江西封禁山形勢。云其中多沃壤。官家以地勢篤僻。慮有姦人嘯聚。故嚴爲之防。然近山人民潛入者日多。大抵以伐木爲業。與地方守者相朋比。得利則勻分之。間有良民。欲作久計。墾田築室。聚族而居。遂成村落。且數十家矣。老人旣以告素馨。素馨忽念此中亦足自立功業。遂以老人爲導。偕入封禁山中。山中諸族旣成村落。墾地日闢。來者益衆。美利所在。不能無爭。始而語言衝突。終乃械鬪不休。素馨始入山時。適有新舊墾民。爭據泉源。各召黨徒。苦鬪累三日矣。新者勢孤。然不畏死。舊者雖衆。然皆倦戰。素馨所與偕之老人固舊黨。而素馨則新來者也。新舊黨徒。見素馨來。爭欲邀其助己。喧阗如雷。素馨抗聲言曰。君等果見愛。願且休戰。吾此來爲君等解鬥。不能左右袒也。幸稍靜聽吾言。吾言果當。無所用戰。言果不當。吾即避去。聽君等酣戰也。語時厥響清婉。神情又至和藹。衆人若爲所感。即各

引却。素馨曰。此山皆曠土。先墾者擇善處。固也。然不能遂以地主自居。憑陵後至之人。凡事合衆則易集。自闕則多敗。今山爲封禁之山。凡潛入者皆違禁也。秘之不奈暇。何爲意氣之爭。脫因而消息外泄。有同歸於盡耳。吾意山中待墾之地方尙多。勿斤斤於一隅之利。妄啓無謂之爭。吾欲爲諸君。制定規約。公決而共守之。以永弭爭端如何。皆曰善。素馨乃爲規約。每戶受田。以六十畝爲率。田各有畛。以正疆界。傍水各爲溝洫。以通灌溉。溝洫之深廣。依其地形而定之。凡舊墾之戶。應助新墾者。或以穀種。或以肥料。或以耕具。各視其力之所餘。新墾之戶。則於歲收時量力報償焉。規約既定。衆皆大服。且公推素馨爲執法之人。素馨陽若不得已而從之者。居久之。李馨居然爲山中首長。而老人則其輔佐也。於是制賦稅之法。諸戶歲納米穀或錢物若干於首長。李馨乃驟富矣。遂築室。畜僕役。有馬十餘匹。李馨每日必乘馬巡行山中。諸墾戶中有口角。或他疑問。輒爲剖決。皆翕然以解。又日求山中未墾之地。相度形勢。預爲規劃。遣人四

出。招致游食之民。居三年。山中墾戶且二百矣。而素馨亦益富。方與衆人議。以巨金賄當道。使弛禁得縱墾。而衆謂如此則來者益多。且患人滿。宜早爲之制。凡入山者必得首長許諾。乃得入墾。冒入者囚之。必令宣誓。然後縱之。韓及同來諸人。皆李馨使人招致者也。韓既知其女貴且富。嘆曰。吾女固自不凡。吾深悔向之過舉也。李馨笑曰。不有向日。安得今日。向非某商吾猶一採茶女耳。富貴固自有命。人力果安所施。語已。老人入言。有新入山者十二人。某某實與偕來。李馨即召入。其人進言。同來十四人。一人斃於虎。一人中道相失。未知去向。李馨領之。韓出。與諸人相見。皆大驚曰。吾儕以爲汝已膏虎吻矣。尙健在耶。李馨曰。諸君勿詫。此人吾父也。衆皆睜然相顧。爭與韓爲禮。李馨曰。山中無坐食之人。吾父家世業農。亦當以農爲事。今與同來諸人。各受田六十畝。諸賦稅法及其他規約咸共遵守。無有違怠。衆皆噉然曰。賢哉首長。韓頗不悅。以爲吾奈何猶與農人伍。吾女富貴若此。吾乃不能一享家庭之樂耶。李馨似已

察見其隱。乃曰。山中之局暫耳。能作苦乃可久。吾甚願吾家世世業農。勿效士大夫靡衣坐食也。韓乃默然。明日遂就田。久之。韓頗泄其行藏於人。諸人漸知李馨雌也。頗指目私議。李馨亦覺之。一日置酒飲諸墾戶。酒酣即自承。爲女子身。且曰。男子未必遂有用。女子未必遂無用。吾託身於此已六七年。山中無盜賊之恐。無衣食之憂。人人各得飽暖。鼓腹而嬉。古人所謂盛世。亦不過此。今規約漸備。諸君第善爲保守可耳。吾今當別。相見自有日也。衆人爭乞留。李馨嘆曰。及今弗去。後且少味矣。衆猶喋喋。李馨拂衣遂入。衆乃曰。僉謀挽回之術。明日復至。已失李馨所在。後三年。有人遊太湖。隔舟歌舞方酣。一女郎憑窗遠眺。眉目間猶有英氣。咸疑爲李馨也。

●衡山僧

湘人楊某嘗游衡山。望見對峰巖壑間。長松蔭蔚。亂石嵯呀。彷彿有人棲止。欲遂窮其跡。因躡屐以往。山徑犖确。不能成步。比至巖下。絕壁峭立。藤葛冒蔓。

○無由得達。楊性好奇。宛轉攀援而上。偶一返顧。目眩欲墮。自巖下孺升歷兩小時。乃造其頂。至則有洞當前。洞口荆棘叢生。僅留一竅。容人出入。楊俯窺之。一僧瞑目趺坐。兀若槁木。無復生意。陰念此僧殆有道者也。欲俟其出定。與作深談。忽聞嗥聲。草木皆震。有虎向己而奔。大驚。疾避入洞。棘刺傷膚血盡出。不暇顧也。洞中闇甚。靈濕之氣觸人欲嘔。虎已到門。探首洞口。厥目眈眈。流涎被吻。楊驚蛻伏不敢動。虎逡巡遂去。良久僧醒。願見楊。駭曰。居士何來。楊具以告。僧嘆曰。凡事固有定數。老衲三十年來。巖棲水飲。與世人不相聞久矣。自分生平歷史。當隨此身灰滅。不意今日乃逢居士。荒山多虎。日暮難行。居士盍留。與老僧作竟夕談。何如。楊曰願之。僧曰。居士以老僧爲何人。楊曰。大師今之達摩也。僧曰。嘻。吾佛門之逃死者耳。安敢妄承謬獎。居士猶憶三十年前。有某貴官過洞庭。遇盜盡覆其舟。無一人返耶。是老衲所爲也。楊矍然大駭。僧曰。居士勿駭。吾當以平生身世。爲居士盡言之。吾家故全州

富室也。道光間海禁初開。吾家以販烟爲業。遂致產數十萬。及洪軍起。吾家嘗輸巨金佐軍。得免劫掠。且受太平天國某名號。洪軍旣敗。族人知吾家事者。脅吾先人索重賄。吾先人以其無厭却之。遂遭禍。破吾家。吾時尙幼。鄉人挾吾以逃。鬻吾於某寺。爲小沙彌。吾師故劇盜。嘗爲擒匪張總愚軍校。擒敗逃之嵩山爲僧。師有門徒二人。皆凶暴無人理。吾時方十歲。屢受其虐。賴吾師庇我。免。二人並擅武技。每出行劫。輒大獲而歸。歸則以珍物奉吾師。師輒受而藏之。吾頗羨吾師富也。一日師方晝寢。忽有官兵數百人。繞寺大噪。師驚而起。即左執盾。右執劍。大呼躍出。官軍皆辟易。吾望見師入衆中。如游龍盤空。頃之遂渺。吾陰嘆吾師勇也。門徒二人亦健鬪。官兵死傷累數十。卒以衆寡不敵。皆爲囚虜。吾亦與焉。縣官以吾年穉。又審吾不知情。乃免吾罪。縣吏某愛吾敏慧。言於官乞爲養子。吾從是人歸。延師謀吾讀。三年吾業大進。遂從縣中老吏習刀筆。年始十五耳。旋以筆札受知於某縣官。延吾爲記室。相從七年。主人以

老乞休，吾亦薄有積蓄。乃納粟。以巡檢官河南。年少銳於任事。頗爲長官所賞。委襄緝捕。累獲鉅盜。大有能名。時歸德有盜。廢亂郡中。大府懸賞購捕弗能得。爲患滋甚。日向昏。附郭通衢。輒恣劫弗禁。府尊聞吾才。言於巡撫。屬吾以卒百人。使往治盜。吾旣奉命。不動聲色。密購眼線。一日偶於城西六十里。聞數人作庾語。吾怪而陰識之。歸以語老於捕盜者。乃知爲盜中相語之辭。蓋他方之盜。來訪其魁。而未知所在。問於同黨。而彼人告之也。吾於是知盜所在。乃選五十人。皆急裝持械。夜至盜魁所居。其地爲一古寺。寺門臨水。樹木陰翳。吾乍至其地。頗覺胆怯。願爲名心所驅。乃復鼓勇前進。毀寺垣而入。義盜不爲吾備。爲虜者七人。盜魁竟逃。擾攘終夜。天色微明。吾騎而追盜魁。且及之矣。魁忽反顧。呼爲沙彌時舊名。曰孺子聽之。吾不忍死汝。是以亟逃。汝猶窮追弗已。莫怪老夫無情也。語已。即揚手發槍。一彈掠吾耳而過。吾審其人。鬚如蝟毛。禿而僧衣。識爲吾師也。即止從人勿追。而以七人者返報。去城可三里。

。城守某參將。率其衆迎面而來。欲分吾功。吾弗可。參將忿而去。吾遂入面府尊。府尊大獎吾能。旋提犯研訊。皆從盜也。問首盜安往。莫肯言者。然府中盜案自是稀矣。未幾府尊去職。代者至。欲盡反前人所爲以自炫異。參將因之短吾於代者。且曰渠盜實與魁稔。追且及矣。縱之。而受賄焉。且以爲功。府尊弗信。請調取同行兵士問之。必得其情。代者如言。果得吾遇盜魁反走狀。即發怒。囚吾於獄。爲書以告巡撫。鍛鍊甚苦。欲入吾重罪。賴前府尊在省。力言吾枉。請提省研訊。巡撫許之。吾旣就逮至省垣。巡撫以吾屬按察使。吾對簿自言。實不識盜魁。但爲其言所懾。因反走耳。受賄尤無其事。按察使領之。卒以嫌疑未能自白。褫職遣戍肅州。同寅知吾事者。多爲扼腕。吾欣然就道。未嘗有恨色也。行經華陰。夜中有人叩吾呼吾名。吾遲迴未應。其人已入。長可十尺。負吾於背。疾馳可百里。至一山寺。其人擲吾於地。倏忽不見。寺門未閉。吾側身而入。殿側一室。有光外射。吾聞呻吟之聲。頃之有人稱吾名曰。某某猶未至耶。吾

私訝此何人也。乃知吾名。窺之見室中禪榻上一人僵臥。氣息弗然。目光炯炯如電。吾乃大驚，蓋吾師也。吾即入。長跪榻旁。曰某至矣。師曰。吾早知汝當來。吾雖與汝久別。而宿緣未了。常戀戀於汝。今天幸使汝至此。吾旦夕入地。得與汝相見。吾願足矣。吾一生所積金寶至夥。吾亦自知無所用此。顧天性所嗜。不能却也。今所積值且巨萬。悉以遺汝。願汝收吾骨。葬諸山脚可矣。吾遲疑弗答。師曰。汝殆以官事未了故耶。吾已爲汝畢之矣。吾歿而後。汝宜東行。即席吾資遊海上可也。其夜向明。師遂沒。吾爲治喪既畢。即裝其遺資。易服東行。途中聞人言。華陰逆旅中。有遺戍之某巡檢。一夕暴卒。縣官爲之棺斂。將俟其家屬來具領也。吾喜且駭。意必吾師所爲。顧莫測所以。遂東遊海上。止於滬。悉出吾師遺資。大治車馬衣服。吾雖屢經風波。而少年盛氣。復擁重資。頗不自檢束。狹邪曲巷間。時時有吾蹤跡。豪情侈態。人幾疑爲貴吾公子也。旋嫖某名妓。且夕流連弗去。遂與某貴官忤矣。君知貴官爲何人。即吾同族。以索賄破

吾家者也。其人亦嫖此妓。豪侈遠不如吾。妓乃遠彼而親我。嘗被酒相值。抵几互詈。吾不覺自露名氏。曰某某豈爲人哉。其人聞言。即曰汝某某耶。吾盛氣曰然。其人默然而逝。吾方喜。以爲鼠子畏我矣。越三日。有友邀我爲龍華之遊。吾欣然遂往。至則有二人公服者在。其旁一人指吾謂之曰。此人是也。公服者即前語曰。奉道憲命召君赴縣署一行。吾知不得脫。即與偕往。至則縣官爲吾言。有人於道憲處訐君。爲遣戍逃官。道憲懾於其人威勢。故遣人逮君。且當通詳。或移河南勘驗耳。吾猶抗辯。縣官曰。事已至此。空言無益。君且耐朝夕委屈。世間當有公道。黑白久自分也。遂羈吾署中。吾知事發必無幸。願無如何。聽之而已。逾月得河南覆文云。已轉陝西飭華陰縣剖驗。乃空棺。遺衣如委蛻耳。於是乃傳致吾於河南勘驗。自分必不免。豈知事有出人意外者。方轉解過江時。天忽大風。江舟多覆。吾亦漂溺。幸得斷桅抱之。載沉載浮。不知若干里。乃爲蘆葦所置。蘆中有人。拔吾以起。見吾身囚衣。苦致窮詰。吾語之故。其人改容爲禮。

○謂君亦一漢子乃能幹此大事。即呼人爲吾易衣。且延吾坐。酌酒飲吾。吾猝被澹頗詫異。其人似已覺。曰吾輩憤國政不平。伏居草莽。專以抵拒暴政爲事。凡國法所仇者。皆吾曹之友也。凡能自脫於法網者。皆吾曹所崇奉爲英傑者也。今君能之矣。願相與同仇如何。吾方憤惋中。聞言大感動。即曰。吾逃死無所。誠能相容。敢不惟命。其人曰。然則吾當與君謁吾魁矣。即導吾偕行。蘆葦茂密。蛇行者久之。突有廣廈現於吾前。其人曰。至矣。君請少待。吾當入告吾魁。得魁見許乃進。吾遂止於門外。其人入良久乃出。曰魁命召君。吾隨之行。甫入門。兩旁大呼曰捉得奸細來矣。吾欲視奸細何狀。四顧竟無有。導者曰行矣。勿留。吾後聞彼中人言。乃知入門之呼。蓋以察初來者之情僞也。復前入重門。劍戟森列。吾略無駭懼之心。反有欣羨之意。頃之與魁相見。魁年可三十。面目嬌好。音吐尤雋雅。左右列侍七八人。皆豐容盛鬋十五六齡好女子也。吾出意外。轉覺刺促。魁獨踞一床。中間懸一神像。狀至溫婉。戴方冠。握麈尾。披八卦衣。

不知何神也。魁既盡詢吾事。即曰汝既入黨。宜向神設誓。吾遂跪。有人酌酒以進。并以刀剝吾臂。瀝血酒中。吾被剝初不覺痛。剝畢血亦遂止。剝者語吾以酒奠神。吾如言奠畢。誓曰。吾從神命。無敢抗。吾守黨義。無敢泄。有不如誓。身爲灰塵。吾宣誓時辭旨伉爽。魁喜曰。吾爲吾黨得人矣。即傳語其衆。以吾爲軍師。吾旣被命。黨中有所舉措。輒爲主謀。料事多奇中。衆情咸服。居凡三年。此三年中殆吾一生最適意時也。其明年。吾偕同黨游湖湘間。泊舟岳陽樓下。聞隔舟笙歌徹耳。憑艙而望。見某貴官踞坐狂飲。其旁一人。雲鬟霧鬢按板縱歌。吾識爲所嫖某妓也。憤極不能自制。即語同行者。皆大奮欲爲吾復仇。吾方盛怒。聽之。其夕夜漏且盡。隔舟已皆沉睡。吾及同行者挾刃登舟。無覺之。吾仇復矣。即舉火焚其舟。舟皆燼。事後地方官以失火報大府。頗有疑之者。以闖舟俱燼。不欲多事。莫復考其真僞。事遂結。吾旣復仇。吾心大快。願天下失意之事。往往即合於決意之中。彼蒼播弄吾人。洵有非人力所能抗避者矣。

○吾自報仇而後。輒自疑所爲太過。每憶前事。若覺良心督責。無以自安。念過去年中。彼人待我誠酷。抑吾亦有自取之道。一旦私憤暴發。遽使至此。報施乘除。得無逾量。况舟中人於我們何仇。而亦同付一炬。無乃太忍。每值人靜。輒自怨艾。未幾同行諸人渡江。舟覆。多死於水。吾益惴惴慮有惡報。偶遊衡山。聞寺中梵鐘。忽有行感。造謁長老。長老爲說毗奈耶雜事。吾感於業報相尋。此心竟無安處。即涕泣長跪。乞長老爲吾解脫。長老答言。唯有皈依。作苦行僧。以所受苦。償所作業。業力旣消。報自弗至。吾即自言。我本佛子。無端入塵。作種種業。今還皈依。佛見許否。長老答言。屠刀一放。立地成佛。汝能覺迷。佛當接引。吾拜受戒。即於此洞棲止。結蒲趺坐。掬泉爲飲。不飯不枕。不裘不葛。三十年矣。洞中入夏奇熱。巖石受日如炙。夜中蚊聲薨薨。嘔膚無完肉。冬則山風怒號。吹面如割。冷氣自石底上侵。臟腑盡僵。虎豹之屬。又時來相擾。吾初入洞之年。種種苦況。皆非所堪。無寧一死爲快。願怖於果報之說。自念與

其來生世世受苦。不如以今生畢歷苦境之爲愈也。每窮寂無聊時。聞虎嘯猿啼。彷彿得一知己。即飢蚊嘬膚。亦若良朋來相廬藉。年復一年。苦乃漸減。十年以後。安之若素。覺人生無所謂苦樂。使吾前此三十年間。未嘗學問仕官。未嘗受塵世種種奉養。安知不以斯洞爲樂土也。近十年中。心境舒泰。若遊天國。惟晨曦初動時。往事根觸。居猶棘胸次。則以念佛自解。入去年來。體漸羸憊。座殆將解吾天弢。證彼禪地。居士今來。煩以吾事傳諸當世。倘足警彼好作妄業者耶。語已。天已向晨。蒙氣盪漾。初日如銅鉦。晨風習習。楊神情頓爽。乃辭僧去。行經某寺。登樓遠眺。對山火光熊熊。樹木延燒甚烈。恍惚見一僧披袈隨火。冉冉然去。火熄遣人趨往尋之。則山洞空矣。

●棘闈遺話

洪武丁丑。劉三吾白信蹈典試闈。取宋琮等五十二人。皆南士也。三月廷試。擢陳郊第一。榜發北士大譁。時天下初定。明太祖以北方人士服屬於元較久。其遺

民猶有故君之思。頗欲假科名以寵之。累勅試官。取士宜以經明行修爲主。勿偏重詞章。意蓋在北士也。而三吾等以爲擇賢無方。彌封編號。宜以文字高下爲準。南北士皆可入彀也。自信蹈者。徵時嘗過陳郊家。郊年少多材藝。信蹈雅賞重之。既典試得一卷。曰必陳郊也。榜發果郊。廷試復魁其曹。諸不第者因撫拾其事。造蜚語上聞。太祖以是科所取皆南士。已惡試官之偏。聞蜚語益怒。遂命侍讀張信等十二人覆閱。三吾進言。禮闈取士。向無南北之分。臣等奉命掄才。自以文字爲主。既無所阿於北。亦何所愛於南。况南北之說。本係東晉南北朝分割時代。各從所主爲言。今天下一家。豈可復存畛域之見。且大江以南。本多佳士。北士自不及南。試官安能枉格相從。虧聖主拔擢真才之宏旨。太祖怒曰。如汝言。江以北竟無佳士耶。張信等覆命。陳郊仍與於榜選。太祖怒未已。殺信蹈及陳郊等。三吾以東宮講官。減等戍邊。太祖乃自閱試卷。取任伯安等六十一人。六月廷試。以韓克忠爲第一。皆北士也。自是禮闈選士。每斟酌於南北之間。迄洪熙宣

德而後。遂有南北卷之分。浸假而有南北中卷之分。同在區宇以內。而此疆彼界。截然不相合併。地方褊狹之見。遂深中於人心矣。陳邨者少慧甚。人皆許爲遠到之器。獨其師不謂然。曰此子骨格清奇。而眉目間常有灰墨之氣。他日必當成名。而禍亦隨之。邨旣捷於秋闈。往拜其師。師戒之曰。子今登榜矣。人爲汝賀。吾爲子弔。他日禮闈春試不幸而雋。吾尤爲子痛矣。盍勿應舉。丈夫成名不在科第。果中無所有即大魁天下何益。邨聞師言。意頗動。丁丑春。邨夜夢遊嵩山。登絕頂。意甚得。徘徊良久。顧見旁有巨石。大書忠信二字。筆法絕類顏魯公。俄而石忽中裂。幻作種種異境。中有一人冕旒高坐。左右衛侍甚衆。邨試俯首探視。忽聞有人呼己。欲返顧。而兩石夾脰弗得脫。大呼而醒。意頗惡之。頓憶師言。欲勿應試。聞自信蹈典試。意頗自疑。以夢告其友。友曰此大吉也。登山造極。况又嵩高。君其魁天下乎。白石而書忠信。今試官一爲三吾。一爲信蹈。一隱一顯。皆有忠信之義焉。君必得志。邨曰。胡又有夾脰之異。友曰。名韞也。利鎖也。

。一登仕途。寧復許君自由。鄒疑遂釋。欣欣然行。往過其師。師曰。吾爲子占。大非吉兆。勿行可乎。鄒遲疑未答。師曰。天定也。人力固無如何。行矣。試畢即歸。勿遲留。鄒遂行。中途遇盜。盡喪其貨。賴同試者共周之。乃得至京。將試。貢院公堂。夜輒發光。碧如鬼火。院中號軍夜聞有聲啾啾。僉謂不祥。鄒聞之。欲無赴試。自念吾師謂吾此行非吉。得勿即此。復轉念吾已遇盜喪吾費。師占已應。詎復有他。矧主司與吾相知。今茲必當獲售。機不可失也。遂入闈。試畢竟無事。同試者相慶。以爲今歲試院多凶徵。老於場屋者。咸慮闈中且有變。今得終場。詎非大幸。鄒亦喜。以爲吾師之占殆弗驗矣。試畢遂留南京。旦夕與同試者遊諸名勝。賦詩飲酒。已忘師戒矣。轉瞬間已屆放榜。鄒竟高列。益得志。同試諸人皆南士。登榜者十之七。意氣皆甚發舒。廷試既畢。鄒得首選。大喜。往謁信蹈。信蹈喜曰。吾所舉固不謬。狀元宰相始基也。子其勉之。張信既奉命覆閱。知太祖意。頗欲有所黜降。且以外議籍籍。多指目鄒。欲遂鄒爲解。

校閱鄒卷至三四。不能得其瑕疵。欲強黜之，意良弗忍。同校者多南士。相與議。以爲衡文大典。安能曲阿主意以爲轉移。果不宜黜。即斧鉞在前弗屈也。况又罪不至此。苟以容悅爲事。汨沒真才。何以對天下士。大臣以道事君。不可則奉身而退耳。信旣屈於衆議。即以題名錄上呈。不意遂觸太祖之怒。駢首就戮。鄒赴市日。歎曰。悔不從吾師之言。已而又歎曰。有是哉妖夢竟踐。是日天忽靈晦。人皆曰冤也。鄒等旣死。乃更試南士。就試者鑒於鄒事。莫敢復騁其才。榜發皆落第。其家人轉相慶以爲幸事也。韓克忠者亦通才。而淡於進取。嘗赴試未第。欲遂勿試。其叔弗可。克忠勉爲一行。途過某寺。寺僧某精於卜。同行者皆就卜焉。僧曰。諸君皆當上第。韓君且必大魁。否者老僧不更論卜。旣皆就試。聞試官爲劉三吾自信蹈克忠曰。吾儕此行又虛矣。或問其故。曰此兩人者皆喜華貴之文。吾儕樸質。必不入主司眼裏。吾欲無入試。姑流覽秦淮鍾阜景物耳。諸君能從我乎。衆皆曰。寺僧許我矣。天下安有不入場而能登上第者。克忠不能違。榜

發果皆弗第。克忠曰。如何。乃皆命裝歸。遇前所宿僧。曰。和尚勿更爲人卜矣。吾等今鍛羽歸矣。僧驚曰。信乎。吾當更爲君等一筮。筮畢。曰。觀國之光利用賓于王。諸君可復往。殆有特旨召試乎。諸人弗信。將行。有人送邸抄至。乃知禮闈試事猶有反覆。僧曰。老僧所言如何。此行復虛返者。吾當毀龜焚筮。逃之異方矣。既試果皆上第。克忠復廷試第一。諸人乃共嘆寺僧爲神。陳郊之友聞而嘆曰。郊之夢乃應在韓克忠乎。功名固有定。遂不復應試。

●榜人女

揚州自道光以前。富庶甲天下。鹽商列戶而居。窮奢極侈。帝王家不啻也。一時稱爲文人墨客。往往各挾所長。寄食大賈門下。大賈亦自託風雅之列。樂聞文士爲之貢諛。家有慶弔事。尤樂以巨金誘致名士爲文以張之。其有能折節下士者。則諸文人譁而稱之曰。某某翁富而好禮者也。其有能斥金錢爲饋遺者。則羣而誦之曰。某某翁好客而務施。今之孟嘗平原也。受之者亦自居不疑。以爲吾果好禮

吾果能施者矣。有江陰某生者。少穎敏。六歲讀楚詞漢賦。已能成誦。人皆許爲神童。八歲能作古近體詩。出言驚其長老。其父故精舉業。謂詩賦於場屋中不屬正科。仍督課以制藝。凡生所素喜誦者。盡禁弗使窺。懼分其心也。生初意頗弗欲。懾於父教弗敢違。循習既久。覺制藝乃天下至文。亦頗嗜之。年十二。掉筆弄文。居然上掩諸名家。未冠已青其衿。然英敏之氣漸即消沉。無復如向之活潑矣。二十而後。屢應鄉試不第。又有室家之累。志氣益蕭然頽沮。其戚某爲某鹽商記室。招往一遊。至之日諸名士適爲平山堂之會。戚某邀生偕往。座中諸人各出所作。評定高下。大抵皆五七言近體也。生新至。觀諸人氣象發舒。默不敢作一語。但聞衆人互誦佳句。頓覺棘耳。私自詫以爲此乃詩耶。此乃名人之詩耶。社長某君見生傍其戚坐。願謂戚某曰。令親遠來。必有佳什相餉。盍出珠玉。俾吾曹共欣賞。生逡巡起謝。衆人覩其樸質。意頗輕之。相與嘲譏曰。先生胡竟吝教。生窘甚。衆人益用爲笑樂。或嘆曰。今日讀書人一工制藝。便號能文。不知當

日李杜韓蘇曾否事此。生乃轉忿。念此曹太欺人。吾搜索枯腸。猶足應付彼輩。不更示弱矣。狂笑而起。衆大驚。四座俱寂。生言於社長。乞紙筆。且請命題。衆人謀所以難之者。良久社長始發言。吾人公議請先生即席賦述懷長古五十韵。生陰笑。汝曹伎倆止此耳。援筆立書。日未移晷已就。自念吾機幸未滯。不爲汝曹所困也。衆人傳觀既竟。瞠目相對。社長曰。先生才氣甚佳。更當精研詩律。不患不出人頭地也。生曰。敢問詩律如何。社長掠其鬚曰。言之長矣。非今日所能盡。抑此中竅要。悉由推敲。久之自悟。杜工部所謂老去漸於詩律細者是也。老夫不敏。從事此道三十年。自謂很有心得。先生不棄固陋。願相與研討如何。生哂曰。詩律固如此耶。不知古來論詩諸家如沈休文等所爲何事。社長願謂其曹曰。日旰矣。吾曹且休。衆譁然遂去。生亦偕其戚歸。戚某語生若曹皆此間名士。旦夕出入諸大賈之門。汝奈何有相輕意。今若此。揚州不易得志矣。生亦悔以爲孟浪。轉念天壤之大自有知音。揚州諸富豪。旣以風雅至許。詎無知我之人。因

裝舊作爲一卷。騰寫凡三副本。三日而畢。先介其戚。欲見其居停。居停聞生名。略不省視。即曰吾聞某先生言。揚州有新至某生。迂而狂。此人得勿是耶。是其詩文不足觀矣。爲我遺以四金。少盡地主之誼可耳。戚以告生。生大懊喪。戚憐之。更爲投詩卷我素所識諸巨商。各得書儀一二金。捫揣所獲。纔二十餘金。戚慰之曰。子懷才蘊璞。終有遇時。今所得雖微。姑將歸。作一年膏火之資。來歲秋試。奚患不蜚黃騰達也。生無如何。遂趁舟歸。舟人有女。年可十四五。不事粉黛。而秀媚天然。生旣登舟。女顧而微笑。生詰之。女曰。吾笑先生徒自苦耳。世間懷才不遇者多矣。豈獨先生。生聞言。不覺笑顏爲開。謂不意乃於此逢一知己也。女笑曰。何謂知己。吾舟載客至數。習聞往來行客。互以此語相慰。吾觀先生行色。殆亦此道中人。不覺脫口而出耳。生聞言爲之嗒然。憑窗遠眺。江水滔滔。思潮蕩起。自念吾幼時如活虎生龍。不可一世。今乃沮喪若此。彼巨商大賈。不過多金耳。吾奈何隨人趨奉。乃以得邀一盼爲歡幸耶。萬鍾粟。黃金屋。

書中固自有之。安見窮儒無驕人之日。朦朧間。若覺身在一巨室中。金帛堆積左右。旁侍者可七八人。方持籌握算。計室中所值且十萬金。篋貯朱標。歷兩三時。猶未竟事。意頗以爲苦。則舍之而出。俄覺在一書室中。琳琅滿架。牙籤萬軸。則大喜。以爲昔人所謂坐擁百城者。吾今乃身歷其境矣。偶取一卷觀之。板本絕精。展卷乃不識一字。則又大駭。以爲吾嘗自許爲通人。世上乃猶多未見之書耶。更撮取他卷。無不盡然。間有略能辨識者。讀之竟不能上口。嘆曰積書雖多。而不能讀。徒作陳設品而已。何益。方惆悵間。一人來。云某進士送硃卷並聯句。宜贖若干金。某秀才以詩卷呈政。宜贈若能金。則又大喜。命以詩卷進。展視髣髴識其一二。欲命筆和韵。苦思久之。乃不成一字。憤而擲筆。加忽聞耳畔嚶然曰。先生憊矣。顧視則亭亭旁立者舟人女也。女言先生何事。手足忽爾起落。吾曹疑先生病痼也。生廻憶夢境不覺啞然。女笑曰。先生何所喜。生以夢告。女曰世俗富貴不過爾爾。先生夢中已嘗盡此况矣。時西風方急。順流東下。一日間達

江岸。生遂歸。閉戶讀書。不復作干求之想。其明年。鄉試復不第。家既清貧。授徒課讀未足療飢。塾中復多頑童。獼猴王尤不易爲。生慨然曰。吾終不能不爲貧貶節也。聞畢秋帆尙書開府湖湘。好招致才士。乃挾所作文謁轅門。刺甫入。門者出受詩卷。問曰。此先生所自著者耶。生曰。我豈從抄襲得來者。何言之刻也。門者曰。先生勿怪。尙書固好士。士亦往往欺以其方。近月以來。竊人著述以干尙書覬餽贖者。時時而有。尙書旣厭之。復以苗疆用兵之故。無暇延接。委某使甄擇焉。先生此卷。能容某展讀否。生意良弗欲。顧事勢至此。無如何。姑聽之。其人展視良久。曰先生固通材。殆久困場屋者耶。何辭之拘而氣之索也。生大驚。以爲門下乃有斯人。主人可知已。其人因恣評古今詩文。所言殊博雅。生一一具答。其人大服。曰惜乎先生不早來此。不然。且夕與尙書及諸名士相掣。所造寧當止此也。乃留生客室。以卷入呈尙書。尙書延見大悅。曰子爲制藝所困矣。不然仙才也。迷途雖遠。及今可復。即命從府中諸名士遊。使參校所刻

諸書。月餼十二金。生嘆曰。吾幸不得志於揚州。否者墮落未知所屆矣。然生運殊蹇。留幕中不一載。而尙書以剿苗故出駐辰州。戎馬奔馳。無暇更及文事。未幾而尙書卒於軍中。幕客各散去。生亦言歸。修俸所餘可百金耳。而學乃大進。氣亦漸銳。見者咸爲改容。明年秋試遂登榜。又明年成進士。以知縣官湖北。湖北大吏知其嘗客畢尙書幕中也。很器重之。生自陳家貧。聊欲絃歌以爲三徑之資。大吏如其請。委署某縣事。不半載八卦教匪勢益熾。或言於大吏。謂某君文學之選。非應變之才。今處之兵衝。是禍之也。大吏以爲然。檄生解職以他人代之。生已被符。即受代而去。比至省往謁大吏。請去職之由。語頗切宜。大吏怒之。乃爲奏。言生非吏才。以致職歸部銓選。生遂東歸。泊舟焦山。偶登岸。過一酒肆。一女人方當壚。生都其貌似曾相識。女迴顧笑曰。秀才只合向書本中討生活。莫更夢想富貴也。審視之乃舟人女。已嫁爲酒家歸矣。

●兩酒狂

考城劉翁。世服農。而性殊耽酒。有田百餘畝。秋穫半以供釀。庭廡間瓮缶積疊。皆佳醞也。翁長日以酒代飯。每飲輒醉。一年三百六十日。日日在醉鄉也。然性殊吝。好獨飲。不以供客。客至。翁亦不讓。或陽醉罵客。客逡巡避去。翁乃大喜。舉觴自慶。以爲吾計售也。同村有李生者。亦嗜飲。家貧不能常具杯杓。歲暮自城中解館歸。修脯所餘可三四千。以其半沽酒。酒肆遣徒送之歸。距村可一里。夕陽初下。歸鴉噪林。生酒興猝發。欲啓甕遂飲。徒弗可。謂先生且至家。姑歸乃縱飲。胡亟亟爲。生堅弗聽。徒無如何。道旁有廟。以祀龍王者。乃移甕入廟。就廡下縱飲。送者自歸。廟中住持素畏生狂。見生方縱酒。益逃匿不敢出。生獨飲殊無聊。酌酒酌地曰。人旣避我。我當求友於幽。幽明雖隔。有同好者必不我棄。向闔忽聞有聲颯然自空而下。一人黑衣兩袂如翅。曰不速之客來矣。生亦微駭。審其面目。則鬣髯繞頰。望之蓬蓬然。惟雙目炯炯可辨耳。生即延坐。其

人亦弗辭。遂縱飲。飲輒倍生所飲者。俄頃酒罄矣。生已微醺。而其人殊未饜。曰日暮矣。願安所得酒。生因言村中有劉翁。多蓄良醞。但殊吝不以分人。不然可就乞也。其人曰。翁家安在。吾能致之。生告以方所。其人倏爾自去。生目未交睫。其人已返。左右各挾酒一巨甕。因啓而縱飲。味絕醇。遠勝生所沾者。生復飲不及半甕。已沈醉不能復起。家中人聞生且歸。待之至夜半。竟不返。皆大驚疑。次日黎明。即分途出村尋之。行經廟前。酒臭薰人。黠者謂生必醉於此。即入視之。廡下酒甕縱橫。生僵臥其間。氣息怱怱然。撼之乃醒。舁之歸。半日乃醒。猶作引觴狀曰。吾友且盡此觴。衆皆笑。生乃起坐。曰。吾友安往。衆曰。汝一人獨飲耳。安得友。生具言夜來事。乃皆驚。劉翁既失酒。頗懊惜。聞人言。生大醉。自廟中舁歸。廟廡兩甕似翁家物。就視果信。翁大怒。詣生罵之。將以盜竊罪鳴諸官。生謝曰。翁酒則吾固嘗之矣。抑吾實非盜。翁蓄酒既富。是區區者即以見贈。何傷。翁憤且笑曰。窮儒何言之易也。吾既耕且種。一年而後有秋。

吾釀酒且百日而後有醇。吾蓄酒經二年而後可飲。吾辛苦藏之。汝一夕耗之。吾覩汝狀貌不逾中人。寧能一夕而罄兩巨甕。吾頃察廟廡階畔。猶有酒香。汝殆不耗於飲。而沃諸地。暴殄天物。又安可者。吾終不汝恕矣。生曰。區區酒耳。寧值一訟。官府事繁。安暇及此。翁曰。物雖微也。情則難恕。吾訟決矣。官府縱不汝罪。吾力猶能沮汝。使汝不得應院試。生曰。吾本無意功名。翁能若是。吾又得數日空閒。可恣飲矣。翁本無意訟生。特以此相恐。生既弗爲動。翁乃轉易其辭。言吾酒匪易得。詎可空飲無償者。生曰。翁乃爲索酒值來耶。窮儒無多貲。修脯所入僅三四千。途中沽酒已耗其半。翁必欲索值。持去可耳。即出所有擲之地。曰。吾所能償者止此矣。翁無如何。悻悻而去。其明年。黃河自銅瓦廂北決。考城爲澤國。生所居村盡沒於水。河未決前三日。生偶飲酒肆中。虬髯忽至。謂曩承延飲。嘉惠不敢或忘。邑中且有天祲。宜早爲計。因出一物狀如帛。以遺生曰。事急時集家人團坐。以此旋繞其外。可無患也。生受之。且邀與偕飲。其

人曰。姑徐徐。遲日當痛飲爲君慶脫險也。語已遂去。越三日。聞水聲汙然。河決矣。村中室屋多傾圮。生如虬髯者教行之。帛忽舒展。頃之乃化爲船。衆人畢登。船遂順流而下。遙見劉翁攀巨甕浮沉水中。意殊憫之。邀使偕登。船行經日。汪洋不見水端。入夜暴風。行絕迅。遲明乃至一山。虬髯者已先在。曰來乎。以手招之。船中人皆登山。翁見虬髯者大駭。欲反走。而橫流方急。所乘船已不知何往。虬髯者曰。翁來此亦前緣。吾欲治杯酒。稍申地主之誼。翁且嘗吾酒。視翁釀者如何。翁聞且得酒。顏頓舒。有頃酒肴已設。虬髯者延翁飲。翁始舉杯。忽覺蹙蹙若有所苦。生驚詢其故。翁曰。噫。今茲之水。沒吾田。毀吾室。吾弗戚也。吾藏酒數十甕。皆陳年佳釀。一旦而失之。心滋懊喪。今此酒香味。大類吾家。吾不覺有感。是以傷耳。虬髯者笑曰。翁固雅人。田廬弗愛。乃拳拳於佳釀。此酒果翁家物也。翁既嗜酒。宜與人同樂。奈何私以自奉。翁須知世間萬物。未有可長據者。况此區區之酒。乃導翁入其地窖。積甕累累。題封宛然。皆翁

所至。探索拳匪。輒以此曹爲導。凡此曹平日所不喜者。則指目爲匪。或威嚇取賂焉。良民因而破家者。不可勝計矣。東安人賈鳳者。家故業農。有田數十畝。頗足溫飽。嘗以事與其鄰訟。其鄰人天主教徒也。挾教士勢以取勝訴。鳳訟旣弗直。喪其產之半。鄰人復從而訕笑之。鳳積忿無所洩。拳亂旣作。亦隨人言排教。毀其鄰居宅以自快。然其他教徒無怨於鳳者。鳳亦不苟與爲仇也。鳳之同村有劉姓者。貧而好亂。挾某師兄勢。以魚肉鄉里。凡平日所不快者。概誣爲二毛子。而其友李某。固天主教徒之虎而冠者也。劉庇之。使盡室以逃。事爲鳳所聞。逆於同壇者。壇人皆指目劉。欲以漢奸處之。賴某師兄曲庇以免。聯軍旣入。教徒乘勢作威福於鄉里。劉旣有德於李。李遂引爲羽翼。劉以同壇諸人嘗欲危己。輒伺隙修怨。尤憾賈鳳。乃引外兵入其家。釜甑無完者。鳳逃而免。其母妻先已避匿。母年老善病。聞家破其子失踪。大憂恐。疾益劇。遂死。鳳聞母死。痛不欲生。即日奔歸。劉聞其歸也。告於李欲繫之。或爲鳳緩頰。盡入其田宅於劉李。

且具禮伏罪。事乃已。鳳葬母既畢。遣其妻歸母家。隻寄破廟中。旦夕禱於神。乞助已復仇。如是者且一年。尋和議告成。外兵悉退。地方百務咸復其舊。劉平日樹怨既多。遂不容於鄉里。鳳亦以外兵既退。劉失所庇。陰購利刃藏之。日伺於劉之間。劉鳴諸官。官以無左證斥不問。鄉里復多爲鳳助者。劉頗自危。避之遊化。鳳既失其仇。遂踪跡之。道經通州。過某寺而禱焉。寺僧察其容色。怪之曰。居士何所不平。而憤惋若此。眉目間行行有殺氣。抑又何也。鳳驚欲去。僧曰。老衲世外人。本不敢強與人事。抑十年以前。借軀報交。固習爲之。吾嘗恨世間多不平事。欲以吾身一一手了之。顧其勢卒不可得。故遂自棄於此。居士果肯以情相告。老僧或能爲力。鳳弗答。僧曰。居士勿隱。老衲已悉汝情矣。居士殆與人有深仇。欲東行踪跡其人。刺刃於其腹中。而後快也歟。鳳驚曰。師何從知之。僧曰。居士行色匆卒。意常東指。方禱之時。切齒怒目。若不欲獨生者。懷中之刃。觸地有聲。老僧雖非善識。亦略得一二。鳳曰。師既已燭吾隱。吾亦何妨相

告。因盡述所遭。僧奮曰。賊可誅也。吾當助汝。即與鳳偕行。及薊州。聞劉方挈妻子在某村。依其戚以居。戚爲村中大姓。門閭警衛甚嚴。劉以避仇故深居簡出。村人稀見其面。鳳歎曰。吾無望矣。僧曰。吾姑爲子籌之。僧故與盤山寺僧同出某長老之門。携鳳往就之。居一月。僧謂鳳曰。吾已爲汝覓得仇人踪跡。但報仇之事。老衲不敢代勞。汝宜自行之。乃挾鳳於臂。騰身而起。瞬息已至劉戚所居。夜已過半。柝聲未息。僧越重簷。直達劉之臥室。與鳳俱止於庭。向空啼啼者有頃。寢門忽闢。僧謂鳳曰。可以入矣。居士識之。凡事適可而止。勿過當也。鳳入室。見仇百脉騰沸。不能自制。即拔刃猛砍其項。劉大吼而斃。血溢床席。其妻若子皆驚寤。即狂呼。鳳又砍之皆斃。亟奔出。僧負之以逃。宅中人聞聲四集。鳳去已遠矣。僧歸謂鳳曰。仇今復矣。汝志逞否。鳳曰。吾頗悔所爲之過當也。噫劉氏之嗣斬矣。僧驚曰。何哉。居士乃忘吾戒。鳳曰。吾不能自制。乃至於此。吾已盡誅之矣。僧頓足曰。居士誤老僧矣。吾不可復留。語已颯然逕

去。不知所往。鳳植立如痴。之久乃奔。層巒疊澗。晝伏夜行。遂竄居東林中。探柏實以食。掬澗泉爲飲。居且三月。有欽使奉命謁陵。守陵之吏大索林中。鳳知不見容。遂逃。途中疲甚。偶過某刹。觸寺門而仆。寺中沙彌晨起出汲。見一人僵臥。大駭。以告住持。住持命舁以入。鳳醒見有僧在側。呼曰。吾師。住持曰。唯。鳳睨之曰。汝非吾師。吾師方頤而廣額。豐髯而秀眉者也。住持曰。然則君與吾師兄有舊矣。是亦吾之故人也。此間多豺狼。君且留此。待健乃行何如。鳳頷之。遂留寺中。一日。向晚偶遊寺後。見新塚隆然。若覺有感。以問沙彌曰。此誰之墓也。曰是吾之師伯也。距今三月前。師伯忽來。夜叩吾師之門。與師絮語。語多不可辨。第聞自言。吾罪深重。佛力不能超脫。奈何。翌日即閉處一室。頻頻自擲。厥狀若狂。越二日。忽拔關出。長跪佛前。燃指膜拜。誦阿彌陀佛至數十遍。大笑而起。其夕即圓寂矣。鳳聞之。木然不語。晚遂弗食。次日。寺中失鳳所在。一日聞人喧傳某村某宅三命案已破。兇犯自赴官署投首。問之乃

知風也。鳳自聞僧死耗。終夜不能寐。未晨即出寺。惘惘無所之。聞人言欽使旦夕過境。念能赦吾罪者惟皇帝。能達吾情於皇帝者惟欽使。吾欲自贖。將安爲計。踟躕半日。疾走入州衙。州吏方治公牘。鳳猝至前兩目瞠視。大言殺某姓三命者我也。有人促我來此投首。速告州官。吾欲進謁。且有事面陳。衆以其語無倫次。即囚繫之。以聞於官。官既提訊。鳳侃侃自述。前後始末。無稍回隱。已遂大言。吾欲往見欽使。吾有寶玉。欲請欽使獻諸皇帝。吾玉值且連城。皇帝受之。必喜而錫吾爵。吾殺三人猶殺鷄狗耳。遂出其玉。則玳瑁一片而已。官審其病狂。取供繫之獄。鳳入獄時猶刺刺不休。顧獄吏言。吾今暫寄於此。旦夕有聖旨召我赴闕。衆皆漫應之。獄既定。鳳忽清醒如常人。客有述其事者。謂是人已遠遁。忽自歸。殆魂纏擾使然也。

●壺頭山道士

安溪李生善醫。疑難諸症。羣醫束手。生爲處方。應手輒愈。其所用藥。與他醫

相彷彿。無絕殊者。然每診必待主人購藥歸。生親爲檢視。且自出藏藥一撮爲引。○封置罐中驗其火候。諄囑服法。乃去。嘗言古方無不可用。但自中古以降。土地日闕。野生藥物採掘殆盡。人工所殖。品性自遜於天然。而市賈嗜利。又往往以近似膺品易其真者。於是方劑雖同。而功效或自相反。至藥引之用。譬行軍之有嚮導。雖有精兵猛將。無良嚮導則將陷入歧途。不惟全軍皆墨。而潰卒四出且爲地方之害。古人所用藥引。皆宿儲於平日。臨事乃斟酌用之。此可以心會而不以言傳者。吾方首在用引。次在辨藥。火候之溫猛。服食之方法。又其次也。聞者頗歎爲知言。生所藏藥。皆手自烹製。每製藥時。輒齋戒三日。閉戶若有所禱。祝。又三日乃啓而出。云藥成矣。或疑其有異術。生自矢無他。第云吾藥皆珍品。製時一或疏忽。則數年採集之勤。胥歸無效。吾閉戶齋戒。且作禱祈儀式者。將以自澄吾心。澡雪無神耳。非果如常情所推測。謂有鬼物來相之者也。聞者終弗信。以爲生爲此言特深於自諱者耳。實則生嘗從異人學鍊丹之術。術秘莫能詳

也。相傳生少時喜談狐鬼之事。每讀聊齋誌異。嘗廢書太息。恨來能身歷其境。十九歲時。有族父官湖南之桃源。生家居無事。因往依之。欲遂求陶靖等所記故迹。以爲庶幾得之者。時海道已通。而生好奇心勝。謂必遣遊而行。乃可遍歷山川之勝。迂道北發。自建寧經仙霞關以入浙江。西行逾鄱陽。上廬山。出大江。更入洞庭以達武陵。所至勾留。積半載乃達。當其過仙霞時。嘗游龍洞。阻於風雨。洞中石隘。上逼下礙。困不得出。自分當死於此。遇異人教以靜坐斂目。冥精專思。自視此身若飛雀。注念既久。覺若卸空。即聳躍而上可出矣。生如言行之。靜坐三日。試作輕舉之勢。一瞬間已至山頂矣。生嘗語人。以爲世間所傳神仙事當不虛也。過廣信時。嘗至龍虎山。謁正一真人。真人方應某貴人之招。往常州建醮。生往投刺即出。少年氣盛。過門時履闕而仆。傷足不能起。府中一老法官。謂觸怒值日神將所致。要生服罪。即爲書符蓋印焚之。餘燼未息。生已蹶然興矣。生又嘗舉以語人。以爲鬼神事殆不誣也。遊洞庭時。遭大風。舟幾覆。舵工相顧變色。舟

中一人隅坐。默誦大悲咒。頃之有物粗如食指。長可三寸。竟體作渾金色。棲於椀竿。衆人相慶曰金龍王來矣。風浪頓息。舟行無恙。生又嘗語人。以爲世間物理非人力所能窮也。既沿沅江西上。求所謂桃花源者。土人輒指某山某洞以實之。乃竟無所得。即沿岸桃花。亦不若桃花源記中所述之盛。生又歎以爲天下事百聞不如一見。古人所言未可盡信也。桃源西有壺頭山。周三百里。勢甚高峻，馬伏波嘗因於此。生求其遺迹。因往遊焉。夜宿於山農之家。遙見山間有光燭天。異之。以問居民。皆曰近月來常見之。前此未嘗有也。生旣好奇。因默識光所起處。循途蹤跡之。亂山高下。林箐邃密。溪澗縱橫。迷不得路。又獨行無侶。乃折而返。夜復登高望之。光上燭如前。生語居民是間必有希世之珍。盍求諸。皆搖首以爲不可。其老者則曰寶物所在必有鬼神守護。以待大福之人。吾曹命薄。第得溫飽足矣。安敢妄覬非分。生太息而已。未幾桃源人忽得異疾。患者沉睡如死。闔城多病。僉曰天災。縣官禱於城隍。患者益衆。縣有巫自云能通神。縣官以其左道

。嘗禁治之。至是巫乃自言能醫疾。但必得縣官向己服罪。乃爲施治。不然當坐視也。縣民旣爲所惑。迫縣官如言行之。縣官不得已。即遣人齎金帛賫巫。且致辭謝罪。巫乃建言結壇禮神。作七晝夜功德。即災禍消除矣。縣官知其誕。欲勿許。而衆情洶洶。皆以巫言爲然。縣官無如何。聽之。乃大醮。饒鉞嘲轟。沈檀霧靄。越三日。巫方登壇跳擲作勢。自云吾南岳夫人也。愍此方人民疾苦。鑒縣官虔誠。已爲請於上帝。赦罪解厄。不日當有符敕矣。方喃喃未已。突有遊方道士過之。一躍登壇。批其頰。曰妖巫乃敢惑衆。此邦瀕沅江。水潦方降。山泉偶含毒質。體弱者飲以致疾。自有方劑可療。神何與焉。巫及其徒皆面色灰墨。匆匆下壇去。邑人稱快。然一二村農猶相恐。以爲得罪於神。天罰且及也。道士旣遣巫。即自出丹藥爲人醫疾。疾良已。然頗向人索金帛。人亦爭賚之。道士遂暴富。生聞而疑之。意道士所言頗類有道者。胡多受人金爲。踰月道士遂去。不知所往。去之日。縣中某大姓失其藏珠。珠廣徑寸。圓而潤澤。大姓秘之。人無知者。

。是日以病延道士臨診。道士既爲處方。賚以金帛弗受。第乞藏珠一觀。以飽眼福。大姓許之。道士得珠諦視良久復返之曰。此至寶也。道人游行天下。所見寶物夥矣。此珠當居第三。今得見此。此行爲不虛矣。抑神物必歸有德。居士宜善保之。遂去。其夕大姓檢珠失所在。疑道士實爲之。道士居城外某觀。大姓潛遣人往探。則言是日早出未歸。室中陳篋纍纍皆貯金帛。或啓視之則空空如也。以試他篋皆然。竟不知何時搬運也。遂訟於官。官以事無佐證置不問。生聞之。言於其叔。謂道士必非善類。不可弗究。叔以道士蹤跡不可得。即欲究治。安所着手。多事不如省事。置之可耳。生年少頗不謂然。以爲國家置官原以爲民。若徒自顧考成。罔恤民隱。聽彼大猾之徒爲害閭里。安用歲糜俸糈。養此木偶者爲。忽念壺頭山中所見光景頗可怪。安知不與道士有關。倘能探其究竟。疑體可盡釋也。幕客有劉姓者。年少頗好事。生潛就商焉。劉大喜請偕行。言於縣官。以入山選勝爲解。縣官歎曰。少年人不務讀書爲應舉計。乃好動若此。然二人竟行。

募山農爲導。入山可二日。忽大霧。二人冥行不相見。霧霽失劉所在。問於山農。亦未能言其蹤跡。但以意測之。謂當在山中耳。生遂前行弗輟。遙望嶺際樹間似有人影。意即劉也。呼之弗應。更進乃一峻嶺。崖壁陡絕。荆棘縱橫。不可得路。導者請反。生弗可。即出佩刀刈去荆棘。割巖壁爲溪。僅能容足。且刈且進。不知經若干時。已達山頂矣。隔澗有洞。洞口有烟縷縷上升。似有人居。澗底水流絕迅。挾沙石俱下。生欲窮劉蹤跡。躡石而過。衣履盡濕。匍匐久之。乃達洞口。導者弗能從也。洞虛若無人。生側身入。石壁崩削。苔蘚滑軟不能駐步。漸入漸覺寬廣。緣繞蝸行。忽見天光。突有人掣其髮。曰汝何人。乃敢入吾洞府。語時生爲所舉。體已離地。大驚。欲返顧。而首被韉。不能左右側。頃之其人擲生於地曰。賊試視我爲何如人。生仰視。見洞中几案皆石製。一道士據案高坐。厥狀甚稔。顧非縣中所見者。生遲疑未答。其人大笑而起。脫黃冠投之。曰李君頗相識否。視之劉也。生駭然曰。君胡以此在。又胡爲作此裝束駭人。劉曰。君

其少休。吾當爲汝盡言之。吾爾日入山遭霧。失足墜山谷中。谷深可十餘丈。吾自上下墜。意頗恐。幸谷中有藤。蜿蜒如盤蛇。吾爲所挂。得不墜。否者吾骨碎矣。吾乃徠升攀藤而上。若覺雲氣擁護。頃刻已達山頂。遂至此洞。洞中有道童二人。見吾來。並出與吾角。吾幼習劍術。矯捷善趨避。渠兩人鬪良久。皆疲且喘。吾乃出全力與撲。皆仆之。二人自承爲道士弟子。師遠出。留吾二人守洞。師出必大獲珠寶而歸。今出已經月。計當返矣。師平日好煉丹。旦夕未嘗去爐鼎。所用藥物皆奇詭。吾二人莫能悉其名也。今丹鼎猶閉。師臨行時諄諄囑吾二人善爲護視。勿使外物侵擾。吾意此洞在山中深處。世人安能遽至。不虞君之見臨也。道童所言如此。吾旣以力服之。即令導吾徧遊洞中。洞深廣各數丈。道士區爲五室。其中一室扁鑰甚固。道童語吾。皆其師所藏諸珍物也。餘四室。或爲丹竈。或爲藥籠。或爲書廚。皆陳列井井。此道者固非凡材。吾頗欲一見其人。因向道童假衣一襲。欲自詭爲遊方道士。俟此道者歸時。進與接談。不意足下忽臨。吾

小施狡獪。欲試君眼力如何耳。生大笑。劉曰。勿笑。道士且歸。吾二人冒險來此。禍福不可測。將何以待之。生躊躇未應。劉曰。君旣無策。請沈默勿多言。吾自有以處之。生曰諾。劉乃復冠爲道裝坐定。道士自空而下。劉迎謁之。曰鍊師歸乎。吾待久矣。道士愕然。二童子欲前。劉目攝之。良久道士始曰。君何從來。曰自天台某觀。觀主囑寄聲問候。道士曰。然則君爲吾友矣。同來者何人。曰吾僕也。道士諦視生良久。曰此人風神秀澈。不類僕隸。劉曰。師誠法眼。渠本書生。矢志學道。因委身爲吾曹服役。若行殊可嘉也。道士微笑曰。二君來意。道人已盡知之。勿更作妄語誑人。劉。驚旣知不可隱。即曰前言戲之耳。吾二人實遊山者。偶失道入洞府。鍊師能容吾稍留否。道士曰。然則君宜改服矣。呼道童爲劉去冠服。道士曰。道人隱淪於此。未嘗開罪二君。二君何忽有相迫之意。道人爲自衛計。不能不與二身爲仇矣。劉作色而起曰。汝欲如何。道士曰。君固健者。但旣入樊籠。不能復聽君自由矣。呼道童和藥以進。曰二君飲此無苦也。

。此藥能令人沈睡且半月。吾當及君睡時。投君溪中。順流東下。自有拯者。生死聽之天命。道人不取問矣。劉攘臂遂進。道士遽曰止止。君非南陽某村人乎。君十歲時亦嘗聞姑家某中表失蹤乎。道人是也。君於吾爲中表兄弟。適間見汝臂上黑印如掌。吾因以知汝矣。劉廢然而退曰。君誠某表兄耶。胡爲入道。胡又挾術誑取他人珍寶錢帛。吾不願與汝親戚。送吾二人出山可矣。道士曰。勿躁。吾更爲汝言之。吾失蹤時。被人賂賣於嵩山某道士爲徒。天台某觀主吾同門友也。吾兩人相約。將大昌道教於南北。彼自矢。欲復興天台之桐柏。吾則志在嵩山之崇福。吾兩人復爲約。以成功孰先。規模孰偉。定吾兩人道力之高下。在苒兩年。吾所欲草創經營者。迄無一就。吾乃不得不出於挾術之一途。吾今乃知世間成事之道。不能不稍參權變也。自吾挾術遊南北。比年以來。所得金帛至夥。吾未嘗侈於自奉。皆別爲貯儲。以備巨工之用。吾爲道教前途計。吾自審所爲。鬼神亦當相諒也。生僂言曰。師以術募資。將興道教。吾旣聞命矣。師又攝取他人珍

寶。意欲奚爲。道士曰。微先生之問。吾固將爲先生言之。吾意世間寶物。當與世人共賞之。不當獨據爲己有。尤不當秘不示人。當世妄人。偶得珍寶。便重鑄深緘。惟恐人知。不惟他人無由欣賞。即己身亦何嘗得一享受。此與棄貨於地何異。吾嘗深以爲恨。凡海內收藏家。有類此者。吾必以術勾致之。吾將以崇福落成之日。盡出所藏珍品。羅列展覽。公諸當世。今茲所藏。不過代世人保守耳。吾未敢以自私也。生笑曰。師持論固高。第恐艱於踐言耳。道士曰。道人向無誑語。先生勿以常情相測度也。生復笑曰。果爾鄙人爲過慮矣。道士默然。其夕遂留生及劉並宿洞中。夜分洞中光明如晝。生不能成寐。向曉乃覺。營騰欲睡。忽聞鷄影破空而來。即驚醒。呼劉偕起。往見道士。已偕其徒行矣。留札一封。言踪跡已露。不可復留。十年後乞相訪於嵩山。以驗吾言信否。書一卷。以遺李君。苟能精研。大有事在也。生及劉瞠目相視而已。後十年而洪楊亂作。或傳道士已投洪軍。盡以私財佐餉。封爲某天將矣。其書皆禁方。則李生所依以行世者也。

●某侍御

某侍御。傳者佚其姓名。性迂戇。好言事。居諫垣日。累摺指陳得失。頗有直聲。然其人殊乏常識。往往撫拾市井譚言入告。朝廷以其心無他。亦優容之。所奏多留中。道光間。禁烟議起。廷臣多所條奏。咸以禁運爲杜絕來源之舉。侍御獨謂鴉片之來。雖洋商販之。而鴉片銷路。則在華人。禁運不如禁吸。誠使舉國無吸者。則銷路悉絕。洋商無利可圖。自必廢然而返。但禁吸之道。不能專恃嚴刑峻法。蓋以鴉片之毒。深入人心臟。不祛此毒。不能禁也。是時天主教士多方誘人入教。凡奉教者臨命輒延教士行禱。愚民因相與傳說。以爲奉教者臨入殮時。教士輒取其眼以去。用製鴉片。眼爲心苗。故鴉片之毒。深入人心。雖臨以峻法。終不能禁。識者多誕其說。侍御獨深信之。輒引以入告。謂禁販烟不如禁傳教。且薦茅山某道士。謂其能鍊丹。服之可解百毒。嘗有人中蠱。道士以丹下之。便溲中含赤頭小蛇以萬計。霍然遂愈。復有人爲瘦狗所噬。乞丹於道士。一服而愈。

○請勅戶部。頒發庫帑。付該道士爲製藥之費。丹成頒諸各省。用作戒烟藥物。可使數萬烟鬼。一旦悉爲良民。正本清源無善於此。疏上朝廷以其言誕。將傳旨申斥。某大臣謂言雖荒謬。其所見實有過人處。不宜遂加摧抑。以塞忠諫之路。遂寢其奏。及英兵入長江。訂江寧條約。侍御大憤。疏請撤回議撫諸大臣。並宣詔痛剿。聞者皆韙其議。頗以未見原奏爲憾。侍御亦語人。謂外國何足異。彼所侍者輪船耳。使朝廷能用雲師。且盡殲之矣。雲師者。五台僧法雲也。侍御深信之。法雲自言能移山海。能作風雲。嘗於侍御坐中小試其術。以盆盛水。平置地上。法雲口誦指畫。頃之水忽騰湧。植立如柱。謂此即倒海術也。又以刀劍三事雜置箱中。書符焚之則刀劍相擊。鏗訇不止。或含水向壁噴之。則壁上雲氣蔚然而起。有物相隨而行。侍御旣深信之。乃言於朝廷。請錫法雲封號。使盡召神兵圍諸輪船。可使悉爲俘虜。或驅令自相砲擊。可使悉爲灰燼。否則行倒海之術。一舉而殲之。尤快事也。疏上。某軍機大臣擬交部召試。某章京知之。亟言此藥

大使棋相擊之術耳。必不可信。徒爲朝廷羞。乃罷。京僚知其事者。頗笑侍御之迂妄矣。未幾侍御忽乞退。奉旨休致去。聞者頗異之。尋知侍御以言事得罪。幾不測。賴某大臣爲乞恩乃解。先是乾隆一朝。和珅當國最久。富甲天下。中外珍物盡入珅家。祗旣敗。貲產悉沒人官。其登籍者爲值且九萬萬兩。然民間猶多訛言。謂珅家重寶多人內府。官書所列特其糟粗耳。一時傳說。遂有和珅推倒嘉慶吃飽之諺。鴉片戰役旣起。飛芻輓粟。繼以賠償兵費。政府始有患貧之嘆。是時朝野爭言禦夷之策。練兵之要。皆苦餉無從出。筦財政者又力持不加賦之議。相顧束手而已。侍御端居深慮。若有所感。一日閉門草奏。盡禁家人窺視。奏中略言和珅貲產多入府。請頒發爲練兵之用。語頗切至。遂大觸朝廷之怒。欲將原摺交部議罪。處以極刑。某大臣力言祖宗以來。無加戮於言官者。且原摺交部。則疏中所言悉暴於外。轉相傳述。益多訛言。尤於朝廷體面有關。此人狂戇。京僚多笑之。今如此適成其名。不如勸令休致。所全實多。事乃寢。某大臣即以告侍

御。使自行乞休。疏上得請以去。聞者頗以侍御爲賢也。侍御旣退休。手寫所上疏稿以授其子。將付劊劊。其子疑之。以告其師。師固明於事理者。讀竟大驚。謂其子曰。此稿果刊行。尊翁之名旣毀。君家且有橫禍。古人自焚諫草。奈何自暴其直。以彰朝廷之過。其子以告侍御。侍御曰。爾師迂矣。何所見之不廣也。彼獨未聞曾子固之言乎。乃以此議我。趣付刻。其子復告其師。師歷指疏中所言。爲之剖解。其子大悟。曰。然則何以處此。師曰。焚之耳。曰。何以反命。師曰。以付我。吾自有以處之。越夕。侍御家人忽見火光上騰。化作朱書如篆文。冉冉入空而去。次日遂失疏稿所在。侍御大沮喪。遍尋弗獲。禱且卜皆無驗。師乃進言。有友善扶亂。能爲人決休咎。盍往求諸。侍御亟請與偕往。師陽爲不得已而從之者。旣至。主人乃爲展壇。具香楮。禱請旣畢。亂忽動。文昌臨壇示偈云。電光石火。身外浮名。如繭自縛。妄逞聰明。判云。此非人間文也。已爲六丁取去矣。奚多問爲。侍御乃首服。歸而歎曰。吾文竟爲造物所忌。昨夕所見。

殆其火化者耶。惜哉惜哉。吾志既不行。並此空言。亦不獲傳後。豈非天耶。其後數年。太平軍起。侍御猶在籍。欲復草疏託人代奏。方援筆。忽墜於地。嘆曰。天竟不欲吾復有言耶。發憤遂卒。

●相術偶談

安邱章生精於相術。自謂得麻衣道者真傳。自袁柳莊以下無北面者。嘗探輯歷代相人已驗事迹。分別編次。如究貌骨格神氣等。以類相從。各下己意爲之論斷。所言頗詳審。生常謂相術本極精微。與其託諸空言。不如徵之事實也。道光末。嘗遊湘中。歸語人曰。天下其將亂乎。然大亂之後。必且復治。或問其故。曰吾遊湘中。所見擔囊之夫。皆一二品骨相。使天下承平。此曹何由致此。曰然則何以知其且治。曰。此曹相雖貴。而神氣清澈者十無一二。其蠢蠢者仍不免作苦以終。大約天下既定。國家進賢退不肖。一以成法拘束天下士。此曹當復散歸閭里耳。未幾而有洪楊之亂。湘軍出征者遍於十八省。是時度支旣絀。立功者多。無

可充賞。則以名器爲酬庸之具。凡竈養廝卒。無不累保至參將遊擊都司守備者。其位地稍高之差弁。則人人皆記名提督。或總兵矣。其始也猶重視之以爲功名。其繼也乃棄擲如泥沙。予之者既不甚愛惜。受之者亦視爲無足重輕矣。相傳中興某閣部大臣總督某省時。嘗遣差官某齎牘往謁某藩司。藩司以某大臣之故特隆其禮。發牘旣畢。便延差官上坐。意特姑爲委蛇而已。差官弗讓。遂坐。且縱談。略不稍假辭色。藩司少年科第。嘗歷清要。且頗得主眷。見差官若此。意殊不平。他日。因事謁見總督。談次因及當代諸名臣。藩司言。功名之盛善終爲難。歷來重臣匪驕則闇。驕則招忌。闇則見罔。然惟驕故闇。左右小人挾勢。擅作威福。而主人猶若弗覺。一旦事敗。禍及主人矣。總督瞿然曰。君言良當。鄙人得勿蹈此。藩司曰。相國睿智之資。何至是。雖然。竊有進者。某雖不肖。然實天子命官。擬於古之方伯。昨某差官奉令下賁。竟與某分庭抗禮不稍讓。是相國門下人自視與天子命官均等也。某不敏。私謂此事且爲相國盛德之累。總督曰。君直

諒人也。敢不承教。立召某差官至戒飭之。且命列班。即送藩司出。門前侍立雙行。其首列者皆紅頂黃馬褂。向所見差官亦在其內。蓋記名提督也。藩司乃大踞階。退而私嘆名器之濫也。然其後承平自久。諸帥漸零落。或投閒散。舊部無以存活。多作苦自給者。或傳滬上某與夫。昔日嘗記名總兵。有一縣令乘輿。惡其遲遲也。累促之。且繼以惡聲。與夫怒。擲輿於地。自出懷中翎頂示之。曰。若一芝麻微官。乃敢督責老夫。縣令懼。亟付賃直。逡巡避去。與夫猶申申不已也。或言此曹皆有舊業。入軍以後。遊散既久。一旦退休。不能復安於田里。往往備食都會。薪以自給。如某與夫者。固不可勝數也。章生友人聞其事者。頗以生言爲神矣。同時有某帥者。位亞於某總督。其所部弁役。亦皆提督總兵也。章生嘗遊大梁。遇某弁於逆旅。一見即許爲貴人。其人曰。吾且夕趨走左右。聽人給使。安敢望此。生曰。君骨相清奇。宜以文職進。可至極品。若戀戀於武職。他日欲復爲人給使。不可得也。時某武弁已累功至三品矣。聞生言頗猶豫。一日隨

其帥出行。過某縣。縣令來謁。令本名進士。自庶吉士散館選授者。遂以七品服入見。帥與爲禮甚恭。某武弁大怪之。退而語人曰。吾儕官已三品。高者或至一二品。然吾帥皆頤指而氣使之。何物縣令。七品官耳。吾帥與之抗禮。延致上坐。又啟中門送之。帥何恭於彼而驕於此。有點者笑曰。彼文官耳。吾曹武人安能與比。某武弁大有感曰。吾寧棄三品武職而就七品文職耳。時捐納方盛行。某乃敦託其友爲措辦一文職。友詢以欲得何官。某曰知縣耳。他未敢望。友曰君能措資幾何。某曰吾盡罄吾產。可得以千金。友故善譴。笑曰。君所有資。不足捐一縣正堂。可得一縣右堂耳。縣右堂者俗稱典史之號也。某意右之與正。官階當非甚遠。地位亦或相敵。即漫應之曰。縣右堂固自佳。何必正堂。友曰。君自審之。其勿悔。某曰。吾固自甘之。奚悔之有。天下已定。朝廷方偃武修文。吾儕已無用武之地。況吾曹且夕侍帥左右。名爲武職。實未嘗親軍旅之事。依人作計。其勢弗久。吾奚戀此鷄助爲。友乃叮嚀而去。未幾果選授某縣典史。友寓書曰。

君今可以嘗縣右堂風味矣。某旣蒞任。始知一縣中。正堂之與右堂。相去乃若天淵。乃嘆其友爲諶己也。然己無可奈何。則勉強從事。事皆舉辦。深爲長官所器。積數年遂復入資加捐爲縣令。旋以勞績累擢進官。二十年間官至封疆。時章生尙在。某頗感前言。遣人以厚幣報之。且邀其來。更詢後運。生至良久諦視。無語。但曰。吾有一言奉告。君某歲當有大厄。急流勇退爲佳。某領之而已。及期果卒於官。或曰其仇斃之也。然當時與某共事之諸武弁。多淪於下位。或以貧病困苦其身。人皆避某之識。而益嘆章生之神也。

●何首烏

何首烏良藥也。醫家相傳。以爲久服能黑鬚髮。悅顏色。長筋骨。益精隨。延年不老。識者多忘之。然自宋以來。其說流不絕。或謂藥肆所售。皆尋常粗品。其精者則能變化。形如嬰兒。竟體瓠白。往往月夜潛出。跳擲墟間。遇人輒投松根以沒。或掘地求之。入土愈深。竟不可得。捕之之術。必先以人偵其蹤踪。俟夜

出時。預誌其所從入處。張網以待。幸而得之。亟移置琉璃器中。或精磁皿內。勿觸以手。觸則立斃且槁。與常品等耳。何首烏既神化若此。竟無能得其精者。延年不老之說。直莫由証其妄。而好事者獨津津樂道。若目見者然。聞者亦未能窮其說也。粵之肇慶以產何首烏之。有黎姓者。世以採藥爲業。述其族祖某捕何首烏事。頗奇誕云。何首烏多產深山中。其歷年久能變化者。多在人跡不到之地。某幼業採藥。凡荒山窮僻之處。足跡靡不到。某歲九月中旬。秋月朗澈。山中景物。纖悉畢露。某流連忘返。沿溪西行。遂與其伴相失。方徘徊覓路間。暮聞風聲颯然。四山草木皆震。有一虎當道而立。某反身欲逃。已爲所見。因端坐弗動。屏氣斂息。默誦大悲神咒。虎耿耿往視。目不稍瞬。某斗憶家中人倚門望。得勿刺促不寧。不覺心動罷誦。虎張爪猛撲。某驚而暈。遂已不省人事。比醒乃臥一山崖下。崖畔有廬。左右皆飛瀑。一人跌坐其中。方閉目調息。某靜待久。其人張目曰。汝已來此耶。夜來當有虎厄。幸汝心地良善。法宜得救。吾故略

施小術拯汝。今大厄已過。後福方無量也。某因叩問邦族。其人曰吾與汝父爲中表行。吾蘇某也。吾憶其祖姑家有表叔某。嘗因採藥入山不返。乃曰第幾叔耶。不意乃於荒山中相見。吾旣來此。當從吾叔問道。叔視我尙可造就否。蘇曰。汝誠天生美質。抑非証道之人。旣來亦有夙緣。姑從我執洒掃之事。吾當使汝登大壽。壽可至二百歲。能更潛修弗怠。或可作地仙也。某因留居廬中。旦夕汲水採薪。烹松實爲食。忽忽經月。復值滿月之夜。遙見林間有物。往來跳擲。以語蘇某。蘇言此俗所稱何首烏也。山中如此類者甚多。以功候。尙未成熟。縱得而餌之。效亦僅耳。去此三十里。乃有絕佳者。惟神物所在。必爲鴛鴦之處。毒蛇猛獸之所窟宅。冒昧往求。或遭其害。汝力尙微。未足任此。某曰。世人謂天生神物。必遭妖魔庇護。吾始弗信。以今觀之果然。蘇曰此又誤矣。須知幽僻之鄉。羣魔所宅。凡能生存於其間者。皆有超絕之能力。善於自衛者也。若其能力稍次者。已摧折無復留存者矣。某曰。然則吾當以何時往求。蘇曰子姑耐之。且聽吾進

止。某遂無言。乃旦夕汲水析薪。而所汲水量漸增於前。向之日汲可五百斤者。今則不崇朝而畢。又久之析薪乃不用斧。以手劈之。木即條裂。某自覺有異。而蘇殊漠然。第日教以運氣之術。又數月。某行山澗中。失足偶墜澗底。倉卒間聳身作勢。乃在澗上。益自喜。以爲吾術進矣。在苒經年。頗以所事爲厭。一夕月明偶出。遇何首烏山中。自念得此亦佳。何必遠索。遽前提之。物雖奔馳絕迅。卒入掌握。呦呦有聲。某喜歸以告蘇。蘇歎曰。鹵莽若此。孺子竟不可教。出何首烏視之。稿矣。蘇舉而擲諸地曰。此復何用。只合與狗肉同烹耳。某大悞喪。其明日蘇遣某。曰久留無益。宜且歸。某堅請留。蘇弗聽。某亦若有感遂行。蘇出山中地圖一紙。示以經行路線。某從旁窺視。圖中所載某山產某靈藥。若丹砂。若朱草。若何首烏。一一皆誌以筆。因默識其方向道里。遂歸。家中人以某久不返。疑已膏虎吻。見之皆大驚喜。諸相識者咸來探視。爭問山中事。某悉爲具言。皆歎爲得未曾有。蘇之家人聞蘇尙在。欲入山求之。頻從某詢山中途徑。欲

挽爲導。某以初歸弗之許也。居數月。某間與同業談山中所產靈藥。又時向人自眩所長、向業多諛之者。謂君負才若此。入山求樂。唾手可致。得而服之。既可長生。更以其餘市之。可大富也。某頗爲所動。欲遂入山一行。猶憶蘇言。未敢冒昧。逢村中秋社。狂飲至醉。夜歸過一山橋。有物蟠於橋上。雙目炯然。蛇也。蛇見某來，猝起繞之。某運氣作勢。迸力突躍。跔斷爲四。明日鄉人咸集。審爲某昨夜事。皆相詫以爲神。某亦不自意其至此。陰念吾力果超絕。入山當無患也。山中路線某旣素習。因自作一圖。具誌諸藥產地。而於何首烏獨詳。計畫旣定。不告於家。脫身獨入山。山行多遇虎。虎輒避去。或偶不及避。拳毆之。虎輒仆弗能動。凡十餘日所歷雖皆險阻。如履平地。某益大喜。謂可惟吾所欲矣。越三日。距何首烏產地僅數十武。遙見高峯插天。林箐茂密。中僅一澗可通。過此卽爲山原。澗水絕迅。其中有物。彷彿若狗。往來游泳。某意頗輕之。拾巖石作彈。偶中其一。物大噪。聲乃甚厲。過於虎豹。已而向某噴水。水勢猛於暴雨。

○某雖強忍自支。已狼狽不可名狀。歎曰。不意微物乃能困人。奔匿樹間半日。水勢稍止。某不敢復涉澗。繞越從林間出。方欲登山。忽覺舉體若痿。倚石稍憩。頃之遍身骨節寸寸作奇痛。已而漸麻木。已而昏不知人。昏瞶中若覺有人啓己齒。以水灌之。味苦不能下咽。三嘔三嚔乃罷。始醒。顧見蘇某方手一壺。壺水猶滴漉未乾也。自疑曰。豈其夢耶。蘇曰。幸哉。猶可苟活。孺子不聽吾言。負却一年功力矣。某曰。是何麼。乃可畏若此。蘇曰。是名石狗。體雖微。力絕猛。善噴水。水珠偶觸人身。百脉凝滯。立仆且斃。汝幸從吾習練。歷時一載有餘。尙能強支十二時。然前此功力。悉悉虛擲矣。吾今日習靜時。眼中忽幻一境。審汝過厄。以藥相醫。今雖幸活。已虧汝質。一年調攝。乃得復元。二年習練。乃可復如向日。惜哉惜哉。山中多怪。汝向者雖未大成。汝力猶足自葆。故能行無遊行無阻。今已矣。吾當護汝出山。此間不可久留也。某曰。然則吾平日所希望者。今終不可致矣。蘇曰。汝幸得生。猶欲作他念耶。汝所遇物。其作崇特小小者。

耳。若更深入。且有十倍於此者。凡事烏可易視。吾居山中數十年。羣魔時相侵擾。吾皆忍不與較。汝有何能。乃冒昧若此。吾既不能旦夕護汝。爲汝計唯速歸耳。某聞言。搏頰自投者再。蘇曰。世事殆有定分。汝所受於天者止此。吾雖欲相助。終無益耳。事已至此。悔亦無益。人果飽食煖衣。身閒意適。市井中即仙境也。遂導某出山。

●振武營

明成祖既遷都北平。以金陵爲南京。南京皆置重兵守備。號爲京營。其後承平日久。北京京營浸老朽不堪用。列尺籍者。買替紛紛。注名領糧。朝甲暮乙。莫可稽考。總兵者皆世胄紈袴。平時古役營軍。以空名支糧。臨操則肆集市人。呼舞博笑。末年益紛紜玩愒。李自成兵入居庸。京軍禦諸沙河。聞礮四潰。督兵者不能禁。京師遂陷。其南京京營尤多耗亡。嘗遣御史點閱名數。掌兵者不便所爲。詭辭入告。朝廷至以爲御史罪。畢點閱之舉。嘉靖中以言者數其弊。乃設振武營

。簡諸營銳卒充之。益以淮揚驍捷者凡三千人。別設教場訓練。領以勳臣。勳臣貴倨不曉事。營卒多徇越軍紀。地方無賴子。竄名伍中。凌踐人民。莫敢與校。勢張甚。有趙甲者。其徒之豪也。精拳術。自謂藝宗達摩。能以隻手搏數十人。衆莫能近。嘗飲酒樓。與人爭席。拳毆其人立斃。隊役聚捕之。跳而免。逃金山寺。爲寺僧執爨寺僧某長老號善知識。視甲容貌。曰子非凡才也。抑骨幹詰聲。慮不免強死。過四十乃當大貴。幸善自葆重。甲謝之。居一月。成國公遊金山。見甲奇之。言於長老。乞以甲歸己。長老以問甲甲已漸厭山寺生活。聞言大喜。請往。長老歎曰。定數不可逃也。成國公遂以甲自隨。國公旋奉命領振武營。即剖授甲爲把總。甲益豪縱。營中諸無賴子爭附之。或縱習拳術。奉以爲師。甲每出入。左右擁十餘人。橫行井里。子女珠玉意有所嗜。輒攫以去。諸被害者既畏其力。復震於國公權勢。莫敢抗。訴諸府官。亦弗克直也。國公素貴倨。營中號令。多出於甲。甲私占空名。冒領月糧。輒數百金。國公弗問。甲居營一載。

服御飲食之奉。擬於富翁。諸爪牙爭效其所爲。浮冒月餉。且逾兵額之半。或揭諸朝。國公必爲隱庇。有直指其罪惡者。輒橫遭禍。時督儲侍郎黃懋官素癭訐。尤精於綜核。以振武營卒多浮冒。欲抑削之。國公爲請弗聽。衆人謀餌以賄。官尤關防甚嚴。賄莫由進。試遣人探之。懋官侃侃言。當執法以繩。衆人皆恐。乃爲匿名書致懋官恫嚇之。懋官弗爲動。索營卒冊甚急。將按名點驗。衆人與趙甲謀。趙甲攘臂大言。彼旣相煎太急。吾人何惜一拚。吾儕平日所犯。皆死罪也。事發不免一死。君等拚着一死。有何可畏。吾雖陋劣。視彼區區。猶匹雛也。來日果點閱。第以十餘人繞軍大噪。文人胆小如鼠。有脫身而逃耳。安敢竟吾事。衆皆曰善。越日懋官果臨營。校視甚嚴。甲與其徒從隊大噪。謂侍郎索賄有不滿所欲。乃欲剋減吾曹餉給。吾曹出死力爲國家保衛疆土。公等安坐而食。願舞文弄法以陷吾曹耶。營卒素放蕩。浮矜易動。呼噪和之。懋官怒。大聲叱曰。若曹叫囂如此。知有王法否。趙甲亦偕其徒噪曰。侍郎欲剋減軍餉。因以自肥。亦知有

王法否。懋官大怒叱曰。孰爲此言者。甲挺身前曰。身是也。懋官呼從人捕之。甲一舉手。衆皆仆地。遂前擒懋官抵諸地。懋官體故羸。一頓挫間。奄無生氣矣。是日成國公方偕姬妾。爲別墅之游。懋官始至。營中即以人往報。國公弗省。曰侍郎自檢餉耳。干我甚事。營中有主餉者。何必瀆我。及懋官被毆遂死。闔城文武咸集。待國公決事。國公聞之。方飲茗。墜碗於地。瞠目不能出一語。頃之乃由家將簇擁至營。衆官見公來。聚詢作何處分。國公色漸定。曰吾方寸已亂。諸公好爲之。但求聖上無見罪。於願足矣。諸人聚謀。以戕官巨變。倘據實上聞。不惟國公得罪。闔城文武且俱蒙咎。今懋官已死。不妨出入其辭。營卒未變者。宜善爲拊循。且待朝命。謀定以告國公。國公稱善者再。乃爲奏。言營卒以軍餉見削。衆情憤激。環跪督儲侍郎。陳訴苦況。督儲左右疑有他。遽與營卒鬪。鬪督儲仆地致死。奏上得旨。督儲抑削軍餉。措置失宜。營卒鬥鬪傷官。罪當死。宜誅首惡者。旨既下。諸營卒嘗被嫌疑者皆已囚繫。而首惡卒不可得。其未變者

則囂囂然。日作謾語。以脅問官。問官憚之莫敢逼詰。而朝旨峻迫。國公憂惶不知所出。即語諸變兵。吾平日何負於汝曹。乃以此報我。今首事者何人。汝等宜知之。盡告我。勿重吾罪。衆人相顧不答。時趙甲與徒三人。已脫身南走。一日宿逆旅中。忽聞鄰人談振武營事。一人曰。成國公以首惡不可得。憂惶致疾矣。一人曰。國公亦太可憐。公於部卒。恩惠甚至。結果乃如此。一人曰。使我爲此次首事之人。吾必挺身自任。大丈夫作事。光明俊偉。寧當潛匿若鼠。貽累他人。甲聞言大感動。即夕返。天明投案自首。國公大喜曰。趙甲固不負我。乃以甲抵罪。他變兵論罪各有差。獄乃結。

●炎荒軼事

南洋羣島。大小萬餘。面積數百萬方里。廣衍饒沃。百貨蕃殖。當歐人之未東來也。吾國實嘗殖民於此。而閩南人所經營之事業。尤足焜耀史乘。如明季之李馬奔。其尤著者也。馬奔泉州農家子。幼有大志。不屑屑事家人生產。泉州地濱海

○野老喜談海外異聞軼事。自明成祖遣三寶太監屢下西洋。鄉人每盛道其事跡。或點染之。爲平話。茶餘酒後。競相傳誦。村間學究。往往於夏日夕陽初下。盤膝箕踞。就大樹旁。集諸兒講演。津津不容口。諸兒泛聽而已。馬已獨若有會。旣長乃棄其世業。從人行賈爪哇諸島。數年間致富累億。乃自置巨舶。集里中少年百餘人。歃血爲盟。相約入海求新地。以紹三寶之業。遂航海南行。過爪哇蘇門答臘皆稍留即去。最後至菲律賓。菲律賓土人見巨舶。以爲天宮自海上來也。爭出迓馬奔及其徒黨。馬奔登岸。土人膜拜甚虔。各出珠寶爲壽。且迎諸人入居堡中。供奉盡禮。久之察諸人無他異。意頗輕之。而馬奔之徒亦不自檢束。時爲暴於居民。居民始有異志。乃陰與他堡約。集千餘人。謀夜攻馬奔居宅。馬奔覺之。部署其曹。潛爲之備。及土人四集。見宅門已啓。寂無人語。其黠者曰妖人遁矣。吾人宜分途往索。衆譁然和之。乃分其衆爲六隊。隊約二百人。各以頭目統之。馬奔已先與其曹伏於隘道。相約並力擒其渠。用以爲質。則衆人可不戰服也。

土人既分途各出。其渠率第一隊燃炬由大道行。路過一橋。馬奔與其徒三十人自閘中突起擒之。餘人出不意皆駭愕。馬奔呼曰勿動。當釋汝會。會亦大呼願降。衆聞言皆投矛羅拜。因遣人馳告餘五隊。而五隊中已有三隊長爲俘虜。皆自閘中要取者也。諸隊聞其渠已被擒且降。皆散去。馬奔乃與其渠立誓。劃堡中曠地若干畝。爲中國人聚落。各以所有互市。勿相侵犯。惟鄰近諸堡。嘗與於此次戰役者。應聽李馬奔號令。每歲各以所得什一爲貢。渠一一如約。自是馬奔遂偕其徒。設市廛於馬尼刺。益造巨舶。通往來。數歲間閩南人渡海往菲律賓賓者。且千人。馬奔悉選其豪。與之從事。設立規條。誓於衆人而共守之。駸駸焉有建國規模矣。馬奔偕其徒黨。時時歸泉州。歸輒大饗鄉里親故。有匱乏者輒出私財周濟之。衆皆感其惠。相與尊之。呼曰海王。而州中耆紳聞之。則皆駭。以爲平民而竊王號。是叛也。其無賴者則更謀於馬奔歸時脅索巨賄。馬奔弗知也。某年冬。馬奔偕徒屬三人歸鄉里度歲。諸無賴者夜圍其宅。勢洶洶。言馬奔偕王號。有叛逆

徵。當縛送諸官。馬奔踰垣夜遁。其同來一人被擒。無賴者索賄不可得。則致諸官。言海盜李某自稱大王。遣同黨鈎煽土人。謀以新歲元旦起事。城守某副將聞之。欲申報督府。調兵防剿。知府某君持不可。謂此間鄉民多通海者。志在估易耳。決無他虞。倘因傳聞發兵。轉恐激成事變。乃提兩造研訊。盡得其情。以通海犯禁例。下馬奔黨於獄。馬奔以重金賄紳嘗。使向官府具保。其人乃釋。然馬奔自是不敢復歸。官府間則籍籍相傳。謂馬奔爲海上巨盜矣。而非律賓互市事業日益發達。華人至者亦日益多。事聞於島中大酋。酋聞同族曾向馬奔納款。且歲出貢賦。大怒。集諸首領議討伐。諸首領皆言妖人勢盛。不易制服。宜四道出兵。斷其往來之路以困之。然後一舉進攻。乃可克也。大酋謂如此則曠日持久。將有他變。不如以全力一鼓盪平。彼寡我衆。奚患不濟。將軍某聞大酋言。即起立。謂大酋言當。臣部下有謀士某。擅異術。能驅使猿猴虎豹之屬。妖人縱善變化。必非此士敵手。大酋喜曰。此人安在。能來一見否。將軍曰諾。即起出。頃之

偕一人入。身長八尺。黑面而怒睛。鬚如蝟毛。牙齒皆暴露。大會見之大悅曰。此一人足以敵萬人矣。因呼爲萬人敵。大會悉集國內之師。使將軍師之。以萬人敵爲副。凡六千人。尅日進攻。馬奔聞之。即以人往探消息。次日探者來告。謂敵軍雖多。然不足畏。將軍某庸材耳。惟副將萬人敵者。故山中野人。素以弄猴爲事。隨行有大猴二百餘。自成部伍。又有虎七。皆盛以鐵籠。聞可驅以戰也。馬奔聞言頗憂慮。問於衆人計將安出。有漳州人李甲者。世以獵虎爲業。至甲乃棄去行賈。因言虎性畏彩色。尤畏光之旋轉。請擇有力者若干人。各執五色紙傘。盡力旋之。則虎不敢逼。更多備筒鐵。實以火藥。同時燃之。使有聲如暴雷。則虎必反走。敵勢自亂。猿猴野性未馴。尤易警也。馬奔如言。乃選有力者五十人。嚴裝以待。即由李甲督率之。部署既定。而將軍及萬人敵已至。將軍召土人詢馬奔行事。土人皆咋舌。言此人殊不可侮。曩始來時衆不過百人。吾曾以千餘人攻之。竟莫能得其踪跡。曾分兵追之。途中突爲所擒。亦莫審其兵所自來。

今聞其衆已千餘人。將軍所率者不過六千。攻守之勢旣殊。強弱之形互異。殆難克也。將軍聞言頗恐。召萬人敵謀之。萬人敵言將軍勿慮。妖人見吾來。必不敢出戰。吾姑休兵一日。俟來日夜間。盡驅猿猴入彼堡中。繼以七虎。彼人必不能守。將軍但於堡外分兵要截。可盡俘之也。將軍大喜。命諸軍暫休。次日晨。忽聞礮聲四震。馬奔偕其衆鼓噪而至。將軍恐甚。召萬人敵出戰。萬人敵不可。謂吾計宜於夜間行之。而馬奔軍益逼。將軍強萬人敵往應之。萬人敵不得已。驅七虎前行。猿猴繼進。陣甫啓。敵軍忽退。萬人敵揮長矛追之。七虎皆張牙爪騰躍而前。馬奔之師潰走。幾不成軍。萬人敵望見大笑。頃之。虎忽不進。但見五色紛披。如綵霞散綺。萬人敵方駭惑。而大聲暴發。天地震動。諸虎皆咆哮反走。萬人敵叱之不能止。猿猴亦驚潰。將軍不知所措。與六千人者曳矛而走。萬人敵納虎柙中。往追將軍。中途忽蹶。欲起則左右足爲繩所繫。左右臂亦爲人所執持。掙扎久之。竟不得脫。乃就擒。將軍聞萬人敵爲虜。遂降於馬奔。六千人亦解甲。

納降。馬奔欸將軍有加禮。自陳寄居此間。不敢有侵掠之想。第求彼此相安。各享通商之利而已。望以此意上達大會。乞見諒也。乃遣萬人敵偕將軍歸。將軍全師返旆。萬人敵舁七虎以行。惟猿猴二百餘。潰者且半。已不知所往矣。大會聞將軍無功。怒甚。將軍入見。且陳馬奔之意，語甚委婉。且言馬奔甚敬大會。會於臣前遙向大會跪拜。大會聞言喜甚。曰信乎。將軍曰。臣何敢於大會前作妄語。六千人皆親見之也。大會笑曰。是人尙恭順。吾當赦其罪矣。萬人敵聞之憤甚。陰念大會與將軍乃好爲虛辭以自誑也。馬奔旣破大酉師。菲律賓諸島族爭送欸與往來。馬奔仍以寓公自處。時遣人通好於大會及諸首領。島人樂其有禮。益歸心悅服。大酉則深自喜。謂彼人尊我。貢獻無缺也。馬奔勞旣日盛。謀爲長久之計。而殖民事業。乃不幸中挫。先是葡萄牙人麥志倫奉西班牙王查理五世之命。率船四艘週游世界。嘗至此島而去。其後西班牙人東來。與中國互市。且欲據有此島。以開拓東亞事業。乃遣軍隊六百人。自島之東方登岸。島人與戰不敵。其

大西傾全國之師。使萬人敵將之。復戰大敗。萬人敵死焉。其首都遂破。島人以西兵所過多殺。益懷馬奔之仁。其大會率遺黎往依馬奔。馬奔撫而用之。益得其力。西人既據此島。乃以西班牙國王斐律布二世之名。名爲菲律賓島。惡馬奔勢力之盛。欲去之。馬奔亦自知危殆。嘗語其曹曰。西人越萬里之遙。以覓此島。又以全力經營之。所以自張國權者。可謂靡所以不至。吾國地勢遙接。吾政府於此曾不過問。吾人千辛萬苦。斬刈荆棘。僅能自立。政府反以爲罪。今以事勢卜之。吾人殆無全理。雖然吾必竭吾心力。至無可爲而後已。使異邦人知吾國有好事男子也。未幾。西人果遣使來告馬奔。責以速速獻島會。否且以兵來索。衆人皆勸馬奔許之。馬奔不可。曰。會以窮歸我。我不能庇。而又獻之。危人以自安。殺人以自存。仁者不爲也。且西人與我不相容。我即委曲求全。終有決裂之日。吾力旣薄。能與土人相結。猶可暫謀旦夕之安。若更助西人以仇土人。是墮黨而崇仇。自斃之術也。謝來使而遣之。一月後。西人果以來攻。馬奔集土客之衆。凡

三千人。出戰。西師敗。次日復戰。西師以火器當前。巨礮齊發。馬奔前徒死者百餘人。乃收兵固守。西師圍之三日。馬奔召衆人謀之。僉謂平原恐難制勝。宜退入谷中。敵軍遠來。弗審地形。可以計勝也。乃夜爲區處。遲明所部衆悉移入谷。谷口留殘兵百餘人。以餌西師。西師不意馬奔猝退。次日乃覺之。悉兵來追。遂入谷。谷中迫狹。旣不利火器。又崎嶇歧錯。難於行軍。西師旣入。行半日。未知敵之所在。主將慮有失。亟命旋師。而士卒行山路間。參差不能成列。伏兵猝起。皆以長矛攢刺。西師三百人。逃者四十餘耳。其隊長某甚勇。衆矛攢刺不能傷。趨起越嶺而遁。馬奔左右黃乙者。同安拳師也。斜飛出其前。徒手與搏。歷兩時乃得之。因遣人與西師統帥約。送隊長歸。各罷兵。統帥不可。益集其軍。凡五千人。環山而攻之。馬奔累戰皆捷。而精銳不能無損失。敵來益衆。要害漸爲所據。相持十月。勢益蹙。土人助馬奔者散亡略盡。惟蓋人數百相隨耳。而矢石已盡。且乏食。馬奔慨然曰。吾去國遠航。寄身異域。本欲爲國家揚聲威於

海外耳。政府苟能以精兵萬人爲助。吾當悉有此島。且進而經營婆羅蘇門答臘諸島。以爲國家外藩。豈非至快之事。區區此志不能自達。猥相指爲海盜。欲加囚殺。寧不可痛。今事勢如此。已無可爲。狐死首邱。吾當歸骨故國。無恤其他。諸君能相從甚善。否則各自爲謀耳。衆人中已有家室者皆不願歸。其相從者百餘人而已。馬奔遂散其徒衆。自間道出海。去三日。西人始覺。遣兵追之。而馬奔已附荷蘭商船內渡。餘人願歸者。亦各以他術自返。馬奔旣歸。易名改服。鄉人多不之識。而徒黨猶時往來。久之漸有人擬議其踪跡者。馬奔意不自安。一日有遊僧到門。願見馬奔。馬奔辭弗見。僧久留不去。馬奔不得已出見之。則漳人某甲也。甲摩其頂曰。十年海王。一夢耳。世事不過爾爾。寧足繫戀。盍去休。馬奔聞言。不辭家人。即偕僧去。後三年。有人見之普陀山中。已削髮爲苾芻矣。精悍之氣猶見於眉宇間也。

炎荒軼事

三〇六

短篇小說終

版權所有
禁止翻印
特載

全一冊定價大洋五角

著者

野

史

出版者

天津大公報館

法租界三十號路

發行者

天津大公報館

中華民國二十二年九月再版

Handwritten scribbles, possibly initials or a signature.

1-7

Handwritten scribbles, possibly a date or a number.

(2)